

O LE EKALEZIA A IESU KERISO O LE AU PAIA O ASO E GATA AI • ME 2015

O Le Liahona

Saunoaga o le Konafesi Aoao

Ua Valaauina Fitugafulu Fou,
Au Peresitene Aoao o Alii
Talavou, ma Fesoasoani i le Au
Peresitene Aoao o le Peraimeri

E Tolu Malumalu Fou
ua Fofogaina Mai



© GREG OLSEN, E LE MAFAI ONA KOPINA

Auala i Emau, saunia e Greg Olsen

“Faauta foi, ua o le toalua o i latou [soo] i lea aso i le aai, o Emau le igoa. . . .

“Ua la fetautalatalaai, ma fesueai, ona faalatalata mai ai lea o Iesu, ua o faatasi ma i laua. . .

“Ua taoto ia e taumafa faatasi ma i laua, ona tago ai lea i le areto, ua faafetai, ua tofitofi, ma avatu ia te i laua.

“Ona pupula ai lea o laua mata, ua la iloa o ia; a ua mou o ia mai ia i laua.

*“Ona la fetautalatala’i lea, E lei mu ea o ta loto i totonu ia i taua, ina ua fetalai o ia ia te i taua i le ala,
ina ua faamatala mai foi e ia o Tusi ia te i taua?” (Luka 24:13, 15, 30–32).*

Sauniga Aoao a Tamaitai

- 8 **Faatumu o Tatou Aiga i le Malamalama ma le Upumoni**
Cheryl A. Esplin
- 11 **O Le Aiga e Ou Le Atua**
Carole M. Stephens
- 14 **O Tagata e Puipuia le Fofalofaga o le Aiga**
Bonnie L. Oscarson
- 17 **O Lē Fesoasoani**
Peresitene Henry B. Eyring

Sauniga i le Taeao o le Aso Toonai

- 22 **“E Le o Lenei Ea le Anapogi Ou Te Loto I Ai?”**
Peresitene Henry B. Eyring
- 26 **O Le Fuafuaga o le Fiafia**
Peresitene Boyd K. Packer
- 29 **O Le A Tatou O Ae Faatasi i Luga**
Linda K. Burton
- 32 **O Le Faataoto o le Lūlū Saito**
Elder Dallin H. Oaks
- 36 **Filifili e Talitonu**
Elder L. Whitney Clayton
- 39 **Aisea e Taua ai le Faaipoipoga ma le Aiga—I Soo se Mea i le Lalolagi**
Elder L. Tom Perry

Sauniga i le Afiāfi o le Aso Toonai

- 43 **O Le Lagolagoina o Taitai o le Ekalesia**
Peresitene Dieter F. Uchtdorf
- 45 **Lipoti a le Matagaluega Suetusi a le Ekalesia, 2014**
Kevin R. Jorgensen
- 45 **Lipoti Faafuainumera, 2014**
Brook P. Hales
- 46 **O Lea Na Latou Faafilemu Ai Lo Latou Matata'u**
Elder David A. Bednar
- 50 **Aisea e Faaipoipo Ai, Aisea e Fai ai se Aiga**
Elder D. Todd Christofferson
- 54 **O Le Musika o le Talalelei**
Elder Wilford W. Andersen
- 56 **Le Au Paia o Aso e Gata Ai, Taumafai Pea**
Elder Dale G. Renlund

59 Lelei Moni Lava ma Aunoa ma le Faa'ole'ole

Elder Michael T. Ringwood

62 O Le Alii o Lo'u Malamalama Ia

Elder Quentin L. Cook

Sauniga Aoao a le Au Perisitua

- 67 **O Le Tupulaga Silisili o Talavou Matutua**
Elder M. Russell Ballard
- 70 **Ioe, Tatou Te Mafaia ma O Le A Tatou Manumalo!**
Elder Ulysses Soares
- 77 **Tulaga Faaletama—O Lo Tatou Taunuuga e Faavavau**
Larry M. Gibson
- 80 **E Faatatau i le Faamaoni**
Peresitene Dieter F. Uchtdorf
- 84 **Perisitua ma le Tatalo Patino**
Peresitene Henry B. Eyring
- 88 **O Le Perisitua—o se Meaalofa Paia**
Peresitene Thomas S. Monson

Sauniga i le Taeao o le Aso Sa

- 91 **Faamanuiaga o le Malumalu**
Peresitene Thomas S. Monson
- 93 **Toe Fo'i i le Faatuatua**
Rosemary M. Wixom
- 96 **Saili Atu i le Alii**
Elder José A. Teixeira
- 98 **Pe O Ofoofogia Pea Ea ia te Oe?**
Bishop Gérald Caussé
- 101 **Faatalitali mo le Atalii Faamaumau Oa**
Elder Brent H. Nielson
- 104 **Pe a Faatasia le Faamasino Tonu, Alofa ma le Alofa Mutimutivale**
Elder Jeffrey R. Holland
- 107 **O Le Meaalofa o le Alofatunoa**
Peresitene Dieter F. Uchtdorf

Sauniga i le Afiāfi o le Aso Sa

- 111 **Faasaoina o le Faitalia, Puipuia o le Saolotoga o Tapuaiga**
Elder Robert D. Hales
- 114 **Tumau i le Laau**
Elder Kevin W. Pearson
- 117 **O Le Vaaiga e Faavavau i le Talalelei**
Elder Rafael E. Pino
- 119 **Ia Oo Mai Lou Malo**
Elder Neil L. Andersen
- 123 **Afai O Le A E Tali Atu**
Elder Jorge F. Zeballos
- 126 **Ia Fanafanau, Uluuluola, ma Faato'a le Lalolagi**
Elder Joseph W. Sitati
- 129 **O Le Sapati o Se Aso Fiafia**
Elder Russell M. Nelson
- 72 **O Au Pulega Aoao ma Taitai Aoao o Le Ekalesia a Iesu Keriso o le Au Paia o Aso e Gata Ai**
- 133 **Faasino Upu o Tala o le Konafesi**
- 134 **Sa Latou Saunua mai ia i Matou: O Le Avea o le Konafesi ma Vaega o o Tatou Olaga**
- 136 **Tala Fou o le Ekalesia**



Konafesi Aoao Faaletausaga Lona 185

Afiāfi o le Aso Toonai, 28 Mati, 2015, Sauniga Aoao a Tamaitai

Pulefaamalumalu: Peresitene Thomas S.

Monson. Taitai: Linda K. Burton.

Tatalo Amata: Beverly Tingey.

Tatalo Faaiu: Reyna I. Aburto.

O musika na saunia e se aufaipese tuufaa-tasi o le Peraimeri, Tamaitai Talavou, ma le Aualofa mai siteki i Sate Leki, Murray, Kamas, ma Park City, Iuta; Erin Pike Tall, taitai; Linda Margetts, ta okeni: “Le Faavae Malosi,” *Viiga*, nu. 45; polokalama faamusika, “The Family Is of God,” Neeley, arr. Zabriskie, e lei lolomiina; “From Home of Saints Glad Arise,” *Hymns*, no. 297, arr. Wilberg, e lei lolomiina; Suifefiloi: “A I Ai i le Aiga,” *Viiga*, nu. 181; “Fai Upu Alofa i le Tasi,” *Viiga*, nu. 147; “Our Savior’s Love,” *Hymns*, no. 113, arr. Tall/Margetts, e lei lolomiina.

Taeao o le Aso Toonai, 4 Aperila, 2015, Sauniga Aoao

Pulefaamalumalu: Peresitene Thomas S.

Monson. Taitai: Peresitene Dieter F. Uchtdorf.

Tatalo Amata: Elder Timothy J. Dyches.

Tatalo Faaiu: Elder Larry J. Echo Hawk.

O musika na saunia e le Aufaipese a le Tape-neko; Mack Wilberg ma Ryan Murphy, o taitai; Andrew Unsworth ma Clay Christiansen, o ta okeni: “Ieova e, ia Tautai Pea i Matou,” *Viiga*, nu. 47; “Mamalu i le Atua,” *Viiga*, nu. 40; “Ua ou Faia ea Se Lelei?” *Viiga*, nu. 136, arr. Zabriskie © HolySheetMusic.com; “I Luga o Mauga,” *Viiga*, nu. 4; “O Mai ia Iesu,” *Viiga*, nu. 65, arr. Murphy, e lei lolomiina; “Ou te Talitonu ia Iesu,” *Viiga*, nu. 71, arr. Wilberg, lolomiina e Jackman.

Afiāfi o le Aso Toonai, 4 Aperila, 2015, Sauniga Aoao

Pulefaamalumalu: Peresitene Thomas S.

Monson. Taitai: Peresitene Henry B. Eyring.

Tatalo Amata: Jean A. Stevens.

Tatalo Faaiu: Elder Randy D. Funk.

O musika na saunia e se aufaipese tuufaa-tasi mai siteki a talavou nofofua matutua mai i Itumalo o Davies ma Weber, Iuta; Sonja Sperling, taitai; Bonnie Goodliffe ma Linda Margetts, taokeni: “Praise to the Lord, the Almighty,” *Hymns*, no. 72, arr. Wilberg, lolomiina e Oxford; “Ou Te Tu ma Ofo,” *Viiga*, nu. 107, arr. Murphy, e lei lolomiina; “Ia Viia Oe, le Atua,” *Viiga*, nu. 10; “Faamalosi ia i le Galuega Nei,” *Viiga*, nu. 152, arr. Eliota, lolomiina e Jackman.

Afiāfi o le Aso Toonai, 4 Aperila, 2015, Sauniga a le Au Perisitua

Pulefaamalumalu: Peresitene Thomas S.

Monson. Taitai: Peresitene Dieter F. Uchtdorf.

Tatalo Amata: David L. Beck.

Tatalo Faaiu: Elder Robert C. Gay.

O musika na saunia e se aufaipese a le au perisitua mai le Iunivesite o Polika Iaga; Ronald Staheli, taitai; Richard Elliott ma Andrew Unsworth, ta okeni: “Mo le Malosi o Mauga,” *Viiga*, nu. 19, arr. Tom Durham, lolomiina e Jackman; “On This Day of Joy and Gladness,” *Viiga*, no. 64, arr. Staheli, e lei lolomiina; “Faalogo Nu Uma!” *Viiga*, nu. 165; “Matai e, Ua Sou le Vasa,” *Viiga*, nu. 58, arr. Staheli, e lei lolomiina.

Taeao o le Aso Sa, 5 Aperila, 2015, Sauniga Aoao

Pulefaamalumalu: Peresitene Thomas S.

Monson. Taitai: Peresitene Henry B. Eyring.

Tatalo Amata: Linda S. Reeves.

Tatalo Faaiu: Elder Kevin S. Hamilton.

O musika na saunia e le Aufaipese a le Tape-neko; Mack Wilberg, taitai; Clay Christiansen ma Richard Elliott, ta okeni: “Fiafia, o le Ali’i o le Tupu!” *Viiga*, nu. 38; “He is Risen!” *Hymns*, no. 199, arr. Wilberg, e lei lolomiina; “Consider the Lilies,” Hoffman, arr. Lyon, lolomiina e Jackman; “Ua ou Iloa Lo’u Faaola,” *Viiga*, nu. 73; “Ua Toetu Iesu,” *Tusipese a Tamaiti*, 44, arr. Murphy, e lei lolomiina; “Ua Toetu Mai le Alii,” *Viiga*, nu. 112, arr. Wilberg, e lei lolomiina.

Afiāfi o le Aso Sa, 5 Aperila, 2015, Sauniga Aoao

Pulefaamalumalu: Peresitene Thomas S.

Monson. Taitai: Peresitene Dieter F. Uchtdorf.

Tatalo Amata: Elder S. Gifford Nielsen.

Tatalo Faaiu: Elder Koichi Aoyagi.

O musika na saunia e le Aufaipese a le Tapeneko; Mack Wilberg ma Ryan Murphy, taitai; Bonnie Goodliffe ma Linda Margetts, taokeni: “O Loo Soifua Lou Faaola,” *Viiga*, nu. 72, arr. Wilberg, e lei lolomiina; “Na Ia Auina Mai Lona Alo,” *Tusipese a Tamaiti*, 20, arr. Hofheins, e lei lolomiina; “Le Tupu o tupu, Afio Mai,” *Viiga*, 25 nu.; “Ta’u Mai Tala ia Iesu,” *Tusipese a Tamaiti*, 36, arr. Murphy, e lei lolomiina; “Faaola e ia ‘Ou Alofa” *Viiga*, nu. 150, arr. Murphy, e lei lolomiina.

E Maua Saunoaga o le Konafesi

Ina ia maua saunoaga o konafesi aoao i luga o le Initoneti i le tele o gagana, asiasi i le

conference.lds.org ma filifili se gagana. O loo maua foi lauga i luga o le Gospel Library polokalama feaveai. E masani lava i totonu o le ono vaiaso talu ona maea le konafesi aoao, e maua foi lipine faalogologo ma vitio faa-Peretania i faletusi autu. O loo maua faa-matalaga e uiga i le konafesi aoao i mamanu e mafai ona faaogaina e tagata o le ekalesia e i ai manaoga faapitoa i le disability.lds.org.

Savali a Faiaoga o Aiga ma Faiaoga Asiasi

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetau lelei ma tulaga o loo manaomia e i latou tou te asia.


I Le Faavaa

Luma: Ata na pueina e Cody Bell.

Tua: Ata na pueina e Leslie Nilsson.

Puega o Ata o le Konafesi

O ata i le Aai o Sate Leki na pueina e Welden C. Andersen, Cody Bell, Janae Bingham, Ale Borges, Randy Collier, Weston Colton, Mark Davis, Craig Dimond, Nathaniel Ray Edwards, Brandon Flint, Ashlee Larsen, August Miller, Leslie Nilsson, Brad Slade ma Christina Smith; ata o mataolela faaaloaloga a le aiga o Quentin L. Cook; i vaalele, saunia e Craig Marshall Jacobsen; i Woodbury, Minesota, ISA, saunia e Sandra Wahlquist; i McMinnville, Oregon, ISA, saunia e Jade West; i Abidjan, Ivory Coast, saunia e Lucien ma Agathe Affoue ma Philippe ma Annelies Assard; i Perpignan, Farani, saunia e Renee Castagno; i Helsinki, Finelani, saunia e Kukka Fristrom; i Johannesburg, Aferika i Saute, faaaloaloga a le aiga o Christoffel Golden; i le Aai o Vatican saunia e Humanum; i Bangkok, Tailandi, saunia e Sathit Kaivaivatana; i Mumbai, Initia, saunia e Wendy Keeler; i Montreal, Quebec, Kanata, saunia e Laurent Lucuix; i Ciudad del Carmen, Campeche, Mekisiko, saunia e Hector Manuel Hernandez Martinez; i San Martín de Los Andes, Neuquén, Atenitina, saunia e Colton Mondragon; Hong Kong, ata o le tauvaga Faafaafanua Faalemalo, na pueina e Brian Yan; i Natal, Rio Grande do Norte, Pasila, saunia e Clebher Tex; ma i Lonetona, Egelani, saunia e Kami Weddick. Page 77: Ata na saunia e Brian Call.



MĒ 2015 VOL. 39 NU. 5
O LE LIAHONA 12565 890

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Mervyn B. Arnold, Christoffel Golden, Larry R. Lawrence, James B. Martino, Joseph W. Sitati

Pule Faatonusili: David T. Warner

Faatonusili o le Lagolago mo Aiga ma Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Lisa Carolina López

Au Tisitusi ma Faatonutonu: Brittany Beattie, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Mindy Anne Leavitt, Michael R. Morris, Sally Johnson Odekirik, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinkley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga: Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Julie Burdett, Katie Duncan, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Peseaga. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i

le liahona.lds.org; pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O *Le Liahona* (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Lituania, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Swahili Tagaloka, Tahiti, Tai, Toga, lukureini, Urutu, ma Viatename. (E esee lava gagana.)

© 2015 Puletaofia e le Intellectual Reserve, Inc. Ua taofia aia tatau uma. Lomia i le Lunaite Setete o Amerika.

E mafai ona kopi tala ma ata o le *Liahona* mo le toe faaagaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufatuga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

May 2015 Vol. 39 No. 5. O LE LIAHONA (USPS 311) Samoa (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Failauga i le Faasologa
Faafalafapeta

Andersen, Neil L., 119
Andersen, Wilford W., 54
Ballard, M. Russell, 67
Bednar, David A., 46
Burton, Linda K., 29
Causé, Gérard, 98
Christofferson, D. Todd, 50
Clayton, L. Whitney, 36
Cook, Quentin L., 62
Esplin, Cheryl A., 8
Eyring, Henry B., 17, 22, 84
Gibson, Larry M., 77
Hales, Brook P., 45
Hales, Robert D., 111
Holland, Jeffrey R., 104
Jergensen, Kevin R., 45
Monson, Thomas S., 88, 91
Nelson, Russell M., 129
Nielsen, Brent H., 101
Oaks, Dallin H., 32
Oscarson, Bonnie L., 14
Packer, Boyd K., 26
Pearson, Kevin W., 114
Perry, L. Tom, 39
Pino, Rafael E., 117
Renlund, Dale G., 56
Ringwood, Michael T., 59
Sitati, Joseph W., 126
Soares, Ulysses, 70
Stephens, Carole M., 11
Teixeira, José A., 96
Uchtdorf, Dieter F., 43, 80, 107
Wixom, Rosemary M., 93
Zeballos, Jorge F., 123

Faasino Autu

Afio Mai Faalua, 119
Agaalofa, 11, 17
Agaga Paia, 8, 17, 54, 84, 98, 111
Agalelei, 29
Aiga, 8, 11, 14, 26, 39, 50, 62, 101, 126, 129
Aiga, 8, 14, 54, 62
Alofa, 11, 26, 29, 50, 62, 80, 96, 101, 104
Alofa tunoa, 36, 46, 50, 59, 80, 104, 107
Anapogi, 22, 67, 84, 129
Aso Sapati, 36, 62, 67, 129
Atamu ma Eva, 26, 46, 50, 104, 117
Ata o le faaolataga, 14, 26, 50, 111, 117, 126
Auauna atu, 22, 59, 80, 84, 129
Autulavou matutua, 67
Avea ma Soo, 32, 59, 67, 80, 114, 123
Eseta, 91, 104, 107
Faaaliga, 84
Faaaumeaina, 93
Faipoipoga, 14, 26, 29, 39, 50, 67, 126
Faamanuiaga, 22, 36, 88, 91
Faamoemoe, 36, 101, 117
Faaoosoga, 70
Faatoagaina Mai, 93, 101
Faatuatua, 36, 46, 62, 84, 93, 98, 101, 114
Faatupulaia o le Ekalesia, 45, 119
Faiaoga o aiga, 84
Faigata, 11, 17, 36, 62, 91, 96, 117, 119
Faitalia, 36, 70, 111, 123
Feagaiga, 11, 17, 29, 46, 59, 114, 129
Fefe, 46
Filemu, 17, 46, 91
Galuega faafaifeautalai, 101, 111, 126

Iesu Keriso, 17, 36, 46, 50, 62, 67, 77, 80, 91, 93, 96, 101, 104, 107, 111, 114, 119
Inisitituti, 67
Iosefa Samita, 8, 111
Le Atua le Tama, 11, 77
Liua, 32, 56, 93
Lotogatasi, 11, 62
Lotomualalo, 59, 84
Malamalama, 8, 36
Malumalu, 26, 91
Masalosalo, 36, 93, 101
Mea e faamuamua, 32
Molimau, 36, 67, 70, 80, 93, 101
Natura paia, 11, 126
Ola faavavau, 114, 117
Ola mama, 26
Olioli, 26, 93, 96
Onosai, 54, 101, 129
Onosai, 111
Perisitua, 77, 84, 88
Ponokalafi, 67, 70
Salamo, 26, 56, 107
Saolotoga o tapuaiga, 111
Seminare, 67
Suesue i tusitusiga paia, 98, 129
Tafaoga Faamasani, 67
Talafoasolopito o aiga, 129
Tatalo, 22, 84, 91, 114
Tekinolosii, 67, 96
Tiute, 88, 123
Toetu, 104, 107
Togiola, 17, 46, 50, 56, 62, 70, 96, 104, 107, 123
Tulaga faaletamā, 14, 29, 77
Tulaga Faamatua, 14, 39, 50, 54, 126, 129
Tulaga faatinā, 14
Tumau, 114
Tusi a Mamona, 8, 114
Upumoni, 8
Vaaiga, 117, 119
Valaauga o le ekalesia, 59, 88
Vavega, 98, 119



o Fitugafulu, se Au Peresitene Aoao fou o Alii Talavou, ma se fesoasoani fou i le au peresitene aoao o le Peraimer.

- Sa matauina i le lipoti faaletausaga le 15.3 miliona tagata o le Ekalesia i siteki e 3,114 ma itu e 561. Sa



O mea ua faamamafaina mai i le Konafesi Aoao Faaletausaga Lona 185 o Le Ekalesia a Iesu Keriso o le Au Paia o Aso e Gata Ai

O mataupu mo lauga mo le konafesi aoao e atofa mai—e le [faia] i se pule faaletagata ae e ala mai i uunaiga a le Agaga,” na faamalamalama mai e Elder Dallin H. Oaks o le Korama a Aposetolo e Toasefululua (itulau e 32). I se konafesi aoao musuia lea na amata i le sauniga aoao a tamaitai ma sa faaiuina i le aso Sa o le Eseta, na aoao atu failauga e uiga i le aiga, o le anapogi, galuega o le malumalu, aveva ma soo, le Sapati ma le Togiola a le Faaola, mai le tele o isi mataupu faavae o le talalelei (tagai itulau 3).

O nisi nei o mea ua faamamafaina mai:

- Na fofogaina e Peresitene Thomas S. Monson ni malumalu fou e fausiaina i Abidjan, Ivory Coast; Port-au-Prince, Haiti; ma Bangkok, Tialani. O nei mea, sa ia saunoa mai ai, “E ofoofogia faamanuiaga ua faapopoloina mo au paia faamaoni i nei nofoaga, ma, e moni lava, i soo se mea o loo i ai malumalu i le lalolagi atoa” (itulau 91).
- Sa lagolagoina e tagata o le Ekalesia ia sui fou o le Korama Muamua

faapaiaina malumalu fou e tolu i le tausaga ua tea, ua maua ai se aofaiga o malumalu e 144 o loo faagaioia.

- Sa faaliliuina le konafesi i gagana e 95. I le mulimuli ai i se faagasologa na amataina ia Oketopa ua tea, e toa tolu failauga sa tuuina atu a latou lauga i gagana e ese mai le faaPeretania.

I le lauga atu i le faaiuga o le vaiaso o le Eseta, sa molimau nai failauga i le Toetu o le Faaola. “O Ia o le Alo o le Atua,” na molimau mai ai Peresitene Thomas S. Monson. “O Ia lea na afio mai i fafo mai le tuugamau i lena taeao muamua o le Eseta, ma aumaia ai faatasi ma Ia le meaalofo o le ola e faavavau mo fanau uma a le Atua” (itulau 93). ■









Saunia e Cheryl A. Esplin

Fesoasoani Lua i le Au Peresitene Aoao o le Peraimeri

Faatumu o Tatou Aiga i le Malamalama ma le Upumoni

Ina ia mafai ona tatou teteeina ma o tatou aiga ia malosiaga o le lalolagi, e tatau la ona faatumulia i tatou i le malamalama ma le upumoni o le talalelei.

Na faatumulia lo'u loto i le Agaga a o ou faalogologo o aoao atu e nei aiga lena upumoni paia, "O le aiga e ou le Atua."¹ O musika musuia o se tasi lea o le anoanoai o auala e mafai ona tatou lagona ai le musumusumu mai o le Agaga ia i tatou, ma faatumulia i tatou i le malamalama ma le upumoni.


O le mataupu o le faatumulia i le malamalama ma le upumoni na matuaitaua patino lava ia te au ona o se aafiaga sa ou mauaina i le tele o tausaga ua mavae. Sa ou auai i se fonotaga lea na aoao ai uso o le fono faatonu aoao a Tamaitai Talavou e uiga i le fatuina o ni aiga ma auai i se faatinoga o lenei mea, sa uu ai i luga e se taitai o Tamaitai Talavou ni apa inu se lua. I le tasi lima sa ia uuina ai le atigi apa e leai se mea o i ai ma i le isi lima o se apa inu e lei tatalaina na tumu i le vaiinu. Muamua, sa ia oomiina le atigi apa; na amata ona omia ma manumi i le oomiina. Na sosoo ai ma le oomiina i le isi ona

lima o le apa e lei tatalaina. Sa mausali. Sa lei omia pe manumi e pei o le atigi apa—ona sa tumu.

Tatou te faatusaina lenei faataitaiga i o tatou lava olaga faapea ma o tatou aiga ma auai. Pe a faatumulia i le Agaga ma le upumoni o le talalelei, tatou te maua le mana e tetee atu ai i malosiaga mai fafo o le lalolagi lea o loo siomia ma fe'omia'i solo ai i tatou. Peitai, afai e le faatumuliaina i tatou faaleagaga, tatou te le maua le malosi i totonu e tetee atu ai i malosiaga mai fafo ma e mafai ona tatou lafofū ai pe a fe'omia'i solo i tatou e nei malosiaga.

Ua iloa e Satani e faapea ina ia mafai ona tatou teteeina ma o tatou aiga ia malosiaga o le lalolagi, e tatau la ona faatumulia i tatou i le malamalama ma le upumoni o le talalelei. O lea na te faia ai mea uma i lona mana e faavaivaia, faafenunia'i, ma faatamaia ai le upumoni o le talalelei ma taumafai e vavaeese i tatou mai lena upumoni.

O le toatele o i tatou ua uma ona papatiso ma maua le meaalofo o le



Agaga Paia, o le e ana le matafaioi o le faaali mai ma aoao mai le moni o mea uma lava.² Faatasi ai ma le faamamamaga o lena meaalofo ua oo mai ai ma le tiutetauave o le sailia o le upumoni, ia ola i le upumoni ua tatou iloa, ma ia faasoa atu ma puipuia le upumoni.

O se tasi o nofoaga sili tatou te saili atu i ai ina ia faatumulia ai i le malamalama ma le upumoni, o totonu o o tatou lava aiga. O upu o loo i le tali o le pese sa tatou faalogoina ua faamanatu mai ai ia i tatou, "Ua aumai e le Atua ia i tatou ni Aiga e fesoasoani ai ia avea i tatou ma tagata e finagalo i ai o Ia."³ O aiga o falea'oga ia a le Alii i luga o le fogaeleele e fesoasoani ia i tatou ia



aoao ma ola ai i le talalelei. Ua tatou o mai i o tatou aiga ma se tiute paia ina ia fesoasoani e fefaamalosiaua'i i le tasi ma le isi faaleagaga.

O aiga faavavau malolosi ma aiga ua faatumulia i le Agaga e le tupu fua. E tele taumafaiga e alu ai, e alu ai le taimi, ma e faia ai e tagata taitoatasi o le aiga lana vaega. E eseese aiga uma, ae o aiga uma lea o loo i ai se tagata se toatasi o loo saili mo le upumoni e mafai lava ona faia se eseese.

O loo fautuaina pea i tatou ina ia faatele lo tatou malamalama faaleagaga e ala i le tatalo ma e ala atu i le suesue ma le mafaufau loloto i tusitusiga paia ma upu a perofeta soifua. I lana

saunoaga o le konafesi aoao e uiga i le mauaina o se molimau o le malamalama ma le upumoni, na saunoa ai Peresitene Dieter F. Uchtdorf:

“O le Atua e Faavavau ma Silisiliese . . . o le a fetalai mai ia i latou e faalatala atu ia te Ia ma se loto faamaoni ma le faamoemoega moni.

“O le a Ia fetalai mai ia i latou i miti, faaaliga, mafaufauga, ma lagona.”

Sa faaaauu le saunoaga a Peresitene Uchtdorf: “E popole le Atua ia te oe. O le a Ia faafofoga atu ma o le a Ia tali atu i au fesili patino. O tali i au tatalo o le a oo mai i Lana lava ala ma i Lana lava taimi, ma o lea, e manaomia ai ona e aoao ia faalogo atu i Lona siufofoga.”⁴

Ua faaalua i se tala o le talafaasolopito o aiga lenei fautuaga.

I nai masina ua mavae sa ou faitau ai i le molimau a le tuafafine o le tama o lo'u tamāmatua o Elisapeta Staheli Walker. Sa malaga mai Elisapeta ma lona aiga a o laitiiti i Amerika mai Suitiselani.

Ina ua uma ona faaipoipo Elisapeta, sa latou nonofo ma lona toalua ma lana fanau e latalata i le tuaoi o Nevada, lea sa latou faagaoioia ai se pisinisi tau meli. Sa avea lo latou fale ma se nofoaga e mapu ai tagata femalagaai. Latou te nofo sauni i le aso ma le po atoa e kuka ma laulau atu meaai mo tagata femalagaai. O se galuega faigata ma lē lavā, ma sa laitiiti le taimi e malolo ai. Ae o se mea

na sili ona popole i ai Elisapeta o talanoaga a tagata sa latou fegalealeai.

Fai mai Elisapeta e oo mai lava i lenei taimi sa ia talitonu lava o le Tusi a Mamona e moni, o le Perofeta o Iosefa Samita sa faatagaina e le Atua e faia le mea sa ia faia, ma o lana savali o le fuafuaga o le olaga ma le olataga. Peitai o le olaga sa ia ola ai e le o se olaga o le a faamalosia ai se talitonuga faapena.

O nisi o tagata femalagaai na afe atu e malolo, o ni tagata faitautusi, atamamai, ma popoto ma o le mataupu na talanoaina pea i taimi uma i lana laulau e faapea, o Iosefa Samita o se tagata “pepelo taufaasese” lea na tusia e ia lava le Tusi a Mamona ona tufa atu lea ia maua ai ni tupe. Sa latou amio ai e pei o mafaufau o soo se mea lava e valea, ma fai mai “o le faaMamona e pepelo.”

O nei talanoaga uma na lagona ai e Elisapeta le tuulafoaia ma le tuuatoatasi. Na leai se tasi e talanoa i ai, leai se taimi e tatalo ai—e ui sa ia tatalo a o ia faigaluega. Sa matuai fefe lava o ia e fai atu se tala ia i latou ia na ulagiaina lana tapuaiga. Fai mai a ia sa ia mafaufau pe o latou tauina mai ea le mea moni, ma sa ia lagona le le mafai ona ia puipuia o lona talitonuga pe ana faapea sa ia taumafai.

Mulimuli ane, sa masii ese atu Elisapeta ma lona aiga. Fai mai Elisapeta sa tele atu le taimi e mafaufau loloto ai ma sa le tele ni mea faasalavei i taimi uma. E masani ona ia alu i le potu i lalo ma tatalo i le Tama Faalelagi i mea sa ia atugalu ai—e uiga i tala ia na tau atu e na tagata atamamai e uiga i le le moni o le talalelei ma e uiga ia Iosefa Samita ma le Tusi a Mamona.

I se tasi po sa fai ai se miti a Elisapeta. Fai mai a ia: “Na foliga mai sa tu o ia i se auala vaapiapi o taavale toso, lea na faataamilo i le auvae o se mauga maualalo, o le afa o le mauga



sa ou vaai ai i se tagata o tilotilo mai i lalo a o tautala, na foliga mai sa talanoa atu i se alii talavou lea sa tootuli; ma punou atu i luga o se lua i le elelee. Na faaloaloa atu ona lima ma na foliga mai o loo ia aapa atu i se mea o i totonu o le lua. Sa ou vaaia le ufiufi maa na aveese mai le lua lea na punou ai le alii talavou. Na toatele tagata i luga o le auala, ae sa foliga mai e leai ma se tasi na amanaiaina ia alii e toalua i luga o le mauga. Na i ai se mea na o mai faatasi ma le miti lea na matuai ese lava le uunaia ai o au lea na ou ala ai i luga; . . . sa le mafai ona ou ta’u atua la’u miti i soo se tasi ae sa ou fiafia lava i lona uiga, o le Agelu o Moronae o loo faatonutonuina le taulealea o Iosefa i le taimi sa ia maua ai papatusi.”

I le tautotogo o le 1893, na alu ai Elisapeta i le Aai o Sate Leki mo le faapaiaga o le malumalu. Sa ia faamatalaina le mea sa oo ia te ia: “Sa ou vaai ai iina i le ata lava e tasi lea sa ou vaaia i la’u miti, ou te matea o se faamalama tioata lanu. Sa ou mautinoa faapea afai na ou vaai i le Mauga o Kumora, sa matua foliga moni lava. Sa ou lagona le faamalieina aua sa faaali mai ia te au i se miti se ata o le Agelu o Moronae o tuuina atu ia Iosefa Samita ia papatusi auro.”

Ina ua mavae le tele o tausaga talu ona faia lenei miti ma i le tele

o masina a o lei malii o ia i le lata i le 88 o ona tausaga, sa maua ai e Elisapeta se uunaiga malosi. Fai mai, “Na oo mai ma le manino se manatu ia te au . . . e pei o fai mai se tasi ia te au, . . . ‘Aua le tanuina lau molimau i le palapala.’”⁵

I augatupulaga mulimuli ane, sa faaauau ai ona mauaina e fanau a Elisapeta le malosi mai lana molimau. E pei o Elisapeta, o loo tatou ola foi i se lalolagi e anoanoai tagata masalosalo ma faitio o e ulagia ma tetee i upumoni tatou te faapelepele i ai. Atonu tatou te faalogo i tala le mautonu ma savali feteenai. E pei foi o Elisapeta, o le a tatou faia le mea sili tatou te mafaia ia pipiimau ai i soo se malamalama ma le upumoni ua tatou mauaina, aemaise lava i tulaga faigata. Atonu o le a le vave ona oo mai tali o a tatou tatalo, ae e tatau ona tatou saili ni taimi filemu ia maua ai le malamalama sili atu ma le upumoni. Ma pe a tatou mauaina, o lo tatou tiute o le ola ai, faasoa atu, ma ia puipuia.

Ou te tuuina atu lau molimau ou te iloa a tatou faatumulia o tatou loto ma aiga i le malamalama ma le upumoni a le Faaola, o le a tatou maua le malosi i totonu e onosaia ai soo se tulaga. I le suafa o Iesu Keriso, amene. ■

Manatua: I le aso 4 o Aperila, 2015, sa faamaloloina mai Sister Esplin i le aveai ai o se fesoasoani lua i le au peresitene aoao o le Peraimeri ma lagolagoina o ia o se fesoasoani muamua.

FAAMATALAGA

1. “O Le Aiga e Ou le Atua,” i le *E Faavavau Aiga: Oototoga mo le Taimi o Fetufaiga 2014* (2013), 28–29.
2. Tagai Moronae 10:5.
3. “O Le Aiga e Ou le Atua.”
4. Dieter F. Uchtdorf, “Mauaina o se Molimau o le Malamalama ma le Upumoni,” *Liahona*, Nov. 2014, 21.
5. Tagai Elizabeth Staheli Walker, “My Testimony, Written for My Children and Their Children after I Am Gone,” 1939, 22–26, University of Nevada, Las Vegas, Special Collections; ua faalaugatasia faamamafa, faamataitisi-lapopoina, ma le sipelaga.



Saunia e Carole M. Stephens

Fesoasoani Muamua i le Au Peresitene Aoao o le Aualofa

O Le Aiga e Ou Le Atua

E taitasi i tatou ma auai ma o loo manaomia i le aiga o le Atua.

O i ai ea se isi mea e sili atu ona matagofie ma loloto nai lo upumoni mama ma faigofie o le talalelei o loo aoaoina i se pese a le Peraimeri? Ma o outou uma o teineiti o le Peraimeri o i ai i lenei po e iloina le pese o le a ou talanoa atu ai. Sa outou aoaoina i le polokalama a le Peraimeri i le tausaga ua tuanai.

I upu o le “O Le Aiga e Ou Le Atua”¹—na muai lagiina i lenei sauniga—ua faamanatu mai ai ia i tatou le aoaoga faavae mama. Ua tatou aoao e le gata o le aiga e ou le Atua ae ua avea foi i tatou taitoatasi ma vaega o le aiga o le Atua.

Ua aoao mai e le laina muamua o le pese: “**E i ai se aiga o le Tama. O a’u! O oe, ma isi foi: o tatou o Lana fanau.**” Mai le folafolaga i le aiga, tatou te aoao ai, “I le muai olaga, sa iloa ma tapuai atalii ma afafine faaleagaga i le Atua o lo tatou Tama e Faavavau.” I lenei malo, sa tatou aoao ai e uiga i lo tatou faasinomaga o tamaitai e faavavau. Sa tatou iloa ai o i tatou taitoatasi “o se afafine faapelepele . . . a ni matua faalelagi.”²

O la tatou malaga faaletino i le lalolagi sa le’i suia ai na upumoni. E i ai uma i tatou i lenei aiga ma o loo manaomia i le aiga o le Atua. E eseese uma aiga faalelalolagi. Ma a o tatou faia le mea silisili e mafai ona tatou faia e fatu ai ni aiga masani malolosi,

o le avea ai ma tagata o le aiga o le Atua e le faalagolago i soo se ituaiga o tulaga—tulaga faalefaaiipoipoga, tulaga faamatua, tulaga faaletupe, tulaga faaleagafesootai, po o ituaiga o tulaga tatou te tuuina i luga o ala o faasalalaua faaleagafesootai.

Tatou te auai. “O i tatou o afafine o lo tatou Tama Faalelagi, e alofa ia i tatou, ma e tatou te alolofa foi ia te Ia.”³

O le laina lona lua e sosooina le laina muamua. “**Na Ia auina mai tatou uma taitoatasi, e ala i le fananau mai, ia ola ae ma aoao iinei i aiga.**”

I le muai olaga, sa tatou aoaoina o le

a tatou manaomia se vaitaimi o le olaga faaletino. Sa tatou “talía le fuafuaga [a leTama Faalelagi] e mafai ai e Lana fanau ona maua se tino faaletino ma maua le tomái faalelalolagi latou te maua ai le atoatoaga ma iloa tino ai [lo tatou] taunuuga paia o ni suli o le ola e faavavau.”⁴

Sa faamatala mai e Elder Richard G. Scott e faapea “sa aoaoina i tatou i le muai olaga e faapea o lo tatou faamoe-moega i le o mai iinei o le faaosoosoina, tofotofoina, ma faalauteleina.”⁵ O lenei faalauteleina e oo mai i le tele o mamamu e pei o le tele o tagata o loo aafia ai. Ou te le’i oo lava i ni aafiaga o le tatalaina o se faaiipoipoga, le tiga ma le le mautonu e sau mai le tuulafoaiina, po o le tiutetauave e fesootai ma le avea ma se tina nofotoatasi. Ou te le’i oo foi i ni aafiaga o se maliu o se tamaitiiti, le lē mauaina o ni fanau, po o le tosina atu i le itupa e tasi. Ou te le’i oo foi i le onosaia o le sauaina po o se gasegase tumau po o ni mea ua fai ma vaisu. Ou te le’i maua le avanoa e tofotofoina ai i nei mea.



O le taimi la lenei o loo mafaufau nisi o outou, “Sister Stephens, e te le malamalama lava!” Ma ou te tali atu atonu e sao outou. Ou te malamalama atoatoa i o outou luitau. Ae e ala i o’u tofotofoga ma luitau faaletagata lava ia—tofotofoga ia na uunaia ai a’u e tatalo—ua ou masani lelei ia te Ia o Le, e malamalama Ia “ua masani foi ma le tiga,”⁶ ua oo i mea uma ma malamalama i mea uma. Ma le isi, ua ou oo uma i tofotofoga faaletino ia na ou ta’ua mai se vaega faaleafafine, faaletina, faaletinamatua, faaleuso, faaleolomatua o le aiga, ma faaleuo.

O lo tatou avanoa o ni afafine tausi feagaiga o le Atua e le na o le aoao mai i o tatou lava luitau; ae o le faatasia lea i le loto malamalama ma le aagalofa a o tatou lagolagosua i isi tagata o le aiga o le Atua i o latou faigata, e pei ona tatou osifeagaiga e fai.

A tatou faia lea mea, o le a tatou malamalama ai foi ma faatuatuaaina e silafia e le Faaola ia faigata o le ala ma e mafai ona taialaina i tatou i soo se faanoanoaga ma ni lē fiafia e ono oo mai. O Ia o le alofa mama moni, o Lona alofa e “tumau e faavavau”⁷—i se vaega e ala ia i tatou—pe a tatou mulimuli ia te Ia.

I le aveia ai ma ni afafine o le Atua ma ni soo o Iesu Keriso, tatou te “galulue e tusa ai ma na tigaalofa ua totoina e le Atua” i o outou loto.⁸ O la tatou faatosinaga e le faatapulaaina na o tagata o o tatou aiga

Sa ou maua talu ai nei se avanoa e asiasi ai ia Sister Yazzie o le Siteki a Chinle Arizona i lona tamai fale laau. Ina ua ia faafeiloai au i totonu o lona maota, o le mea muamua na ou matauina o ata faavaa eseese o le aiga ma faifeautalai i luga o lona puipui ma

lulau. O lea sa ou fesili ai, “E toa fia ni fanau a lau fanau o i ai?”

I le faateia ai i la’u fesili, sa faamimigi ona tauau. I le le mautonu i lana tali, sa ou autilo atu i lana tama teine, o Sister Yellowhair, lea na tali mai, “Na te leiloa pe toa fia ni ana fanau a fanau. E valaau uma e le fanau o ia iā ‘Tinamatua’—o ia o le Tinamatua i tagata uma.”

E le faatapulaaina e Sister Yazzie lona alofa ma faatosinaga i lona aiga moni. E malamalama o ia i le uiga o le faalateleina o ana faatosinaga a o ia agalelei atu, faamanuia, faafaileleina, ma puipuia le aiga o le Atua. E malamalama o ia e faapea “soo se taimi e faamalosia ai e se tamaitai le faatuatua o se tamaitiiti, ua ia saofagā i le malosi o se aiga—i le taimi nei ma le lumanai.”⁹

O le lina lona tolu o le pese e faamatala atili ai le faamoemoega o lo tatou olaga faaletino: **“Ua aumai e le Atua ia i tatou ni Aiga e fesoa-soani ai ia aveia i tatou ma tagata e finagalo i ai o Ia.”** Na aoao mai le Faaola, “Ia tasi outou; ma afai tou te lē tasi e lē a a’u outou.”¹⁰ Ua aoao mai e le folafolaga i le aiga e faapea i le aveia ai ma afafine agaga faapelepele o ni matua faalelagi, ua ia i tatou se natura paia, faasinomaga e faavavau, ma le faamoemoega. E finagalo le Atua ia tasi i tatou—o afafine tausi-feagaiga ua faatasia e ui i eseese o o tatou olaga taitoatasi,¹¹ o e naunau e aoao mea uma e manaomia ia toe foi atu ai i Lona afioaga, ma faamauina ia te Ia o se vaega o Lona aiga e faavavau.

“O sauniga ma feagaiga paia o loo maua i malumalu paia ua mafai ai e i [tatou] ona toe foi atu i le afioaga o le Atua ma mo aiga ina ia tuufaatasia e faavavau.”¹² O sauniga tatou te mauaina ma feagaiga tatou te osia i le papatisoga ma i totonu o malumalu



paia e fesootai ai le aiga o le Atua i itu uma o le veli—e fesootai ai i tatou i lo tatou Tama e ala i Lona Alo, o Le na tatalo, “Ina ia tasi i latou uma, faapei o oe le Tama o i totonu ia te au, o a’u foi o i totonu ia te oe, ina ia tasi i latou i totonu ia te i taua.”¹³

A tatou faaaogaina o tatou taimi i le olaga faaletino e susesue ai ma faaaoga aoga a le Faaola, tatou te avea atili e pei o Ia. Tatou te oo ai ina malamalama o Ia o le ala—le ala lava e tasi—e mafai ai ona tatou faatoilaloina luitau faaletino, ia faamaloloina, ma toe foi atu i lo tatou aiga faalelagi.

O le laina mulimuli o le pese e toe foi i le amataga: **“O le auala lea e faasoa mai ai Lona alofa, ona o le aiga e mai le Atua.”** O le fuafuaga a le Tama mo Lana fanau o se fuafuaga o le alofa. O se fuafuaga e faatasia ai Lana fanau—Lona aiga—faatasi ma Ia. Na aoao mai Elder Russell M. Nelson, “E na o le lua lava mea e finagalo ai le Tama mo Lana fanau . . . : tino ola pea ma le ola e faavavau, ‘o lona uiga o le olaga faatasi ma Ia i le aiga.’”¹⁴ O na faanaunauga e na o le pau le mea e mafai ona iloaitino ai pe afai lea tatou te faasoa atu foi le alofa ua i ai i le Tama Faalelagi mo Lona aiga e ala i le aapa atu ma faasoa atu Lana fuafuaga i isi.

I le lua sefulu tausaga talu ai, na aapa atu ai le Au Peresitene Sili ma le Korama a Aposetolo e Toasefululua i le lalolagi atoa ina ua auina atu se folafolaga i le aiga. Talu mai lena taimi, ua faateteleina osofaiga i aiga.

Afai e ao ona faamanuina i tatou i o tatou tiutetauave paia o ni afafine o le Atua, e tatau ona tatou malamalama i le taua e faavavau o [le fuafuaga a le Tama] atoa ai ma o tatou tiutetauave taitoatasi e aoao atu upumoni e uiga i le fuafuaga a lo tatou Tama Faalelagi mo Lona aiga. Sa faamalalama mai e Peresitene Howard W. Hunter:



“O loo i ai se tulaga manaomia tele e aumai faatasi ia tamaitai o le Ekalesia ina ia tutu faatasi ma tutu atu mo le Usoga i le taofiga o le tai fana’e o le amioleaga ua siosiomia ai i tatou, ma le tuleia i luma o le galuega a lo tatou Faaola. . . .

“. . . O lea matou te augani atu ai ia te outou ina ia auauna atu ma le uuniga mamana mo le lelei i le faamalolosi o o tatou aiga, la tatou ekalesia, ma o tatou nuu.”¹⁵

Uso e, ua tatou auai. E alofagia i tatou. E manaomia i tatou. Ua ia i tatou se faamoemoega paia, se galuega paia, se tofiga paia, ma se matafaioi paia i le Ekalesia ma le malo o le Atua ma i Lona aiga e faavavau. O tou silafia ea i totonu o o outou loto e alofa le Tama Faalelagi ia te outou ma e finagalo ia te outou ma i latou e te alofa i ai ina ia faatasi ma Ia? E pei lava o “Le Tama Faalelagi ma Lona Alo e atoatoa . . . , O o Laua faamoemoega mo i tatou e atoatoa.”¹⁶ O le La fuafuaga mo i tatou e atoatoa, ma o a Laua folafolaga e moni. O nei upumoni ou te molimau atu ai ma le agaga faafetai i le suafa o Iesu Keriso, amene. ■

FAAMATALAGA

1. Tagai “O Le Aiga e Ou Le Atua,” i le *E Faavavau Aiga: 2014 Oototoga mo le Taimi o Fetufaaiga* (2013), 28–29.
2. “O Le Aiga: O Se Folafolaga i le Lalolagi,” *Liahona*, Nov. 2010, 129.
3. “Autu a Tamaitai Talavou,” i le *Ahualu i Luma o le Tagata Lava Ia* (tamaitusi, 2009), 3.
4. “O Le Aiga: O Se Folafolaga i le Lalolagi.”
5. Richard G. Scott, “Ia Avea le Faaogaina o le Faatuatua ma Mea E te Faamuamuaia,” *Liahona*, Nov. 2014, 92.
6. Isaia 53:3.
7. Moronae 7:47.
8. Joseph Smith, i le *O Afafine i Lo’u Malo: O Le Talafaasolopito ma le Galuega a le Aualofa* (2011), 16.
9. *O Afafine i Lo’u Malo*, 159.
10. Mataupu Faavae ma Feagaiga 38:27.
11. Tagai Patricia T. Holland, “‘One Thing Needful’: Becoming Women of Greater Faith in Christ,” *Ensign*, Oct. 1987, 26–33.
12. “O Le Aiga: O Se Folafolaga i le Lalolagi.”
13. Ioane 17:21.
14. R. Scott Lloyd, “God Wants His Children to Return to Him, Elder Nelson Teaches,” Vaega o Tala Fou a le Ekalesia i le LDS.org, Ian. 28, 2014, [lds.org/church/news/god-wants-his-children-to-return-to-him-elder-nelson-teaches](https://www.lds.org/church/news/god-wants-his-children-to-return-to-him-elder-nelson-teaches).
15. Howard W. Hunter, i le *O Afafine i Lo’u Malo*, 157; tagai foi “I Tamaitai o le Ekalesia,” *Liahona*, Ian. 1993, 119.
16. M. Russell Ballard, “Let Us Think Straight” (Faigalotu a le Iunivesite a Polika Iaga, Aug. 20, 2013); speeches.byu.edu.



Saunia e Bonnie L. Oscarson
Peresitene Aoao o Tamaitai Talavou

O Tagata e Puipuia le Folafolaga o le Aiga

*Ia tatou fesoasoani i le fausia o le malo o le Atua i le tulai i luga
ma le lototoa ma avea ma tagata e puipuia le faaipoipoga,
tulaga faamatua, ma le aiga.*

O se faamanuiaga ma se fiafiaga le avea ai ma se vaega o lenei faatasiga ofoofogia o teineiti ma tamaitai. Ua matua faamanuiaina i tatou o ni tamaitai i le auai faatasi ai i lenei afiafi i le lotogatasi ma le alofa.

Sa ou faitau talu ai nei i le tala ia Marie Madeleine Cardon, o lē, faatasi ai ma lona aiga, sa mauaina le savali o le talalelei toefuataiina a Iesu Keriso mai uluai faifeautalai na valaauina e galulue i Italia i le 1850. O ia o se tamaitai talavou e 17 pe 18 ona tausaga

i le taimi na latou papatiso ai. I se tasi Aso Sa, a o faia se sauniga tapuai i lo latou fale i luga o mauga o Italia i matu, na potopoto faataamilo ai se vaega faatupu vevesi o alii, e aofia ai ma nisi o faifeau i le lotoifale, ma amata ona taufonō, feei, ma tauvalaau atu e aumai i fafo faifeautalai. E leai sou manatu sa latou naunau ia aoao i le talalelei—sa latou faamoemoe ia faaoolima. O Marie talavou sa savali atu i fafo e faafetaia'i ma le au faatupu vevesi.

Sa faaauau pea ona latou fe'ei atu i upu masoa ma faatonu atu e aumai i fafo faifeautalai. Sa sii e Marie i luga lana Tusi Paia ma faatonu i latou e o ese. Sa ia tau atu ia i latou o loo i lalo faifeautalai i lana puipuiga ma e le mafai ona latou faatamaia se lauulu se tasi mai o latou ulu. Faafofoga i ana lava upu: "Sa tutu tagata uma ma le ofo. . . na faatasi le Atua ma a'u. Sa Ia tuuina mai na upu i lo'u gutu, aua e le mafai ona ou faia na upu. Na faafuasei ona filemu mea uma. Na tutu ma le le mautonu na alii malolosi matamataita i luma o se teineitiiti auvaivai, gatete, ae sa le fefe." Na talosagaina e faifeau le au faatupu vevesi e o ese, ma sa latou o ma le filemu ma le maasiasi, fefefe, ma le faanoanoa. Na faamaeaina e le vaega toalaiti le latou sauniga ma le filemu.¹

E mafai ona e vaai faalemafaufau atu i lona tamaitai talavou lototoa, e tutusa lona matua ma le toatele o outou, na tu atu i le au faatupu vevesi ma puipui i lona talitonuga fou ma le lototele ma le tuuto?

Uso e, e toalaiti i tatou o le a fetai ai ma se au faatupu vevesi feita faapea, ae o loo i ai se taua o loo faia i lenei lalolagi lea o loo osofaia ai a tatou aoaoga faavae autu ma sili ona taua. O loo ou talanoa faapitua atu lava i le aoaoga faavae o le aiga. O le tulaga paia o le aiga ma faamoemoega taua o le aiga o loo fesiligia, faitioina, ma sauaina i soo se auala e mafai ai.

I le taimi muamua lava na faitau ai e Peresitene Gordon B. Hinckley le "O Le Aiga: O Se Folafolaga i le Lalolagi" i le 20 tausaga ua mavae i lenei tausaga, sa matou faafetai ai, ma faatauaina le manino, faigofie, ma le moni o lenei pepa o faamatalaga musuia mai faaaliga. Matou te liloaina i lona taimi, le matua manaomia e i tatou o nei folafolaga autu i le



lalolagi i lenei vaitaimi e avea ma tulaga manaomia tatou te faamasino ai soo se aoaoga fou po o filosofia a le lalolagi tatou te maua mai i ala o faasalalauga, le Initoneti, tagata atamamai, TV ma ata tifaga, ma e oo lava i sui o palemene. Ua avea le folafolaga i aiga ma se fua faatatau mo le faamasinoina o manatu o le lalolagi, ma ou te molimau atu o mataupu faavae ua tuuina atu i totonu o lenei faamatalaga e moni i lenei vaitaimi e pei lava i le taimi na tuuina mai ai ia i tatou e se perofeta a le Atua i le toetiiti ato a le 20 tausaga talu ai.

E mafai ona ou faasino atua se mea manino? E seasea ogatusa le olaga ma fuafuaga mo soo se tagata, ma ua tatou matua nofouta e le o tamaitai uma ua aafia i mea o loo faamatala mai e le folafolaga. E taua pea le malamalama ma aoao atu i le mamanu a le Alii ma taumafai ia maua lena mamanu i le mea sili tatou te mafaia.

Ua tofu i tatou ma se tiute i le fuafuaga, ma ua tutusa uma lo tatou taua i fofoga o le Alii. E tatau ona tatou manatua ua silafia e le Tama Faalelagi alofa o tatou manaoga amiotonu ma o le a Ia faamamaluina Ana folafolaga lea o le a leai se mea e taofia mai ia i latou o e tausia faamaoni a latou feagaiga. E i ai i le Tama Faalelagi se misiona ma se fuafuaga mo i tatou taitoatasi, ae ua i ai foi Lana lava faatulagaga o taimi. O se tasi luitau sili ona faigata i lenei olaga o le faatuatua lea i le taimi a le Alii. O se manatu lelei i ai o se fuafuaga faaleoleo, lea e fesoasoani ia i tatou ia avea ma tamaitai tausi-feagaiga, agaalofo, ma amiotonu o e fausia le malo o le Atua e tusa lava po o fea e agai ai o tatou olaga. E tatau ona tatou aoaoina a tatou fanau teine ina ia taulai atu mo le tulaga aupito sili ae ia fuafua foi mo ni mea e tutupu faafuasei.

I le aluga o le faamanatuina o le 20 tausaga o le folafolaga i le aiga,



ou te fia tuuina atu se lu'i mo i tatou uma o tamaitai o le Ekalesia ina ia avea ma e puipuia le "O Le Aiga: O Se Folafolaga i le Lalolagi." E pei ona puipuia ma le lototoa e Marie Madeleine Cardon ia faifeautalai ma lana tapuaiga fou, e tatau foi ona tatou puipuia ma le lototoa ia aoaoga faavae a le Alii na faaalai mai o loo faamatala ai le faaipopoga, aiga, o matafaioi paia a alii ma tamaitai, ma le taua o aiga o ni nofoaga paia—e tusa lava pe o tauvalaau mai le lalolagi i o tatou taliga faapea o nei mataupu faavae ua tuai, faatapulaa, ma e le o toe aoga. O tagata uma, e tusa lava po o a o latou tulaga faaleulugalii pe fia le aofai o le fanau, e mafai ona avea ma e puipuia le fuafuaga a le Alii o loo faamatala mai i le folafolaga o le aiga. Afai o le fuafuaga lea a le Alii, e tatau foi ona avea ma a tatou fuafuaga!

E tolu mataupu faavae o loo aoao mai i le folafolaga ou te manatu e matuai manaomia ai lava ni tagata e puipuia ma le mausali. O le mea muamua o le faaipopoga i le va o se alii ma se tamaitai. Ua aoaoina i tatou i tusitusiga paia, "A e ui lava ina faapea, e leai se tane pe a le o i ai le fafine, e leai foi se fafine pe a le o i ai le tane,

i le Alii."² Mo le mauaina e soo se tagata o le atoatoaga o faamanuiaga o le perisitua, e tatau ona i ai se tane ma se ava ua faamauiina i le maota o le Alii, o galulue faatasi i le amiotonu, ma tumau faamaoni i a laua feagaiga. O le fuafuaga lenei a le Alii mo Ana fanau, ma e le mafai e talanoaga po o faitioga lautele ona suia mea ua folafola mai e le Alii. E manaomia lo tatou faataitaia pea o faaipopoga amiotonu, saili mo na faamanuiaga i o tatou olaga, ma ia faatuatua pe afai o loo tuai ona oo mai. Ia avea i tatou ma tagata e puipuia le faaipopoga e pei ona faauuina e le Alii a o faauuau pea ona faaalai le alofa ma le agaalofo mo i latou e eseese manatu.

O le isi mataupu faavae lea e manaomia ai o tatou leo o le puipuiga o le faamamaluina o matafaioi a tina ma tama. Tatou te naunau e aoao a tatou fanau ia taulai maua atu i lenei olaga. Tatou te matua mananao ia faamautinoa ua iloa e a tatou fanau teine ua ia i latou le gafatia e ausia ma avea ai ma soo se mea e mafai ona latou mafaufauina. Matou te faamoe-moe o le a latou fiafia e aoao, ia aotauina, ia talenia, ma atonu ia avea ma le isi Marie Curie po o Eliza R. Snow.

Pe o tatou aoao foi o tatou atalii ma afafine e leai se isi mamalu silisili, leai ni faalagiga taua, ma e leai nisi matafaioi e sili atu ona taua i lenei olaga nai lo o tina ma tama? Ou te faamoemoe a o tatou uunaia a tatou fanau ia ausia le mea sili i lenei olaga o loo tatou aoao atu foi i latou ia faamamalu ma viia ia matafaioi o loo faia e tina ma tama i le fuafuaga a lo tatou Tama Faalelagi.

Na iloa e le ma uii, o Abby, se avanoa uigaese e tu atu ai ma puipuia le matafaioi o tina. I se tasi aso sa ia mauaina se tusi mai le aoga a lana fanau o le a faia se latou polokalama o le Aso o Matata i le aoga. Na valaulia matua e auina atu se talosaga pe a latou mananao e o atu i le aoga e aoao le fanau ia latou galuega, ma na musuia Abby i se lagona e talosaga e alu atu ma talanoa e uiga i le avea ma se tina. Na te lei toe faalogo i se tala mai le aoga, ma ina ua latalata i le Aso o Matata, sa iu lava ina ia valaau i le aoga, ma mafaufau atonu ua leiloa ia i latou lana talosaga. Sa saili solo e taitai ma iloa ai e toalua faiaoga na ioe e alu atu Abby e talanoa ia laua vasega i le faaiuga o le Aso o Matata.

I le mālie tele o ana aoaoga i le fanau, sa aoao atu ai e Abby i latou, atoa ma isi mea e faapea, i le avea ai ma se tina e manaomia le malamalama lelei i vaialaau faafomai, mafaufau, tapuaiga, faiaoga, musika, tusi, tusiata, mea tau-tupe, teuina o fale, sitailliina o ulu, ave-taavale, taaloga, kuka, ma le tele o isi mea. Na faagaetia le fanau. Sa ia faaiuina i le fai atu i tamaiti taitasi ia manatua o latou tina e ala i le tusiina o se tusi faafetai e faaali ai le lotofaafetai mo le tele o galuega alofa o auunaga o loo latou mauaina i aso taitasi. Na lagona e Abby ua vaai atu tamaiti i o latou tina i se malamalama fou ma o le avea ma se tina po o se tama o se mea e taua tele. Na ia talosaga e toe fia faasoa atu i lenei



tausaga ma sa valaaulia ai o ia e aoao atu ni vasega se ono.

O le tala lea a Abby e uiga i lona aafiaga: “Ou te lagona e pei e faigofie i lenei lalolagi le mauaina e se tamaitiiti o se lagona faapea, o le avea ma se matua o se galuega lona lua lea po o se tulaga e le tau manaomiaina tele. Ou te manao ia lagona e tamaiti uma o i latou o se mea e sili ona faamuamua ma taua i o latou matua, ma atonu o le tau atu ia i latou e taua ia te au le avea ma se matua, o le a fesoasoani lea ia latou iloa ai mea uma o loo faia e o latou matua mo i latou ma le mafuaaga.”

O lo tatou perofeta pele, o Peresitene Thomas S. Monson, o se

faaitaiga matagofie lea o le faamamaluina o tamaiti ma tulaga faatina, aemaise lona lava tina. I se faatatau o tatou tina faalelalolagi, na ia saunoa ai: “Ia taitasi i tatou ma faatau lenei upumoni; e le mafai e se tasi ona faagalo tina ma manatua le Atua. E le mafai e se tasi ona manatua tina ae faagalo le Atua. Aisea? Aua o nei tagata paia e toalua, o le Atua ma lo [tatou (tina) faalelalolagi], e soa i le foafoaga, i le alofa, i le ositaulaga, i auunaga, e tasi i laua.”³

O le mataupu faavae mulumuli e tatau ona tatou tutu atu ma puipuia le tulaga paia o le aiga. E tatau ona tatou aveina se faaupuga lea e talanoaina i

nisi taimi ma le faatauemu, ma siitia-ina. O le faaupuga *fatuaigatausi*. E mafai e i tatou uma—o tamaitai, alii, autalavou, ma le fanau, nofofua pe faaiipoipo—ona galulue ia avea ma fatuaigatausi. E tatau ona “faia o tatou aiga” ma nofoaga o le malutaga, paia, ma ia saogalemu. E tatau ona avea o tatou aiga ma nofoaga e matua faateleina ai le lagonaina o le Agaga o le Alii ma o loo suesueina ai, aoaoina, ma ola ai i tusitusiga paia ma le tala-lelei. O le a tele se eseese o le a i ai i le lalolagi pe afai e vaavaai tagata uma ia i latou lava o ni fatuaigatausi amiotonu. Ia tatou puipua le aiga o se nofoaga e lona lua atu i le malumu lona paia.

Uso e, ou te faafetai i le avea ai ma se tamaitai i nei aso e gata ai. Ua tatou maua avanoa ma filifiliga e lei maua muamua e nisi augatupulaga o tamaitai i le lalolagi. Ia tatou fesoasoani i le fausia o le malo o le Atua i le tulai i luga ma le lototoa ma avea ma tagata e puipua le faaiipoipoga, tulaga faamatua, ma le aiga. E manao-mia i tatou e le Atua ia avea ma autau lotototoa, tumau, ma lē mafaagaetia o le a puipua Lana fuafuaga ma aoao atu Ana upumoni i augatupulaga o i le lumanai.

Ou te molimau atu o loo soifua le Tama Faalelagi ma e alofa ia i tatou taitoatasi. O Lona Alo, o Iesu Keriso, o lo tatou Faaola ma Togiola. Ou te tuuina atu lenei molimau ia te outou i le suafa o Iesu Keriso, amene. ■

FAAMATALAGA

1. Tagai Marie Madeline Cardon Guild, “Marie Madeline Cardon Guild: An Autobiography,” cardonfamilies.org/Histories/MarieMadelineCardonGuild.html; tagai foi Marie C. Guild autobiography, circa 1909, Faletusi o le Talaaga o le Ekalesia, Sate Leki, Iuta.
2. 1 Korinito 11:11.
3. Thomas S. Monson, “Behold Thy Mother,” *Ensign*, Jan. 1974, 32.



Saunia e Peresitene Henry B. Eyring
Fesoasoani Muamua i le Au Peresitene Sili

O Lē Faamafanafana

Ou te molimau atu ua auina mai e le Keriso soifua le Agaga Paia, le Faamafanafana, ia i latou ua tatou osifeagaiga ia faamafanafanaina.

Ou tuafafine pele, o se fiafiaga mo au le faatasi ai ma outou. Sa ou mafaufau i lou tina, lou toalua, ou afafine, ou afafine faaletulafono, fanau teine a lau fanau—o nisi o i latou o loo i ai iinei. O lenei polokalama matagofie ua sili atu ai ona ou talisapaia i latou. Ou te iloa o le mauaina o se aiga faapena ma se aiga matagofie e oo mai ona ua latou tuu le Faaola i le totonugalemu o o latou olaga taitoatasi. Tatou te manatuaina o Ia i le po nei i musika, tatalo, ma e ala i lauga musuia. O se tasi o uigapaia

o le Faaola e sili ona tatou talisapaiaina o Lona agaalofa lemafuaia.

O lenei po ua outou lagonaina e silafia e Ia outou ma e alofa ia te outou. Ua outou lagonaina Lona alofa mo i latou o nonofo i outou talaane. O i latou o o outou uso, afafine agaga a lo tatou Tama Faalelagi. E popole o Ia mo i latou e pei ona Ia popole mo outou. E malamalama o Ia i o latou faanoanoaga uma. E finagalo o Ia e fesoasoani atu ia i latou.

O la’u savali ia te outou i le po nei e faapea, e mafai ma e tatau ona outou avea ma se vaega taua o Lana faamafanafanaga o loo tuuina atu ia i latou e manaomia le faamafanafanaina. E mafai ona e faia lau vaega i le mea sili pe afai e te iloa a tili le auala Na te tali mai ai na tatalo mo se fesoasoani.

E toatele o loo tatalo atu i le Tama Faalelagi mo se toomaga, mo se fesoasoani i le tauaveina o a latou avega o le faanoanoa, tuuatoatasi, ma le fefe. E faafogaina e le Tama Faalelagi na tatalo ma malamalama i o latou manaoga. Ua Ia folafola mai faatasi ma Lona Alo Pele, le Iesu Keriso toetu, ia fesoasoani.

Na tuu mai e Iesu Keriso lenei folafolaga matagofie:

“Ia outou o mai ia te au, o outou uma o e tigaina ma mafatia i avega, o a’u foi e malolo ai outou.



“Ia outou amoina la’u amo, ma ia outou faaa’oa’o ia te au, aua o au lē agamalu ma le loto maualalo, ona maua lea e outou o le malologa mo outou agaga.

“Aua e avegofie la’u amo, o la’u avega foi e māmā ia.”¹

O avega e tatau ona tauaveina e Ana auauna faamaoni i le olaga ua faamamaina e Lana Togiola. O le avega o le agasala e mafai ona aveesea, ae o tofotofoga o le olaga faaletino mo tagata lelei e mafai ona avefa pea ma ni avega mamafa.

Ua outou vaaia ia tofotofoga i olaga o tagata lelei tou te alolofa i ai. Ua outou lagonaina se manao e fesoasoani atu ia i latou. O loo i ai se mafuaaga o lou lagonaina o le agaalofoa mo i latou.

O oe o se tagata o le feagaiga o le Ekalesia a Iesu Keriso. Sa amata se suiga tele i lou loto ina ua e oo mai i totonu o Lana Ekalesia. Sa e osia se feagaiga, ma e mauaina se folafolaga lea na amata suia ai lou lava natura.

Sa faamatalaina e Alema i ana lava upu i le Vai o Mamona, le mea lea sa e folafolaina atu i lou papatisoga ma le uiga o le a i ai ia te oe ma tagata uma o siomiaina oe—aemaise i o outou aiga. Sa saunoa atu o ia ia i latou sa sauni e osia feagaiga ia ua e osia, ma sa latou mauaina foi folafolaga na faia e le Alii ia te oe:

“Faauta, o vai nei o Mamona (ona sa faapea ona ta’ua o ia vai) ma o lenei, ona ua outou mananao e o mai i le lafu a le Atua, ma ta’ua o ona tagata, ma outou loto e tauave avega a le tasi, ina ia māmā;

“Ioe, ma outou loto e faanoanoa faatasi ma e faanoanoa; ioe, ma faamafanafana atu ia te i latou o e e manaomia le faamafanafanaga, ma tutu o ni moli-mau a le Atua i taimi uma ma i mea uma, ma nofoaga uma atonu tou te i ai, seia oo lava i le oti, ina ia mafai ona togiolaina outou e le Atua, ma faitauina faatasi ma i latou o le uluai toetutu, ina ia mafai ona outou maua le ola e faavavau.”²

O le mafuaaga lena e te maua ai se lagona o le fia manao ia fesoasoani atu i se tagata o loo tauivi e agai i luma a o mamafatu i se avega o le faanoanoa ma faigata. Na e folafola atu o le a e fesoasoani i le Alii ia faamāmāina a latou avega ma ia faamafanafanaina. Ua uma ona tuuina atu ia te oe le mana e fesoasoani ai e faamāmāina na avega pe a e mauaina le meaalofoa o le Agaga Paia.

Sa faamatalaina e le Faaola le auala e fesoasoani ai o Ia e faamāmāina avega ma tuu atu le malosi e tauave ai ina ua lata ina faasatauroina o Ia. Sa Ia silafia o le a faanoanoa Ona soo. Sa Ia silafia latou te ono matatau mo lo latou lumanai. Sa Ia silafia o le a latou lagonaina le masalosalo i o latou gafatia e agai ai i luma.

O lea sa Ia tuu atu ai ia i latou le folafolaga lea ua Ia faia ia i tatou ma i Ona soo moni uma:

“Ou te fai atu foi i le Tama, ona foi mai ai lea e ia ia te outou le tasi Fesoasoani, ina ia tumau pea o ia ia te outou e faavavau;

“O le Agaga lea . . . [o] le upu moni, e le mafai e le lalolagi ona talia o ia, aua ua le vaaia o ia, ua le iloa foi o ia; a o outou, ua outou iloa o ia, aua e tumau pea ia ia te outou, e i ai foi o ia i totonu ia te outou.”³

Ona Ia folafola mai lea:

“A o le Fesoasoani, o le Agaga Paia lea, e auina mai e le Tama i lo’u igoa, o ia lava na te aoao ia te outou i mea uma lava, e faamanatu mai foi o ia ia te outou i mea uma ua ou fai atu ai ia te outou.

“Ou te tuuina atu ia te outou le manuia, o lo’u manuia ou te avatu ai ia te outou; ou te le avatu ia te outou faapei ona avatu e le lalolagi. Aua le atuavale o outou loto, aua foi tou te matatau.”⁴

I ni nai vaiaso talu ai na ou vaaia ai lena folafolaga o le auina mai o le





aiga i se tafaoga. Sa ou toe maua foi le avanoa e vaaia ai le auala na faamanuiaina ai e le Alii ē faatuatua i le toomaga ma le malosi e tumau ai.

Sa ou vaavaai i le auala sa faamāmāina ai e le Alii a latou avega mamafa. Sa ou i ai ma i latou o se auauna o le

Mumbai, Initia

Alii e faamafanafana i latou. Sa matou nofonofu i lo matou potu malolo. Sa ou faamafanafanaina le potu o se po malulu i se tamai afi i le magalafu.

Sa ou lagonaina ia tau atu ia i latou ou te alofa ia i latou. Sa ou tau atu ia i latou ua ou lagonaina le alofa o le Alii mo i latou. I ni nai upu lava, sa ou taumafai ai e tau atu ia i latou o loo ou faanoanoa foi mo i latou ae ua na o le Alii lava sa Ia silafia ma mafai ona lagonaina atoatoa lo latou tiga ma le faavauvau.

Ina ua maea ona fai atu na upu, sa ou lagona le uunaiga ia faalogo atu ma le alofa a o latou talanoa mai i o latou lagona.

I le itula sa matou nofonofu faatasi ai, sa tele mea na la saunoa ai i lo au. Sa mafai ona ou lagonaina i o la siufoga ma vaaia i o la fofoga sa pa'i atu le Agaga Paia ia te i laua. Sa la saunoa e uiga i le mea na tupu ma o la lagona i upu o se molimau faigofie. Ua uma lava ona tuu atu e le Agaga Paia ia i laua le filemu lea e sau mai le faamoe-moe o le ola e faavavau, i le taimi o le a avea ai lo la atalii, lea ua maliu e aunoa ma se agasala, ma o la atalii e faavavau.

Ina ua ou tuu atu ia i laua uma se faamanuiaga faaleperisitua, sa ou faafetai i ai mo le faatosinaga a le Agaga Paia sa i ai iina. Sa oo mai Lē Faamafanafana, ma aumaia le faamoe-moe, lototele, ma le malosi faateleina mo i matou uma.

I lena po, sa ou vaaia ai le faaalua o le auala e galue ai le Alii faatasi ma i tatou e faamama ia avega a Ona tagata. E te manatua i le Tusi a Mamona i le taimi na toetiiti lava a olopalaina ai Lona nuu i avega na tuu i o latou luga e tagata sau.

Sa aioi tagata mo se toomaga, e pei ona faia e le toatele o e tatou te alolofa ma auauna i ai. O le faamaumauga lenei, lea ou te iloina e moni:



Agaga Paia ua faataunuuna i olaga o fanau a le Atua sa aioi atu i tatalo ina ia faamāmāina a latou avega. O le vavega o avega e faamāmāina na oo mai i se ala na folafola mai e le Alii. Sa Ia auina maia ma le Tama Faalelagi le Agaga Paia e fai ma Faamafanafana i Ona soo e fesoasoani atu ai.

Talu ai nei sa faanoanoa ai ni augatupulaga se tolu o se aiga i le maliu o se tamaitiiti e lima tausaga le matua. Sa maliu faafuasei o ia a o i ai ma lona

feagaiga a le Alii—e pei lava ona outou faia soo i tou olaga—“e faanoanoa faatasi ma e faanoanoa . . . ma faamafanafana atu ia te i latou o e e manaomia le faamafanafanaga.”⁵

Ona sa ou iloina e moni lena mea, sa ou fiafia ai ma tofilemu ina ua valauliaina a'u e matua matutua ia matou feiloai faatasi ma matua o le tamaitiiti a o lei faia le falelauasiga.

Sa ou tatalo ia iloina le auala e mafai ona ou fesoasoani atu ai i le



“Ma o le a Ou faamāmāina foi avega ua tuu i o outou tau’au, e oo ia te outou tou te le lagonaina i latou i luga o o outou tua, a’o outou i ai lava i le pologa; ma o le a Ou faia lenei mea ina ia mafai ona outou tutu e avea o ni molimau mo a’u i le lumanai, ma ina ia mafai ona outou iloa ma le mautinoa o A’u, o le Alii le Atua, e asiasi atu i o’u tagata i o latou puapuaga.

“Ma o lenei sa oo ina faamāmāina avega sa tuu i luga o Alema ma ona uso; ioe, sa faamalositia i latou e le Alii ina ia mafai ona latou tauave ma le faigofie a latou avega, ma sa latou gaua’i atu ma le fiafia ma le onosai i le finalo atoa o le Alii.”⁶

Ua ou vaia lena vavega i le tele o taimi. Tatou te faamāmāina avega a isi i se auala silisili e ala i le fesoasoani atu i le Alii ia faamalositia i latou. O le mafuaaga lena ua faaafafia ai e le Alii i lo tatou tiute o le faamafanafanaina o isi le poloaiga ia avea ma Ana molimau i taimi uma ma i nofoaga uma.

Sa tuu mai e le tama ma le tina o le tamaitiiti le molimau o le Faaola i lena afiafi i lo’u potu malolo. Na oo mai le Agaga Paia. Sa faamafanafanaina uma i matou. Sa faamalositia matua. O le avega o le faanoanoa sa lei mou atu, ae sa mafai ona laua lavatia le faanoanoa. Sa faatupulaia lo la faatuatua. Ma o le a faaauau pea ona tuputupu ae lo la malosiaga a o la talosagaina pea ma ola ai mo lena malosiaga.

O le molimau a le Agaga e uiga i le Togiola lea na oo mai i lena po

sa faamalositia ai foi Iopu e tauave lana avega:

“Aua ua ou iloa, o loo soifua le na te togiolaina a’u; o aso amuli foi e tulai mai ai o ia i luga o le elelee:

“E ui lava foi ina faaumatia lenei tino pe a mavae atu lo’u pa’u, a e ou te iloa atu le Atua i lo’u tino.”⁷

O le molimau lena a le Agaga na ia maua ai le malosi e tumau ai. E oo lava o ia i le faanoanoa ma le lei o se faamafanafanaga mai tagata na siomia ai o ia ia iloa ai le olioli lea e sau mai le faamaoni pe a manumalo ma le faamaoni i o latou tofotofoga.

Sa moni lea mea mo Iopu. Sa oo mai faamanuiga ia te ia i lenei olaga. Sa faamutaina le tala a Iopu i lenei vavega:

“Ua sili foi ona faamanuia e Ieova o le gataaga o Iopu i lona amataga. . . .

“E lei iloa foi i le nuu uma ni fafine lalelei e tusa ma afafine o Iopu. Ua avatu foi ia te i latou e lo latou tama o tofi faatasi ma o latou tuagane.

“Ona ola pea lea o Iopu, ina ua mavae o ia mea, o tausaga e tasi le selau ma le fa o sefulu. Ua ia iloa foi ona atalii, ma atalii o ona atalii, e oo atu i tupulaga e fa.

“Ona oti lea o Iopu, ua toeaina, ma ua tuutulu’i lona ola.”⁸

Sa ala mai i le molimau a le Agaga e uiga i le oo mai o le Togiola lea na tumau ai Iopu i tofotofoga ia ua faamoemoe e oo mai i le olaga. O le vaega lena o le fuafuaga sili o le fiafia na aumai e le Tama ia i tatou. Sa Ia faa-tagaina Lona Alo ina ia saunia, e ala i

Lana taulaga togiola, le faamoemoe lea e faamafanafanaina ai i tatou e tusa lava po o le a le faigata e ono oo ai lo tatou auala e toe foi atu ia te Ia.

Ua auina mai e le Tama ma le Alo le Agaga Paia e faamafanafana ma faamalositia soo o le Matai i la latou malaga.

Sa ou vaia lenei vavega o le faamafanafanaga ina ua ou taunuu i fafo o le falesa lea sa faia ai le falelauasiga o le tamaitiiti. Sa taofi mai au e se tamaitai agalelei sa ou le iloaina. Sa ia fai mai sa sau i le falelauasiga ia faanoanoa ma tuu atu le faamafanafanaga pe a ia mafaia.

Sa ia fai mai na sau i le falelauasiga o se vaega o le faamafanafanaga mo ia lava. Sa ia faamatala mai e lei leva atu na maliu ai lana tama muamua. Sa ia siina se teineitiiti lalelei. Sa ou falo atu ia ou tilotilo atu i foliga matafiafia o le teineitiiti. Sa ou fesili atu i le tina o le pepe, “O ai lona igoa?” Sa ia tali vave mai ma le fiafia “O lona igoa o Olioli. E mulimuli mai lava le olioli pe a mavae faanoanoaga.”

Sa ia tuuina mai lana molimau ia te au. Sa mafai ona ou vaia le filemu ma le mafanafana ua oo atu ia te ia mai le puna mautinoa e tasi. Ua na o le Atua e silafaiaina loto, ma o lea e na o Ia lava e mafai ona fetalai i le upumoni, “Ou te iloa ou lagona.” O lea e na o lo ta mafaufauina lava o lona olioli ma le faanoanoa na muai oo i ai, ae ua silafia e le Alii o le e alofa ia te ia.

E na o sina vaega e mafai ona ou iloaina o le tele o le olioli Na te lagonaina i taimi uma e te fesoasoani atu ai ia te Ia, i le avea ai ma Ona soo, e aumaia se taimi o le filemu ma le olioli i se atalii po o se afafine o lo tatou Tama Faalelagi.

Ou te tuu atu lau molimau ua faatunuina e le Alii i tatou taitoatasi, o Ona soo, ia fesoasoani e tauave e le tasi le avega a le isi. Ua tatou folafola atu foi e faia lena mea. Ou te molimau atu, e ala

i Lana Togiola ma le Toetu, ua motusia ai e le Alii mana o le oti. Ou te molimau atu ua auina mai e le Keriso soifua le Agaga Paia, le Faamafanafana, ia i latou ua tatou osifeagaiga ia fesoasoani atu ia te Ia ia faamafanafana ia i latou.

O outou uma o molimau, e pei foi o au, o le upumoni o le lomiga o loo i luga o le pine na fai e lo'u tina mo le silia ma le 20 tausaga i le ave ai ma se sui o le fono faatonu aoao o le Aualofa. E faitauina, "E Le Uma le Alofa."⁹ Ou te le o iloaina lava le uiga atoa o na upu. Ae ua ou maua sina vaaiga e pei ona sa ou vaaia o ia aapa atu i e le tagolima. Ua tau mai e tusitusiga paia lenei upumoni: "O le alofa mama o le alofa le pona lea o Keriso."¹⁰

E le uma lava Lona alofa, ma o le a le tuua lava lo tatou lagonaina i o tatou loto le uunaiga "e faanoanoa faatasi ma e e faanoanoa . . . ma faamafanafana atu ia i latou o e e manaomia le faamafanafanaga"¹¹ E faapena foi o le a le tuua lava i tatou e le filemu ua Ia folafola mai pe a tatou auauna atu i isi mo Ia.

I le avea ai ma Ana molimau, ou te faafetai atu mo mea ua matua lelei ona outou faia e fesoasoani i le Alii soifua o Iesu Keriso ma le Agaga Paia, le Faamafanafana, faamalolosa o tulivae ua vaivai ma sii i luga lima ua tautau i lalo.¹² Ou te faafetai, ma lou loto atoa, mo tamaitai i lou olaga o e na fesoasoani ma faamanuia au i le avea ai o ni soo moni o Iesu Keriso. I le suafa o Iesu Keriso, amene. ■

FAAMATALAGA

1. Mataio 11:28–30.
2. Mosaea 18:8–9.
3. Ioane 14:16–17.
4. Ioane 14:26–27.
5. Mosaea 18:9.
6. Mosaea 24:14–15.
7. Iopu 19:25–26.
8. Iopu 42:12, 15–17.
9. 1 Korinito 13:8.
10. Moronae 7:47.
11. Mosaea 18:9.
12. Tagai Mataupu Faavae ma Feagaiga 81:5.





Saunia e Peresitene Henry B. Eyring
Fesoasoani Muamua i le Au Peresitene Sili

“E Le o Lenei Ea le Anapogi Ou te Loto I Ai?”

O le a sili atu mea e faia e lau taulaga anapogi nai lo le fesoasoani atu e fafaga ma faalavalava ni tino. O le a faamaloloina ma suia ia loto.

O uso e ma tuafafine, o se fiafiaga mo au le faailoa atu o lo’u alofa ia te outou i lenei konafesi aoao o Le Ekalesia a Iesu Keriso o le Au Paia o Aso e Gata Ai. O lena fiafia e sau mai le molimau a le Agaga e faapea e oo atu le alofa o le Faaola ia te outou taitoatasi ma fanau uma a le Tama Faalelagi. E finagalo lo tatou Tama Faalelagi e faamanuia Lana fanau i le faaleagaga ma le faaletino. E malamalama foi o Ia i o latou manaoga taitoatasi, a latou fuafuaga, ma o latou faamoemoega.

A tatou ofo atu se fesoasoaniga i soo se tasi, e lagonaina e le Faaola e peiseai o tatou aapa atu e fesoasoani ia te Ia.

Na Ia tau mai le moni o lena mea ia i tatou ina ua Ia faamatalaina se taimi o le lumanai o le a tatou maua uma pe a tatou vaai ia te Ia pe a mavae ma faamaeaina lo tatou olaga i lenei lalolagi. O se ata i lo’u mafaufau o lena aso ua faatupulaia atili ai le manino i aso na ou tatalo ai ma anapogi ia iloa le mea ou te tautala ai i lenei taaao. O le faamatalaga a le Alii o lena faatalanoaga

i le lumanai sa tuuina atu i Ona soo, ma ua faamatalaina ai mea tatou te mananao ai ma o tatou loto atoa ina ia moni mo i tatou foi:

“Ona fai atu ai lea o le Tupu i e o i lona itu taumatau, O mai ia, o outou ua faamanuiaina e lou Tama, ia fai mo outou tofi le malo ua saunia mo outou ao lei faavaeina le lalolagi:



“Aua na ou fia’ai, ona outou avane ai lea ni mea ou te ai ai: na ou fi inu, ona outou avane ai lea ni vai ou te inu ai: Sa fai a’u ma tagata ese, ona outou talia lea o a’u:

“Na ou le lavalava ona outou faaofuina lea o au: na ou ma’i ona outou asiasia mai lea o au: na ou i le falepuipui ona outou o ane ai lea ia te au.

“Ona tali mai ai lea ia te ia o e amio-tonu, e faapea mai, Le Alii e, o anafea ua matou iloa ai oe ua fia ai ma matou fagaina oe? po o fia inu, ma matou avane e te inu ai?

“O anafea foi na matou iloa ai oe o le tagata ese, ma matou talia oe? po o le le lavalava, ma matou faaofuina oe?

“O ana fea foi na matou iloa ai oe ua ma’i, po o i le fale puipui ma matou o atu ai ia te oe?

“Ona tali atu ai lea o le Tupu, e faapea atu ia te i latou, E moni, ou te fai atu ia te outou, aua na faia e outou i le tasi o e aupito itiiti o o’u uso nei, o a’u lea na outou faia i ai.”¹

Tatou te mananao uma i lena faafeiloaiga fiafia mai le Faaola. Ae e mafai faapefea ona onomea ia i tatou? O loo toatele atu tagata fiaaai, leai ni aiga, ma fanau ua tuulafoaiina a le Tama Faalelagi nai lo i latou atonu e mafai ona tatou fesoasoani i ai. Ma o loo faatupulaia pea le aofai tatou te le o oo atu i ai.

O lea ua tuuina mai ai e le Alii ia i tatou se mea e mafai ona faia e i tatou taitoatasi. O se poloaiga e matua faigofie lava lea e mafai ona malamalama i ai se tamaitiiti. O se poloaiga faatasi ma se folafolaga mo e le tagolima ma i tatou foi.

O le tulafono o le anapogi. O upu o loo i le tusi a Isaia o le faamatalaga lea a le Alii e uiga i le poloaiga ma le faamanuiaga o loo avanoa mo i tatou i Lana Ekalesia:

“E le o lenei ea le anapogi ou te loto i ai? ina ia tatalaina fusi na faia i le amio

leaga, e tatala fusi o le amo, e tuuina atu ia saoloto ē ua faasauaina, ma ia outou gausia amo uma lava?

“E le o lenei ea? Ona ia tofitofi au mea e ai i le ua fia ai, ia au mai i lou fale ē ua matitiva ma faasauaina; a e iloa lē ua lē lavalavā e te faaofuina o ia, aua foi e te lafi ia i latou o lou lava aiga?”

“Ona gafoa mai ai lea o lou malamalama e pei o le tafa o ata, e taalise ona tupu mai foi o lou malolo; e alu atu foi lau amiotonu i ou luma, e muli’au mai le pupula o Ieova ia te oe.

“Ona e valaau lea, a e tali mai ai Ieova; e te alaga atu, a e fetalai mai o ia, O a’u lenei pe afai e te faateaseina le amo ia te outou, o le tusi o le lima, ma le upu vale;

“Afai foi e te alofa atu i le ua fia’ai, ma e fafaga ia ma’ona o le ua tiga; ona alu ae lea o lou malamalama i le pouliuli, ma lou pogisa e pei o le aoauli ia:

“E taitaina foi oe e le aunoa e Ieova; e faamalie foi o ia ia te oe pe a oge vai, ma faamalosia ou ivi; e avea foi oe e pei se fanua ua faasūsūina, e pei o le punavai foi e le mate ona suavai.”²

O lea ia ua tuuina mai ai e le Alii ia i tatou se poloaiga faigofie faatasi ma se folafolaga ofoofogia. I le Ekalesia i nei aso ua ofo mai ai ia i tatou le avanoa e anapopogi ai faa-tasi i le masina ma tuu atu se taulaga anapogi limafoai i lo tatou epikopo po o le peresitene o le paranesi mo le manuia o lē mativa ma lē tagolima. O nisi o ia mea o le a e foai atu o le a faaaogaina e fesoasoani atu ai i e o siomia oe, masalo o se tasi i lou lava aiga. O le a tatalo ma anapopogi auauna a le Alii mo le faaaliga ia iloa ai po o ai e fesoasoani i ai ma po o le a foi se fesoasoaniga e tuu atu. O vaega o lena taulaga ua le manaomiaina e fesoasoani ai i tagata i la outou iunite o le Ekalesia i le lotoifale o le a avanoa lea e faamanuiaina ai isi tagata



o le Ekalesia i le lalolagi atoa, o e o loo mafatia.

O le poloaiga ia anapopogi mo e matitiva ua anoanoai faamanuiaga o loo afifi mai ai. Sa ta’ua e Peresitene Spencer W. Kimball o le le usitaia o lena tulafono o se agasala o le faatalalē ma e i ai sona tau mamafa. Sa ia tusia: “O folafolaga silisili ua faia e le Alii ia i latou o e anapopogi ma fesoasoani i e le tagolima. . . . O le a oo mai musumusuga ma le taitaiga faaleagaga faatasi ai ma le amiotonu ma le latalata atu i lo tatou Tama Faalelagi. O le faatalale e fai lenei faatinoga amiotonu o le anapogi o le a faoa ai mai ia i tatou nei faamanuiaga.”³

Sa ou maua se tasi o na faamanuiaga i ni nai vaiaso ua tuanai atu. Talu ai e pa’ū le konafesi aoao i se faaiuga o le vaiaso lea e masani ona aofia ai ma le sauniga anapogi ma molimau, sa ou anapogi ai ma tatalo ia iloa le auala e tatau ai pea ona ou usitaia le poloaiga ia tausia ē lē tagolima.

I se Aso Toonai, a o anapogi ai, sa ou ala ae i le 6:00 ma toe tatalo. Sa uunaia au ou te matamata i talafou i le lalolagi. O iina sa ou faitau ai i le lipoti lenei:

Na faatamaia e le Āfā Fulifaō o Pam le tele o fale a o taia tonu ai Port Vila, le laumua o Vanuatu. Ua fasiotia ai e le itiiti ifo ma le toa ono tagata i Vanuatu, o le uluai lipoti faamaonia lea mai se tasi o āfā sili ona malosia ua taia ai le motu.

“Ua tau le i ai se laau o toe tu sao ona sa agi sa’o atu i ai le āfā i lea motu o le Pasefika.”⁴

Na fuafua e le vaega o iloiloga mo faalavelave faafuasei a le World Vision ia iloilo ina mea ua faaleagaina i le mavae ai o le afa.

Sa latou fautuaina tagata ia saili atu i ni malutaga i fale malolosi e pei o iunivesite ma aoga.

Ona latou faapea mai lea: “O fale sili ona malolosi o ia i latou o falesa simā,’ sa fai mai ai Inga Mephām [mai le] CARE International. . . . ‘Ae o nisi o i latou e leai ni fale faapena. E faigata tele ona maua se fausaga e te manatu o le a mafai ona tatalia se (matagi) o le vaega 5.’”⁵

Ina ua ou faitau i ai, sa ou manatuaina la’u asiasiga i tamai fale o aiga i Vanuatu. Sa mafai ona ou vaai faalemafaufau i tagata o faatasitasi i fale ua faatamaia e matagi. Ona ou manatua lea o le faafeiloaiga fiafia o a’u e tagata o Vanuatu. Sa ou mafaufau ia i latou ma o latou tuaoi o sosola ese atu i le saogalemu o o tatou falesa simā.

Ona ou vaai faalemafaufau lea i le epikopo ma le peresitene o le Aualofa o savavali atu ia i latou, ma tuu atu faamafanafanaga, palanikeke, mea tau-mafa, ma vai inu. Sa mafai ona ou vaai faalemafaufau i le fefefe o fanau o loo potopoto faatasi.

Ua matua mamao ese lava i latou mai le fale sa ou faitauina ai lena lipoti,

faamaoni, o loo tu o ia i luga o se eleele paia.¹¹

E pei lava ona mafai e le mauaina o faamanuiaga o au taulaga ma a'u taulaga anapogi ona suia loto, e faapena foi i le anapogi mo le manuia o isi. E oo lava i se tamaitiiti na te lagonaina lava.

E toatele tamaiti, ma nisi o tagata matutua, atonu mo ni mafuaaga patino e faigata ai ona anapogi mo le 24 itula. I upu a Isaia, e mafai ona lagonaina o le anapogi e “mafatia ai o [latou] agaga.” E iloa e matua atamamai lena avanoa ma o lea e mulimuli ai ma le faaeteete i le fautuaga a Peresitene Iosefa F. Samita: “E sili atu le aoao o i latou i le mataupu faavae, ma tuu i latou e tausia pe a lava lo latou matutua e filifili ai ma le atamai.”¹²

Sa ou vaaia le faamanuiaga i lena fautuaga talu ai nei. Sa iloa e se tasi o atalii o la'u fanau le faigata tele ona onosaia le anapogi e 24 itula. Ae sa tuu pea e ona matua atamamai le mataupu faavae i lona loto. Sa maliu talu ai nei se tausoga o se tasi o ana uo i le aoga i se faalavelave. Sa fesili atu le atalii lea i lona tina i le aso anapogi, i le taimi tonu e masani lava ona faafaigata ai

ona faaauau le anapogi, pe faamata o le a lagona e lana uo faanoanoa le mafanafana pe a faaauau pea lana anapogi.

O lana fesili o le faamautinoaga lea o le fautuaga a Peresitene Iosefa F. Samita. Ua oo le atalii o se tasi o la'u fanau i le tulaga e le gata ua ia malamalama i le mataupu faavae o le anapogi, ae sa totona foi i lona loto. Ua oo ina ia lagonaina o lana anapogi ma tatalo o le a taitai atu ai i se faamanuiaga mai le Atua mo se tasi o loo mafatia. Afai e lava lona ola soo ai i le mataupu faavae, o le a aumaia ni aafiaga matagofie i lona lava olaga, e pei ona folafola mai e le Alii. O le a ia maua faamanuiaga faaleagaga o le mana e maua ai musumusuga ma le gafatia sili atu e tete e ai faaosoosoga.

Tatou te le iloa uma ni mafuaaga na afio atu ai Iesu Keriso i le togavau e anapogi ma tatalo ai. Ae ua tatou iloa ina o se tasi o ia aafiaga: sa teena atoa e le Faaola faaosoosoga a Satani ia faaaga sese Lona mana paia.

O si taimi puupuu lava tatou te anapopogi ai i masina uma ma sina tupe itiiti tatou te ofo atu mo ē matitiva e mafai ona tatou maua ai na o sina

vaega o le suiga i o tatou natura ia le toe i ai se manao e faia le leaga. Ae o loo i ai se folafolaga sili ua tuuina mai ia i tatou pe a tatou faia mea mea uma tatou te mafaia e tatalo ai, anapogi, ma foai atu mo i latou o ē lē tagolima:

“Ona gafoa mai ai lea o lou malamalama e pei o le tafa o ata, e taalise ona tupu mai foi o lou malolo; e alu atu foi lau amiotonu i ou luma, e muli'au mai le pupula o Ieova ia te oe.

“Ona e valaau lea, a e tali mai ai Ieova, e te alaga atu, a e fetalai mai o ia, O a'u leni.”¹³

Ou te tatalo ia tatou maua na faamanuiaga ofoofogia mo i tatou lava ma o tatou aiga.

Ou te molimau atu o Iesu o le Keriso, i totonu o Lana Ekalesia ua valaaulia ai i tatou ia fesoasoani atu ia te Ia a o Ia tausia ē matitiva i Lana lava ala, ma ua Ia folafola mai faamanuiaga e faavavau o le a oo mai mai lo tatou fesoasoani atu ia te Ia. I le suafa o Iesu Keriso, amene. ■

FAAMATALAGA

1. Mataio 25:34–40.
2. Isaia 58:6–11.
3. Spencer W. Kimball, *The Miracle of Forgiveness* (1969), 98.
4. Tagai Steve Almasy, Ben Brumfield, and Laura Smith-Spark, “Cleanup Begins in Vanuatu after Cyclone Batters Islands,” Mar. 14, 2015, edition.cnn.com.
5. Tagai Sean Morris, Steve Almasy, and Laura Smith-Spark, “‘Unbelievable Destruction’ Reported in Tropical Cyclone Pam’s Wake,” Mar. 14, 2015, edition.cnn.com.
6. Peter F. Evans, “Sister Abie Turay’s Story,” tusiga e lei lolomiina.
7. Peter F. Evans, “Sister Abie Turay’s Story.”
8. Abie Turay, quoted in Peter F. Evans, “Sister Abie Turay’s Story.”
9. Peter F. Evans, “Sister Abie Turay’s Story.”
10. Abie Turay, quoted in Peter F. Evans, “Sister Abie Turay’s Story.”
11. Peter F. Evans, “Sister Abie Turay’s Story”; o se vitio e faatatau ia Tuafafine Tulei, “We Did Not Stand Alone,” o loo maua i le lds.org/media-library.
12. Joseph F. Smith, “Editor’s Table,” *Improvement Era*, Dec. 1903, 149.
13. Isaia 58:8–9.





Saunia e Peresitene Boyd K. Packer
Peresitene o le Korama a Aposetolo e Toasefululua

O Le Fuafuaga o le Fiafia

O le taunuuga o gaoioiga uma i le Ekalesia, o le vaai lea o fiafia se alii ma se tamaitai faatasi ma a la'ua fanau i le aiga ma ua faamauina faatasi mo le olaga nei ma le faavavau atoa.

Etele tausaga ua mavae, ina ua maea le Taua Lona Lua a le Lalolagi, sa ou aoga i le iunivesite ina ua ma feiloai ma Donna Smith. Pe tusa o lena taimi sa ou faitau ai faapea e lua mea e manaomia mo se faaipopoga manuia o se kuki ma se kisi. Sa ou mafaufau faapea e fai si paleni lelei.

Ou te aoga i le iunivesite i le taeao, ona ou alu ai lea i le Aai o Polika Iaga e faigaluega i le fale lipea o lo'u tama. O le vasega mulimuli a Donna i le taeao o le faafatuaiga. Ou te afe lava i lona potu aoga mo sina taimi ae ou te le i alu. O le faitotoa e i ai le tioata sulu, ae a ou tu lata i le tioata, e mafai ona ia iloa mai lo'u atalafoia i fafo. Ona ia la'a mai lea i fafo ma se kuki ma se kisi. O le taunuuga, o le talafaasolopito lea. Sa ma faaipopo i le Malumalu o Logan, ma o iina na amata ai le malaga tele o o ma'ua olaga.

I le tele o tausaga sa masani ona ou aoao atu ai se mataupu faavae taua: o le faamoemoega o gaoioiga uma i le Ekalesia, o le vaai lea o fiafia se alii ma se tamaitai faatasi ma a la'ua fanau i le aiga ma ua faamauina faatasi mo le olaga nei ma le faavavau atoa.

I le amataga:
“Na affio ifo Atua i lalo e faatulaga le tagata i lo latou lava faatusa, e fai e i latou o ia i le faatusa o Atua, e fai e i latou i laua o le tane ma le fafine.
“Ma sa fetalai ane Atua: O le a tatou faamanuia i laua. Ma sa fetalai ane Atua: O le a tatou faia i laua ia fanafanau ma uluola, ma faatumuina le lalolagi, ma faato'a i ai” (Aperaamo 4:27–28).



Ma o lea sa amata ai le taamilosaga o le tagata soifua i lenei lalolagi ina “ua iloa e Atamu lana ava, ma sa fanauina e ia ia te ia o atalii ma afafine, ma sa amata ona latou fanafanau ma uluola i le lalolagi.

“Ma . . . sa amata ona vaevae tai-toalua o atalii ma afafine o Atamu i le laueleele, . . . ma sa latou fanauina foi atalii ma afafine” (Mose 5:2–3).

O le poloaiga e fanafanau ma uluola ma faatumuina le lalolagi, e lei aveesea lava. E manaomia i le fuafuaga o le togiolaina ma o le punavai o le fiafia o le tagata. E ala i le faaaogaina ma le amiotonu o lenei mana, e mafai ai ona tatou latalata i lo tatou Tama i le Lagi ma iloa ai le atoaga o le olioli, le tulaga faaleatua. O le mana o le foafoaina o le ola, e le o se vaega faaopoopo o le fuafuaga o le fiafia; o le ki lea i le fiafia.

O le manao o le tagata soifua e faaulugalii e faifai pea ma e malosi tele. O lo tatou fiafia i le olaga faitino, o lo tatou olioli ma le faaeaga e faalagolago i le ala tatou te tali atu ai i nei manaoga malolosi faaletino faifai pea. A oo ina matua le mana e foafoa ai le ola i le popofou faatamatane ma faaletamaitai, ona tulai mai lea o lagona patino, i se ala faalenatura, e le pei o se isi lava aafiaga faaletino.

A tusa ai, o le faaulugalii e amata i le alofa faamama'i. E ui atonu e eseese agaifanua, ae o loo lauusi i lagona o le sagisagi ma faanaunauga e maua i tusitala, o nisi foi taimi e teena. E i ai le masina susulu ma fuarosa, o tusi alofa, o pese alofa, o solo, o le uulima, ma isi faailoaga o le faananau i le va o se alii talavou ma se tamaitai talavou. E oo ina le toe manatu i laua i nisi lava mea o le lalolagi ae ua na o laua lava, ma la faalogoina ai lagona o le olioli.

Ma afai e te manatu o le atoaga o le faaosofia o le alofa faamama'i talavou, o le taunuuga lea o avanoa e puna ae

mai mana e foafoa ai, e te lei ola la e vaai i le tuuto ma le mafanafana o le alofa ua faaiipoipoina mo se taimi umi. E tofotofoina ulugalii faaiipoipo i faaososoga, o le le femalamalamaa'i, o faafitauli tautupe, o mafatiaga faaleaiga, o ma'i, ma i taimi o nei aafiaga uma, e tuputupu malosi ai lava le alofa. O le alofa ua matua e i ai le fiafia e lei mafaufauina e i latou faatoa faaiipoipo.

O le alofa moni e manaomia ai le faasaosao seia maea ona faaiipoipo, ona fefaasoa'i lea o lona alofa faama-ma'i lea e tatalaina ai na mana paia e foafoa ai le ola. O lona uiga o le aloese mai tulaga ia e ono pulea ai e manaoga faaletino. O le alofa mama e faapea e seiloga ua uma se tautoga o le faama- oni e faavavau, se sauniga faaletulafono aloaia, ma e sili lava pe a maea le sauniga faamau i le malumalu, e faamatuu mai ai na mana foafoa e tusa ai ma le Atua mo le faailoaga atoa o le alofa. E ao ona faaoga faatasi ma na o lē lava ua aveva ma au soa e faavavau.

A ulu atu i ai ma le agavaa, o lenei faagasologa ua tuu faatasia ma lagona aupito matagofie ma faaeaina faaletino, faalelagona, ma faaleagaga e soofaatasi ma le upu *alofa*. O lona vaega o le olaga e leai se mea e faatusalia i ai, i aafiaga uma o le tagata soifua. A osia feagaiga ma tausia, o le a tumau e faavavau, “o totonu iina e faauu atu ai ki o le perisitua paia, ina ia outou maua le viiga ma le mamalu” (MF&F 124:34), “o le mamalu lea o le atoatoaga ma le faaauuina o fanau e faavavau ma faavavau lava” (MF&F 132:19).

Ae o le alofa faamama'i e le atoatoa; ua na o se faatomuaga. O le alofa e faafailele i le oo mai o fanau, o e foafoa mai i lona punavai o le ola ua faatua-tuaina ai ulugalii i le faaiipoipoga. O le a fuafuaina e faatino i se faatasiga ua faaiipoipoina i le va o se tane ma le ava. E amata ona tupu si tino itiiti mai se



mamanu lavelave ofoofogia. E oo mai se tamaitiiti i le vavega o le fanau mai, na foafoaina i le faatusa o lona tama ma le tina faalelalogagi. I totonu o lona tino faitino ua i ai se agaga ua mafai ona lagonaina ma iloa mea faaleagaga. Ua i ai i le tino faitino o le tamaitiiti le mana e fanauina ai fanau i lona lava faatusa.

“O le agaga ma le tino o le tagata lea” (MF&F 88:15), ma e i ai tulafono faaleagaga ma faaletino e usitaia pe a tatou mananao ia fiafia. E i ai tulafono e faavavau, e aofia ai tulafono e faata-tau i lenei mana e avatu ai le ola, “na folafola lē maaveesea i le lagi i luma atu o le faavaega o le lalolagi lenei ua faavae ai i luga faamanuiaga uma” (MF&F 130:20). O tulafono faaleagaga nei ia e faamaioio ai le tulaga faatonu-ina mama mo le tagata (tagai Faaliliuga a Iosefa Samita, Roma 7:14–15 [i le faaopopooga i le Tusi Paia]; 2 Nifae 2:5; MF&F 29:34; 134:6). E i ai feagaiga e noatia ai, faamau ai, ma malupuipua ai ma tuuina mai le folafolaga o faama-nuiaga e faavavau.

Na apoaoai atu Alema i lona atalii o Sepulona, “Ia pulea ou tuinanau uma, ina ia mafai ona faatuuina oe i le alofa” (Alema 38:12). O se faagutu e faaoga e taiala ai, e faatonutonu ai, e taofii ai. E tatau ona taofiofia o tatou lagona malolosi. A oo ina faaogaina faaletulafono, o le a faamanuiaina e le mana e foafoa ai le ola ma faapaiaina ai

(tagai *Aoaoga a Peresitene o le Ekalesia: Iosefa F. Samita* [1998], 162–3).

E i ai pea lava faaososoga. Talu ai e le mafai e le tiapolo ona fanauina le ola, ua lotoleaga o ia i e uma ua i ai lona mana faalelagi. O ia ma i latou sa mulimuli ia te ia na tuliese ma latou le maua ai le aia tatau mo se tino faitino. “Ua saili o ia ia pagatia tagata uma e pei o ia lava” (2 Nifae 2:27). O le a ia faaososo, pe afai na te mafaia, e faaleaga, e faapiopio, ma afai e mafai, e faaumatiaina le meaalofo lea e mafai ai ona maua aiga e faavavau pe afai tatou te agavaa (tagai MF&F 132:28–31).

Afai tatou te faapalpalaina o tatou punavai o le ola pe taitai atu isi ioli-tulafono, o le a i ai faasalaga e sili atu ona “tetele” ma “faigata ona onosaia” (MF&F 19:15) nai lo fiafiaga faaletino uma e mafai ona faatauaaina.

Sa ta'u atu e Alema i lona atalii o Korianetona, “Ua e le iloa ea, lo'u atalii e, o nei mea o ni mea inosia i le sila-faga a le Alii; ioe, ua silisili ona inosia i lo o agasala uma vagana ai le faama-saaina o le toto le sala po o le faafitia o le Agaga Paia?” (Alema 39:5). E le mafai ona tatou sosola ese mai le taunuuga o le solitulafono.

Na pau le faaogaaga faaletulafono, faatagaina o mana o le foafoaina o le ola e i le va lea o le tane ma le ava, o e ua faaiipoipoina aloaia ma faaletula-fono. O se isi mea e ese mai ai, ua solia



ai poloaiga a le Atua. Aua ne'i gauai atu i faaosoosoga mataga a le tiapolo, aua o aitalafu uma o le solitulafono e tatau ona totogi "seia e avatu tupe uma lava" (Mataio 5:26).

E leai se isi mea o sili ona faaalua mai ai le agalelei ma le alofa mutimutivale o le Atua nai lo le salamo.

O o tatou tino faaletino, a oo ina faa-manualia, e mafai ona toe faaleleia i latou lava, ae o nisi taimi e ala i le fesoasoani a se fomai. Peitai, afai e ogaoga le afaina, e tele lava ina tumau se ma'ila e avea o se faamanatu o le manu'a.

O o tatou tino faaletino o se isi lea mataupu. E faatamaia o tatou agaga pe a tatou faia ni mea sese ma faia ni agasala. Ae e le faapei o le tulaga o o tatou tino faaletino, a oo ina maea le faagasologa o le salamo, e le toe i ai ni ma'ila e totoe ona o le Togiola a Iesu Keiso. O le folafolaga o le: "Faauta, o ia o le ua salamo i ana agasala, o ia lava lea ua faamagaloina, ma o A'u, o le Alii, e le toe manatuina lava i latou" (MF&F 58:42).

A tatou talanoa e uiga i le faaipoipoga ma le olaga faaleaiga, e le maalo-fia le oo mai i le mafaufau, "Ae faapefea tuusaunoaga? O nisi e fananau mai ma ni tapulaa ma lē mafai ai ona fanauina ni fanau. O nisi e ta'umamaina ua faaleagaina a latou faaipoipoga ona o le faiamio o o latou taitoalua. O isi e le faaipoipo ae ola i ni olaga nofotoatasi ma le agavaa.

Mo le taimi nei, ou te tuuina atu lenei faamafanafanaga: O le Atua o

lo tatou Tama! O le alofa uma ma le agalelei e faaalua i le faataitaiga sili o se tama faaleolaga nei, e faateleina ia te Ia o le o lo tatou Tama ma lo tatou Atua i talaatu o le malosi o le mafaufau o le tagata e malamalama ai. E tonu Ana faamasinoga: e leai se tuaoi o Lona alofa mutimutivale; o Lona mana e le mafaatusalia faalelalolagi. "Afai ua gata i lenei olaga mea tatou te faamoemoe i ai ia Keriso, ua sili lo tatou malaia i tagata uma lava" (1 Korinito 15:19).

Ou te faaaogaina nei ma le migao le upu *malumalu*. Ou te vaai faalemafau-fau i se potu mo faamauga ma se fata faitaulaga o i ai se ulugalii talavou o tootutuli ai iina. O lenei sauniga paia o le malumalu e matuai sili nua nai lo se faaipoipoga, aua o lenei faaipoipoga e mafai ona faamauiina e le Agaga Paia o Folafolaga, ma ua tautino mai e le mau faapea o le a tatou "mautofi i nofoalii, malo, itumalo, ma mana, ma puleaga" (MF&F 132:19). Ua ou vaai i le olioli o loo faatalitali mai mo i latou o e taliaina lenei meaalofo faalelagi ma faaaogaina ma le tatau.

Toetiiti atoa le 70 tausaga o ma vaavaalua i le faaipoipoga ma Sister Donna Smith Packer. A oo mai i lo'u toalua, le tina o le ma fanau, e leai ni au upu e faamatala ai. E matua loloto tele le lagona ma e mamana nua le mana e toetoe ai ina a ou le magagana. O le tau ai aupito sili ua ma maua i lenei olaga, ma le olaga a sau, o a ma fanau ma fanau a le fanau. I le agai atu i le faaiuga faatasi

o o ma taimi i le olaga nei, ou te faafetai mo minute taitasi faatasi ma ia i o'u autafa, ma mo le folafolaga na tuuina mai e le Alii o le a leai se iuga.

Ou te molimau atu o Iesu o le Keriso, o le Alo o le Atua soifua. O loo tu o Ia i le ao o lenei Ekalesia. O Lana Togiola ma le mana o le perisitua, e mafai ai e aiga na amata i le olaga nei ona faatasi e oo i le faavavau. O le Togiola, lea e mafai ona laveai i tatou taitoatasi, o le a leai ai ni ma'ila po o faamanatu o ni manu'a. O lona uiga po o a mea ua tatou faia po o fea na tatou i ai pe na faapefea ona tupu se mea, afai tatou salamo faamaoni, ua Ia folafola mai o le a Ia togiolaina. Ma pe a Ia togiolaina, ua totogiina lenei mea. O le matua toatele lava o i tatou o e o lalafi solo, e pei na i ai, ma ni lagona o le tausalaina, ma le leiloa lelei pe faapefea ona sosola ese mai ai. E mafai ona e solaese i le taliaina o le Togiola a Keriso, ma o le a mafai ona liua ia faanoanoaga uma i le matagofie ma le alofa ma le faavavau.

Ou te matua faafetai mo faamanuiaga a le Alii o Iesu Keriso, mo le mana e foafoaina le ola, mo le mana o le togiola, mo le Togiola—o le Togiola lea e mafai ona fufulu mamaina soo se pisia e tusa lava po o le a le faigata po o le a le umi po o le a foi le tele o taimi na toe faia ai. O le Togiola e mafai ona toe faasaolotoina oe ia agai i luma, i le mama ma le agavaa, ia taulai atu i le ala ua e filifilia i le olaga.

Ou te molimau atu o loo soifua le Atua, o Iesu o le Keriso, o le Togiola e le o se mea lautele e mo le Ekalesia atoa. O le Togiola e mo tagata taitoatasi, ma afai o i ai se mea o e popole ai—o nisi taimi ua matua leva lava ua e tau le manatuina—tuu i le Togiola e galue. O le a faamamaina, ma o le a e le, e pei o Ia, toe manatuina au agasala. I le suafa o Iesu Keriso, amene. ■



Saunia e Linda K. Burton
Peresitene Aoao o le Aualofa

O Le A Tatou O Ae Faatasi i Luga

I le avea ai ma tamaitai ma alii tausī feagaiga, tatou te manaomia e siitia ma fesoasoani i le tasi ma le isi ma avea ma tagata e finagalo le Atua e avea ai i tatou.

E faapoopo atu i saunoaga, musika, ma tatalo musuia lea e ootia ai o tatou loto e le aunoa i le taimi o konafesi aoao, na ta’u mai ai ia te au e le toatele o tamaitai le mea e sili ona latou fiafia i ai o le matamata lea i le Au Peresitene Sili ma le Korama a Aposetolo e Toasefululua pe a latou tuua lenēi tulaga ma a latou soa faava-vau. Ma e tatou te le fiafia uma ea e faalogologo i le Usoga o faailoa mai ma le faamemelo lo latou alolofa mo i latou?

I lana saunoaga e uiga i lona faletua, o Donna, na saunoa mai ai Peresitene Boyd K. Packer, “Ona o le tofi o loo ou umia, ua ia te au se matafaioi paia e tau atu le mea moni: E atoatoa o ia.”¹

“O ia o se la susulu o lo’u olaga,”² na saunoa ai Peresitene Dieter F. Uchtdorf e uiga i lona faletua, o Harriet.

O Peresitene Henry B. Eyring, a o faasino i lona faletua, o Kathleen, na ia saunoa, “O ia o se tagata e naunau ina ia faamanoa a’u ou te faia le mea e sili ona ou mafaia.”³

Ma Peresitene Thomas S. Monson, a o saunoa ai i lana manamea o Frances: “O ia o lo’u ola atoa, o la’u soa faatua-tuaina, ma la’u uo mamae. I lo’u fai atu

ai ua ou misia lava o ia, e le o amata ai ona ou faamatalaina le loloto o ou lagona.”⁴

Ou te fia faailoa atu foi lo’u alofa mo la’u soa pele, o Craig. O ia o se meaalofo taua ia te a’u! O le faatatau a i lo’u toalua, o se fuaitau taua ma paia lea o folafolaga i lo’u faamanuiaga faapeteriaka e faapea o lo’u olaga ma olaga o la’u fanau o le a “lelei le tausiga e ia.” Ua manino ia te au o Craig o se faataunuuga o lena folafolaga. O le siiina mai o upu a Mark Twain, ou te



faapea atu ai “o le olaga e aunoa ma [Craig] o le a le pei o se olaga.”⁵ Ou te alofa tele lava ia te ia!

Matafaioi ma Tiutetauave Paia

I le asō ou te manao ina ia faamaluina tane, tamā, tuagane, atalii, ma tamā o aiga o e o silafia po o ai i latou ma o i latou o loo faia le mea sili latou te mafaia e faataunu ai o latou matafaioi ua tuu mai e le Atua e pei ona faamatalaina i le folafolaga i aiga, e aofia ai le pulefaamalumu ma le amiotonu ma le tausia ma le puipuia o o latou aiga. Faamolemole ia silafia ou te matua iloa lelei lava o autu e uiga i tulaga faatama, faatina, ma faaipoipoga e ono faapopoleina ai le toatele. Ou te iloa o lagona o nisi o tagata o le Ekalesia o le a le mafai e o latou aiga ona ausia le tulaga latou te manatu o se tulaga sili ona lelei. O le toatele o loo tiga ona o le tuulafoaiina, sauaina, o vaisu, ma tu ma aganuu le sa’o. Ou te le fiafia i faatinoga a alii po o tamaitai o e ua faia ma le iloa po o le leiloa foi ua mafua ai ona i ai le tiga, mafatia, ma faanoanoaga i o latou aiga. Peitai ou te tautala atu i le asō e uiga i se isi mea.

Ou te mautinoa e leai se taimi ua sili atu ai ona aulelei se tane i lana ava nai lo le taimi o loo ia auauna atu ai i ana matafaioi na tuu mai e le Atua e avea o sē agavaa e umia le perisitua—e matua taua lava i totonu o le aiga. Ou te fiafia ma talitonu i upu nei mai ia Peresitene Packer i tane ma tamā agavaa: “Ua ia te oe le mana o le perisitua ua tuusao mai le Alii e puipui ai lou aiga. O le a i ai taimi e na o le pau lava le mea e tulai atu e fai ma talipupuni i le va o lou aiga ma mea faalavefau a le fili, o le mana lena.”⁶

Taitai ma Faiaoga Faaleagaga i le Aiga

I le amataga o lenēi tausaga sa ou auai atu ai i se falelauasiga o se tagata



tulaga ese le taualoa—o si toeaina o le aiga o si ou toalua o Uncle Don. Na faasoa mai e se tasi o atalii o Uncle Don se aafiaga sa ia maua a o latitiiti, i se taimi e lei leva ona faatau e ona matua lo latou fale muamua. Talu ai e toalima tamaiti laiti e fafaga ma faalavalava, sa le lava se tupe e faapa ai le fanua. O le faamaoni i se tasi o ana matafaioi paia o se leoleo mo lona aiga, sa tutu'i ai e Uncle Don ni nai tamai fasi laau i le palapala, aumai ni manoa, ma nonoa le manoa mai lea fasi laau i lea fasi laau faataamilo i le fanua. Ona ia valaauina lea o lana fanau e o mai. Sa ia faasino atu ia i latou ia laau ma le manoa ma fai atu ia i latou afai latou te nonofo i totonu o lena pa le tumau, o le a latou saogalemu.

I se tasi aso sa matamata atu ma le ofo ni faiaoga asiasi a o latou agai atu i le fale ma iloa atu ni tamaiti laiti se toalima o tutu ma le usiusitai i le tau-faasiusiuga o le manoa, ma tilotilo faananau atu i le polo lea na pau atu i tua o lo latou tuaoi ma alu atu ai i le auala. Sa tamoe se tasi o tamaiti e aumai lo latou tama, o le na tali mai, i le tamoe atu ma aumai le polo.

Mulimuli ane i le falelauasiga, sa faailoa mai ma loimata e le atalii matua, na pau lava lona faamoemoega i le olaga ia avea faapei o lona tama pele.

Na saunoa mai Peresitene Ezra Taft Benson:

“Ia, tane ma tamā i Isaraelu, e mafai ona outou faia ni mea se tele mo le faaolataga ma le faaeaga o o outou aiga! . . .

“Manatua lou valaauga paia o se tamā i Isaraelu—lou valaauga sili ona taua i le taimi nei ma le faavavau—o se valaauga o le a le mafai ona faamalolo mai ai outou.”

“E tatau ona outou fesoasoani e fausia se aiga e mafai ona mafuta ai le Agaga o le Alii.”⁷

Oka se talafeagai o nei upu faapero-feta i lenei vaitaimi.

Ai se faigata, i le tulaga sili, mo alii o le feagaiga ona ola i se lalolagi e le gata ina le faatauaina o latou matafaioi paia ma tiutetauave ae o loo auina atu ai foi ni savali sese e uiga i le avea ai ma se “alii moni.” O se tasi savali sese o le “O mea uma e faatatau ia te a’u.” I le isi itu, o loo i ai ni savali faamaasiasi ma faatauemu faapea e le o toe manaomia ni tane ma ni tama. Ou te aioi atu ia te outou e aua nei faalogo i pepelo a Satani! Ua uma ona ia aveesea lona avanoa paia o le avea ma se tane po o se tama. Talu ai e lotoleaga o ia ia i latou o e ua maua matafaioi paia na te le mafai ona ausia, ua ia naunau ai ina ia “pagatia tagata uma e pei o ia lava!”⁸

Siitiaina ma Fesoasoani i o Tatou Matafaioi e Faaatoatoa ai Isi

Uso e ma tuagane, tatou te manaomia le tasi ma le isi! I le avea ai ma

tamaitai ma alii tausī feagaiga, tatou te manaomia e siitia ma fesoasoani i le tasi ma le isi ma avea ma tagata e finagalo le Atua e avea ai i tatou. Ma e tatau ona tatou galulue faatasi e siitia le tupulaga faiae ma fesoasoani ia latou ausia o latou gafatia paia o ni tagata maufofi o le ola e faavavau. E mafai ona tatou faia e pei ona faia e Elder Robert D. Hales ma lona faletua o Mary, ma mulimuli i le faataoto “Ia e siitia a’u, ona ou siitia ai lea o oe, ona ta o a’e faatasi ai lea i luga.”⁹

Ua tatou iloa mai tusitusiga paia “e le lelei ina toatasi o le tagata.” O le mafuaaga lena na faia ai e le Tama Faalelagi “sona fesoasoani.”¹⁰ O le upu *fesoasoani* o lona uiga “o se fesoasoani e talafeagai, agavaa, pe fetui lelei mo ia.”¹¹ Mo se faataitaiga, e talitutusa lava o tatou lima e lua peitai e le tutusa lelei. O le mea moni, o le faafeagai o le tasi le isi, ae e faaatoatoaina e le tasi le isi ma e fetui lelei lava mo le tasi ma le isi. O le galulue faatasi, ua la malolosi atili ai.¹²

I se mataupu e uiga i aiga, o loo i ai i le tusitaulima a le Ekalesia le faama-talaga lena: “O le natura o agaga tane ma fafine ua faia ina ia faaatoatoaina ai e le tasi le isi.”¹³ Faamolemole ia matau o loo fai mai “faaatoatoa e le tasi le isi,” ae le o le “fiatautavā o le tasi i le isi!” Ua tatou i ai iinei e fesoasoani, siitia, ma olioli le tasi i le isi a o tatou taumafai ia avea ma o tatou tagata sili ona

lelei. Na aoao mai ma le atamai Sister Barbara B. Smith, “E matua tele lava o le fiafia tatou te maua pe a mafai ona tatou olioli i tulaga faamanuiaina o le isi ae le na o i tatou lava.”¹⁴ A tatou saili e “faaatoatoa” nai lo le “fiatautavā,” o le a matua faigofie lava ona tatou fefaa-malosiāu atu i le tasi ma le isi!

A o avea au ma se tina talavou o se fanau iti toatele, i le faatumulia ai i le faaiuga o aso i suiga o napekini, fufuluina o ipu, aoaiina, e leai se tasi na sili ona usuina ma le naunautai le pese Peraimeri lenei i lo a’u, “I’m so glad when daddy comes home.”¹⁵ Ou te faanoanoa e tautino atu ou te lei fiafia i taimi uma na oso fiafia mai ai i totonu o le faitotoa ia Craig ina ua mavae se aso o ni galuega faigata. Na te faafeilo-aia i matou taitoatasi e le aunoa ma se opo ma se kisi ma faaliliuina le tele o aso faigata ma aso le lelei i taimi fiafia ma tamā. Maimau pe ana ou faaitiitia lou popole i le mau mea e lei faia i lena aso ae taulai atili atu ma le atamai, e pei o ia, i mea e sili ona taua. Semanu e faatele ona ou tu ma fiafia i taimi paia faaleaiga ma ou faafetai atili ai ia te ia mo faamanuiaga i o matou olaga!

Ia Tatou Fai Soo Upu Alofa i le Tasi ma le Isi

E lei mamao tele atu, na faasoa mai ai e se tamaitai faamaoni i le Ekalesia se popolega tele sa ia tatalo ai mo sina taimi. O lona popolega e mo nisi o tamaitai i lana uarota. Sa ia tau mai ia te au lona lototiga tele i le matauina o lo latou tautatala atu ma le le migao i nisi taimi i a latou tane ma le faia o tala o a latou tane, e oo lava i luma o a latou fanau. Ona ia tau mai lea ia te au a o avea ma se tamaitai talavou sa ia moomoo ma tatalo ma le faamaoni ina ia maua ma faaiipoipo i se alii agavaa e umia le perisitua ma fausia se aiga fiafia faatasi ma ia. Sa ia ola ae i se aiga lea na “pulea [e lona tina]” ae faataunuu ma le

fefe e lona tama faatonuga a lona tina ina ia tausia le filemu i totonu o le aiga. Sa ia lagona e i ai se auala sili atu. Na te lei vaai o faataitaia i totonu o le aiga sa ia ola ae ai, ae a o ia tatalo faatauanau mo le taitaiga, na faamanuiaina o ia e le Alii ia iloa le ala e fatu ai ma lana tane se aiga lea o le a talia ai ma le toafimalie le Agaga. Na ou i ai i lena aiga ma ou te molimau atu o se nofoaga paia!

Uso e ma tuagane, na faafia ona tatou “fai [atu ni] upu alofa i le tasi” ma le loto i ai?”¹⁶

Atonu tatou te suesueina i tatou lava i le faia o ni nai fesili. O sina fetuuna-iga, e mafai ai ona faatatau nei fesili i le toatele o i tatou, pe ua tatou faaiipoipo po o nofofua ma po o le a lava le tulaga o i ai o tatou aiga.

1. O le a le taimi mulimuli na ou faa-malo faamaoni ai i la’u soa, a le na o ia pe i luma o le maua fanau?
2. O le a le taimi mulimuli sa ou faafetai atu ai, faailoa atu le alofa, pe aioi atu faamaoni mo ia i le tatalo?



3. O le a le taimi mulimuli sa ou taofia ai au mai le fai atu o se upu ou te iloa e ono faatiga?
4. O le a le taimi mulimuli sa ou faatose atu ai ma aioi ma le faamaulalo mo se faamagaloga—e aunoa ma le faaopoopo atu o upu “ae pe ana e” po o le “ae pe ana e le”?
5. O le a le taimi mulimuli sa ou filifili ai ia fiafia nai lo le pulunaunau ia “sa’o”?

Ia, afai o nisi o nei fesili o le a taitai atu ai oe i le le toafimalie po o se lagona o le ta’usalaina, ia manatua na aoao mai Elder David A. Bednar o le “aafiaga o le ta’usalaina i o tatou agaga e faapei foi o le aafiaga o le tiga i o tatou tino—o se lapataiga i se tulaga matautia ma o se puipuiga mai nisi faataumaoga.”¹⁷

Ou te valaau atu ia te outou taitoatasi ina ia usitaia le aioi faamaoni mai a Elder Jeffrey R. Holland: “Uso e ma tuafafine, i lenei sailiga umi e faava-vau ina ia avea atili e faapei o lo tatou Faaola, ia tatou taumafai ina ia avea o ni alii ma ni tamaitai “atoatoa” a itiiti i le ala lenei e tasi i le taimi nei—ia le faatiga lava i se upu po o i se isi tulaga lelei e faaupu ai, e ala i se gagana fou, le gagana lea a agelu.”¹⁸

A o ou sauni mo lenei avanoa i le asō, na aoao au e le Agaga, ma na ou tautino atu ia tautala atili e le aunoa i upu agalelei i la’u soa faapelepele ma e uiga ia te ia, ina ia siitia ai alii o lo’u aiga ma faailoa atu le faafetai mo auala o loo latou faataunuuina ai a latou matafaioi paia ma faaatoa-toaina. Ma ua ou tautino e mulimuli i le faataoto “Ia e siitia a’u, ona ou siitia ai lea o oe, ona ta o a’e faatasi ai lea i luga.”

Tou te fia auai faatasi ma au i le sailia o le fesoasoani a le Agaga Paia e aoao i tatou i le auala e sili ona lelei



Saunia e Elder Dallin H. Oaks

○ Le Korama a Aposetolo e Toasefululua

e siitia ai le tasi ma le isi i a tatou matafaioi faaatoatoaina o ni atalii ma afafine o le feagaiga a o tatou matua faalelagi alofa?

Ou te iloa e ala atu i mana gafatia o le Togiola ma lo tatou faatuatua ia Iesu Keriso, e mafai ai ona tatou faia. Ou te tatalo o le a tatou faatuatuaina o Ia ia fesoasoani ia i tatou e fesoasoani i le tasi ma le isi ina ia ola fiafia ma le faavavau a o tatou o a'e faatasi i luga, i le suafa o Iesu Keriso, amene. ■

FAAMATALAGA

1. Boyd K. Packer, in "Donna Smith Packer Receives Family History Certificate from BYU," *news.byu.edu/archive12-jun-packer.aspx*.
2. Dieter F. Uchtdorf, in Jeffrey R. Holland, "Elder Dieter F. Uchtdorf: I Ni Vaaiga Fou," *Liahona*, Mat. 2005, 10.
3. Henry B. Eyring, in Gerald N. Lund, "Elder Henry B. Eyring: Aoaoina e 'Aafiaga Iloga,'" *Liahona*, Ape. 1996, 31.
4. Thomas S. Monson, "Ou Te Le Tuua Lava Oe, Ou Te Le Tuulafoai Lava ia te Oe," *Liahona*, Nov. 2013, 85.
5. Mark Twain, *Eve's Diary* (1905), 107.
6. Boyd K. Packer, "O Le Mana o le Perisitua," *Liahona*, Me 2010, 9.
7. Ezra Taft Benson, "To the Fathers in Israel," *Ensign*, Nov. 1987, 51, 50.
8. 2 Nifae 2:27.
9. Tagai Robert D. Hales, "Faamalolosia o Aiga: O Lo Tatou Tiute Paia," *Liahona*, Iulai 1999, 40; tagai foi LaRene Gaunt, "Elder Robert D. Hales: 'Return with Honor,'" *Liahona*, Apr. 1995, 31.
10. Kenese 2:18.
11. Kenese 2:18, vaefaamatalaga e.
12. Tagai Bruce K. Satterfield, "The Family under Siege: The Role of Man and Woman" (presentation given at Ricks College Education Week, June 7, 2001), 4; *emp.byui.edu/SATTERFIELD/PDF/RoleManWoman2.pdf*.
13. *Tusitaulima 2: Taitaiina o le Ekalesia* (2010), 1.3.1.
14. Barbara B. Smith, "Hearts So Similar," *Ensign*, May 1982, 97.
15. "Daddy's Homecoming," *Children's Songbook*, 210.
16. "Fai Upu Alofa i le Tasi," *Viiga*, nu. 147.
17. David A. Bednar, "Matou Te Talitonu i le Nofomama," *Liahona*, Me 2013, 44.
18. Jeffrey R. Holland, "O Gagana a Agelu," *Liahona*, Me 2007, 18.

○ Le Faataoto o le Lūlū Saito

E pule lava i tatou taitoatasi i le faatulagaina o mea faamuamua ma faia mea ia lelei ai lo tatou eleele ma fua tele ai la tatou seleselega.

○ mataupu mo lauga o le konesi aoso e atofa mai—e le [faia] i se pule faaletagata ae e ala mai i uunaiga a le Agaga. E tele mataupu o le a taulimaina ia popolega faaletagata e oo uma ia i tatou. Ae e pei lava ona sa lei aoso atua e Iesu le auala e faatolalo ai luitau faaleolaga nei po o sauaga faaupufai o Ona aso, e masani lava ona Ia uunaia soo Ana auauna i aso nei ia saunoa atu e uiga i le mea e tatau ona tatou faia e suia ai o tatou olaga patino e saunia ai i tatou e toe foi atu i lo tatou aiga faalelagi. I lenei faaiuga o le vaiaso o le Eseta ua uunaia au ina ia ou talanoa atu e uiga i aosoaga taua ma tumau pea i se tasi o faataoto a Iesu.

O le faataoto o le lulu saito o se tasi lea o nai faataoto laiti o loo tusia i Talalelei uma e tolu. O se tasi foi lea o se vaega laiti lava o faataoto na faamalamalama atu e Iesu i Ona soo. O le fatu lea na lulu "o le upu o le malo" (Mataio 13:19), "o le upu" (Mareko 4:14), po o le "afoga lea a le Atua" (Luka 8:11)—o aosoaga a le Matai ma Ana auauna.

O eleele eseese ia na pauu i ai fatu ua faatusa lea i auala eseese o loo maua ai e tagata nei aosoaga ma

mulimuli ai. O lea o fatu na "pa'ū . . . i le auala" (Mareko 4:4) sa lei mauaina le eleele moni lea sa ono mafai ona ola ai. Ua pei i latou o aosoaga e pa'ū i luga o se loto ua maa pe le o saunia. Ou te le toe fai atua se isi tala e uiga i nei mea. O la'u savali e faatatau ia i tatou uma ua tuuto atu e avea ma soo o Keriso. O le a la le tatou mea e fai i aosoaga a le Faaola a o tatou ola ai i o tatou olaga?

Ua lapataia e le faataoto o le tagata lulu saito i tatou e uiga i tulaga ma uiga ia e mafai ona taofia ai soo se tasi ua mauaina le fatu o le savali o le talalelei mai le mauaina o se seleselega lelei.

I. Eleele Papa, Leai se A'a

O nisi fatu na "pa'ū foi . . . i le mea papa, e itiiti lava le eleele sa i ai; ona tupu lise lea ia, aua o le eleele ina itiiti: ua alu ae le la, ua velasia ai, ona magumagu ai lea, ona ua leai ni aa" (Mareko 4:5–6).

Sa faamalamalama mai e Iesu e faapea ua faamatalaina e lenei mea i latou o "e ua faalogo i le upu, ona talia loa lea ma le fiafia," ae ona "ua leai ni o latou aa, . . . pe a tupu le puapuaga, po o le saua ona o le upu, ona latou tausuai loa lea" (Mareko 4:16–17).



O le a le mea e mafua ai ona “leai ni . . . aa” i ē faalogo? O le tulaga lea o loo tupu i tagata fou faatoa liliu mai i faifeautalai pe liliu mai i le tele o uiga lelei o le Ekalesia po o le tele o fua maoae o le auai i le Ekalesia. Ona o le le maua’a i le upu, e mafai ona faavaivaia i latou ma ō ese ai mai le upumoni pe a tulai mai ni feteenaiga. Ae e oo lava foi ia i latou e ola ae i le Ekalesia—tagata ua leva ona lolotu—e mafai lava ona see ese atu i se tulaga lea e leai ai ni o latou aa. Ou te iloaina nisi o nei—tagata o le ekalesia ua aunoa ma se liua mausali ma le tumau i le talalelei a Iesu Keriso. Afai tatou te le mauaa i aoaoga o le talalelei ma faatino soo e le aunoa, e mafai lava e soo se tasi o i tatou ona atiaeina se loto maaa, lea e aveva ma eleele papa mo fatu faaleagaga.

E taua meaai faaleagaga mo le ola faaleagaga, aemaise lava i se lalolagi ua aluese mai le talitonu i le Atua ma mataupu o le sa’o ma le sese. I se vaitau ua puleaina e le Initoneti, ia ua faasalalau ai savali ia ua faatamaia ai le faatuatua, e tatau ai ona tatou faateleina lo tatou mauaina o upumoni faaleagaga ina ia mafai ai ona faamallosia lo tatou faatuatua ma mauaa ai i le talalelei.


Autalavou, afai o lena aoaoga e foliga mai e fai si faalauaitetele, o se faataitaiga patino la lenei. Afai o loo tufaina atu faatusa o le faamanatuga ae o loo e tasi i isi pe manamananū solo pe taaalo i taaloga vitio pe o faia foi soo se mea e faafitia ai oe lava mai meaai taua faaleagaga, o loo e lamatiaina ou aa faaleagaga ma avatu oe lava i eleele papa. Ua e tuua oe lava i se tulaga

lamatia o le se ese pe a e fetaii ma faafitauli e pei o le fiatagata, taufaama-tau, po o le faitio. Ma e faatatau foi lena mea i tagata matutua.

O le isi mea e mafai ona faale-againa ai aa faaleagaga—ua faatele-vaveina e tekinolosi o nei aso ae le tulagaese ai—o le papa’u o le iloa e uiga i le talalelei po o le Ekalesia. O lenei iloa faatapulaa e taulai atu i se aoaoga faavae patino pe matau se vaivaiga o se taitai ma lē amanaia ai le vaaiga silisili o le fuafuaga o le talalelei ma faamanuiaga o se vaega atoa ma tagata taitoatasi mai le talalelei lava ia. Sa tuuina mai e Peresitene Gordon B. Hinckley se faamatalaga manino e uiga i se tasi o vaaiga o lenei iloa papa’u. Sa ia faamatala atu i se aofia i le BYU e uiga i le au faasalalau o faiga faaupufai “o e sa matuai feitai lava” i se faatasiga a le au failipoti i lena taimi. Sa latou faia ma le atamai le tele o ni faamatalaga faatiga ma faaosoita. . . . E mautinoa lava,” sa ia faaiu ai, “e foliga mai o le vaitami lenei ma le nofoaga ua mafai ai lava ona tautala faapea i upu faatiga.”¹ I se faatusatusaga, ina ia matuai mauaa ma le mausali i le talalelei, e le tatau lava ona tatou soona lafo ni faamatalaga ma soona faitio i isi ae saili i taimi uma mo se malamalama lautele atu o le galuega mamalu a le Atua.

II. Vao Tuitui: O Le Popole i Mea a Lenei Lalolagi, ma le Pepelo o le Oa

Sa aoao mai Iesu e faapea na “pa’ū foi isi i le vao tuitui, ua tutupu ae le vao tuitui, ona fetinaia ai lea, e lei fua mai lava” (Mareko 4:7). Sa Ia faamalalama mai o tagata nei “na faalogo i le upu, a o le popole i mea a lenei lalolagi, ma le pepelo o le oa, ma le tuinanau i nisi mea, ua oo atu i totonu o le loto, ua fetinaia ai le upu, ona le fua mai lava lea” (Mareko 4:18–19).



O se lapataiga mautinoa lava lenei ia tatou faalogo uma i ai.

O le a ou tautala muamua atu lava i le pepelo o le oa. Po o fea lava o tatou i ai i lenei malaga—po o le a lava lo tatou tulaga o le liua—e faasoosoina lava i tatou uma e lenei mea. A taulai atu uiga po o mea faamuamua i le mauaina, faaaogaina, po o le umiaina o meatotino, tatou te taua lenei mea o le manao i mea faalelalolagi. Ua tele faamatalaga ua faia ma tusia e uiga i mea faalelalolagi lea e itiiti ai sina mea e faaopopo atu ai i i.² O i latou o e talitonu ma fai le oa ma o latou atua ua pagatia i le taufaasese o le oa. O le umiaina o le tamaoaiga po o le tele o tupemaua e le o se faailoga o le manuia faalelagi, ma o le leai o na

mea e le o se faamaoniga o le leai o se manuia faalelagi. Ina ua tau atu e Iesu i se soo faamaoni e mafai ona ia maua le ola e faavavau pe afai na te foai atu ana mea uma i e matitiva (tagai Mareko 10:17–24), Na te lei faailoaina se leaga o le *umiaina* o le oa ae o le leaga i *uiga* o lenei soo e faatatau i na oa. E pei ona tatou iloaina uma, sa viia e Iesu le Samaria agalelei na faaaogaina tupe lava ia e tasi e auaina atu ai i lona uso a tagata lea foi na faaaogaina e Iuta e faalata ai lona Faaola. O le pogai o mea leaga uma e le o le tupe ae o le *manao i tupe* (tagai 1 Timoteo 6:10).

O loo faamatala mai e le Tusi a Mamona se taimi i le Ekalesia a le Atua na “amata [ai] ona vaivai o le ekalesia i lona alualu i luma” (Alema 4:10) ona

sa “amata [e] tagata o le ekalesia . . . [ona] tuu atu o latou loto i luga o oa ma luga o mea lē aoga o le lalolagi” (Alema 4:8). Po o ai lava e mauoa i mea faalelalolagi ua lamatia i le “faa-tamaiaina” faaleagaga e oa ma isi mea o le lalolagi.³ O se folasaga talafeagai lenei i isi aoaoga a le Faaola e sosoo ai.

O vao tuitui sili ona leaga na te fetinaia le aafiaga o le upu o le talalelei i o tatou olaga o malosiaga faalelalolagi ia e ta’ua e Iesu o “mea e popole ai ma oloa ma mea faafiafia o le olaga nei” (Luka 8:14). Ua anoanoai nei mea e tau tolaulau atu. Ua lava na o ni nai faataitaiga.

I se tasi taimi sa aoai ai e Iesu Lana Aposetolo sinia, ma fetalai atu ia Peteru, “Ua fai oe ma mea ou te tausuai ai; aua e le o mea a le Atua ua e loto i ai, a o mea a tagata” (Mataio 16:23; tagai foi MF&F 3:6–7; 58:39). O le faamuamua o mea a tagata o lona uiga o le tuu lea o le faamuamua i popolega o lenei lalolagi i lo mea a le Atua i a tatou amioga, a tatou mea e faamuamua, ma o tatou manatu.

Tatou te lolo atu i “mea faafiafia o le olaga nei” (1) pe a fai ma a tatou vaisu, lea e faaleagaina ai le meaalofa taua a le Atua o le faitalia; (2) pe a faaseseina i tatou e mea faatosina lē aoga, ia e tosoeseina i tatou mai mea e i ai le taua e faavavau; ma le (3) pe a tatou mafau-fau e i ai lo tatou aia i ni taunuuga lelei, lea e faaleagaina ai le tuputupu ae o le tagata lava ia e agavaa ai mo lo tatou taunuuga e faavavau.

E faatoilaloaina i tatou e “popolega . . . o lenei olaga” pe a faapipiliina i tatou e le fefe i le lumanai, lea e faatuai ai lo tatou agai i luma i le faatuatua, ma faalagolago i le Atua ma Ana folafolaga. I le luasefulu-lima tausaga talu ai sa saunoa ai la’u faiaoga faaalooogia i le BYU, o Hugh W. Nibley e uiga i le matautia o le lolo atu i popolega o le lalolagi. Sa

fesiligia o ia i se faatalanoaga pe faamata o tulaga o le lalolagi ma lo tatou tiute e faasalalau atu le talalelei, ua manaomia ai ona sailia nisi auala ina “ia fetuunai ai mea tatou te faia i le Ekalesia ia talafeagai ai ma mea o le lalolagi.”⁴

O lana tali: “O le tala atoa lena o le Ekalesia, a ea? E ao ona outou loto ina ia tiga i i, e ao ona outou loto ina ia oo i tulaga lamatia. O i na e oo mai ai le faatuatua. . . . O lo tatou tuuto e ao lava ona tofotofoina, e ao lava ona faigata, e ao lava ona le talafeagai ma tulaga o lenei lalolagi.”⁵

O le faamuamua o le talalelei sa faamautuina i le lotoa o le BYU i ni nai masina na sei mavae atu nei e se taitai iloga o le Katoliko, o Charles J. Chaput, o le akiepipokopō o Filatelefa. A o saunoa ai e uiga i “popolega o loo i ai uma i nuu o le tatou Ekalesia ma Katoliko,” e pei o le “faaipopoga ma le aiga, le natura o lo tatou tulaga feusui, le paia o le ola o le tagata, ma le faanaunautaga o le saolotoga o tapuaiga,” sa ia saunoa ai:

“Ou te toe fia faamamafa atu le taua o le ola moni lava i mea ua tatou ioeina ma talitonu i ai. O lena mea e manaomia ona avea ma faamuamua—e le na o o tatou olaga patino ma aiga ae e faapena foi i a tatou lotu, a tatou filifiliga faaupufai, a tatou fegalegaleaiga faapisinisi, lo tatou taulimaina o e matitiva; ma i se isi faaupuga, i mea uma tatou te faia.”

“O le mafuaaga lenei e taua ai,” sa ia faaaau ai. “I le aoao ai mai aafiaga FaaKatoliko. O i matou o Katoliko ua talitonu o la matou galuega ia avea matou ma mea faafefete i le malo. Ae o loo i ai se laina matagofie i le va o le avea ma mea faafefete i le malo, ma le avea ai ma se vaega o le malo.”⁶

O le lapataiga a le Faaola e faasaga i popolega o lenei lalolagi ia e fetinaina le afioga a le Atua i o tatou olaga e



mautinoa lava ua luitauina ai i tatou ia faatumauina le mausali o a tatou mea e faamuamua—tuu atu o tatou loto—i poloaiga a le Atua ma le taitaiga o Lana Ekalesia.

O faaitaiga a le Faaola e mafai ona faaosofia ai i tatou e manatu i lenei faataoto o le faataoto o le eleele. O le tulaga talafeagai o le eleele e faalagolago lea i le loto o i tatou taitoatasi ua malamalama i le fatu o le talalelei. A iloilo ina le saunia o se tasi e talia aoaoga faaleagaga, o nisi o loto ua faamaaina ma lē saunia, o nisi o loto ua liu papa mai le faatalalē, ma o nisi o loto ua pupū i mea o le lalolagi.

III. Ua Pa’ū i le Eleele Lelei, Ona Fua Mai Lea

Na faaiuina le faataoto o le lulu saito i le faamatalaina e le Faaola o le fatu na “pa’ū i le eleele lelei, ona fua mai lea” i fuataga eseese (Mataio 13:8). E mafai faapefea ona tatou sauniaina i tatou lava ia avea ma lena eleele lelei ma maua ai lena seleselega lelei?

Sa faamalalama e Iesu “o le mea na i le eleele lelei, o i latou ia e ua faalogo i le upu, ma tausi i ai i le loto ua faamaoni ma le lelei, ona fua mai ai lea ma le onosai” (Luka 8:15). Ua ia i tatou le fatu o le upu o le talalelei. Ae e pule lava i tatou taitoatasi i le faatulagaina o mea faamuamua ma ia faia mea ia lelei ai lo tatou eleele ma fua tele ai la tatou seleselega. E tatau ona tatou saili atu ia mauaa mausali atili ma liua i le talalelei a Iesu Keriso (tagai Kolose 2:6–7). Tatou te ausia lenei liua e ala i le tatalo, e ala i le faitauina o tusitusiga paia, e ala i le auauna atu, ma e ala i le

taumafa ma inu e le aunoa i le faama-natuga ina ia maua pea Lona Agaga e faatasi ma i tatou. E tatau foi ona tatou saili atu i le suiga tele o le loto (tagai Alema 5:12–14) lea e suitulaga ai e le alofa i le Atua ma le manao e auauna atu ia te Ia ma Ana fanau ia manaoga leaga ma popolega faaloloto.

Ou te molimau atu i le moni o nei mea, ma ou te molimau atu i lo tatou Faaola, o Iesu Keriso, o Ana aoaoga o loo faasino mai ai le ala ma Lana Togiola ua mafai ai mea uma, i le suafa o Iesu Keriso, amene. ■

FAAMATALAGA

1. Gordon B. Hinckley, “Let Not Your Heart Be Troubled” (Brigham Young University devotional, Oct. 29, 1974), 1; speeches.byu.edu.
2. Tagai, mo se faaitaiga, Dallin H. Oaks, “Materialism,” mataupu 5 i le *Pure in Heart* (1988), 73–87.
3. Ou te faafetai ia Elder Neal A. Maxwell mo lenei ata taua (tagai “These Are Your Days,” *Ensign*, Oct. 2004, 26).
4. James P. Bell, in “Hugh Nibley, in Black and White,” *BYU Today*, May 1990, 37.
5. Hugh Nibley, in “Hugh Nibley, in Black and White,” 37–38.
6. Charles J. Chaput, “The Great Charter at 800: Why It Still Matters,” *First Things*, Jan. 23, 2015, firstthings.com/web-exclusives/2015/01/the-great-charter-at-800; see also Tad Walch, “At BYU, Catholic Archbishop Seeks Friends, Says U.S. Liberty Depends on Moral People,” *Deseret News*, Jan. 23, 2015, deseretnews.com/article/865620233/At-BYU-Catholic-archbishop-seeks-friends-says-US-liberty-depends-on-moral-people.html. Archbishop Chaput also said that “some of our best Catholic institutions have either lost or greatly softened their religious identity. . . . Brigham Young is an extraordinary university . . . because it’s a center of learning enriched by its religious identity. Never lose that” (“The Great Charter at 800”).



Saunia e Elder L. Whitney Clayton
O Le Au Peresitene o Fitugafulu

Filifili e Talitonu

Ua tuuina mai e le Faaoala Lana talalelei e avea ma se malamalama e taiala ai i latou o ē filifili e talitonu ma mulimuli ia te Ia.

ave atu o ia i se falemai ma fesoasoani ai e toe faafoisia lona malosi.¹

Sa ola Sailor ona sa vaai o ia i se malamalama i se mea mamao ma sa tau-ivi ina ia taunuu i ai—e ui i le togāvaōa o lea nuu maotua, le loloto o le faalavelave matautia sa ia oo i ai, ma manu’aga sa feagai ma ia. E faigata ona mafaufau pe na mafai faapefea e Sailor ona fai le mea sa ia faia i lena po. Ae o le mea ua tatou iloa, na ia iloina le malamalama o lena fale mamao o se avanoa mo le laveai. Sa i ai le faamoemoe. Sa ia

Ia Ianuari talu ai, sa felelei atu ai Sailor Gutzler e fitu tausaga ma lona aiga mai Florida i Ilinoi i se vaalele totino. O le tama o Sailor na faafoeina le vaalele. Ina ua faatoa oo mai le po, sa amata ona alia’e mai ni faaletonu i le afi o le vaalele ma sa fetō’ai ai ma mauga pogisa o Kenitaki, ma tītō ai i lalo i se laufanua gaoā tele. Sa maliliu tagata uma i le faalavelave vagana ai Sailor. Sa gau lona tapulima i le faalavelave. Sa mafatia o ia i manu’a ma maosiosia ma sa leiloloa ona seevae. O le fua o le ea e 38 tikei Farenaita (po o le 3 tikeri Celsius)—o se po malulu, ma timuga i Kenitaki i le taumalulu—ma sa na o se ofuvae vaepupuu, se mitiafu, sa ofuina e Sailor ma se totini se tasi.

Sa taufonō mo lona tina ma lona tama, ae sa leai se tali mai. I le faaao-gaina o aunese uma o le lototoa, sa amata savali atu ai o ia e leai ni seevae i le nuu e sue se fesoasoani, sa tauasa atu i alia, laasia ‘autu, ma ui atu i le mātuituia o vineuli. Mai le tumutumu o se tasi mati’e laitiiti, sa vaaia ai e Sailor se malamalama i se mea mamao, pe tusa ma se maila. O le tautevateva atu i le pogisa ma pupulaaui agai atu i lena malamalama, sa iu ai ina taunuu o ia i se fale o se tamaloa agalelei, na te lei vaai muamua lava i ai, o le sa vave ona tausia o ia. Sa saogalemu Sailor. Sa lei pine ae




lototele i le mea moni po o le a lava le leaga o mea sa i ai, ae o le a maua lava lona laveai i lona malamalama.

E toaititi i tatou o le a onosaia se aafiaga matautia e pei o Sailor. Ae o i tatou uma lava o le a i ai se taimi, e ao ai ona tauivi faaleagaga ma o tatou lava aafiaga faigata ma faia a tatou lava faigamalaga faigata faalelagona. O na taimi, po o le a lava le pogisa po o le foliga mai ua leai se faamoemoe, afai tatou te sailia, o le a i ai *pea* se malamalama faaleagaga e emoemo mai ia i tatou, e aumaia ai le faamoemoe o le laveai ma le toomaga. O lona malamalama e susulu mai le Faaola o tagata uma, le Malamalama o le Lalolagi.

O le matauina o le malamalama faaleagaga e ese mai le vaaia o le malamalama faaletino. O le iloa o le malamalama faaleagaga o le Faaola e amata i lo tatou naunau e talitonu. E manaomia e le Atua ia tatou muai mananao ia talitonu. “Afai tou te ala mai ma fafagu o outou mafaufau, . . . ma faaaoga sina *vaega itiiti* o le faatuatua,” ua aoa mai le perofeta o Alema, “ioe, e tusa pe ua le mafai ona e faia o se isi lava mea nai lo le *fia* talitonu, ia tuu lea manao e galue i totonu ia te oe, seia oo lava ina ia e talitonu ai i se ala e mafai ai ona e tuu ane o se avanoa mo se vaega o upu [a le Faaola].”²

O le valaau a Alema mo i tatou ia naunau e talitonu ma “ia tuu se avanoa” i o tatou loto mo afioga a le Faaola ua faamanatu mai ai ia i tatou o le talitonu ma le faatuatua e manaomia ai la tatou filifiliga patino ma faatinoga. E tatau ona tatou “ala mai ma fafagu [o tatou] mafaufau.” E tatau ona tatou ole atu a o lei tuuina mai ia te i tatou; e tatau ona tatou saili a o lei mauaina; ma e tatau ona tatou tuitui atu a o lei toina mai ia i tatou. Ona tuuina mai ai lea o le folafolaga ia te i tatou: “Aua o i latou uma e ole atu, e to mai i ai; ma o ia o le



e saili, e maua e ia; ma o le e tuitui atu, o le a tatala mai ia te ia.”³

E leai se isi aioiga ma le lotonaunau mo i tatou ia talitonu ua oo mai nai lo le Faaola lava Ia, i le taimi o Lana galuega i le lalolagi ina ua Ia talosagaina i latou e lei talitonu ia te Ia:

“Afai ou te le faia galuega a lo’u Tama, aua tou te talitonu mai ia te au.

“Ae afai ou te faia, e ui lava ina outou le talitonu mai ia te au, ia outou talitonu; ina ia iloa e outou, ma ia talitonu o i totonu ia te au le Tama, o a’u foi o i totonu ia te Ia.”⁴

O aso uma lava e feagai ai i tatou taitoatasi ma se suega. O le suega o o tatou olaga atoa: pe tatou te filifili e talitonu ia te Ia ma faatagaina le malamalama o Lana talalelei e ola i totonu ia i tatou, pe o le a tatou mumusu e

talitonu ma tumau pea le faimalaga na o i tatou i le pogisa? Ua tuuina mai e le Faaola Lana talalelei e avea ma se malamalama e taiala ai i latou o ē filifili e talitonu ma mulimuli ia te Ia.

Ina ua mavae le faalavelave, sa i ai se filifiliga a Sailor. Sa mafai ona ia filifili e nofonofo i autafa o le vaalele i le pogisa, na o ia ma le fefe. Ae sa faamalumu mai le po umi, ma ua amata ona tetele le malulu. Sa ia filifilia se isi auala. Sa a’e Sailor i luga o se mati’e, ma o iina sa ia vaaia ai se malamalama i le tafailagi.

Na faifai malie, a o āga atu Sailor i le po e agai atu i le malamalama, sa faasolo ina malamalama atili. Ae, atonu na i ai taimi sa le mafai ai ona ia iloa atu. Atonu na mou ese mai le vaaia ina ua i ai o ia i se vanu po o tua o laau



po o faapuloulou, ae sa ia faamalosi atu pea. Soo se taimi sa mafai ai ona ia vaaia le malamalama, sa ia Sailor se faamaoniga o loo sa'o le ala la e i ai. Ae na te lei iloa tonu po o le a le la malamalama, ae sa savali atu pea o ia agai i ai e faavae i le mea sa ia iloaia—, i le talitonu ma le faamoemoe o le a ia toe vaaia foi pe afai e agai atu pea i le itu sa'o. O le faia o lena mea, atonu o le a ia faasaoia ai lona ola.

E mafai foi ona faapena o tatou olaga. Atonu e i ai taimi tatou te tiga ai, tatou te vaivai ai, ma pe foliga mai ua pogisa ma maluluina o tatou olaga. Atonu e i ai taimi e le mafai ai ona tatou iloa atu se malamalama i le tafailagi, ma atonu tatou te lagona le fiu. Afai tatou te naunau e talitonu, o le a faaalua mai e aoga ma faataitaiga a le Faaola ia i tatou le ala i luma.

Filifili e Talitonu

Faapei ona tatau ai ia Sailor ona talitonu o le a ia maua le saogalemu i lena malamalama mai se mea mamao, ua tatau ai foi ia i tatou ona filifili e tatala o tatou loto i le moni paia o le Faaola—i Lona malamalama e faavavau ma Lona alofa mutimutivale e malolo ai. Ua uunaia i tatou e perofeta i augatupulaga uma ma aioi mai ia i tatou ia talitonu ia Keriso. O a latou apoapoaiga o loo atagia mai ai se mea moni faavae: E le faamalasia i tatou e le Atua e talitonu. Ae Na te valaaulia i tatou ia

talitonu e ala i le auina mai o perofeta soifua ma aposetolo e aoao i tatou, e ala i le aumaia o tusitusiga paia, ma faatauanau mai ia i tatou e ala i Lona Agaga. O i tatou lava e tatau ona filifili e talia na valaaulia faaleagaga, filifili e vaai i mata faaleagaga le malamalama faaleagaga lea Na te valaauina ai i tatou. O le faaiuga e talitonu, o le filifiliga aupito taua lea e mafai ona tatou faia. E mamanuina ai isi a tatou faaiuga uma tatou te faia.

E le faamalasia e le Atua i tatou e talitonu i nisi mea nai lo Lona faamalasia o i tatou e tausi i soo poloaiga, e ui i Lona naunauga atoatoa ia faamanuia i tatou. Ae o Lana valaau ia i tatou e talitonu ia te Ia—ia faaoga lena vaega itiiti o le faatuatua e tuu ai se avanoa mo Ana afioga—o loo tumau pea i aso nei. E pei ona fetalai mai le Faaola, “Ou te molimau atu ua poloaiina e le Tama tagata uma, i soo se mea o i ai, ia salamo ma talitonu mai ia te au.”⁵

O le talitonu ma le molimau ma le faatuatua e le o ni mataupu faavae na ona tau ane ai. E le o se mea e tupu fua ia i tatou. O le talitonu o se mea tatou te filifilia—tatou te faamoemoe i ai, tatou te galulue ia maua, ma e tatou te ositaulaga foi ia maua. O le a le faafuasei lava ona tatou talitonu i le Faaola ma Lana talalelei nai lo le faafuasei ona tatou tatalo pe totogi le sefuluai. Tatou te filifili ma le manino e talitonu, faapei lava ona tatou filifili e tausi isi poloaiga.

Faafino le Talitonu

Sa le i mafai ona iloa muamua e Sailor pe o le a aoga le mea sa ia faia o le taumafai e ui atu i faapuloulou. Sa sē o ia ma sa manu'a; sa pogisa ma malulu. Ae sa ia tuua le mea na tupu ai le faalavelave ae taumafai atu i le faamoemoe mo se laveai, tolotolo ma su'egi i luma lona ala seia oo ina ia iloa atu se malamalama mai se mea mamao. O le taimi na ia iloa atu ai, sa ia faia le mea sili na ia mafaia e agai atu i ai, ma manatua le mea sa ia vaaia.

E faapena i tatou, e tatau ona tatou tuu se avanoa mo le faamoemoe o le a tatou maua lava le malamalama faaleagaga e ala i le opomauina o le talitonuga nai lo le filifilia o le masalosalo. O a tatou faatinoga o le faamaoniga lea o lo tatou talitonu ma avea ai ma tino aano o lo tatou faatuatua. Tatou te filifili e talitonu pe a tatou tatalo ma pe a tatou faitauina a tatou tusitusiga paia. Tatou te filifili e talitonu pe a tatou anapogi, pe a tatou tausia le paia o le aso Sapati, ma pe a tatou tapuai i le malumalu. Tatou te fiifili e talitonu pe a tatou papatiso ma pe a tatou aai ma feinu i le faamana-tuga. Tatou te filifili e talitonu pe a tatou salamo ma saili atu i le faamagaloga a le lagi ma le alofa faamalolo.

Aua Lava Le Fiu

O nisi taimi o le alualu i luma i mea faaleagaga, e mafai ona foliga ua tele-gese pe motumotu. O nisi taimi atonu tatou te lagona ua le mau le pipii, ma ua tatou faia ni mea sese, pe e le o aoga foi a tatou taumafaiga silisili e saili atu i le Faaola. Afai o e oo i nei lagona, faamolemole aua lava le fiu—aua lava. Faaauu pea ona talitonu ia te Ia ma Lana talalelei ma i Lana Ekalesia. Faaogatusa au faatinoga ma lena talitonuga. O taimi na pe a oo ina muiitiiti le sulu o lou faatuatua, tuu atu lou faamoemoe i le alofa ma le alofatunua o le Faaola, o loo maua



Saunia e Elder L. Tom Perry

○ Le Korama a Aposetolo e Toasefululua

i Lana talalelei ma Lana Ekalesia e faa-toilaloina lou masalosalo. Ou te folafola atu ua leva ona faatali mai o Ia e talia oe. A mavae aso o le a e iloa ai sa e faia le filifiliga silisili sa mafai ona e faia. O lau faaiuga lototele e talitonu ia te Ia o le a le mafuatiaina ona faamanuia ai oe ma e faavavau.

O Faamanuiaga o le Talitonu

Ua ou lagonaina le alofa mutimutivale o le Faaola i lo'u olaga. Ua ou saili ia te Ia i o'u lava taimi o le pogisa ma na Ia aapa mai ia te a'u i Lona malamalama ou te malolo ai. O se tasi o fiafiaga sili o lo'u olaga o le failalaga lea ma lo'u toalua, o Kathy, e feiloai ma tagata o le Ekalesia i le tele o tulimanu o le kelope. O nei feiloaiga matagofie ua aoaoina ai au ma aoaoina ai i tatou e uiga i le alofa o le Atua mo Ana fanau. Ua latou faaali mai ia te au le gafatia le faatuaoia o le fiafia lea e oo ina avefa ma faamanuiaga mo i latou o ē filifili e mulimuli i aoaoga a le Alii o Iesu Keriso. Ua ou aoao o le talitonu ia te Ia ma i Lona mana togiola o le ala moni lea i le "filemu i lenei lalolagi, ma le ola e faavavau i le lalolagi a sau."⁶

Ou te molimau atu o Iesu Keriso o le puna lea o le malamalama ma le faamoemoe mo i tatou uma. Ou te tatalo ina ia tatou filifili uma e talitonu ia te Ia. I le suafa o Iesu Keriso, amene. ■

FAAMATALAGA

1. Tagai Lindsey Bever, "How 7-Year-Old Sailor Gutzler Survived a Plane Crash," *Washington Post*, Jan. 5, 2015, washingtonpost.com; "Girl Who Survived Plane Crash Hoped Family 'Was Just Sleeping,'" Jan. 4, 2015, myfox8.com; "Kentucky Plane Crash: Four Killed, Little Girl Survives," Jan. 4, 2015, news.com.au; Associated Press, "Young Girl, Sole Survivor of Kentucky Plane Crash," Jan. 3, 2015, jems.com.
2. Alema 32:27; faaopoopo le faamamafa.
3. 3 Nifae 14:8; tagai foi fuaiupu e 7.
4. Ioane 10:37-38.
5. 3 Nifae 11:32.
6. Mataupu Faavae ma Feagaiga 59:23.

Aisea e Taua ai le Faaipoipoga ma le Aiga—I Soo se Mea i le Lalolagi

O le aiga o le totonugalemu o le olaga ma o le ki lea o le fiafia e faavavau.

Ia Novema talu ai, sa ou maua ai le avanoa i se valaaulia—faatasi ma Peresitene Henry B. Eyring ma Bishop Gérald Caussé—e auai i se fonotaga faapitoa e uiga i faaipoipoga ma aiga i le Vatikana i Roma, Italia. Sa



auai ai sui o lotu ma faatuatuaga eseese e 14 mai le ono o konitineti e fitu, ma sa valaaulia uma i latou ia faailoa atu o latou talitonuga i le mea o loo tupu i le aiga i le lalolagi i le taimi nei.

Sa tatalaina e Pope Faranisisi le sauniga muamua o le faatasiga i le saunoaga lenei: "Ua tatou ola nei i se aganuu o mea lē tumau, lea ua faateleina ai le lafoaia e tagata o le faaipoipoga o se tautinoga a tagata lautele. O lenei fetauaiga i uiga ma amioga mama ua tele lava ina faapea nisi o le faailoaga lea o lo latou saolotoga, ae o le mea moni, ua aumaia ai le faatamaiaaga faaleagaga ma faaletino i le anoanoai o tagata soifua, aemaise lava i tagata sili ona matitiva ma sili ona vaivai. . . . O i latou lava ia e sili ona mafatia i nei faiga faalēalofa."¹

I le faasino atu ai i le tupulaga faia'e, sa ia saunoa ai e faapea e taua le "aua nei o latou lolo atu i lena manatu faataumaioi o mea lē tumau, ae ia avefa ma tagata e tetee atu ma le lototele e saili



Fonotaga e faatatau i le faaiipoipoga ma aiga, Aai o Vatikan

le alofa moni ma tumau, ia faasagatau atu i faiga masani ua i ai nei; ma e tatau ona faia lenei mea.²

Sa sosoo ai ma aso e tolu o aoaoga ma talanoaga faatasi ma taitai faalelotu e uiga i le mataupu o le faaiipoipoga i le va o se alii ma se tamaitai. A o ou faalogologo atu i manatu loloto eseese o taitai faalelotu i le lalolagi atoa, sa ou faalogo atu o latou ioe atoa i le tasi ma le isi ma faailoa le lagolago i talitonuga o le tasi ma le isi e uiga i le paia o le faavae o le faaiipoipoga ma le taua o aiga i le aveai ma iunite faavae o malo. Sa ou lagonaina se lagona mamana o le manatu tasi ma le lotogatasi faatasi ma i latou.

Sa toatele taitai na iloina ma faailoaina lenei lotogatasi, ma sa latou faia lea mea i le tele o auala eseese. O se tasi o ia auala na sili ona ou fiafia i ai o le taimi sa sii mai ai e se polo-fesa Mosalemi mai Irani ni parakalafa maoti se lua mai la tatou lava folafolaga i le aiga.

I le taimi o le fonotaga faapitoa, sa ou matauina ai a oo ina lotogatasi faatuatuaga ma tapuaiga ma lotu eseese e uiga i le faaiipoipoga ma le aiga, ua lotogatasi foi uma i latou i tulaga faatauina ma le faamaoni ma tautinoga ia e fesootai pea ma iunite faaleaiga. Sa ofoofogia lava mo au le vaaia o le auala e sili atu ai mea e faamuamua i faaiipoipoga ma le faaogatotonuina o le aiga i lo isi lava eseese faaupufai, faaletamaoiga, pe faalelotu. A oo mai i le alofa i le toalua ma faamoemoega, popolega, ma miti mo fanau, ua tutusa i tatou uma.

Sa ofoofogia lava le faatasi ai i ia fonotaga ma faiaoga i le lalolagi atoa a o latou talanoaina lautele o latou lagona e uiga i le taua o le faaiipoipoga



i le va o se alii ma se tamaitai. Sa sosoo ai ma a latou saunoaga taitasi ia molimau mai isi taitai faalelotu. Sa saunoa Peresitene Henry B. Eyring i le molimau faaii o le fonotaga faapitoa. Sa ia tuu atu se molimau mamana e uiga i le matagofie o se faaiipoipoga tuuto ma e uiga i lo tatou talitonuga i faamanu-iaga folafolaina o aiga e faavavau.

O le molimau a Peresitene Eyring sa matua talafeagai lelei e tapunia ai na aso faapitoa e tolu.

Ia, atonu la tou te fesili, “Afai la na lagonaina e le toatele lena lagona tutusa e uiga i mea e faamuamua i le aiga ma talitonuga, afai na ioeina moni uma e na faatuatuaga ma tapuaiga le tulaga e tatau ona i ai faaiipoipoga, ma afai na latou ioe uma i le faataua e tatau ona tuu atu i aiga ma sootaga faaleaiga, e faapefea la ona ese mai ai i tatou? O faapefea ona iloagofie ma ese mai le Ekalesia a Iesu

Keriso o le Au Paia o Aso e Gata Ai lava ia mai le toatele o le lalolagi?”

O le tali la lenei: e ui sa matagofie le vaaia ma le lagonaina, e tele naua mea tatou te tutusa ai ma le toatele o le lalolagi e faatatau i o tatou aiga, ae ua na o i tatou o loo i ai se vaaiga e faavavau o le talalelei toefuataiina.

O le mea ua aumaia e le talalelei toefuataiina i talanoaga e uiga i le faaiipoipoga ma le aiga e matua lautele lava ma fitoitonu tele lea e ao ai ona faamanino lelei: tatou te talanoaina lea mataupu [i lona tulaga] e faavavau! Tatou te talanoaina le tautinoga ma le paia o le faaiipoipoga i se tulaga sili atu ona o lo tatou talitonuga ma le malamalamaaga e faapea o aiga na amata mai lava a o lei faavaeina le lalolagi ma e mafai ona agai pea i luma i le faavavau.

O leni aoaoga faavae ua faigofie lona aoaoina ma le mamana ma le

matagofie e le tusiga a Ruth Gardner o le pese a le Peraimeri “E Mafai Ona Faavavau Aiga.” Taofi lava mo sina taimi ma mafaufau e uiga i tamaiti Peraimeri i le lalolagi atoa o loo usuina nei upu i la latou lava gagana, ma le leotetele, faatasi ma se faanaunautaiga lea e na o le alofa o le aiga e mafai ona manatua ai:

*E mafai na faavavau aiga
I le ala a le Tama.
Ou te fia mau ma lo’u lava aiga,
Ua faaali mai e le Alii le ala ou
te ausia ai.*³

O le talitonuga atoa o le tatou tala-lelei toefuataiina ua faatotonugalemu i aiga ma le feagaiga fou ma le faavavau o le faaiipoipoga. I Le Ekalesia a Iesu Keriso o le Au Paia o Aso e Gata Ai, tatou te talitonu i se muai olaga lea sa tatou ola uma ai o ni fanau agaga moni a le Atua lo tatou Tama Faalelagi. Tatou te talitonu sa avea i tatou, ma o loo avea pea i tatou ma tagata o Lona aiga.

Tatou te talitonu e mafai ona faaaau pea faaiipoipoga ma sootaga faaleaiga i talaatu o le tuugamau—ma o faaiipopoga e faatinoina e i latou ua i ai le pule tatau i Ona malumalu o le a faaaau pea ona aoga i le lalolagi a sau. E le o i ai a tatou sauniga o faaiipoipoga ia upu “seia tetea ta’ua i le oti” ae o loo faapea mai “mo le olaga nei ma le faavavau atoa.”

Tatou te talitonu foi o aiga malolosi ua masani ai e le gata o iunite faavae ia o se malo mautu, o se tamaoiga mautu, ma se aganuu mautu o tulaga faatauaaina—ae o i latou foi o iunite faavae o le faavavau ma le malo ma le faigamalo a le Atua.

Tatou te talitonu o le faatulagaga ma le faigamalo o le lagi o le a fausiaina i aiga ma aiga lautele.

O le tulaga ona o lo tatou talitonuga e faapea o faaiipoipoga ma aiga



e faavavau lea o i tatou, o se ekalesia, e mananao ia avea ma se taitai ma se tagata auai i taumafaiga i le lalolagi atoa ia faamalosi i latou. Tatou te iloa e na o i latou foi o loo toaaga i lotu e tutusa o latou tulaga faatauaaina ma mea e faamuamua i faaiipoipoga tumau ma sootaga malolosi faaleaiga. O se aofaiga tele o tagata le lolotu ua talitonu o se faaiipoipoga tuuto ma se olaga faaleaiga o le ala aupito sili lea ona aoga, ma sili ona tamaoiga, ma sili ona fiafia e ola ai.

E leai ma se tasi ua ia maua se isi auala sili atu ona lelei e tasi a’e ai le isi tupulaga e sosoo ai i lo se aiga o ni matua faaiipoipoina faatasi ma se fanau.

Aisea e tatau ai ona taua le faaiipoipoga ma le aiga—i soo se mea? Ua faaalii i manatu o tagata lautele e faapea o le faaiipoipoga o loo avea pea ma se tulaga sili ona lelei, ma se mea e faamoemoe i ai se vaega toatele o vaitausaga uma—e oo lava i le augatupulaga fou o le meleniuma lea ua tele ina faalogo ai i le au lē fia faaiipoipo, saolotoga o le tagata lava ia, ma le nonofo faapouliuli nai lo le faaiipoipo. O le mea moni e matua toatele lava tagata i le lalolagi atoa o loo mananao pea ia fai ni fanau ma fatua’i ni aiga malolosi.

O le taimi lava tatou te faaiipoipo ai ma faia ai a tatou fanau, o le taimi foi

lea o le a atili faamaonia ai le tulaga tutusa i tagata uma. I le avea ai ma “tagata e talitonu i le faatulagaga o aiga”—po o fea lava tatou te nonofo ai pe o a foi o tatou talitonuga faalelotu o i ai—tatou te tausoa faatasi lava le tele o faigata e tasi, o fetuunaiga e tasi, ma faamoemoega e tasi, popolega, ma miti mo a tatou fanau.

E pei ona saunua le tusitala o le *New York Times* o David Brooks e faapea: “e le sili atu ona lelei tagata pe a faamatuu i ai se saolotoga sili mo i latou lava e faia ai le mea latou te mananao i ai. E sili atu lo latou lelei pe a noatia i ni tautinoga e faamuamua mea taua i lo mea e fiafia i ai i latou lava—o tautinoga i le aiga, Atua, galuega ma le atunuu.”⁴

O se tasi faafitauli o le tele lea o ala o faasalalauga ma faafiafiaga i le lalolagi atoa e le o talafeagai lea ma mea faamuamua ma tulaga faatauaaina o le toatele o tagata. Po o le a lava le mafuaaga, o le tele naua o televise, atatifaga, musika, ma le Initoneti ua maua ai se tulaga masani o se vaega toalaiti o tagata ua manatu o latou o se vaega toatele. O le ola le mama ma le leai o ni uiga mama, e sau mai fetuunaiga matuia i feusuaiga faataaloga, ua fai e pei lava o se mea masani ma e mafai ona faatupuina ai se lagona ia i



tatou o loo ola i tulaga faatauaina lelei e pei ua pasiā a tatou amio pe tatou te o mai mai se vaitau ua lava lava. I sea lalolagi ua puleaina e ala o faasalalauga ma Initoneti, ua matuai faigata ai lava ona tausia fanau e tali atu mo i latou lava ma le faatumauina faatasi o faaiipoipoga ma aiga.

Peitai, e tusa lava po o le a le tele naua o auala o faasalalauga ma faafiafiaga e ono fautua mai, ma e tusa lava po o le a le tulaga moni o le faaitiitia o le mananao o tagata ia faaiipoipo ma faia ni aiga, ae o le vaega toatele o tagata o loo talitonu pea o le faaiipoipoga e tatau ona faia i le va o le alii e toatasi ma le tamaitai e toatasi. Latou te talitonu i le faamaoni a'ia'i i totonu o le faaiipoipoga, ma latou te talitonu i tau-toga o le faaiipoipoga, "i le ma'i ma le malosī" ma le "seia tetea ta'ua i le oti."

E ao ona tatou faamanatu ifo ia i tatou lava i lea taimi ma lea taimi, e pei ona faamanatu mai ia te au i Roma, o le mea moni mautinoa ma le mafanafana matagofie e faapea, o le faaiipoipoga ma le aiga o loo avea pea ma taulaiga ma faamoemoega atoa o le toatele o tagata ma e le tuua ai na o i tatou i na talitonuga. E le i ai lava se isi taimi

muamua ua sili atu ai ona luitauina le sailia o se paleni moni i le va o galu-ega, aiga, ma manaoga faaletagata lava ia i lo tatou nei aso. I la tatou mata-faii o le ekalesia, tatou te mananao ai ia fesoasoani atu i mea uma tatou te mafaia e fatua'i ai ma lagolago atu i faaiipoipoga malolosi ma aiga.

O le mafuaaga lena o loo auai ai ma le mataalia le Ekalesia ma tuuina atu le taitaiga i taumafaiga eseese a vaega soofaatasi ma ekalesia soofaatasi ina ia faamalosi ai le aiga. O le mafua-aga lea tatou te faasoa atu ai a tatou tulaga faatauaina e taulai i aiga i ala o faasalalauga ma luga o ala o fesoota-iga. O le mafuaaga lea tatou te faasoa atu ai a tatou gafa ma faamaumauga o aiga lautele i malo uma.

Tatou te mananao ia lagonaina lo tatou leo e faasagatau atu i sitaile eseese taufaasese o le olaga ia ua taumafai e suia le faalapotopotoga o le aiga lea na faavaeina e le Atua Lava Ia. Tatou te mananao foi ia lagonaina lo tatou leo i le lagolagoina o le olioli ma le faama-lieina lea e aumai e aiga ua masani ai. E tatau ona tatou faaauau pea ona faailoa atu o tatou manatu i le lalolagi atoa i le tautino atu lea o le mafuaaga

e taua tele ai le faaiipoipoga ma le aiga, le mafuaaga e matuai afaina moni ai lava le faaiipoipoga ma le aiga, ma le mafuaaga o le a taua ai pea.

Ou uso e ma tuafafine, o le talale-lei toefuataina ua totonugalemu i le faaiipoipoga ma le aiga. E faapena foi, o faaiipoipoga ma aiga lea e mafai ona tatou lotogatasi sili ai ma isi faatuatu-aga. O le faaiipoipoga ma le aiga foi lea o le a tatou maua ai lo tatou tulaga tutusa silisili faatasi ma le isi vaega atoa o le lalolagi. O le faaiipoipoga foi ma le aiga lea o loo maua ai e Le Ekalesia a Iesu Keriso o le Au Paia o Aso e Gata Ai le avanoa silisili e avea ai ma mala-malama i luga o le mauga.

Sei ou faamaea atu i le tuuina atu o le molimau (ma o lo'u ivasefulu tau-saga i luga o lenei lalolagi ua ou agavaa atoa ai e ta'u atu lenei mea) e faapea o le matua lava ou te oo i ai, o le faatele-ina foi lena o lo'u iloaina o le aiga o le totonugalemu o le olaga ma o le ki lea i le fiafia e faavavau.

Ou te faafetai lava i lo'u toalua, mo la'u fanau, mo fanau a la'u fanau, ma fanau a fanau a la'u fanau, ma mo ou tausoga uma ma aiga faaletulafono ma aiga lautele lea ua matuai faamanuina ai lava lo'u lava ia olaga ma, ioe, e oo lava i le faavavau. Ou te tuu atu ai la'u molimau sili ona malosī ma paia e uiga i lenei upumoni e faavavau i le suafa o Iesu Keriso, amene. ■

FAAMATALAGA

1. Pope Francis, saunoaga i le Humanum: An International Interreligious Colloquium on the Complementarity of Man and Woman, Nov. 17, 2014, humanum.it/en/videos; tagai foi zenit.org/en/articles/pope-francis-address-at-opening-of-colloquium-on-complementarity-of-man-and-woman.
2. Pope Francis, Colloquium on the Complementarity of Man and Woman.
3. "E Mafai na Faavavau Aiga," *Viiiga*, nu. 183.
4. David Brooks, "The Age of Possibility," *New York Times*, Nov. 16, 2012, A35, nytimes.com/2012/11/16/opinion/brooks-the-age-of-possibility.html.



Fofogaina e Peresitene Dieter F. Uchtdorf
Fesoasoani Lua i le Au Peresitene Sili

O Le Lagolagoina o Taitai o le Ekalesia

Etuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma o le Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O e finagalo i ai ia faailoa mai.
O i latou e au ese ai pe afai e i ai, faailoa mai.
Ua faamauina le palota.
E tuuina atu ia tatou lagolagoina

Boyd Kenneth Packer o le Peresitene o le Korama a Aposetolo e Toasefululua ma uso nei o lena korama: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ma Neil L. Andersen.

O e finagalo i ai, faamolemole ia faailoa mai.
A i ai se faatuiese ia faailoa mai.
Fa'afetai tele. Ua faamauina le palota.

E tuuina atu ia tatou lagolagoina ia fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O e uma e finagalo i ai, faailoa mai.
O e faatuiese, pe afai o i ai, i le faailoga lava lea.

Ua faamauina le palota.

E tuuina atu ina ia faamalolo mai Fitugafulu Eria nei, e amata atu i le aso 1 o Me , 2015: Juan C. Avila, Philip K. Bussey, René J. Cabrera, Renato Capelletti, Paul D. M. Christensen, Samuel W. Clark, Rogério G. R. Cruz, George R. Donaldson, Ini B. Ekong, Christian H. Fingerle, Craig G. Fisher, Jerryl L. Garns, M. Keith Giddens, Allen D. Haynie, Jui Chang Juan, George M. Keele, Von G. Keetch, Katsumi Kusume, German Laboriel, J. Christopher Lansing, Gustavo Lopez, Dmitry V. Marchenko, Peter F. Meurs, T. Jackson Mkhabela, Hugo Montoya, Valentín F. Nuñez, Hee Keun Oh, Jeffery E. Olson, R. Ingvar Olsson, Norbert K. Ounleu, Robert N. Packer, Nathaniel R. Payne, Cesar A. Perez Jr.,





Michael J. Reall, Edson D. G. Ribeiro, Brad K. Risenmay, Walter C. Selden, Mozart B. Soares, Carlos Solis, Norland Souza, Vern P. Stanfill, T. Marama Tarati, Kouzou Tashiro, Ruben D. Torres, Omar Villalobos, Jack D. Ward, Alan J. Webb, Gerardo J. Wilhelm, ma Jim L. Wright.

O e fia au faatasi ma i matou e faailoa atu le lotofaafetai mo la latou tautua matavela, faamolemole faailoa mai.

Ua tuuina mai ina ia tatou faamaloloina mai ma le agaga faafetai Brother David L. Beck, Larry M. Gibson, ma Randall L. Ridd sa avea ma au peresitene aoao o Alii Talavou. E faapena foi ona faamalolo mai ma sui uma o le fono faatonu aoao o Alii Talavou.

I lenei taimi e faamaloloina mai foi Sister Jean A. Stevens o le fesoasoani muamua i le au peresitene aoao o le Peraimeri ma Sister Cheryl A. Esplin o le fesoasoani lua

i le au peresitene aoao o le Peraimeri.

O e uma e fia afaatasi ma i matou i le faailoa atu o le agaga faafetai i nei uso ma tuafafine mo la latou auaunaga maoae ma le tuuto, faamolemole ia faailoa mai.

E tuuina atu ina ia tatou lagolagoina e avea ma uso fou o le Korama Muamua a Fitugafulu: Kim B. Clark, Von G. Keetch, Allen D. Haynie, Hugo Montoya, ma Vern P. Stanfill.

O e uma e lagolagoina, ia faailoa mai.

O e faatuiese i le faailoga lava e tasi.

E tuuina atu ina ia tatou lagolagoina e avea ma Fitugafulu Eria fou: Nelson Ardila, Jose M. Batalla, Lawrence P. Blunck, Bradford C. Bowen, Mark A. Bragg, Sergio Luis Carboni, Armando Carreón, S. Marc Clay Jr., Z. Dominique Dekaye, Osvaldo R. Dias, Michael M. Dudley, Mark P. Durham, James E. Evanson, Paschoal F.

Fortunato, Patricio M. Giuffra, Daniel P. Hall, Toru Hayashi, Paul F. Hintze, J. K. Chukwuemeka Igwe, Seung Hoon Koo, Ming-Shun Kuan, Johnny L. Leota, Carlo M. Lezano, Joel Martinez, J. Vaun McArthur, Kyle S. McKay, Helamán Montejo, A. Fabio Moscoso, Michael R. Murray, Norman R. Nemrow, S. Mark Palmer, Ferdinand P. Pangan, Jairus C. Perez, Steven M. Petersen, Wolfgang Pilz, Jay D. Pimentel, John C. Pingree Jr., Edvaldo B. Pinto Jr., Evan A. Schmutz, K. David Scott, Paul H. Sinclair, Benjamin T. Sinjoux, Rulon F. Stacey, David L. Stapleton, Karl M. Tilleman, William R. Titera, Seiji Tokuzawa, Carlos R. Toledo, Cesar E. Villar, Juan Pablo Villar, David T. Warner, Gary K. Wilde, ma Robert K. William.

O e uma e lagolagoina, faamolemole faailoa mai.

O e faatuiese pe afai e i ai.

Ua tuuina mai tatou te lagolagoina Cheryl A. Esplin e avea ma fesoasoani muamua i le au peresitene aoao o le Peraimeri ma Mary R. Durham e avea ma fesoasoani lua.

Ua tuuina mai foi tatou te lagolagoina Brother Stephen W. Owen e avea ma peresitene aoao o Alii Talavou, faatasi ai ma Douglas Dee Holmes o le fesoasoani muamua ma Monte Joseph Brough o le fesoasoani lua.

O e e lagolagoina, faamolemole ia faailoa mai.

A i ai se faatuiese ia faailoa mai.

Peresitene Monson, ua faamauiina le palota. Matou te valaaulia i latou sa faatuiese i soo se tofiga ina ia faafesootai atu la outou peresitene o le siteki. O'u uso e ma tuafafine pele, matou te faafetai atu mo lo outou faatuatua ma tatalo mo taitai o le Ekalesia.

Matou te valaaulia le Au Pulega Aoao fou ma sui o au peresitene aoao fou o ausilali ia susu mai loa i luga i tou alalafaga i le tulaga. ■

Lipoti a le Matagaluega Suetusi a le Ekalesia, 2014

Fofogaina e Kevin R. Jergensen

Pule Faatonusili, Matagaluega Suetusi a le Ekalesia

I Le Au Peresitene Sili o Le Ekalesia a Iesu Keriso o le Au Paia o Aso e Gata Ai

Uso Pele: E pei ona faamanino mai i le faaaliga o loo i le vaega e 120 o le Mataupu Faavae ma Feagaiga, o le Aufono e Faafoeina ia Sefuluai—lea e aofia ai le Au Peresitene Sili, o le Korama a Aposetolo e Toasefululua, ma le Au Epikopo Pulefaamalumu—e faatagaina tupe faaalu o tupe a le Ekalesia. E faaaogaina e matagaluega a le Ekalesia tupe ia ogatusa ma paketi ua faamaonia, ma e tusa ai ma aiaiga ma faiga faavae a le Ekalesia.

Ua tuuina mai i le Matagaluega Suetusi a le Ekalesia, lea e aofia ai ni tamalii faapolofesa ma e tutoatasi lava mai isi matagaluega uma a le Ekalesia, le tiutetauave e faatino ai sugegatusi mo le faamoemoega o le tuuina atu o le faamautinoaga talafeagai e tusa ai

ma saofaga na tauaaoina, o tupe na faaalu, ma le malupuipua o aseta a le Ekalesia.

E faavae i luga o sugegatusi ua uma ona faatino, ua i ai nei i le Matagaluega Suetusi a le Ekalesia le manatu, o mea uma, o saofaga na tauaaoina, o tupe na faaalu, ma aseta a le Ekalesia mo le tausaga 2014, sa tusi faamaumau ma tauli-maina e tusa ai ma paketi sa faamaonia, aiaiga faavae, ma faiga faatausitusi a le Ekalesia. E mulimuli le Ekalesia i faiga na aoao atu i ona tagata o le ola ai i totonu o se paketi, aloese mai aitalafu, ma teu tupe mo taimi o le le tagolima.

E tuuina atu ma le faaaloalo lava, Matagaluega Suetusi a le Ekalesia
Kevin R. Jergensen
Pule Faatonusili ■



Lipoti Faafuainumera, 2014

Fofogaina e Brook P. Hales

Failautusi a le Au Peresitene Sili

Mo le silafia e tagata o le Ekalesia, ua tuuina mai e le Au Peresitene Sili le lipoti faafuainumera leni e faatatau i le tuputupu ae ma le tulaga o le Ekalesia e oo mai i le aso 31 o Tesema, 2014.

Iunite o le Ekalesia

Siteki	3,114
Misiona	406
Itu	561
Uarota ma Paranesi	29,621

Tagata o le Ekalesia

Aofaiga o Tagata o le Ekalesia...	15,372,337
Tamaiti Fou o Faamaumauga	116,409
Tagata Liliu Mai na Papatisoina.....	296,803

Faifeautalai

Faifeautalai Faamisiona.....	85,147
Faifeautalai o Auaunaga a le Ekalesia	30,404

Malumalu

O Malumalu sa Faapaiaina i le 2014 (Fort Lauderdale Florida, Gilbert Arizona, ma Phoenix Arizona).....	3
Malumalu sa Toefaapaiaina (Ogden Utah).....	1
Malumalu o loo Faaaogaina e oo mai i le Faaiuga o le Tausaga.....	144



Saunia e Elder David A. Bednar

○ Le Korama a Aposetolo e Toasefululua

O Lea Na Latou Faafilemu Ai Lo Latou Matata'u

E le pei la o le mata'u faalelalolagi lea e tupu ai le tē'i ma le atuatuvaile, o le mata'u i le Atua o se puna lea o le filemu, faamautinoaga, ma le talitonuga.

Ou te manatua lelei se aafiaga sa ou oo i ai a o tamaitiiti. I se tasi o aso a o matou taaalo ma au uo, sa faafuasei ai ona ta'e ia a'u se faamalama o se faleoloa e lata ane i lo matou fale. A o nuti ai le tioata ma tatagi leotele le faailoilo, sa faatumulia lou loto ma le mafaufau i se fefe lē mautonu. Sa vave ona ou iloina ua lofituina au e faaalu le toega o lou olaga i le falepuipui. Sa iu ina tauanauina au e ou matua ia ou sau i fafo mai se mea na ou lafi ai i lalo o lou moega ma fesoasoani ia te au ia faia se faaleleiga ma le pule o le faleoloa. O le mea e lelei ai, sa lei oo le faafalepuipuiina o au.

O le fefe na ou lagonaina i lena aso sa lofituina ma moni. E te lagonaina ma le le masalosalo ni lagona sili atu o le mata'u i le maea ai ona iloa o se faigata faalesoifua maloloina faaletagata lava ia, i le iloina o se tagata o le aiga i tulaga faigata po o le lamatia, po o le matauina o mea faapopoleina o loo tutupu i le lalolagi. I ia tulaga, o lagona faanoanoa o le fefe e aliae ona o le taufaamatau o

mea lamatia, lē mautonu, po o le tiga ma e ala i aafiaga e le faamoemoeina, o nisi taimi e faafuasei, ma e foliga mai e maua ai se taunuuga le lelei.

I o tatou olaga i aso uma, o lipoti faifai pea o fetauaiga faasolitulafono, oge, taua, faiga piopio, faiga faatupu faalavelave, faaitiitia o amioga mama, faamai, ma malosiaga faataumaioi o

le natura e mafai ona tupu mai ai le fefe ma le atuatuvaile. E moni lava ua tatou ola i le vaitau na muai valoia e le Alii: “Ma i lena aso . . . o le a vāvāō le lalolagi atoa, ma o le a faavaivaia loto o tagata” (MF&F 45:26).

O lo'u faamoemoega o le faamatalaina o le auala e aveesea ai le fefe e ala i se malamalama sa'o e uiga i le faatuatua ma le faatuatua i le Alii o Iesu Keriso. Ou te tatalo faatauanau ia faamanuia outou taitoatasi e le Agaga Paia a o tatou iloiloina faatasi lenei autu taua.

Fefe Faaletagata

I le faalogoina ai o le siufofoga o le Atua i le maea ai ona ai le fua faasaina, sa lalafi ai Atamu ma Eva i le Faatoaga o Etena. Sa fetalai atu le Atua ia Atamu ma fesili, “O fea o i ai oe? Ma [na tali Atamu], na ou faalogo atu i lou siufofoga . . . , ona ou fefe ai lea” (Kenese 3:9–10). E tatau ona matauina, o se tasi o uluai aafiaga o le Pa'u e mo Atamu ma Eva ina ia oo ai i le fefe. O lenei lagona malosi o se elemene taua o lo tatou olaga faaletino.

O se faataitaiga mai le Tusi a Mamona ua faamamafaina ai le mana





o le iloa o le Alii (tagai 2 Peteru 1:2–8; Alema 23:5–6) e aveesea ai le fefe ma maua ai le filemu pe a tatou fetaiai ma le fili maoae.

I le laueleele o Helama, sa fefefe ai le nuu o Alema e ala i se autau a sa Lamana sa agai mai ia i latou.

“Peitai sa alu atu Alema ma ua tu i totonu o i latou, ma apoapoai atu ia te i latou ia aua ne’i o latou fefefe, ae . . . manatua le Alii lo latou Atua ma o le a ia laveaiina i latou.

“O lea na latou faafilemuina ai lo latou matata’u” (Mosaea 23:27–28).

Ia matau sa lei faafilemuina e Alema le matata’u o le nuu. Ae, sa fautua atu Alema i e talitonu ia manatua le Alii ma le laveaiga lea e na o ia e mafai ona aumaia (tagai 2 Nifae 2:8). Ma le malamalama o le leoleoga malu a le Faaola e mafai ai e tagata ona faafilemuina lo latou matata’u.

O le malamalama sa’o e uiga i le faatuatua ma le faatuatua i le Alii e faamalosia ai i tatou ia faafilemuina lo tatou matata’u ona ua na o Iesu Keriso lava le puna o le filemu tumau. Na Ia tautino mai, “Aoa mai ia te au, ma faalogo mai i a’u upu; savali i le agamalu o lo’u Agaga, ma o le a e maua ai le filemu ia te a’u” (MF&F 19:23).

Sa faamalamalama mai foi e le Matai, “O ia o le e faia galuega o le amiotonu o le a maua lona tau, o le filemu lea i le lalolagi lenei ma le ola e faavavau i le lalolagi a sau” (MF&F 59:23).

O le faatuatua ma le talitonuga ia Keriso ma se faalagolagoga naunautai i Ana galuega, alofa mutimutivale, ma le alofatunoa e taitai atu i le faamoemoe e ala i Lana Togiola, i le Toetu ma le ola e faavavau (tagai Moronae 7:41). O sea faatuatua ma le faamoemoe e valaauliina le filemu matagofie o le magafagafa lelei i o tatou olaga lea tatou te naunau uma i ai. O le mana o le Togiola ua mafai ai ona salamo ma faafilemu ai faanoanoaga ua mafua mai i le agasala; ua faamalosia ai foi i tatou ia vaai, faia, ma avea ma ni tagata lelei i ni auala e le mafai ona tatou iloaina pe ausiaina i o tatou gafatia faatapulaa faaleolaga nei. O le mea moni, o se tasi o faamanuiaga maoae o le avea ma soo tuuto “o le manuia foi mai le Atua, o loo silisili lava i mea uma e manatu i ai” (Filipi 4:7).

O le filemu e aumai e Keriso e faatagaina ai i tatou ia malamalama ai i le olaga faaletino e ala i le vaaiga taua o le faavavau ma maua ai se mausali faaleagaga (tagai Kolose 1:23) lea e fesoasoani ai ia i tatou ia faatumauina

se taulaiga faifai pea i le taunuuga faalelagi. O lea, e mafai ai ona faamanuiaina i tatou ia faafilemuina lo tatou matata’u ona o Lana aoaoga faavae ua maua ai le faamoemoe ma le taitaiga i vaega uma o o tatou olaga. O Ana sauniga ma feagaiga e faamalosia ma faamafanafana ai [tatou] i taimi uma o le lelei ma le leaga. Ma ua aumaia e Lana pule o le perisitua le faamautinoaga e faapea o mea e sili ona taua e mafai ona tumau i le olaga nei ma i le faavavau.

Ae e mafai ona tatou faafilemuina le matata’u lea e faigofie ona lavelavea soo ai i tatou i lo tatou lalolagi i nei aso? O le tali i lenei fesili o se ioe manino. E tolu mataupu faavae autu o loo tutotonu i le mauaina o lenei faamanuiaga i o tatou olaga: (1) tepa atu ia Keriso, (2) atiae i luga o le faavae o Keriso, ma le (3) fetaomi atu i luma i le faatuatua ia Keriso.

Tepa Atu ia Keriso

O le fautuaga na tuu atu e Alema i lona atalii o Helamana ua faatatau tonu lava ia i tatou taitoatasi i aso nei: “Toe, vaai ia e tepa atu i le Atua ma e ola ai” (Alema 37:47). E tatau ona tatou tepa atu ma faatumau ma le mausali lo tatou taulai i le Faaola i taimi uma ma i nofoaga uma.

Manatua le taimi na i ai Aposetolo a le Alii i totonu o se vaa, sa felafoaiina i le loloto o le sami. Sa afio atu Iesu ia i latou, ma savali i luga o le vai; ae sa latou lei iloina o Ia, na latou alalaga atu i le matata'u.

“Ona fetalai atu loa lea o Iesu ia te i latou, ua faapea atu, Ia outou loto tetele; o a'u lava, aua tou te matatau.

“Ua tali mai Peteru ia te ia, ua faapea mai, Le Alii e, afai o oe, ia e fetalai mai ia te au, ou te alu atu ia te oe i luga o le vai.

“Ona fetalai atu ai lea o ia, Ina sau ia” (Mataio 14:27–29).

Ona savali atu lea o Peteru i luga o le vai ia Iesu.

“Ae ina ua ia vaai atu ua malosi le matagi, sa fefe o ia,” ma amata ai ona magoto ifo, ma alaga atu, “Le Alii e, ia e faaola mai ia te au.

“Ona aapa atu loa lea e Iesu o lona aao, ua tago ia te ia, ua faapea atu ia te ia, O oe na lē faatuatua itiiti, se a le mea ua e masalosalo vale ai?” (Mataio 14:30–31).

Ou te vaai faalemafaufau atu ia Peteru o tali vave atu ma le naunautai i le valaaulia a le Faaola. Faatasi ai ma ona fofoga ua taulai atu ia Iesu, na ia laa ese atu ai mai le vaa ma savali atu faavavega i luga o le vai. Ae ina ua faasalaveia lana vaai e le matagi ma galu sa fefe ma amata loa ona magoto ifo i lalo.

E mafai ona faamanuiaina i tatou ia faatoilalo lo tatou matatau ma faa-malosisia lo tatou faatuatua pe a tatou mulimuli i faatonuga a le Alii: “Vaai mai ia te a'u i mafauauga uma; aua le masalosalo, aua le fefefe” (MF&F 6:36).

Atiae i Luga o le Faavae o Keriso

Na apoapoai atu Helamana i ona atalii o Nifae ma Liae: “Ia manatua, ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e



le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo o le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afai e atiae ai tagata e le mafai lava ona pauu i latou” (Helamana 5:12).

O sauniga ma feagaiga o mea faavae ia tatou te faaogaina e fau ai o tatou olaga i luga o le faavae o Keriso ma Lana Togiola. E mausali lelei tatou fesootaiga i le Faaola pe a tatou mauaina ma le agavaa sauniga ma ulu atu i feagaiga, manatua ma le faamaoni ma faamamalu na tautinoga paia, ma faia le mea sili tatou te mafaia e ola ai e tusa ma matafaioi ua tatou taliaina. Ma o lena sootaga o le puna lea o le malosi ma le tumau faaleagaga i vaitau uma o o tatou olaga.

E mafai ona faamanuiaina i tatou e faafilemu lo tatou matatau pe a tatou atiae ma le mausali o tatou manaoga ma amioga i luga o le faavae mautinoa o le Faaola e ala i o tatou sauniga ma feagaiga.

Fetaomi Atu i Luma i le Faatuatua ia Keriso

Sa tautino mai Nifae: “O le mea lea, e tatau ai ona outou fetaomi atu i luma

ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai tou te fetaomi atu i luma, ma tau-mamafa fiafia i le afioga a Keriso, ma tumau e oo i le iuga, faauta, ua faapea ona fetalai mai o le Tama: O le a outou maua le ola e faavavau” (2 Nifae 31:20).

O le tumau ma le faautauta ua faa-matala mai i lenei fuaiupu o le taunuuga lea o le malamalamaaga faaleagaga ma le vaai mamao, faapalepale, onosai, ma le alofa tunoa o le Atua. O le faatino-ina o le faatuatua i le suafa paia o Iesu Keriso, gauai atu ma le agamalu i Lona finagalo ma Lana taimi i o tatou olaga, ma le faamamaluina ma le lotomau-lalo o Lona aao i mea uma e tupu mai ai mea filemu o le malo o le Atua ma aumaia ai le olioli ma le ola e faavavau (tagai MF&F 42:61). E tusa foi pe tatou te fetaiai ma faigata ma feagai ma lē mautonu o le lumanai, e mafai lava ona tatou tumau ma le fiafia ma ola i se olaga “filemu i le amio Atua uma lava ma le [faamaoni]” (1 Timoteo 2:2).

E mafai ona faamanuiaina i tatou e faafilemu lo tatou matatau pe a tatou maua le malosi lea e sau mai le aoa-ina ma le ola ai i mataupu faavae o le talalelei ma fetaomi atu i luma ma le naunautai i luga o le ala o feagaiga.

O Le Mata'u i le Alii

E ese mai ai ae fesootai lava i le mata'u lea e tele ina tatou oo i ai, lea e faamatalaina e tusitusiga paia o le “mata'u ia fiafia mai ai o ia” (Eperu 12:28) po o le “mata'u i le Alii” (Iopu 28:28; Faataoto 16:6; Isaia 11:2–3). E le pei la o le mata'u faalelalolagi lea e tupu ai le te'i ma le atuatuvaale, o le mata'u i le Atua o se puna lea o le filemu, faamautinoaga, ma le talitonuga.

Ae e mafai faapefea e soo se mea e fesootai ma le mata'u ona faagaetiaina pe aoga i le faaleagaga?

O le mata'u amiotonu o loo ou taumafai e faamatala atu e aofia ai se lagona loloto o le migao, faaaloalo, ma le maofa mo le Alii o Iesu Keriso (tagai Salamo 33:8; 96:4), usiusitai i Ana poloaiga (tagai Teuteronomie 5:29; 8:6; 10:12; 13:4; Salamo 112:1), ma le tulimatai atu i le Faamasinoga Mulimuli ma le faamasinotonu i Lona aao. O lea, o le mata'u i le Atua e tupu mai i se malamalamaaga sa'o o le natura paia ma le misiona a le Alii o Iesu Keriso, se naunautaiga e gauai atu o tatou loto i Lona finagalo, ma se malamalama o le a tali atu lava alii ma tamaitai uma mo a latou lava agasala i le Aso o le Faamasinoga (tagai MF&F 101:78; Mataupu Faavae o le Faatuatua 1:2).

E pei ona aao mai tusitusiga paia, o le mata'u i le Atua "o le amataga lea o le potō" (Faataoto 1:7), "o le aaoaina lea e potō ai" (Faataoto 15:33), o se "faatua-tuaga malosī" (Faataoto 14:26), ma "o le puna o le ola lea" (Faataoto 14:27).

Faamolemole ia matau le mata'u i le Atua e fesootei le mamotusiaina i se malamalamaaga o le Faamasinoga Mulimuli atoa ai ma lo tatou tali atu o i tatou lava ia mo o tatou manaoga, mafaufauga, upu, ma amioga (tagai Mosaea 4:30). O le mata'u i le Alii e le o se atuatuvaale musuā e uiga i le alu atu i Lona afioaga ina ia faamasinoina. Ou te le talitonu o le a tatou fefefe ia te Ia. Ae, o le manatu o le a tatou i ai i Lona afioaga e feagai ma mea e pei ona i ai moni lava e uiga ia i tatou lava ma le i ai "o se malamalama atoa" (2 Nifae 9:14; tagai foi i le Alema 11:43) o a tatou faaiuga uma, pepelo, ma le olegia o i tatou lava. I le faaiuga, o le a leai sa tatou 'alofaga.

O tagata uma lava ua soifua pe o le a soifua mai i luga o le fogaeleele "o le a aumau e tutu i luma o le nofoa faamasino a le Atua, e faamasino e ia e tusa ma a latou galuega pe lelei pe

leaga" (Mosaea 16:10). Afai sa tatou mananao i le amiotonu ma lelei a tatou galuega, ona avea lea o le pa faamasino ma se aafiaga fiafia (tagai Iakopo 6:13; Enosa 1:27; Moronae 10:34). Ma i le aso mulimuli o le a "tauia [i tatou] i le amiotonu" (Alema 41:6).

Peitai, afai sa tatou mananao i mea a le tiapolo ma galuega o le amioleaga, ona avea lea o le pa faamasino ma se pogai o le fefe. O le a tatou le fia vaai a'e ai i luga i lo tatou Atua; ma o le a sili ai ona tatou fiafia pe a na mafai ona tatou faatonu atu i papa ma mauga ia pauu mai i o tatou luga, e pupuni ai i tatou mai ona luma" (Alema 12:14). Ma i le aso mulimuli o le a tatou "maua [lo tatou] tau i le leaga" (Alema 41:5).

E pei ona aoteleina i le Failauga:

"Ia e mata'u i le Atua, ma anaana i ana poloaiga: aua o mea ia e tatau i tagata uma.

"Aua e faamasinoina e le Atua galuega uma, atoa ma mea lilo uma lava, o mea lelei atoa ma mea leaga" (Failauga 12:13–14).

O'u uso e ma tuafafine, o le mata'u i le Atua e aveesea ai le fefe faaletagata. E faafilemuina ai foi popolega



faanoanoa ia e le mafai lava ona lava ai lo tatou lelei faaleagaga ma o le a le gafatiaina ai lava mea e manaomia ma mea ua faamoemoeina mai e le Alii. O le mea moni, e le mafai lava ona lava lo tatou lelei pe gafatiaina foi pe a tatou faalagolago atoa i lo tatou lava malosī ma faatinoga. E lē lava ma e le mafai e a tatou lava galuega ma naunautaiga ona faaolaina i tatou. "Pe a uma mea uma e mafai ona tatou faia" (2 Nifae 25:23), ua na o le alofa muti-mutivale ma le alofatunoa lava e mafai ai ona faaatoatoaina i tatou lea e maua mai i le taulaga togiola e le i'u ma faavavau a le Faaola (tagai Alema 34:10, 14). O le mea mautinoa lava, "[tatou] te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei" (Mataupu Faavae o le Faatuatua 1:3).

O le mata'u i le Atua o le alofa lea ma le faatuatuaina o Ia. A tatou matata'u atoa i le Atua, tatou te alolofa atoatoa ia te Ia. Ma "e lafo ese i fafo e le alofa ua atoatoa le fefe uma" (Moronae 8:16). Ou te folafola atu le malamalama susulu o le mata'u i le Atua o le a lafo ese ai i fafo le pogisa o le mata'u faaletagata (tagai MF&F 50:25) pe a tatou tepa atu i le Faaola, atiae i luga ia te Ia e fai ma o tatou faavae, ma fetaomi atu i luma i luga o Lana ala o le feagaiga faatasi ai ma se tautinoga faapaiaina.

Molimau ma le Folafolaga

Ou te alofa ma faaaloalo i le Alii. O Lona mana ma le filemu e moni lava. O Ia o lo tatou Togiola, ma ou te molimau atu o loo soifua o Ia. Ma ona o Ia, e le tatau ai ona atuatuvaale o tatou loto pe fefefe (tagai Ioane 14:27), ma o le a faamanuiaina i tatou ia faafilemuina lo tatou fefefe. Ou te molimau atu ai i le suafa paia o le Alii o Iesu Keriso, amene. ■



Saunia e Elder D. Todd Christofferson
O Le Korama a Aposetolo e Toasefululua

Aisea e Faaipoipo Ai, Aisea e Fai ai se Aiga

O se aiga e fausia i luga o le faaipoipoga o se alii ma se tamaitai e maua ai se faatulagaga sili mo le fuafuaga a le Atua ia lausiusi.

I luga ae o le Faitotoa Tele i Sisifo o le Westminster Abbey lauiloa i Lonetona, Egelani, o loo tutu ai ni faatagata e 10 o maturo Kerisiano o le seneturi e 20. O loo i ai ma Dietrich Bonhoeffer, o se faifeau Siamani atamai sa fanau i le 1906.¹ Sa avea Bonhoeffer o se tagata tetee le mataofofia o le pulega sau a le Nazi ma le faiga sa fai a'i tagata o Iutaia ma isi. Sa faafalepuipuia o ia i lona tetee aliali ma iu ai ina sa fasiotia i se togalauapi o pagota. O Bonhoeffer o se tusitala o le mau tusitusiga, ma o nisi o ana tusiga ua sili ona lauiloa o tusi ia na

fesoasoani ai leoleo sa faavauvau alolofa ia te ia ma fesoasoani ai e aveese faanana o ia mai le falepuipui, ma na lolomi ma faasalalauina mulimuli ane o *Tusi ma Pepa mai le Falepuipui*.

O se tasi o na tusi o le tusi i si ona tei teine a o lei faia lana faaipoipoga. Na aofia ai malamalamaaga taua nei: “O le faaipoipoga e sili atu nai lo le alofa o le tasi i le isi. . . . I lo oulua alofa e na o oulua lava lua te vaai i ai i le lalolagi, peitai i le faaipoipoga e tatau ona sosoo ai oulua i se sooga i le filifili o augatupulaga, lea e faamatu’ia e le Atua e faaunuunuina mo lona mamalu, ma valaauina ai i lona malo. I lo oulua alofa o le a na o le lagi o lo oulua lava fiafia lua te vaai i ai, peitai i le faaipoipoga ua tuuina oulua i se tulaga o tiutetauave agai atu i le lalolagi ma tagata. O lo oulua alofa o la oulua lava lea meatotino, peitai o le faaipoipoga e tele atu nai lo se mea e patino faaletagata—o se tulaga aloaia, o se tofi. E pei lava o se palealii, ae le na o se manao e pulea, e afua ai ona i ai se tupu, ma e faapena foi i le faaipoipoga, e le na o se alofa o le tasi i le isi, e soofaatasia ai oulua i le silafaga a le Atua ma tagata. . . . O lea la, o le alofa e mai

ia te oulua, ae o le faaipoipoga e mai lugā, e mai le Atua.”²

O le a le auala e maualuga atu ai le faaipoipoga i le va o se alii ma se tamaitai nai lo le alofa o le tasi i le isi ma lo la’ua lava fiafia e avea ai “o se tulaga o le tiutetauave agai atu i le lalolagi ma tagata”? O le a le itu e sau ai “mai lugā, mai le Atua”? Ina ia malamalama, e tatau ona tatou toe foi i le amataga.

Ua faaalii mai e perofeta faapea na muai ona tatou ola o ni atamai ma sa tuuina mai ia i tatou ni foligafaatusa, po o ni tino agaga, e le Atua, o lea na avea ai ma Ana fanau agaga—o atalii ma afafine o ni matua faalelagi.³ Na oo mai le taimi i lea muai olaga o agaga i le taimi, na faagasolo ai Lona finagalo ina ia “mafai ona tatou maua se avanoa e avea ai faapei o Ia,”⁴ sa saunia e lo tatou Tama Faalelagi se fuafuaga e faatino ai. I tusitusiga paia o loo aumaia ai ni igoa eseese, e aofia ai “o le fuafuaga o le olataga,”⁵ “o le fuafuaga tele o le fiafia,”⁶ ma le “o le fuafuaga o le togiolaina.”⁷ O faamoemoega autu e lua o le fuafuaga sa faamatala atu ia Aperaaamo i upu nei:

“Ma ua tulai mai se tasi i totonu o i latou sa pei o le Atua, ma sa fai atu o ia ia te i latou o e sa faatasi ma ia: O le a tatou o i lalo, ona o loo i ai se avanoa iina, ma o le a tatou ave mai mea nei, ma o le a tatou faia se lalolagi e nonofo ai i latou nei [agaga];

“Ma o le a tatou tofotofoina ai i latou, e vaai pe latou te faia mea uma o soo se mea e poloaiina ai i latou e le Alii lo latou Atua:

“Ma o i latou o e e tausia lo latou esetete muamua, o le a faaopoopoina i luga o i latou; . . . ma o i latou o e e tausia lo latou esetete lona lua o le a faaopoopo i luga o o latou ulu le mamalu e faavavau ma faavavau lava.”⁸

Ona o lo tatou Tama Faalelagi, o lea sa avea i tatou o ni tagata agaga. O lea la ua Ia ofoina mai ia i tatou se



ala e faamae'a pe faaatoatoa ai lena tagata. O le faaopoopoga o le elemene faaletino e taua ina ia maua le atoaga ma le mamalu o loo sapi ai le Atua lava Ia. Afai, na o tatou faatasi ma le Atua i le lalolagi o agaga i le muai olaga, ma tatou ioe e auai i le faatinoga o Lana fuafuaga—pe i se isi faaupuga, “tausia lo [tatou] esetete muamua”—o le a “faaopoopoina i o tatou luga” se tino faaletino ina ua tatou o mai e nonofo i le lalolagi lea sa Ia foafoaina mo i tatou.

Afai la, i le gasologa o lo tatou olaga faitino, sa tatou filifili e “faia mea uma o soo se mea e poloaiina ai [i tatou] e lo [tatou] Atua,” o lona uiga ua tatou tausia la tatou “esetete lona lua.” O lona uiga la e ala i a tatou filifiliga tatou te faaali atu ai i le Atua (ma i tatou lava) la tatou tautinoga ma le mana e ola ai i Lana tulafono faaselesitila a o tatou i ai i fafo mai o lona afoaga, ma i se tino faaletino ma ona mana uma, manaoga, ma naunauga. Pe mafai ea ona tatou faafoeina le tino faaletino ina ia aveva o se meafaigaluega ae le o se pule o o tatou agaga? Pe mafai ea ona faatuatuaina i tatou i le olaga nei ma le faavavau i mana faaleatua, e aofia ai le mana e foafoa ai le ola? Pe o le a tatou taitoatasi ma faatoilaloina le leaga? O i latou sa faia o le a “faaopoopoina i luga o o latou ulu le mamalu e faavavau ma faavavau lava”—o se itu taua o lona mamalu o le tino toetu, tino ola pea, ma le mamalu.⁹ E leitioa tatou “alalaga fiafia” i avanoa ma folafolaga ofoofogia.¹⁰

E le itiiti ifo i le fa ni mea e manaomia mo le manuia o lenei fuafuaga paia:

Muamua o le Foafoaga o le lalolagi e aveva ma o tatou nofoaga e nonofo ai. Po o a lava auililiga o le faasologa o le foafoaga, ua tatou iloa e le o se mea na faafuaveta, ae na taitaiina e le Atua le Tama ae faataunuuna e Iesu Keriso—“na ia faia mea uma lava; e leai foi se mea e tasi na faia e lei faia e ia.”¹¹



Lona lua o le tulaga o le olaga nei. Sa faatino e Atamu ma Eva mo i latou uma o e sa filifili e auai i le faatinoga o le fuafuaga sili a le Tama mo le fiafia.¹² O lo la Pa'u na afua ai tulaga sa manaomia mo lo tatou fanau mai faaletino, ma mo se aafiaga faaletino ma le aoaoina i fafo mai o le afoaga o le Atua. O le Pa'u na oo mai ai ma se iloa o le lelei ma le leaga ma le mana na tuuina mai le Atua e filifili ai.¹³ O le mea mulimuli, o le Pa'u na aumaia ai le oti faaletino lea e manaomia e fai ai lo tatou taimi i le olaga nei ma taimi e le tumau ina ia aua ai ne'i o tatou ola e faavavau i a tatou agasala.¹⁴

Lona tolu o le togiolaina mai le Pa'u. Ua tatou vaai i le matafaioi a le oti i le fuafuaga a lo tatou Tama Faalelagi, ae o lona fuafuaga o le a le aoga e aunoa ma se auala e faatoilalo ai le oti i le iuga, faaletino ma le faaleagaga. O le mea lea, na puapuagatia ai le Faaola, o le Alo Pele o le Atua, o Iesu Keriso, ma maliu e togiola mo le solitulafono a Atamu ma Eva, lea ua maua ai le toetu ma le tino ola pea mo tagata uma. Ma e talu ai e leai se tasi o i tatou o le a atoatoa ma faifai pea le usitai i le tulafono o le talalelei, o lea ua togiolaina ai foi i tatou e Lana Togiola mai i a tatou lava agasala le tuutuuga o le salamo. O le alofa tunoa togiola o le Faaola, ua maua mai ai le faamagaloga o agasala ma le faapaiaaga o le agaga, ua mafai ai ona tatou toe fanauina faaleagaga ma toe faalelei ai ma le Atua. O lo tatou oti faaleagaga—le tuueseeseina o i tatou mai le Atua—o le a muta.¹⁵

Lona fa ma le mea mulimuli, o le tulaga mo lo tatou fanau mai faaletino ma le toe fanauina faaleagaga i le malo o le Atua. Mo Lana galuega ia manuia e “[faaeaina ai i tatou] faatasi ma ia lava,”¹⁶ sa faauuina e le Atua ia faaiipoipo alii ma tamaitai ma fanauina ai fanau, ma o lea e foafoaina ai, i le faapaaga ai ma le Atua, ia tino faitino ia ua aveva ma autu o le tofotofoga o le olaga nei ma e taua mo le mamalu e faavavau faatasi ma Ia. Sa Ia faauuina foi ia faavaeina e matua ni aiga e faafailele ai a latou fanau i le malamalama ma le upumoni,¹⁷ ma taitai i latou i se faamoemoe ia Keriso. Ua poloaiina i tatou e le Tama:

“Ia aoao saoloto atu nei mea i lau fanau, ua fai atu:

“Ona . . . talu ai ona sa outou fanau mai i le lalolagi i le vai, ma le toto, ma le agaga lea na Ou faia, ma faapea ona aveva ai o le efuefu o se tagata ola, e faapea lava ona tataua ona toe fanauina o outou i le malo o le lagi, i le vai, ma i le Agaga [Paia], ma faamamaina i le toto, o le toto lava lea o la'u Toatasi na Fanau; ina ia mafai ona faapaiaina outou mai agasala uma, ma olioli i afoaga o le ola e faavavau i le lalolagi lenei, ma le ola faavavau i le lalolagi a sau, o le mamalu ola pea lava.”¹⁸

O le iloa ai o le mafuaaga na tatou tuua ai le afoaga o lo tatou Tama Faalelagi ma le mea e manaomia tatou te toe foi atu ai ma faaeaina faatasi ma Ia, ua matua manino ai lava e leai se mea e tusa ai ma lo tatou ola ai i le

lalolagi e mafai ona sili atu ona taua nai lo le fanau mai faaleagaga ma le toefanauina faaleagaga, o mea ia e lua e tataua ona muamua maua mo le ola e faavavau. O lea la, ina ia faaaoga ia upu a Dietrich Bonhoeffer, o le “tofi” o le faaipoipoga, o le “tulaga o le tiutetauave agai atu i tagata,” e faapea o lenei faatulagaga paia “mai lugā, mai le Atua” e faatinoina ai. O le “sooga i le filifili o augatupulaga” iinei ma le olaga a sau—o le faatulagaga lea o le lagi.

O se aiga e fausia i luga o le faaipoipoga o se alii ma se tamaitai e maua ai se faatulagaga sili mo le fuafuaga a le Atua ia lausiusi—o le faatulagaga mo le fanauina o fanau, o e o mai i le mama a’ia’i ma le taumamaina mai le Atua, ma le siosiomaga mo le aoaoina ma sauniuniga o le a latou moomia mo se olaga manuia faaletino, ma se olaga e faavavau i le lalolagi a sau. O se vaega toaititi o aiga e fausia i na ituaiga o faaipoipoga e taua mo nuu ia ola ai ma lausiusi. O le mafuaaga lena e uunaia ai e nuu ma malo ma puipuia le faaipoipoga ma le aiga o ni faalapotopotoga anagata. E le na o se mea e uiga i le alofa ma le fiafia o tagata matutua.

O le suesuega faaagafesootai o se faaipoipoga ma mo aiga sa taiulu ai se alii ma se tamaitai ua faaipoipo, e uunaia malos. ¹⁹ Ma o lea, “matou te lapatai atu foi, o le faamalepeina o le aiga o le a aumai ai i tagata taitoatasi, alaalfaga, ma malo, faafanoga ia na uluai ta’u mai e perofeta anamua ma aso nei.” ²⁰ Peitai o la tatou tautinoga mo le matafaioi a le faaipoipoga ma le aiga e le faavaea i luga o suesuega faaagafesootai, ae i luga o le upumoni faapea o ni foafoaga ia a le Atua. O ia o le na foafoaina i le amataga ia Atamu ma Eva i Lona faatusa, o le tane ma le fafine, ma tuufaatasia i la’ua o se tane

ma se ava ia avea ma “tino e tasi” ma ia fanafanau ma uluuluola ia tumu ai le lalolagi. ²¹ E tofu tauaveina e tagata taitasi le faatusa paia, ae o totonu o le tuufaatasiga faalefaaipoipoga o le tane ma le fafine e avea ma tino e tasi, tatou te maua ai le uiga aupito sili ona atoa o le foafoaina o i tatou i le faatusa o le Atua—o le tane ma le fafine. E leai se tasi o i tatou po o se isi lava e mafai ona fetuuna’ia lenei faatulagaga paia o le faaipoipoga. E le o se mea na faia e le tagata lava ia. O lea faaipoipoga ua tonu ia “mai lugā, mai le Atua” ma o se vaega tele o le fuafuaga o le fiafia pei o le Pa’ū ma le Togiola.

I le lalolagi o le muai olaga, sa fouvale Lusifelo i le Atua ma Lana fuafuaga, ma iu ina matua faatupulaia lona tetee. Ua ia tauivi ia lē faia ni faaipoipoga ma le faatulagaina o aiga, i mea o loo faatulagaina ai faaipoipoga ma aiga, na te faia mea na te mafaia e faalavelaveina ai. Na te osofaia mea uma e paia e uiga i feusuaiga faaletagata soifua, nutipalaina mai le matalalaga o le faaipoipoga i ni ituaiga le mafaatusalia o mafaufauga ma taga lē mama. E saili o ia e faatalitonu alii ma tamaitai faapea o mea e faamuamua i faaipoipoga ma aiga, e mafai ona faatuatunani pe lafoaia, pe ta’umauaoina nai lo matata faalegaluega, o isi mea e ausia, ma se tulimataiga o lou lava faamalieina ma le saolotoga o le tagata. E moni lava e fiafia tele le fili pe a le aoaoina e matua ma faamasani a latou fanau ia faatuatua ia Keriso ma ia toefanauina faaleagaga. Uso e ma tuafafine, e tele mea e lelei, e tele e taua, ae e na o ni nai mea e manaomia.

Ina ia tautino atu ia upumoni faavae e tusa ai ma le faaipoipoga ma le aiga, e le o faaseloai ai le vaai pe tuuititia ai osigataulaga ma manuia o i latou e le i afea le tulaga lea i le taimi nei. O nisi o outou e le o maua faamanuiga

o le faaipoipoga ona o ni mafuaaga e aofia ai le leai o se vaai i le lumanai, tosina atu i le itupa e tasi, faaletonu o le tino po o le mafaufau, pe na o le fefe foi lava ne’i toilalo faapea, mo na o lea taimi pe ā, ua lamatia ai le faatuatua. Pe atonu foi sa e faaipoipo, ae ua faamutaina lena faaipoipoga, ma ua tuua ai na o oe e faafoeina mea e toetoe ina a le mafai e ni tagata se toalua ona taulimaina. O nisi o outou ua faaipoipo, e le mafai ona fanauina ni fanau e ui i le naunautaiga lofituina ma tatalo faatauanau.

Ae tusa lava, e tofu tagata uma ma meaalofa; e tofu tagata uma ma taleni; e mafai e tagata uma ona saofaga i le tatalaina mai o le fuafuaga paia i tupuaga taitasi. E tele mea e lelei, e tele mea e manaomia—o nisi lava taimi o mea uma e tataua ai mo le taimi nei—e mafai ona ausia i tulaga faatauvaa. Ua toatele naua outou o loo faia le mea silisili tou te mafaia. Ma a outou amoina avega aupito mamafatu o le olaga nei, ia outou gagana mai e puipuia le fuafuaga a le Atua ia faaeaina Lana fanau, ua tatou saunia uma lava e lagolagoina outou. Faatasi ai ma le mautinoa tatou te molimau atu o le Togiola a Iesu Keriso ua faamoemoeina, ma, i le iuga,



o le a tauia ai mea uma na le'i mauaina, ma le toilalo o i latou na liliu atu ia te Ia. E leai se tasi na muai fuafuaina faapea e itiiti mea na te maua nai lo mea uma o i le Tama mo Ana fanau.

Sa faailoa mai ia te au e se tina talavou lona atugaluga e uiga i lona le agavaa mo lenei valaauga taua. Sa ou lagonaina o le faafitauli o loo popole ai o ia, e laitiiti ma e le tatau ona ia popole ai; o la sa lelei le mea o loo ia faia. Peitai, sa ou iloina sa na ona manao o ia e faamalie le Atua ma faamamaluina Lona faatuatuga ua tuu atu ia te ia. Sa ou tuuina atu ni upu faamautinoa, ma i lo'u loto sa ou ole atu ia faamafanafanaina o ia e le Atua, lona Tama Faalelagi, i Lona alofa ma le molimau o Lana faamaoniga a o ia faatinoina Lana galuega.

O la'u tatalo lea mo i tatou uma i le asō. Ia tatou taitasi ma sailia le faamaoniga o Lona finagalo. Talosia ia lausiusi faaipoipoga ma manuia aiga, pe o lo tatou taunuuga o se atoaga o nei faamanuiaga i le olaga nei pe leai foi, talosia ia aumaia e le alofa tunoa o le Alii le fiafia i le taimi nei ma le faatua-tua i folafolaga mautinoa o le a oo mai. I le suafa o Iesu Keriso, amene. ■

FAAMATALAGA

1. Tagai Kevin Rudd, "Faith in Politics," *The Monthly*, Oct. 2006, themonthly.com.au/monthly-essays-kevin-rudd-faith-politics--300.
2. Dietrich Bonhoeffer, *Tusi ma Pepa mai le Falepuiʻpui*, ed. Eberhard Bethge (1953), 42–43.
3. Tagai, mo se faaitaiga, Salamo 82:6; Galuega 17:29; Eperu 12:9; Mataupu Faavae ma Feagaiga 93:29, 33; Mose 6:51; Aperaamo 3:22. Na tuuina mai e le Perofeta o Iosefa Samita le faamatalaga lenei: "O le uluai mataupu faavae o le tagata o le ola lava ia faatasi ma le Atua. O le Atua lava ia, i le silafia ai ua i ai o Ia i le lotolotoi o agaga [po o le atamai] ma le mamalu, ma talu ai e sili atu lona atamai, sa silasila atu ai e tatau ona faatulagaina ni tulafono e mafai ai e le toatele ona maua le avanoa e alualu ai i luma e pei o Ia lava. . . . O loo ia te ia le mana e faatulagaina ai ni tulafono e faatonu ai malamalama e vaivai, ina ia faeaina i



latou faatasi ma Ia" (*Aoaoga a Peresitene o le Ekalesia: Iosefa Samita* [2007], 223–224).

4. *Aoaoga: Iosefa Samita*, 223–224.
5. Alema 24:14.
6. Alema 42:8.
7. Alema 12:25; tagai foi fuaiupu e 26–33.
8. Aperaamo 3:24–26.
9. Na ofoina mai e le Perofeta o Iosefa Samita le faamatalaga oototo lenei: "O le faatula-gaga a le Atua ao lei faavaeina le lalolagi o le tatau lea ona i ai ni o tatou malumalu [tino] faaletino, ma e ala atu i le faamaoni e tatau ona tatou manumalo ona faapea lea ona tatou maua le toe tutu mai le oti, ma i lea tulaga e maua ai le mamalu, viiga, mana, ma malo." Na saunoa foi le Perofeta: "Ua tatou o mai i lenei lalolagi ina ia tatou maua ni tino ma tuuina atu ma le mama i luma o le Atua i le malo selesitila. O le mataupu faavae sili o le fiafia e aofia ai le i ai o le tino. O le tiapolo e leai se tino, o lona faasalaga lena. E fiafia o ia pe a ia mauaina le tino o le tagata, ma ina ua tuliese e le Faaola sa ia talosaga ina ia ulu atu i le lafu puua, ua faaalua ai lona manao i le tino o le puua i lo o le leai o se tino. O tagata uma e fai tino e i ai le mana ia i latou o le leai ni tino" (*Aoaoga: Iosefa Samita*, 224–225).
10. Iopu 38:7.
11. Ioane 1:3; tagai foi Mataupu Faavae ma Feagaiga 76:23–24.
12. Tagai 1 Korinito 15:21–22; 2 Nifae 2:25.
13. Tagai 2 Nifae 2:15–18; Alema 12:24; Mataupu Faavae ma Feagaiga 29:39; Mose 4:3. Na saunoa Iosefa Samita: "O tagata uma e aia o latou saolotoga, aua sa faauuina ai e le Atua. Sa ia faia le tagata e fai ma sui, ma tuuina ia i latou le mana e filifili ai le lelei po o le leaga; ia saili atu i mea e lelei, i le tuliloina lea o le auala o le paia i lenei olaga, e aumai ai le filemu o le mafaufau, ma le fiafia i le Agaga Paia iinei, ma le faatumuina i le fiafia ma le olioli i Lona itu taumatau pe a mavae lenei olaga; po o le tuliloa o se auala leaga, i le faia lea o le agasala ma le tetee atu i le Atua, ma faapea ona aumaia ai le faasalaga

i o latou agaga i lenei lalolagi, ma le leiloloa e faavavau i le lalolagi a sau." Na faailoa mai foi e le Perofeta: "E le mafai e Satani ona maileia i tatou i ana faatosinaga sei vagana ua tatou ioe i o tatou lava loto ma gauai atu i ai. O lo tatou lava natura o loo i ai le mafai e tatou te tetee atu i le tiapolo; ana faapea e lei foafoaina i tatou faapena, ua le avea i tatou ma ni tagata saoloto" (*Aoaoga: Iosefa Samita*, 227).

14. Tagai Kenese 3:22–24; Alema 42:2–6; Mose 4:28–31.
15. E oo lava ia i latou o ē lē salamo ua togiolaina mai le oti faaleagaga e ala i le Togiola i le tulaga o le a latou toe tutu i luma o le silafaga o le Atua mo le Faamasinoga Mulimuli (tagai Helamana 14:17; 3 Nifae 27:14–15).
16. *Aoaoga: Iosefa Samita*, 223.
17. Tagai Mataupu Faavae ma Feagaiga 93:36–40.
18. Mose 6:58–59.
19. E mafai ona faamaoni tagata i le tasi ma le isi i fegalegaleaiga e le'i faaipoipoina, ma e mafai ona fanauina ma tausua fanau, o nisi taimi e itiiti le faamanuiaina, nai lo se siosiomaga o se aiga o ni matua e toalua ua faaipoipoina. Ae o le averesi ma i tulaga e tele, o faamaoniga o manuia faaleaga-fesootai o faaipoipoga ma le faatusatusa i taunuuga silisili mo fanau i aiga e faauluulu e se tama ma se tina ua faaipoipoina e faalauteleina. I le isi itu o tau o agafesootai ma tamaoaiga o mea ua taua e se tasi o tagata tusitala "o le sola ese mai le aiga," e pau atu le tele o le mamafa i luga o le lalolagi. Ua faavasegaina ma matauina e Nicholas Eberstadt le faaitiitia i le lalolagi atoa i faaipoipoga ma le fanauina o fanau ma faiga masani e faatautu i aiga e leai ni tama ma faaipoipoga ua tatalaina: "O le aafiaga faataumaioi i luga o fuainumera le taua o fanau ua tulaga faaletonu e sosola ese mai le aiga ua lava le manino. O lea, i le matafaioi faatamaioi o le tatalaina o faaipoipoga ma le fanauina o fanau i fafo atu o le faaipoipoga ua faateteleina le eseese tele o mea tautupe ma le avanoa i oa—mo le lalolagi atoa, ae maise lava mo fanau. Ioe, o fanau e mafai ona toe faaleleia ma isi mea. Ae o le sola ese mai le aiga e tele ina mautinoa e oo mai i le tulaga matautia i [tamaiti] laiti agavaivai. O lena foi sola ese e i ai se uunai-ga le faamagaloina mo le tagata matua agavaivai." (Tagai "The Global Flight from the Family," *Wall Street Journal*, Feb. 21, 2015, wsj.com/articles/nicholas-eberstadt-the-global-flight-from-the-family-1424476179.)
20. "O Le Aiga: O Se Folafolaga i le Lalolagi," *Liahona*, Nov. 2010, 129.
21. Tagai Kenese 1:26–28; 2:7, 18, 21–24; 3:20; Mose 2:26–28; 3:7–8, 18, 20–24; 4:26.



Saunia e Elder Wilford W. Andersen
O Le Fitugafulu

O Le Musika o le Talalelei

O le musika o le talalelei o le lagona fiafia faaleagaga lea e sau mai le Agaga Paia. E aumaia se liuga o le loto.

I tausaga ua mavae sa ou faalogo-
logo ai i se faatalanoaga i le leitio o
se fomai talavou sa faigaluega i se
falemai i le Itumalo a Initia Navajo. Sa
ia faamatalaina se aafiaga sa na maua
i se tasi po lea na alu atu ai se toeaina
Amerika Mao'i e fili uumi lona lauulu i
le potu o faalavelave faafuasei. Na ave
e le fomai talavou lana laupapa kilipa,
ma alu atu i le toeaina, ma fai atu, "E
faapefea ona ou fesoasoani ia te oe?"
Na tilotilo sao le toeaina ma na leai se
tala na fai ifo. Na toe taumafai atu le
fomai, lea na tau lagona le le onosai.
"E le mafai ona ou fesoasoani atu ia
te oe pe a e le talanoa mai ia te au,"
o lana tala lea. "Tau mai pe aisea ua
e sau ai i le falemai."

Ona tilotilo atu lea o le toeaina ia te
ia ma fai atu, "E te siva?" A o mafaufau
le fomai talavou i lea fesili ese, na oo ia
te ia se manatu masalo ona o lana ma'i
o se tagata e talitonu i mana faamalolo
faapitoa, e tusa ai ma aga faaleaganuu,
na taumafai e faamalolo le ma'i e ala i
pesega ma siva nai lo vailaau faafomai.

"Leai," o le tala lea a le fomai, "Ou
te le siva. E te siva?" Na lue le ulu o le
toeaina ioe. Ona fesili lea o le fomai,
"E mafai la ona e aoao au e siva?"

O le tali a le toeaina ou te mafau-
fau pea lava i ai mo le tele o tausaga.
"E mafai ona ou a'oa lau siva," na ia
fai mai ai, "ae e tatau ona e lagonaina
le musika."

O nisi taimi i o tatou aiga, tatou te
aoaina lelei ai taga o le siva ae le lelei
i le fesoasoani atu i tagata o o tatou
aiga ia lagonaina le musika. Ma e pei
ona silafia lelei e le toeaina, e faigata
ona e siva e aunoa ma se musika. O
le siva e aunoa ma se musika e faale-
manaia ma e le faamalieina—e oo lava
i le maasiasi. Na e faaitaitaia muamua?

I le vaega e 8 o le Mataupu Faavae ma
Feagaiga, na aoao atu ai e le Alii ia Iosefa
Samita ma Oliva Kaotui, "Ioe, faauta, o le
a Ou tau atu ia te oe i lou mafaufau ma
lou loto, e ala i le Agaga Paia, lea o le a
oo atu i ou luga ma lea o le a mau i lou
loto" (fuaiupu e 2). Tatou te aoaina ia
taga o le siva i o tatou mafaufau, ae tatou
te faalogo ma o tatou loto i le musika. O
taga o siva o le talalelei o mea ia ua tatou
faia; o le musika o le talalelei o le lagona
fiafia faaleagaga lea e sau mai le Agaga
Paia. E aumaia se liuga o le loto ma o le
puna o manaoga uma amiotonu. O taga
o le siva e manaomia ai le amio pulea, ae
o le olioli o le siva ua na o lo tatou faalo-
goina o le musika o le a lagonaina ai.

O loo i ai tagata e faatauemu i tagata
o le Ekalesia mo mea tatou te faia. E
malamalama lena mea. O i latou o e
sisiva e masani ona foliga e ese lava pe
faalemasani po o le, faaaoga o se faa-
upuga faatusipaia, "tulaga ese" (1 Peteru
2:9) mo i latou o e e le lagonaina le
musika. Na e i ai se taimi na e tu ai i se
moli taofi i talaane o se taavale o loo
siva ma pese ai le avetaavale i le mea e
gata mai ai lona leo—ae e le mafai ona
e lagonaina se leo aua sa i luga uma au
faamalama? Pe e lei tulaga ese ea ona
foliga? Afai e aoaina e a tatou fanau ia



taga o le siva e aunoa ma le aoaoina e faalogo ma ia lagona le musika matagofie o le talalelei, o le a faasolo ina latou le maua le toafimalie e sisiva ai ma, a le o le mumusu e sisiva pe, e tutusa lava le leaga, na o le faaauau lava ona sisiva ona o uunaiga ua latou lagonaina mai isi o loo sisiva i o latou autafa.

O le lui mo i tatou uma o e saili e aoao atu le talalelei o le faalatele lea o le mataupu aoaoina i tua atu o taga o le siva. Ua faamoemoe le fiafia o a tatou fanau i lo latou mafaia ona faalogo ma fiafia i le musika matagofie o le talalelei. O faapefea ona tatou faia?

Muamua, e tatau ona tatou faaogatusaina o tatou lava olaga ma tulaga faaleagaga sa’o. I aso ua leva, a o lei i ai ni komepiuta, na tatou mauaina ni alaleo e sili ona tatou fiafia i ai i le mimiloina lea faaeteete o le ki o le leitio seia laina lelei lava le gila ma le alaleo. A o latalata atu i le fuainumera, e na o le gogolo lava tatou te faalogoina. Ae a sa’o loa le gila o le laau, ona mafai lea ona tatou faalogologo ma le manino atu i pese e sili ona tatou fiafia i ai. I o tatou olaga, e tatau ona tatou faasa’oina le tatou gila ina ia faalogo ai i musika a le Agaga.

Ina ua tatou maua le meaalofa o le Agaga Paia ina ua uma ona papatiso, na faatumulia i tatou ma le musika faalelagi lea e o faatasi ma le liua. Ua i ai se liuga o o tatou loto, ma ua “le toe i ai so matou manao e fai mea leaga, ae ia faia mea lelei e le aunoa” (Mosaea 5:2). Peitai o le a le onosaia e le Agaga le le alofa po o le faamaualuga po o le lotoleaga. Afai o le a aveesea mai i o tatou olaga lena aafiaga maaleale, o le a vave ona lavelave ia vaega ogatusa o le talalelei ma iu lava ina faamutaina. Na fesili Alema i le fesili faamomoioto: “Afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina nei?” (Alema 5:26).



Matua, afai e le o ogatusa o tatou olaga ma le musika o le talalelei, e tatau ona tatou faaogatusaina. E pei ona aoao mai e Peresitene Thomas S. Monson ia Oketopa ua mavae, e tatau ona tatou mafaufau loloto i ala o o tatou vae (tagai “Ia Mafaufau i le Ala o Ou Vae,” *Liahona*, Nov. 2014, 86–88). Tatou te iloa le auala e faia ai. E tatau ona tatou savalia le ala lava e tasi lea sa tatou savalia i le taimi muamua sa tatou faalogo ai i atugaluga faalelagi o musika o le talalelei. Tatou te faatinoina le faatuatua ia Keriso, salamo, ma ‘ai ma inu i le faamanatuga; tatou te lagonaina le malosi o le uunaiga a le Agaga Paia, ma o le a toe taina le musika o le talalelei i o tatou olaga.

Lona lua, pe a faalogoina e i tatou lava le musika, e tatau ona tatou taumafai e faia le mea sili tatou te mafaia e faatino ai i o tatou aiga. E le o se mea e mafai ona tatou fositia pe fai faamalosi. “E leai se mana po o se aafiaga e mafai pe tatau ona faatumauina ona o le perisitua”—pe i le avea ai ma se tama po o se tina po o le tagata sili ona lapoa pe sili ona leotele—“nao i le faatauana, i le tali-tiga, i le agamaualalo ma le agamalu, . . . ma le alofa faamaoni; [ma le] agalelei” (MF&F 121:41–42).

Aisea o le a taitaiina ai e nei uiga paia le faateleina o le mana ma le

faatosinaga i se aiga? Aua o uiga paia ia e valaauliaina le Agaga o le Agaga Paia. O uiga paia ia e faaogatusaina o tatou loto ma musika o le talalelei. Afai e i ai, o le a sili ona lelei le faatinoga o taga o le siva ma o le a faafiafiaina tagata uma o le ausiva i totonu o le aiga, e aunoa ma le manaomia o le taufaafefe pe taufaamatau pe faamalosi.

A o laiti a tatou fanau, e mafai ona tatou usuina ia i latou se pese faamoepese o le alofa faamaoni, ma pe a latou faalogogata ma mumusu e o e momoe i le po, atonu e manaomia ona tatou usuina le pese faamoe pepe o le tali tiga. E mafai e matua ona faatinoina ma le lotogatasi atoatoa ia uiga paia soosootauu o le agalelei ma le agamalu. E mafai ona tatou valaauliaina a tatou fanau e usu faatasi ma i tatou i le leo e tasi a o tatou faaitaia le agalelei atu i se tuaoi e le tagolima.

O le a le oo uma mai i le taimi e tasi. E pei ona silafia e tagata musika faamanuiaina uma, e alu ai ni faaitaiga filiga e faatino ai ni musika matagofie. Afai o uluai taumafaiga i le faiga o musika ua foliga mai ua i ai ni feteenaiga, ia manatua o feteenaiga e le mafai ona faasa’oina e ala i faitioga. O feteenaiga i totonu o le aiga e pei lava o le pogisa i totonu o se potu. E leai se aoga o le otegia o le pogisa. E tatau

ona tatou *suia* le pogisa e ala i le faasusulu atu o le malamalama.

O lea la afai ua matua leotele pe malosi ia leo malū i i le aufaipese a lo outou aiga, pe ua maualuga tele le ii pe ua sese le fati o le vaega o uaua o le faaili a lo outou aiga, pe ua sese le fati pe ua le mafai ona taofiofi ia vaega itiiti o pu, ia onosai. Afai e te le o faalogoina le musika o le talalelei i lou aiga, faamolemole ia manatua upu nei e lua: *faataitai pea*. Faatasi ai ma le fesoasoani a le Atua, o le a i ai se aso o le a faatumulia ai e le musika o le talalelei oe ma lou aiga i le olioli e le mafaamatalaina.

E tusa lava pe lelei ona faatino-ina, e le foia lava e le musika ou faafitauli uma. O le a i ai pea ni tulaga maualuluga ma tulaga maualalalo i o tatou olaga, i taimi o le ogatasi ma taimi o feteenaiga. O le natura lava lea o le olaga i le paneta o le lalolagi.

Ae a tatou faaopoopoa le musika i taga o le siva, o nisi pā'ō faigata o faaipopoga ma le olaga faaleaiga e matele ina agai atu i se tulaga paleni ma ogatasi. E oo lava i o tatou luitau sili ona faigata o le a maua ai ni matā-leo manino lelei ma ni fati musuia. O le a amata ona to ifo i luga o o tatou agaga ia aoga faavae o le perisitua e pei o le sau mai le lagi. O le a avea le Agaga Paia ma o tatou soa tumau, ma o tatou tootoo—o se faasinoga manino i le mana ma uunaiga—o le a avea ma tootoo le feliliuiai o le amio-tonu ma le upumoni. Ma o a tatou puleaga o le a avea ma se puleaga tumau faavavau. Ma e aunoa ma ni ala faamalosi o lona uiga, o le a tafe mai ia te i tatou e faavavau ma faavavau lava (tagai MF&F 121:45–46).

Ia faapena foi i o tatou olaga taitoatasi ma i o tatou aiga taitasi, o la'u tatalo lea i le suafa o Iesu Keriso, amene. ■



Saunia e Elder Dale G. Renlund
O Le Fitugafulu

Le Au Paia o Aso e Gata Ai, Taumafai Pea

A tatou taumafai, tutumau, ma fesoasoani i isi ia faia lea lava mea e tasi, o i tatou la o le Au Paia moni o Aso e Gata Ai.

O u uso e ma tuafafine pele, ia Tesema 2013 na faanoanoa ai le lalolagi i le maliu o Nelson Mandela. I le mavae ai o tausaga e 27 o faalepuipei ai mo lana matafaioi i le tetee atu i faiga faailogalanu i lena taimi, na avea ai Mandela ma uluai peresitene filifilia o le faatemokalasi o Aferika i Saute. Sa ofoofogia lona faamagaloina o i latou na faafalepui-puiina o ia. Sa viia ma faamamaluina o ia e tagata uma.¹ Sa teena soo lava e Mandela ia viiga i le faapea mai, “E le o au o se tagata paia—ae sei vagana lava ua outou manatu o se tagata paia o se tagata agasala o loo taumafai pea.”²



O lenei saunoaga—“o se tagata paia o se tagata agasala o loo taumafai pea”—e tataua ona toe faamautino-ina ma faamalosiaina ai tagata o le Ekalesia. E ui o loo ta'ua i tatou o le “Au Paia o Aso e Gata Ai,” ae o nisi taimi tatou te le maua ai le toafimalie i lenei faalagiga. O le faaupuga *Au Paia* e masani ona faaoga e faailoga ai i latou ua ausiaina se tulaga siitia o le paia po o le atoatoa. Ma ua tatou iloa lelei tatou te le atoatoa.

E ui i lea, o o tatou talitonuga faalelotu ua tatou aoao ai, e mafai ona faaatoatoaina i tatou e ala i le faateleina o le “faalagolago atoa” e le aunoa i le mataupu faavae a Keriso: faatinoina o le faatuatua ia te Ia, salamo, taumamafa ma feinu i le faamanatuga e faafou ai feagaiga ma faamanuiaga o le papatisoga, ma le mauaina o le Agaga Paia e fai ma soa tumau i se tulaga maualuga atu. A tatou faia lea mea, e avea atili i tatou e faapei o Keriso ma ua mafai ona tumau e oo i le iuga, ma mea uma e aofia ai.³ I se faaupuga faigofie, e popole tele le Atua po o ai i tatou ma po o a ituaiga tagata e avea ai i tatou, nai lo tagata sa tatou i ai i le tuana'i.⁴ E popole o Ia ina ia tatou taumafai pea.



O le tala malie o le *As You Like It*, sa tusia e le tusitala Peretania o Viliamu Siekispia, o loo faaalā ai se suiga tele i se olaga o se tagata. Na taumafai se uso matua ina ia fasiotia lona uso laitiiti. E ui lava i le iloaina o lenei mea, ae na laveai e le uso laitiiti lona uso leaga mai se oti mautinoa. Ina ua iloa e le uso matua le agaalofa o lona uso laitiiti, na matuai suia atoa ma le tumau o ia ma maua ai le mea na ia ta'ua o se "liua." Mulimuli ane sa o atu nisi tamaitai i le uso matua ma fesili i ai, "E le o oe ea lea sa taupulepule e fasioti [lou uso]?"

Na tali atu le uso matua, "Sa ou faapena; ae ou te le o toe faapena: Ou te le mā e tau atu ia te outou lo'u tagata tuai—, ona ua matagofie tele lo'u liua, ua avea ai nei au ma tagata ua i ai nei."⁵

Mo i tatou, ona o le alofa mutimutivale ma le Togiola a Iesu Keriso, o sea suiga e le o se talafatu tusitusia: E ala mai ia Esekielu, na tautino mai ai le Alii:

"E le pa'ū foi le ua amio leaga i lana amio leaga i le aso e liliu ese ai o ia i lana amio leaga. . . .

". . . Afai e liliu ese ia i lana agasala, ma ua fai e ia le amio tatau ma le amiotonu;

". . . Faafoi . . . le mea e tuu faafaatau, ma toe avane le mea na ia fao, ma ia savali i sauniga e ola ai, ma ua le fai le amio leaga; e ola lava ia. . . .

"O ana agasala ua ia faia e le ta'uta'ua ia te ia; ua ia fai le amio tatau ma le tonu."⁶

I lona alofa mutimutivale, ua folafola mai e le Atua le faamagaloga pe a tatou salamo ma liliu ese ma le amio leaga—o lea tulaga o le a le ta'uta'ua mai ai a tatou agasala ia i tatou. Mo i tatou, ona o le Togiola a Keriso ma lo tatou salamo, e mafai ai ona tatou tepa atu i a tatou amioga o le tuana'i ma faapea, "Sa ou faapena, ae ou te le o toe faapena." Po o le a lava lo tatou amioleaga, e mafai lava ona tatou faapea, "Sa ou faapena. Ae o lena tagata amioleaga i le tuana'i ua le o toe avea ai au."⁷

Sa aoao mai Peresitene Thomas S. Monson, "O se tasi o meaalofa aupito silisili a le Atua mo i tatou o le olioli lea o le taumafai pea lava pea, aua e le manaomia ona faamuta i se toilalo."⁸ E tusa lava foi pe tatou te faia ma le mautinoa le agasala pe feagai soo foi ma le toilalo ma le le fiafia, ae o le taimi lava tatou te filifili ai e toe taumafai, o le a mafai ona fesoasoani mai le Togiola a Keriso ia i tatou. Ma e ao ona tatou manatuaina e le o le Agaga Paia lena e tau maia ia i tatou ua matua tatou leaga lava ma ua sili ai loa ona tatou faavaivai.

O le finagalo o le Atua ina ia taumafai pea le Au Paia o Aso e Gata Ai ua oo atu foi i tala atu o le faatoilaloina o le agasala. Pe o tatou mafatia ona o faafitauli o mafutaga, luitau faaletamao-aiga, po o faamai po o se taunuuga o agasala a nisi tagata, e mafai lava e le Togiola le i'u a le Faaola ona faamalo-loina—ma e masalo aemaise lava—

i latou ua mafatia fua. E malamalama atoatoa o Ia i le mea e taua o le mafatia fua ona o se taunuuga o le solitulafono a le isi tagata. E pei ona sa valoia, o le Faaola o le a "fufusi i e loto momomo, . . . [faa]fiafia i e faanoanoa; . . . foaiina atu . . . le matagofie e sui a'i le lefulefu, o le uu o le olioli e sui a'i le faanoanoa, [ma le] ofu e fai a'i viiga e sui a'i le loto faavaivai."⁹ Po o le a lava le tulaga e i ai, faatasi ai ma Lana fesoasoani, ua faamoemoeina e le Atua le Au Paia o Aso e Gata Ai ina ia taumafai pea.

E pei lava ona olioli le Atua pe a tatou tutumau, e faapena foi ona le fiafia o Ia pe afai tatou te le faamamaluina le taumafai pea o isi. Sa faasoa mai e le ma uo pele o Topa le auala sa ia aoaoina ai lenei lesona mai lona tina, o Iulia. O Iulia ma Topa o nisi ia o uluai tagata uli na liliu mai i Aferika i Saute. Ina ua faamutaina faiga faailogalanu, sa faatagaina loa tagata uli ma papae o le Ekalesia e auai faatasi i le lotu. Mo le toatele, o le tulaga tutusa o fegalegaleaiga i le va o ituaiga ia e lua sa fou ma faigata. I se tasi taimi, a o auai Iulia ma Topa i le lotu, sa la lagonaina e le o tau-limaina i laua i le agalelei e nisi o tagata papae o le ekalesia. Ina ua la o ese atu, sa faitio atu Topa ma le le fiafia i lona tina. Sa faalogo ma le totoā Iulia seia oo ina sasaa atu e Topa lona le fiafia. Ona faapea atu lea o Iulia: "Oi, Topa, o le Ekalesia e pei lava o se falemai tele, ma o loo tatou tafai mamai uma i o tatou lava tulaga. Ua tatou o mai i le lotu ina ia maua se fesoasoani."

O le faamatalaga a Iulia ua atagia mai ai se malamalamaaga taua tele. E le gata e tatau ona tatou onosai a o taumafai isi e foia o latou gasegase faaletagata lava ia; ae e tatau foi ona tatou agalelei atu, faapalepale, lagolago atu, ma ia loto malamalama. E pei ona uunaia i tatou e le Atua ia taumafai pea, ua Ia faamoemoeina foi i tatou ia tuu



atu foi i isi le avanoa e faia ai lea lava mea e tasi, i la latou lava fua faataatau. O le a oo mai le Togiola i o tatou olaga i fuataga tetele atu. O le a tatou iloina ai e faapea po o a lava ni eseesea ua iloagofie, o loo manaomiaina e i tatou uma le Togiola le iu lava e tasi.

I ni nai tausaga ua mavae sa vala-uaina ai se alii talavou lelei e igoa ia Curtis e auauna atu i se misiona. O ia o se ituaiga o faifeautalai e tatalo uma peresitene o misiona ia latou maua. Sa gauai o ia ma galue malosi. I se tasi taimi, sa tofia ai o ia e soa ma se faifeautalai sa faatamaitiiti lava, faigata ona fegalegaleai ma tagata, ma sa lei naunau patino ia faataunuu le galuega.

I se tasi aso a o la tietie atu i a la uila vilivae, sa tepa atu i tua Curtis ma vaai atu i lana soa ua oso ese mai lana uila e leai ma se tala ma savali. Sa faailoa atu lemu e Curtis lona faanoanoa i le Atua; o se galuega mamafa le tofia i se soa e matua manaomia ona toe tau faamalosi ina ia faataunuu le galuega. I ni nai minute mulimuli ane, sa maua e Curtis se uunaiga loloto, e peiseai na fetalai i ai le Atua, “E te iloa, faatusatusa mai ia te au, o oulua e le tele lava se eseesea.” Sa aooina e Curtis e manaomia ona ia onosai i se soa le atoatoa sa taumafai foi i lana lava ala.

O la’u valaaulia ia i tatou uma ia iloilo o tatou olaga, salamo, ma taumafai

pea. Afai tatou te le taumafai, ua na o i tatou lava la o le au agasala o aso e gata ai; afai tatou te le tutumau, o i tatou o le au faavaivai o aso e gata ai; ma afai tatou te le faatagaina isi e taumafai, ua nao i tatou o le au pepelo o aso e gata ai.¹⁰ Ae a tatou taumafai, tutumau, ma fesoasoani i isi ia faia lea lava mea e tasi, o i tatou la o le Au Paia moni o Aso e Gata Ai. A tatou suia, o le a tatou iloina e popole tele le Atua po o ai i tatou ma po o a ituaiga tagata e avea ai i tatou, nai lo tagata sa tatou i ai i le tuanai.¹¹

Ou te matua faafetai lava mo le Faaola, mo Lana Togiola le iu, ma mo perofeta o aso e gata ai o loo uunaia i tatou ia avea ma Au Paia o Aso e Gata Ai, ia taumafai pea.¹² Ou te molimau atu e moni o loo soifua le Faaola, i le suafa o Iesu Keriso, amene. ■

FAAMATALAGA

1. Tagai Nelson Rolihlahla Mandela, *Long Walk to Freedom* (1994); “Biography of Nelson Mandela,” nelsonmandela.org/content/page/biography; and President Barack Obama’s Dec. 10, 2013, eulogy for Nelson Mandela, at whitehouse.gov/the-press-office/2013/12/10/remarks-president-obama-memorial-service-former-south-african-president. The diversity of the awards is indicated by Mandela receiving the Nobel Peace Prize, the United States Presidential Medal of Freedom, and the Soviet Order of Lenin.
2. Tagai, mo se faaitaiga, i le saunoaga a Nelson Mandela i le Rice University’s Baker Institute i le aso 26 Oke., 1999,

bakerinstitute.org/events/1221. Na foliga mai sa ia toe faaupuina le faamatalaga lauiloa e faataatau ia Ropati Lui Sitivisone: “The saints are the sinners who keep on trying.” Ua faaalua mai e le toatele i le faagasologa o tausaga ni lagona talitutusa. Mo se faaitaiga, na fai mai foi Confucius, “Our greatest glory lies not in never falling but in getting up every time we fall.”

3. Tagai, mo se faaitaiga, 2 Nifae 31:2–21; 3 Nifae 11:23–31; 27:13–21; Moronae 6:6; Mataupu Faavae ma Feagaiga 20:77, 79; 59:8–9; *Tusitaulima 2: Taitaiina o le Ekalesia* (2010), 2.1.2.
4. O le fai mai e popole tele le Atua po o ai i tatou ma po o a ituaiga tagata e avea ai i tatou, nai lo tagata sa tatou i ai i le tuanai e le o faapea mai e le o popole le Atua i taunuuga o agasala a se tagata po o isi. O le mea moni, e popole tele le Faaola e uiga ia i latou o e mafatia i tiga, puapuaga, ma faanoanoaga ona o agasala a isi. O le a “ave [le le Faaola] i ona luga . . . vaivaiga [a Lona nuu], ina ia mafai ona faatumuina lona loto i le alofa mutimutivale, . . . ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou vaivaiga” (Alema 7:12).
5. William Shakespeare, *As You Like It*, act 4, scene 3, lines 134–37.
6. Esekielu 33:12, 14–16.
7. O le faaogaina o faaupuga veape i le taimi nei ua iloagofie i le tele o mau e faataatau i le Faamasinoga Mulimuli. Tagai, mo se faaitaiga, 2 Nifae 9:16; Mamona 9:14; Mataupu Faavae ma Feagaiga 58:42–43.
8. Thomas S. Monson, “The Will Within,” *Ensign*, May 1987, 68.
9. Isaia 61:1–3; tagai foi Luka 4:16–21.
10. O le faaupuga *tagata pepelo* e pei ona faaogaina i le Feagaiga Fou e mafai ona faaliliuina mai le gagana Eleni o se “tagata faafoliga”; “o le uiga o le upu Eleni ‘o se tagata e faatino ni tala po o ata,’ po o ‘se tasi e faafoliga, fai ma sui, pe faatēlēina se vaega’” (Mataio 6:2, vaefaamatalaga a). Afai tatou te le tuuina atu i isi le avanoa e sui ai i lo latou lava ala, ua na o i tatou o ni Au Paia o Aso e Gata Ai pepelo.
11. Tagai i le faamatalaga 4, o i luga.
12. O le aofia o taimi o loo faaali mai ai lenei savali i sauniga a le Au Peresitene Sili ma le Korama a Aposetolo e Sefululua e ofofofia. Na saunoa mai Peresitene Dieter F. Uchtdorf faapea, “Mai mataupu faavae uma na aooina e perofeta i le aluga o seneturi, o le tasi ua faamamafa pea lava pea o le savali faamalosiua o loo i ai se faamoemoe e faapea e mafai ona salamo tagata, suia auala, ma toe foi atu i luga o le ala moni o le avea ma soo” (“E Mafai ona E Faia Nei Lava!” *Liahona*, Nov. 2013, 56).



Saunia e Elder Michael T. Ringwood

○ Le Fitugafulu

Lelei Moni Lava ma Aunoa ma le Faa'ole'ole

O le tala fiafia o le talalelei a Iesu Keriso e faapea, o manaoga o tatou loto e mafai ona suia, ma o o tatou faanaunauga e mafai ona aoaoina ma faaleleia.

E faanoanoa lava, sa i ai se taimi i lo'u olaga sa uunaia ai au e manao i viiga ma le pule. Sa amata moni lava i ni manatu mama. A o ou sauni e auauna atu o se faifeautalai faamisiona, sa avea lo'u uso matua ma se taitai sone i lana misiona. Sa ou faalogo i le tele o mea lelei e uiga ia te ia lea sa ou le manofa ai ae manao foi ia talanoa tagata faapena ia te au. Sa ou faamoemoe ma tatalo foi mo sea tulaga faapena.

O le mea e faafetai ai, a o ou auauna atu i lau misiona, sa ou aoaia ai se lesona mamana. I le konafesi talu ai sa faamanatu mai ai ia te au lena lesona.

Ia Oketopa sa saunoa ai Peresitene Dieter F. Uchtdorf: "I le gasologa o lo'u olaga, sa ou maua ai le avanoa e soosoo tauau ai ma nisi o alii ma tamaitai sili ona atamamai ma popoto i lenei lalolagi. A o o'u talavou, sa faagaetia lava au e i latou o e atamamai, talenia, faamanuiaina, ma viia e le lalolagi. Ae i le aluga o tausaga, ua ou iloa ai ua sili atu le faageetia o au e i latou o tagata lelei ma faamanuiaina o e *lelei moni lava ma [aunoa ma le faa'ole'ole].*"¹

O la'u tagata toa o le Tusi a Mamona o se faaitaiga atoatoa o se agaga lelei ma

faamanuiaina sa lelei moni lava ma aunoa ma le faa'ole'ole. O Sepulona o se tasi o atalii o Alema le Itiiti. E sili atu lo tatou masani i ona uso o Helamana, lea na mulimuli i lona tama e fai ma tautusi o talafaamaumau ma le perofeta a le Atua, ma Korianetona, lea sa matua lau-iloa o se faifeautalai sa manaomiaina nisi o fautuaga mai lona tama. Ia Helamana, sa tusia ai e Alema fuaiupu e 77 (tagai Alema 36–37). Ia Korianetona, sa ofo alofa atu i ai e Alema fuaiupu e 91 (tagai Alema 39–42). Ia Sepulona, lona atalii ogatotonu, sa na o le 15 fuaiupu na tusi i ai e Alema (tagai Alema 38). Ae o ana upu i na fuaiupu e 15 e mamana tele ma faagaetia.

"Ma o lenei, lou atalii e, ou te faalagolago o le a ou maua le olioli tele ia te oe, ona o lou maumaututu ma lou faamaoni i le Atua; aua e pei ona e amata mai i lou talavou ona e vaai atu i le Alii lou Atua, ua faapea lava ona ou faamoemoe o le a aveaveai pea ona e tautusi o ana poloaiga; aua e amuia lava o ia o le e tumau e oo i le iuga.

"Ou te fai atu ia te oe, lo'u atalii e, ua uma ona ou maua o le olioli tele ia te oe, ona o lou faamaoni ma lou filiga, ma lou onosai ma lou tali-tiga i totonu o tagata" (Alema 38:2–3).

E faapoopoo atu i lana tautalaga ia Sepulona, sa saunoa ai foi Alema e *uiga* ia te ia ma Korianetona. Fai mai Alema: "E te lei vaai ea i le maumaututu o lou uso, lona faamaoni, ma lona filiga i le tausiga o poloaiga a le Atua? Faauta, sa ia lei faia ea mo oe se faaitaiga lelei?" (Alema 39:1).²

E foliga mai o Sepulona o se atalii sa manao e faafiafia lona tama, sa alu atu ma faia le mea sa'o ona o le mea sa'o lea nai lo viiga, tofiga, malosia, mamalu, po o le pule. Atonu sa iloa e Helamana lenei mea e uiga i lona uso ma faaloalo i ai, aua sa ia tuu atu i le vaavaaiga a Sepulona ia faamaumauga





Woodbury, Minnesota, USA

paia na ia maua mai lona tama. E mautinoa lava na faatuatuaaina e Helamana Sepulona ona “o ia o se tagata amiotonu, ma sa savali ma le tonu o ia i luma o le Atua; ma sa ia tausi e fai mea lelei e le aunoa, e tausi poloaiga a le Alii lona Atua” (Alema 63:2). E pei ona foliga mai o uiga moni ia o Sepulona, ae e le o tele se mea na faamaumauina e uiga ia te ia mai le taimi na ia taulimaina ai faamaumauga paia seia oo ina ia tuu atu ia Helamana le atalii o Helamana (tagai Alema 63:11).

O Sepulona sa lelei moni lava ma e aunoa ma le faa’ole’ole. Sa avea o ia ma se tagata na ositaulagaina lona taimi, taleni, ma taumafaiga e fesoasoani ai ia siitia isi ona o se alofa mo le Atua ma ona uso a tagata (tagai Alema 48:17–19; 49:30). Ua atoatoa le faamatalaina o ia i upu a Peresitene Spencer W. Kimball: “O tamaitai ma alii maoae e naunau atili i taimi uma ia auauna atu i lo le maua o le pule.”³

I se lalolagi i le mea o loo saili ai viiga, tofiga, malosia, mamalu, ma le pule i soo se auala e mafai ai, ou te faamamaluina ai na agaga lelei ma faamanuiaina o ē e lelei moni lava ma e aunoa ma le faa’ole’ole, o i latou o loo uunaia e se alofa i le Atua ma o latou tuaoi, i latou o tamaitai ma alii maoae o e “e naunau atili i taimi uma ia auauna atu i lo le maua o le pule.”



O loo i ai i aso nei nisi e taumafai ia tatou talitonu o la tatou sailiga mo mea taua ua na o le mauaina o tofiga ma le pule e mafai ona faamalieina ai. Ae, o le mea e faafetai ai, e toatele i latou e le o faaseseina e lenei manatu. Latou te mauaina mea taua i le saili atu ia lelei moni lava ma e aunoa ma le faa’ole’ole. Ua ou iloa ina i latou na i soo se tulaga o le olaga ma i le tele o faatuatua e eseese. Ma ou te maua le toatele o i latou i soo liua moni o Keriso.⁴

Ou te faamamalu ia i latou o e auauna atu ma le le manatu faapito i vaiaso taitasi i uarota ma paranesi i le lalolagi atoa e ala i le faia o le tele o mea e faataunu ai valaauga. Ae o valaauga e omai ma toe o atu. O le isi foi mea e sili ona faagaetia ai au o le toatele o e e aunoa ma ni valaauga aloaia latou te sailia ni auala e auauna atu ai pea ma siitia isi. E vave alu atu se tasi uso i le lotu e faatulaga nofoa ma nofo pe a maea e toe faamama le falesa. O se tasi o tuafafine e filifili lava o ia e nofo i talaane o se tuafafine tauaso

i lana uarota e le gata na te faafeiloai ia te ia ae ia mafai foi ona ia usu leotele viiga ina ia mafai ai e le tuafafine tauaso ona faalogo i upu ma pese mai ai. Afai e te tagatagai totoa i lau uarota po o le paranesi, o le a e mauaina ni faataitaiga faapenei. O loo i ai lava i taimi uma tagata latou te iloa ina ē e manaomia le fesoasoani ma le taimi e tuu atu ai.

Masalo o la’u lesone muamua lava e uiga i Au Paia e lelei moni lava e aunoa ma le faa’ole’ole sa auauna a o avea au ma se faifeautalaitalavou. Sa ou masii atu i se eria faatasi ma se faifeautalaitalavou o le iloa. Sa ou faalogo o talanoa isi faifeautalaitalavou e uiga i lona lei mauaina o se tofiga faaletaitai ma lona tauivi ai i le gagana Korea e ui lava sa umi se taimi o i ai i le atunuu. Ae ina ua faasolo ona ou iloa ina lenei faifeau, sa ou iloa ai o ia o se tasi o faifeautalaitalavou ona usiusitai ma faamaoni ua ou iloa. Sa ia suesue pe a oo i le taimi e suesue ai; sa ia galue pe a oo i le taimi e galue ai. Sa ia tuua le fale i le taimi sa’o ma foi mai i le taimi sa’o. Sa filiga o ia i le suesueina o le FaaKorea e ui lava sa matua patino le faigata o le gagana ia te ia.

Ina ua ou iloa ina o faamatalaga sa ou faalogo i ai e le moni, sa ou lagonaina e pei lava ua faamasino sese tagata i lenei faifeautalaitalavou faapea e le faamanuiaina. Sa ou manao e tau atu i le misiona atoa le mea ua ou iloa ina e uiga i lenei faifeau. Sa ou faasoa atu i la’u peresitene o le misiona lo’u manao ia faasa’o le le malamalama lenei. O lana tali, “O loo silafia e le Tama Faalelagi lenei alii talavou o se faifeautalaitalavou faamanuiaina, ma e faapena foi a’u.” Sa ia faaopoopo mai, “Ma o lea foi ua e iloa ina, o ai la se isi tagata e sili ona taua?” Sa auauna au e lenei peresitene atamai o le misiona i le mea sa taua i le auaunaga, ma sa le o viiga, tofiga, malosia, mamalu, po o le pule. O se lesone sili lea mo se faifeautalaitalavou sa taulai tele atu i ni faalagiga.



I le manatuaina ai o lenei lesone, sa amata ai ona ou toe tepa i tua i lou olaga ma vaai pe faafia ona faatosina-ina a'u e alii ma tamaitai o ē i lena taimi sa lei ni faalagiga tele po o ni tofiga. O se tasi o na tagata e pei o Sepulona, o la'u faiaoga seminare i le taimi o o'u tausaga amata i le aoga maualuga. Sa faiaoga lenei tamalii lelei i le seminare mo na o le lua pe tolu tausaga, ae sa ia tatalaina lo'u loto i se auala na fesoasoani ai ia te au ia maua se molimau. Atonu sa le o ia o se faiaoga na sili ona lauiloa i le aoga, ae sa ia saunia i taimi uma ma o ana faatosinaga ia te au sa mamana ma tumau. O se tasi o na taimi laitai sa ou vaaia ai lenei tamalii i totonu o tausaga e 40 talu ona ia aoaoina au, o le taimi na sau ai o ia e asi au i le maliu o lo'u tama. O le mea moni, o se faatinoga lena sa lei uunaia e se faalagiga po o se pule.

Ou te faamamaluina lena faiaoga tuuto ma le tele o tagata e pei o ia o ē lelei moni lava ma e aunoa ma le faa'ole'ole. Ou te faamamaluina le faiaoga o le Aoga Sa e le na o le taimi o le vasega o le Aso Sa na te aoaoina ai ana tamaiti aoga ae aoaoina foi ma faatosinaina nei lava tamaiti aoga e tasi e ala i le valaauliaina o i latou ia auai atu i lona aiga mo se mālū taeao. Ou te faamamaluina taitai o le autalavou e auai i gaoioiga faaleaganuu ma taaloga faatasi ma alii talavou ma tamaitai talavou i o latou uarota. Ou te faamamaluina le tagata na te tusia ni tusi faamalosi i

tuaoi ma tamaitai e le na o le lafoina o kata Kerisimasi i le meli ae tauaao atu e ia lava i tagata o le aiga ma uo o loo manaomia se asiasiga. Ou te faamamaluina le uso na te fai ma masani le ave o se tuaoi e faatietie i taimi faigata o se tuaoi—ma tuuina atu ia i laua uma ma lona toalua se suiga sili ona manaomia o galuega faisoo o le aso.

O nei mea e le o faia ona o viiga ma mamalu. O nei alii ma tamaitai e le o faaosofia e fai ni mea ina ia maua ai ni faalagiga po o se pule. O i latou o ni soo o Keriso, o loo o atu ma faia e le aunoa le lelei, ma e pei o Sepulona, o loo latou taumafai e faafiafia lo latou Tama i le Lagi.

Ou te faanoanoa pe a ou faalogo atu i nisi ua le toe galulue i tofiga pe le toe auai i le lotu ona ua faamalolo mai se valaauga pe ua le tofiaina foi i se tofiga po o se valaauga na faufau i ai. Ou te faamoemoe o le a i ai se aso latou te aoaoina ai le lesone lava e tasi sa ou aoaoina a o ou avea ma se faifeautalaitalavou—o le auunaga e sili ona taua e masani lava e na o le Atua na te faamamaluina. I la tatou sailiga o mea tatou te mananao i ai, pe ua galo ea ia i tatou mea e finagalo i ai le Atua?

Atonu e fai mai nisi, "Ae e matua tele lava sa'u taumafaiga ia avea ai e pei o i latou ua e faamatalaina." O le tala fiafia o le talalelei a Iesu Keriso e faapea, o manaoga o o tatou loto e mafai ona suia ma o o tatou faanaunaga e mafai ona aoaoina ma faaleleia. A papatisoina

i tatou i le lafu moni a le Atua, ua tatou amataina le faagasologa o le avea ma ni tagata fou (tagai 2 Korinito 5:17; Mosaea 27:26). O taimi uma tatou te faafouina ai le feagaiga o le papatisoga e ala i le aai ma feinu i le faamanatuga, tatou te latalata atili ai lava i lena sini silisili.⁵ A tatou tumau i lena feagaiga, tatou te mauaina le malosi e faanoanoa ai ma i latou o loo faanoanoa ma faamafanafana ia i latou o loo manaomia le faamafanafanaga (tagai Mosaea 18:9). I lena feagaiga, tatou te maua ai le alofatunoa lea e mafai ai ona tatou auuina atu i le Atua ma tasi Ana poloaiga, e aofia ai le alofa atu i le Atua ma o tatou loto atoa ma le alofa atu i o tatou tuaoi e pei o i tatou ia i tatou lava.⁶ I lena feagaiga, e fesoasoani mai ai le Atua ma Keriso ia i tatou ina ia mafai ai ona tatou fesoasoani atu foi ia i latou o loo manaomia la tatou fesoasoani (tagai Mosaea 4:16; tagai foi fuaiupu 11–15).

Na o le pau lava le mea ou te manao ai i le olaga o le faafiafia lea o o'u tama—tama faalelagi ma faalelagi—ma avea atili e faapei o Sepulona.⁷

Ou te faafetai i lo'u Tama Faalelagi mo tagata pei o Sepulona e ana faataitaiga ua ofo mai ai ia te au—ma i tatou uma—le faamoemoe. I o latou olaga, tatou te vaaia ai se molimau a se Tama i le Lagi alofa ma se Faaola popole ma agaalofa. Ou te faaopoopo atu la'u molimau i a latou molimau faatasi ai ma se augani ia tauivi e avea atili e faapei o i latou, i le suafa o Iesu Keriso, amene. ■

FAAMATALAGA

1. Dieter F. Uchtdorf, "Le Alii e, O Au Ea?" *Liahona*, Nov. 2014, 58; faaopoopo le faamamafa.
2. E lei alu Helamana e aoao atu sa Sorama, o lea ua tatou iloa ai o Sepulona lea sa talanoa i ai Alema ina ua ia faapea mai "o lou uso" (tagai Alema 31:7; 39:2).
3. Spencer W. Kimball, "The Role of Righteous Women," *Ensign*, Nov. 1979, 104.
4. "Na aoao mai le Alii ia i tatou, pe a tatou liua moni i Lana talalelei, o le a liliu o tatou



Saunia e Elder Quentin L. Cook
O Le Korama a Aposetolo e Toasefululua

loto mai atugaluga manatu faapito ae liliu agai atu i auunaga ia siitia ai isi a'o latou agai i luga i le ola e faavavau. Ina ia maua lena liua, e mafai ona tatou tatalo ma galulue i le faatuatua ia ave ma tagata fou, lea e mafai ona maua e ala i le Togiola a Iesu Keriso. E mafai ona tatou amata i le tatalo mo le faatuatua e salamo ai i le manatu faapito, ma mo le meaalofo o le agaalofo i isi e sili atu nai lo i tatou lava. E mafai ona tatou tatalo mo le mana e tuu ese ai le faamaualuga ma le lotoleaga” (Henry B. Eyring, “Molimau ma le Liuaia,” *Liahona*, Fep. 2015, 4–5).

5. “O le [Atua] e faavavau ma atoatoa. O i tatou o ni tagata faaletino ma e le atoatoa. Ae ui i lea tatou te sailia ni auala e oo lava i le faavavau e mafai ai ona tatou faatasia ma Ia faaleagaga. O le faia o lea mea tatou te maua ai nisi o avanoa i le alofatunoa ma le mamalu o Lona mana. O na taimi faapitoa e aofia ai . . . le papatisoina ma le faamauiina . . . [ma le] tagofia o faatua o le Talisuaga a le Faaola” (Jeffrey R. Holland, *To My Friends* [2014], 80).
6. “O Au Paia o Aso e Gata Ai o e vaaia i latou lava i mea uma latou te faia o ni fanau a le Atua e masani lava ona latou faia ma tausia tautinoga. O le ata o le faaolataga ua faailogaina i feagaiga. Ua tatou folafola atu e usiusitai i poloaiga. Ae ua folafola mai ai e le Atua ia faamanuiaga i lenei olaga ma mo le faavavau. E tonu o ia i mea na te finagalo i ai ma e tausia lelei lava ana folafolaga. Ona e alofa ia i tatou ma ona o le faamoemoega o le fuafuaga ia ave faapei o ia, e finagalo o ia ia tatou tutusa ma ia. Ma o folafolaga ua fetalai mai ai o ia ia i tatou e aofia ai pea lava pea le mana e tuputupu ae ai i lo tatou tulaga gafatia i le tausiga o feagaiga. Na te faailoa mai ana tulafono. A tatou taumafai ma o tatou loto ato ina ia ausia ona tulaga faatonuina, na te tuuina mai ia i tatou le mafutaga a le Agaga Paia. O lena mea e faateleina ai lo tatou mana e tausia ia tautinoga ma iloatino mea lelei ma mea moni. Ma o le mana lena e aoao ai, i a tatou sutesuga faaletino ma i le aoaoina tatou te manaomia mo le faavavau” (Henry B. Eyring, “A Child of God” [Brigham Young University devotional, Oct. 21, 1997], 4–5; speeches.byu.edu). Tagai foi David A. Bednar, “Tauave ma le Faigofie a Latou Avega,” *Liahona*, May 2014, 87–90.
7. Mai ou manatuaga anamua, sa ou mana'o lava ia faafiafia lo'u tama. A o ou tuputupu ae ma maua se molimau, sa ou maua foi se naunautaiga ia faafiafia le Tama Faalelagi. I se taimi mulimuli ane i lo'u olaga, sa ou aoao ai e uiga ia Sepulona ma faapoopo atu ai i a'u sini o le olaga ia ave faapei o ia.

O Le Alii o Lo'u Malamalama Ia

O lo tatou gafatia e tumau mausali ai ma le faamaoni ma mulimuli i le Faaola e tusa lava po o a fesouaiga o le olaga, e matua faamallosia lava e aiga amiotonu ma le lotogatasi e faatutotonu ia Keriso i a tatou uarota ma paranesi.

I lenei vaiata o le Eseta tatou te mafau-fau ai ma olioli i le togiola na saunia e lo tatou Faaola, o Iesu Keriso.¹

O le malomaloa o loo taalili i le lalolagi atoatoa ona o le amioleaga o le lalolagi ua tupu mai ai lagona o le vaivai. E ala i fesootaiga faaonapo nei, o aafiaga o le amioleaga, faailogalanu, ma le faitu'au ua tuua ai le toatele ma lagona e faapea, o le olaga e faaitu'au foi. E ui e tuga nei tofotofoga, ae e le tatau ona faalavelaveina ai i tatou mai le olioli ai ma fiafia i ai'oiga a Keriso i le Atua mo i tatou. O le Faaola na “manumalo [moni] i le oti. Faatasi ai ma le alofa mutimutivale ma le agaalofo, na Ia ave ai i Ona luga a tatou agasala ma solitulafono, o lea ua togilolaina ai i tatou ma faamaloe ai manaoga o le faamasinotonu mo tagata uma o e salamo ma talitonu i Lona suafa.²

O Lana taulaga togiola ofoofogia e silisili ese lona taua e le malamalama i ai tagata faaletino. O lenei faatinoga o le alofatunoa ua maua ai le filemu lea e sili atu i le mea e malamalama i ai [se tasi].³

E faapefea la ona tatou taulimaina faigata moni ia e siomia ai i tatou?



E fiafia lava lo'u toalua o Mary, i fugalaa'u o mata o le la. E fiafia o ia pe a ola ae i tafatafa'ala, i ni nofoaga e lei faamoemoeina ai. O loo i ai se auala pefu e tau atu i le fale sa nonofo ai o'u matua matutua. A ma tietie atu la i lena auala, e alaga lava Mary, “E te manatu o le a e vaaia na mata o le la matago-fie tele i lenei aso?” Sa faateia i maua i le ola lausiusi o mata o le la i eleele



O se tasi o vaega ofoofogia o mata o le la vao iti nei o le auala e mulimuli ai moemoe o le fugalaau ititi ma faasaga ai i le mea e alu i ai le la i luga le lagi.

e aafia tele i masini faatoaga ma sua kiona, atoa ai ma le faatupulaia o mea ia e manatu o le a le lelei i le elelee mo fugalaau vao e ola ai.

O se tasi o vaega ofoofogia o mata o le la vao iti nei, e faaopoopo atu i le ola ai i se elelee le lelei, o le auala e mulimuli ai moemoe o le fugalaau ititi ma faasaga ai i le mea e alu i ai le la i luga le lagi. O le faia o lea mea, na te mauaina ai le malosi e tumau ai le ola a o lei fuga mai i lona lanu samasama mamalu.

E pei foi o le mata o le la, a tatou mulimuli i le Faaola o le lalolagi, le Alo

o le Atua, tatou te ola fiafia foi ma le mamalu e ui lava i le tele o tulaga leaga o loo siomia ai i tatou. O Ia moni lava o lo tatou malamalama ma le ola.

I le faataoto o le saito ma le titania, na tautino mai ai le Faaola i Ona soo o i latou e tausui ma faia le agasala o le a faapotopoto i *fafo* o Lona malo.⁴ Ae e faatatau i e faamaoni, na Ia fetalai ai, “Ona pupula ai lea o e amiotonu e pei o le la i le malo o lo latou Tama.”⁵ I le avea ai ma tagata taitoatasi, o ni soo o Keriso, o loo ola i se lalolagi pagatia lea ua vāvāō moni lava, e mafai ona tatou ola ma fuga mai pe afai o mauaa

lo tatou alolofa i le Faaola ma mulimuli ma le lotomualalo i Ana aoaoga.

O lo tatou gafatia e tumau mausali ai ma le faamaoni ma mulimuli i le Faaola e tusa lava po o a fesouaiga o le olaga, e matua faamalosiava lava e aiga amiotonu ma le lotogatasi e faatutotonu ia Keriso i a tatou uarota ma paranesi.⁶

O Le Taimi Sa’o i le Aiga

O le matafaioi o le Aiga i le fuafuaga a le Atua o le “aumaia ia i tatou o le fiafia, ia fesoasoani ia i tatou ia aoa mataupu faavae sao i se siosiomaga alofa, ma ia saunia i tatou mo le ola e faavavau.”⁷ O tu masani matagofie o gaoioga faalelotu i totonu o le aiga e manaomia ona mauaa i loto o a tatou fanau.

O le tuagane o lo’u tina o Vaughn Roberts Kimball o se tagata lelei i le a’oga, o se tusitala musuia, ma se tagata lakapi o le laina i tua. I le aso 8 o Tesema, 1941, le aso ina ua mavae le osofaiga i le Pearl Harbor, na auai ai o ia i le Neivi a le Iunaite Setete. A o i ai o ia i se tofiga e saili nisi tagata e auai i le Neivi i Alepani, Niu Ioka, na ia auina atu ai sana tamai tusiga i le *Reader’s Digest*. Na totogi atu e le mekasini ia te ia le \$200 ae lolomi lana tusiga na faaulutalaina “The Right Time at Home (O Le Taimi Sa’o i le Aiga)” i le lomiga o Me 1944.

O lona são i le *Reader’s Digest*, lea na ia faamatalaina ai o ia o se tagata folau, e faitauina sina vaega:

“O Le Taimi Sa’o i le Aiga:

“I se tasi afiafi i Alepani, Niu Ioka, sa ou fesili atu i se tagata folau pe ua ta se fia. Sa ia toso maia i fafo se uati telē ma tali mai, ‘Ua 7:20.’ Sa ou iloaia ua tuai. ‘Ua pe lau uati, a ea?’ sa ou fesili atu ai.

“Leai,’ sa ia fai mai ai, ‘O lea lava ou te i ai i le taimi a Iutā. Ou te sau mai Iutā i saute. Ina ua ou auai i le Neivi, na tuu mai e tamā lenei uati. Fai mai



a ia o le a fesoasoani ia te au ia manatua ai le aiga.

“Afai mai la’u uati ua ta le 5 i le taeao ou te iloa ua alu tama e tatau susu o povi. Ma o soo se po e fai mai ai ua ta le 7:30 ou te iloa ua faataamilomilo le aiga atoa i se laulau ai, ma o loo faafetai Tama i le Atua mo meaai ma ole atu ia te Ia ia leoleo ia te a’u,’ . . . sa ia faaiu ai. E mafai ona ou sueina le taimi i le mea e faigofie ia te a’u. O le mea ou te fia iloina pe ua ta se fia i Iutā.’”⁸

E lei leva talu ona auina atu le tusiga, ae tofia Vaughn i se vaa na tautua i le Ogasami o le Pasefika. I le aso 11 o Me, 1945, a o ia tautua ai i le vaa o le USS *Bunker Hill* e lata i Okinawa, na tuipomuina ai le vaa e ni vaalele faapapomu pule i le ola.⁹ E latalata i le 400 le auvaa na malilili ai, e aofia ai ma lo’u uncle o Vaughn.

Sa faailoa e Elder Spencer W. Kimball lona tigaalofa ootia i le tamā o Vaughn, ma faamauina le agavaa o Vaughn ma le faamautinoaga a le Alii e faapea “o le a le tofo i le oti i latou o e e oti ia te au, aua o le a suamalie ia te i latou.”¹⁰ Sa fai atu ma le agamalu le tama o Vaughn e ui ua lagomau Vaughn i le vasa, ae o le aao o le Atua o le a avatua Vaughn i lona aiga faalelagi.¹¹

I le luasefulu-valu tausaga mulimuli ane, sa saunoa Peresitene Spencer W. Kimball e uiga ia Vaughn i se konafesi aoao. Sa ia saunoa i se vaega: “Ou te iloa lelei lenei aiga. . . . Sa ou tootuli

i le tatalo malosia faatasi ma i [latou]. . . . O aoaoga i le aiga ua oo atu ai i faamanuiaga e faavavau o lenei aiga toatele.” Sa luiina e Peresitene Kimball aiga uma “ina ia tootutuli . . . e tatalo mo o latou atalii ma afafine faalua i aso uma.”¹²

Uso e ma tuafafine, afai tatou te faia ma le faamaoni tatalo faaleaiga, suesuega o tusitusiga paia, afiafi faaleaiga, faamanuiaga faaleperisitua, ma le tausia o le aso Sapati, o le a iloa e a tatou fanau pe ua ta se fia i o tatou fale. O le a saunia i latou mo se aiga e faavavau i le lagi e tusa lava po o a mea e tutupu ia i latou i se lalolagi faigata. E matua taua tele le iloina e a tatou fanau e alofagiaina i latou ma saogalemu i le aiga.

O tane ma ava o ni paaga tutusa.¹³ E eseese o la tiutetauave ae galulue faatasi. E fanauina e le ava ia fanau, lea e manuia ai le aiga atoa. E mafai ona maua e le tane le perisitua, lea e manuia ai le aiga atoa. Ae i le aufono faaleaiga o ava ma tane, i le avea ai ma ni paaga tutusa, la te faia ni faaiuga sili ona taua. La te filifili i auala e aoao ma aoi ai le fanau, o auala o le a faaalua ai tupe, nofoaga o le a latou nonofo ai, ma le tele o isi faaiuga faaleaiga. O nei mea uma e faia faatasi i le maea ai ona saili atu i le taitaiga mai le Alii. O le sini, o se aiga e faavavau.

O Le Malamalama o Keriso e totoina le natura e faavavau o le aiga i loto o fanau uma a le Atua. O se tasi o tusitala

e sili ona ou fiafia i ai, e le o se tasi o lo tatou faatuatuaga, sa ia saunoa faapenei: “E anoanoai mea i le olaga e le taua, [ae] . . . o le aiga o le mea moni lea, le mea taua, le mea faavavau; le mea e leoleoina ma tausia ma ia faamaoni i ai.”¹⁴

E Fesoasoani le Ekalesia ia i Tatou ia Taulai atu o se Aiga Afaatasi i le Faaola

E faapoopoo atu o le aiga, o le matafaioi a le Ekalesia e taua foi. “Ua saunia e le Ekalesia faalapotopotoga ma auala mo le aoaoina atu o le talalelei a Iesu Keriso i fanau uma a le Atua. E maua ai le pule o le perisitua e faatautaia ai sauniga o le faaolataga ma le faaeaga i tagata uma ua agavaa ma loto ia talaiina na sauniga.”¹⁵

O loo i ai i le lalolagi ia fefinau-aiga le mataofiofia ma agasala, ma se faamamafa tele i aganuu eseese ma le le tutusa. I le Ekalesia, vagana ai iunite o gagana, o a tatou uarota ma paranesi ua faataatitia i tuaoi faafaafanua. Tatou te le vaevaeina i ni tulaga po o ni mamalu.¹⁶ Tatou te olioli i le mea moni ua fefiloi faatasi ma ituaiga ma aganuu eseese i se faapotopotoga tonu. E taua lo tatou aiga faaleuarota i lo tatou alualu i luma, fiafia, ma taumafaiga faaletagata lava ia ia avea atili e faapei o Keriso.

E tele lava ina tuueseese e aganuu ia tagata ma o nisi taimi e avea ai ma se pogai o fetauaiga ma le faailogalanu.¹⁷ I le Tusi a Mamona o nisi o faaupuga sili ona taua faamatau o loo faaaogaina e faamatala ai tu masani a tamā amioleaga ia na taitai atu ai i fetauaiga, taua, amioleaga leaga, agasala, ma na oo lava i le faafanoga o tagata ma malo.¹⁸

E le o i ai se vaega sili atu ona lelei e amata ai i totonu o tusitusiga paia nai lo le 4 Nifae mo se faamatalaga o le aganuu a le Ekalesia lea e taua mo i tatou uma. I le fuaiupu e 2 e faitauina faapenei, “Sa liliu tagata uma i le

Alii, i luga o le laueleele atoa, o sa Nifae uma ma sa Lamana, ma sa leai ni finauga ma ni feteenaiga i totonu ia te i latou, ma sa faamaoni tagata uma o le tasi i le isi.” I le fuaiupu e 16 tatou te faitau ai, “Ma e moni e le mafai ona i ai o ni tagata e sili atu ona fiafia i totonu o tagata uma na foafoa e le aao o le Atua.” O le mea moni sa leai se finauga ona “o le alofa o le Atua sa mau i loto o tagata.”¹⁹ O le aganuu lenei e tatau ona tatou mananao i ai.

O tulaga faatauaina loloto faaleaganuu ma talitonuga o se vaega autu lea o ituaiga tagata tatou te i ai. O tu masani o le ositaulaga, lotofaafetai, faatuatua ma le amiotonu e ao ona faatauaina ma faasaoina. E tatau i aiga ona olioli ma puipuia tu masani ia e atiaeina le faatuatua.²⁰

O se tasi o vaega sili ona taua o soo se aganuu o lana lava gagana. I le eria o San Francisco, Kalefonia, lea sa ou nofo ai, sa i ai ni iunite se fitu o gagana e ese mai le gagana a le atunuu. O la tatou aoaoga faavae e tusa ai ma gagana ua faataatia mai i le vaega e 90, fuaiupu e 11 o le Mataupu Faavae ma Feagaiga: “Aua o le a oo mai, i lena aso, o le a faalogo ai tagata taitoatasi

i le atoatoaga o le talalelei i lana lava tautala, ma i lana lava gagana.”

A tatalo atu le fanau a le Atua ia te Ia i la latou lava gagana, o le gagana lena o o latou loto. Ua manino lava o le gagana o le loto e taua i tagata uma.

O lo’u uso matua o Iosefa, o se fomai ma sa galue mo le tele o tausaga i le eria i San Francisco Bay. O se tagata Samoa matua o le Ekalesia, o sana gasegase fou, sa alu atu i lona ofisa. Sa matua tuga ma lofituina ona tiga. Sa iloa ifo sa i ai ni maa i lona fatugao ma ua talafeagai ai le faia o se togafitiga. Sa ta’ua e lenei tagata faamaoni o le ekalesia na o le pau lava lona faamoemoe ia malamalama i le mea o loo tupu ina ia mafai ai ona ia tatalo i le FaaSamoa i lona Tama Faalelagi e uiga i le faaletonu o lona soifua maloloina.

E taua mo tagata ona malamalama i le talalelei i le gagana o o latou loto ina ia mafai ai ona latou tatalo ma galulue e tusa ma mataupu faavae o le talalelei.²¹

E oo lava foi i le eseesea o gagana ma le matagofie o tu ma aga faaleaganuu musuia, e tatau lava ona su’i faatasi o tatou loto i le lotogatasi ma le alofa.²² Ua matua faamamafa mai lava e le Alii: “Ia taitasi le tagata ma manatu taua i

lona uso e pei o ia lava ia te ia. . . . Ia tasi outou; ma afai tou te le tasi e le ā a’u outou.”²³ E ui tatou te faatauaina eseesea talafeagai faaleaganuu, ae o la tatou sini ia lotogatasi i le aganuu, faiga masani, ma tu masani o le talalelei a Iesu Keriso i soo se tulaga.

Ua Faateleina Pea le Malosi o le Ekalesia a Iesu Keriso o le Au Paia o Aso e Gata Ai

Matou te iloina o loo i ai i nisi tagata o le ekalesia ni fesili ma ni atugaluga a o latou saili atu ia faamaalosi lo latou faatuatua ma molimau. E tatau ona tatou faaeteete ia aua nei faitio atu pe faamasino atu ia i latou o i ai ni atugaluga—tele pe itiiti. I lea lava taimi e tasi, o e o i ai ni atugaluga e tatau ona faia mea uma latou te mafaia e atiae ai lo latou lava faatuatua ma le molimau. O suesuega ma le onosai ma le agaga tatalo, mafaufau loloto, tatalo, ola i mataupu faavae o le talalelei, ma le fefautuaai ma taitai talafeagai, o auala sili ia e foia ai ni fesili po o ni atugaluga.

Ua fai mai nisi ua toatele atu tagata ua tuua le Ekalesia i aso nei, ma ua faateleina le masalosalo ma le le talitonu i lo le taimi ua tea. Ae e le moni lea mea. O loo faateleina pea le malosi o Le Ekalesia a Iesu Keriso o le Au Paia o Aso e Gata Ai. O le aofai o tagata ua aveesea o latou igoa mai faamaumauga o le Ekalesia e itiiti lava i taimi uma ma ua iloga le faaitiitia i tausaga talu ai nei i lo le taimi ua tuanai.²⁴ O le siitaga i vaega o fuainumera, e pei o tagata ua maua faeega paia o loo i ai se pepa faataga o le malumalu o loo aoga, tagata matutua e totogi atoa le sefuluai, ma i latou o loo auuina atu i misiona, ua matua faateleina.”²⁵ Ua tatou aapa atu i tagata uma.

Afai o faigata matuitui ia o loo outou fetai ai i le taimi nei ua foliga mai ai ua leai se faamoemoe ma ua mamafatu, ma ua toetoe lava a le lavatia, manatua



o tiga matuitui o le agaga i Ketesemane ma sauaga ma tiga le mafaamatalaina o Kalevario, na faataunuu ai e le Faaola le Togiola, lea ua foia ai avega sili ona mamafatu e mafai ona tutupu i lenei olaga. Sa Ia faia mo oe, ma sa Ia faia mo au. Sa Ia faia ona e alofa ia i tatou ma ona e usiusitai o Ia ma alofa i Lona Tama. O le a laveaiina i tatou mai le oti—e tusa lava pe lagomau tatou i le loloto o le vasa.

O lo tatou puipuiga i lenei olaga ma le faavavau o le a faalagolago lea i le amiotonu o le tagata lava ia ma le aiga, sauniga a le Ekalesia, ma le mulimuli i le Faaola. O lo tatou malutaga lea mai matagi. Mo i latou o loo lagonaina le tuuatoatasi, e mafai ona e tu mausali i le amiotonu ma le iloaina o le Togiola o le a puipuia ma faamanuiaina oe e sili atu ma lou tomai e malamalama atoa i ai.

E tatau ona tatou manatuaina le Faaola, tausi a tatou feagaiga, ma mulimuli i le Alo o le Atua e pei o mata o le la e mulimuli lava i le sulu o le la. O le mulimuli i Lona malamalama ma le faataitaiga o le a aumaia ai ia i tatou le olioli, fiafia, ma le filemu. E pei ona folafola mai uma e le Salamo e 27 ma se viiga faapelepele, “O le Alii lou malamalama ma lou faaolataga.”²⁶

I lenei faaiuga o le vaiaso o le Eseta, i le avea ai ma se tasi o Aposetolo a le Faaola, ou te molimau atu ma le faamaoni i le Toetu o Iesu Keriso. Ou te iloa o loo soifua o Ia. Ou te iloa Lona siufofoga. Ou te molimau atu i Lona paia ma le moni o le Togiola i le suafa o Iesu Keriso, amene. ■

FAAMATALAGA

1. Tagai 2 Nifae 9:20–22.
2. Tagai Mosaea 15:8–9.
3. Tagai Filipi 4:7.

4. Tagai Mataio 13:41.
5. Mataio 13:43.
6. Tagai Mataupu Faavae ma Feagaiga 115:5–6.
7. *Tusitaulima 2: Taitaiina o le Ekalesia* (2010), 1.1.4.
8. Vaughn R. Kimball, “The Right Time at Home,” *Reader’s Digest*, May 1944, 43.
9. Tagai i le tusi mai ia Kapeteni G. A. Seitz, U.S. Navy, USS *Bunker Hill*, tusia i le aso 25 Me, 1945, mo le tama o Vaughn Kimball, o Crozier Kimball, Draper, Iuta.
10. Tagai i le tusi mai ia Spencer W. Kimball, tusia i le aso 2 Iuni, 1945, ia Crozier Kimball; Mataupu Faavae ma Feagaiga 42:46.
11. Tagai Crozier Kimball, in Marva Jeanne Kimball Pedersen, *Vaughn Roberts Kimball: A Memorial* (1995), 53.
12. Spencer W. Kimball, “The Family Influence,” *Ensign*, July 1973, 17. Spencer W. Kimball a o avea i lena taimi ma Peresitene o le Korama a Aposetolo e Toasefululua.
13. Tagai “O Le Aiga: O Se Folafolaga i le Lalolagi,” *Liahona*, Nov. 2010, 129.
14. Carla Carlisle, “Pray, Love, Remember,” *Country Life*, Sept. 29, 2010, 120.
15. *Tusitaulima 2*, 1.1.5.
16. Tagai 4 Nifae 1:26.
17. O le aganuu ua sili atu ona talanoaina i le lalolagi i lenei vaitaimi. Mo le tausaga 2014 o le upu *aganuu* na avea foi ma se upu o le tausaga i le Merriam-Webster.com.
18. Tagai Alema 9; Helamana 5.
19. 4 Nifae 1:15.
20. The German philosopher Goethe famously wrote, “What from your fathers’ heritage is lent, earn it anew, to really possess it!” (Johann Wolfgang von Goethe, *Faust*, trans. Bayard Taylor [1912], 1:28).
21. O se tasi lea o mafuaaga ua aoao atu ai e le Ekalesia le talalelei i gagana e 50 ma faaliuina le Tusi a Mamona i gagana e 110. Ae peitai, o se tasi o luitau o le lalolagi atoa o le aoaoina lea o le gagana o le atunuu lea o loo e alala ai. I le avea ai ma matua e tatau ona tatou ositaulaga ina ia fesoasoani atu i le tupulaga faiae ia aoao le gagana o le atunuu o loo latou nonofo ai i le taimi nei. Fesoasoani ia i latou ia avea lena gagana ma gagana o loo latou loto.
22. Tagai Mosaea 18:21.
23. Mataupu Faavae ma Feagaiga 38:25, 27.
24. I le aluga o le 25 tausaga ua mavae, o le aofai moni o tagata na tuua le Ekalesia ua faaitiitia ma ua toetiitia faaluaina le toatele o le Ekalesia. Ua matua faaitiitia le pasene o i latou ua tuua le Ekalesia.
25. Mataupu Faavae ma Feagaiga 18:10.
26. Salamo 27:1; tagai foi “O Iesu Lo’u Sulu,” *Viiga*, nu. 49.





Saunia e Elder M. Russell Ballard

○ Le Korama a Aposetolo e Toasefululua

○ Le Tupulaga Silisili o Talavou Matutua

O le mea ua matou manaomia nei o le tupulaga aupito sili o talavou matutua i le talafaasolopito o le Ekalesia. Matou te manaomia lou loto atoa ma le agaga atoa.

O se tasi o mea e sili ona ou fiafia i ai a o ou femalagaai i le salafa o le lalolagi, o le avanoa e feiloai ai ma ofoalofa atu i o tatou faifeautalagai. O nei alii ma tuafafine faifeautalagai e susulu mai ai le Malamalama o Keriso, ma e musuia ai lava au e le aunoa i lo latou alolofa i le Alii o Iesu Keriso ma la latou tautua tuuto atu ia te Ia. O taimi uma lava ou te faatalofa atu ai ia i latou ma lagonaina lo latou agaga ofoofogia ma le faatuatua. Ou te faapea ifo ia te au lava, “O o tatou nei atalii ma afafine ofoofogia, o se vavega moni lava!”

I le sauniga perisitua i le konafesi aoao ia Oketopa 2002, sa ou tuu atu ai se lu’i i epikopo, matua, ma i latou ua tatau ona faamisiona e “sii le fua” mo le auunaga faafaifeautalagai faamisiona.

Ona ou fai atu lea faapea “o le mea ua tatou manaomia . . . o le tupulaga aupito sili o faifeautalagai i le talafaasolopito o le Ekalesia. Ua tatou manaomia faifeautalagai agavaa, atamamai, ma malolosi faaleagaga. . . .

“. . . Matou te manaomia lou loto atoa ma lou agaga atoa. Matou te manaomia ni faifeautalagai malolosi, talitonu, ma naunautai o i latou e iloa ona

faalogo ma usitai i musumusuga a le Agaga Paia.”¹

I le tele o ala, ua sili atu ona faigata le lalolagi i ona po nei nai lo le 13 tausaga talu ai. Ua tele atu mea faalavefau ua faasalaveia ai o tatou alii talavou ma tamaitai talavou mai a latou sauniuniga mo se misiona ma se olaga fiafia i le lumanai. Ua matua faateleina le tekinolosi, ma e toetoe e tofu tagata uma ma masini feaveai, ia e mafai ai ona ‘apo maia le

gauai a le aiga o le Atua mo mealelei sili faapea foi mealeaga tele.

O le po nei ou te tautala atu i faifeautalagai o loo galulue i le taimi nei, o faifeautalagai i le lumanai, o faifeautalagai ua foi mai, ma alii talavou matutua uma o le Ekalesia. Ou te tatalo ia outou malamalama ma mafaufau ma loto atoa i mea o le a ou tautala atu ai ia te outou, a o outou faimalaga ai i nei tausaga sagisagi ma tausaga faigata foi o o outou olaga.

I le popofou o le Ekalesia, sa faatalanoaina e se Pulega Aoao ia faifeautalagai a o lei malaga atu ia latou misiona. O aso nei ua faatalanoaina outou e galulue o ni faifeautalagai, e o outou epikopo ma peresitene o siteki, ma o le toatele lava o outou o le a gasolo o outou olaga atoa e aunoa ma le faatalanoaina e se Pulega Aoao. Ua na o se ata lena o le tulaga moni o se ekalesia i le lalolagi atoa e silia ma le 15 miliona tagata. Ua ou iloa ou te tautala mo o’u uso, pe a ou fai atu ia te outou ua matou moomoo pe ana mafai e i matou, ona iloa patino outou uma ma mafai ona ta’u atu ia te outou matou te alolofa ia te outou ma e matou te lagolagoina outou.



O le mea e lelei ai, ua saunia e le Alii ia auala matou te aapa atu ai ia te outou. Mo se faataitaiga, o se uso o le Korama a le Toasefululua e tofia faifeautalai uma i lana misiona. E ui ina faia lenei mea e aunoa ma se faatalanoaga faafesagai, ae e soofaatasi le tekinolosi ma faaaliga e maua ai se potu masani lea e matua ofoofogia le maioio ma patino. Sei ou faamatala atu le ala e tupu ai lenei mea.

E oso mai i luga o le lau o le komepiuta lou ata, faatasi ai ma faamatalaga autu e aumai i lou epikopo ma le perezitene o le siteki. A oo mai la lou ata, matou te tilotilo i ou mata ma iloilo au tali i fesili o le talosaga a le faifeautalai. O lona taimi puupuu, e foliga mai o loo e nofo mai ma tali sa’o mai ia i matou.

A o matou tilotilo atu i lou ata, matou te talitonu ua e ausia i ona itu uma le “fua ua sii” o loo manaomia i le taimi nei e avea ai o se faifeautalai faamaoni, faamanuiaina. Ona matou tofia lea o oe e ala i le mana o le Agaga o le Alii ma i lalo o le taitaiga a Peresitene Thomas S. Monson, i se tasi o misiona e 406 a le Ekalesia i le salafa o le lalolagi.

Leai, e le tutusa ma se faatalanoaga patino, e faafesagai. Ae e lalata lava i ai.

O konafesi faavitio o se tasi lea o auala e fesoasoani ia i matou e fesootai atu i taitai o le Ekalesia ma tagata o le au paia o e paau mamao mai le laumua o le Ekalesia.

O le mafaufau i lona mea, ou te mana'o ai ia te outou na o loo sauniuni e faamisiona, i latou ua foi mai, ma outou uma talavou matutua, e faaalu ni nai minute faatasi ma au, faapea o lea e fai le tatou talatalanoaga patino faavitio i le taimi nei. Faamolemole tilotilo mai ia te au mo ni nai minute faapea e na o oe lava ma au i le potu, i soo se mea lava na e te i ai i le po nei.

O a’u, o le a ou manatu faapea o loo ou tilotilo atu i ou mata ma faalogologo ma le toto’a i au tali i nai fesili, ia ou te talitonu o le a ta’u mai ai ia te au ni mea se tele e uiga i le loloto o lau molimau, ma lou tuuto atu i le Atua. Afai e mafai ona ou toe faapuina mea sa ou tautala atu ai i faifeautalai i le 13 tausaga talu ai, o le mea ua tatou manaomia nei o le tupulaga silisili o talavou matutua i le talafaasolopito

o le Ekalesia. Ua matou manaomia lou loto atoa ma lou agaga atoa. Ua matou manaomia ni talavou matutua malo-losi, talitonu, ma naunautai o e iloa pe faapefea ona faalogo ma tali atu i musumusuga a le Agaga Paia a o outou asa atu i tofotofoga ma faaososoga o le avea ai ma se talavou, o le Au Paia o Aso e Gata Ai i le taimi nei.

I se isi faaupuga, ua oo i le taimi e sii ai le fua e le gata i faifeautalai ae faapea foi i faifeautalai ua foi mai, ma la outou tupulaga atoa. O le mea lea, faamolemole ia manatunatu loloto i lou loto ma tali mai i fesili nei:

1. Pe o e sailiili e le aunoa i tusitusiga paia?
2. Pe o e tootuli ma tatalo e talanoa atu ai i lou Tama Faalelagi i taeao ma po taitasi?
3. Pe o e anapogi ma foai atu i le taulaga anapogi i masina taitasi—tusa lava pe o oe o se tagata aoao o loo tauivi, e mativa, e le gafatia ona foai atu se tupe tele?
4. Pe o e mafaufau loloto e uiga i le Faaola ma Lana taulaga toggiola mo oe ina ua talosagaina oe e saunia, faamanuia, tufa, pe ai ma inu i le faamanatuga?
5. Pe o e auai i au fonotaga ma taumafai e tausia le paia o le aso Sapati?
6. Pe o e faamaoni i le fale, aoga, lotu, ma le galuega?
7. Pe o e mama faalemafaufau ma faaleagaga? Pe o e aloese mai le matamata i ponokalafi po o le tilotilo i uepisaita, mekasini, atatifaga, po o polokalama e aofia ai le Tinder ma le atapue o le Snapchat, ia e te maasiasi ai pe a vaai i ai ou matua, taitai o le Ekalesia, po o le Faaola lava Ia?
8. Pe o e faaeteete ea i ou taimi—aloese i tekinolosi ma faasalalaua faagafesootai e le talafeagai, e aofia



ai taaloga vitio, ia e mafai ona faa-pogisa ai lou nofouta faaleagaga?

9. E i ai ea se mea i lou olaga e manaomia ona e suia ma faaleleia, e amata atu i le po nei?

Faafetai atu mo lenei talanoaga patino puupuu. Ou te faamoemoe sa taliina nei fesili taitasi ma le faamaoni ma le mafaufau lelei i ai. Afai ua e iloa e i ai se tasi o nei mataupu faavae faigofie e te le o faia, ona ou uunaia lea o oe ia salamo ma le lototoa, ae ia e ola e tusa ai ma tulaga faatonuina o le talalelei o le avea ai ma soo amiotonu.

O lenei uso e, pe mafai ona ou tuuina atu ni nai fautuaga faaopoopo o le a fesoasoani tou te maua ai a outou molimau i le talalelei, ia oo ifo i o outou loto ma agaga?

Ou te faamanatu atu ia te outou faifeautalai ua foi mai, e ao lava ina faaaauu pea la outou tapenapenaga mo le olaga ma mo se aiga. O le “RM” e le o se “Ritaea Mamona”! O le avea ai o se faifeautalai ua foi mai, ia outou “auai ma le naunautai i se faamoemoega lelei, ma fai mea e tele i lo [outou] lava loto malie, ma aumai le amiotonu tele.”²

Faamolemole ia faaoga tomai sa outou aoaoina mai a outou misiona e faamanuia ai olaga o tagata o siomia ai outou i aso uma. Aua nei fetuuna’ia lau taulaiga mai le auuuna atu i isi i le taulai atu na o le aoga, galuega, po o gaioiga faaagafesootai. Ae, ia faapaleni lou olaga ma aafiaga faaleagaga ia e faamanatu ma saunia ai oe mo le auuunaga i aso taitasi mo isi.

I le taimi o a outou misiona sa outou aoaoina ai le taua o le asiasi atu i tagata i o latou fale. Ou te faamoemoe i o tatou talavou matutua uma, pe na faamisiona talai pe leai, ua malamalama i le taua o le asiasi atu i tagata ua tuuatoatasi, mama’i, pe ua lotovaivai—e le gata o se tiute ua tofia i ai ae ona o le



alofa moni foi ua ia te oe mo le Tama Faalelagi ma Ana fanau.

O outou o i aoga mauuluga o loo sauniuni mo misiona, ou te fautuaina outou ia auai i le seminare ma ia faauu mai ai. O outou talavou matutua ua tatau ona lesitala i se inisitituti o mataupu faalelotu.³ Afai o e a’oga i se aoga a le Ekalesia, ia e auai e le aunoa i se vasega o aoaoga faalelotu i semesa taitasi. I le taimi o lenei vaitau taua o sauniuniga mo se misiona, faaipoipoga e faavavau, ma le olaga o se tagata matua, e tatau ona e sailia pea lava pea auala e aoao ai ma tuputupu ae ai ma mauaina musumusuga ma le taiala e ala i le Agaga Paia. E mafai ona fesoasoani ia te oe mo lena sini se suesue toto’a ma le agaga tatalo i le talalelei e ala i le seminare, inisitituti, po o vasega faalelotu i aoga.

Pe o e aoga i aoga a le Ekalesia pe leai, pe o e alu i le iunivesite pe leai, aua lava nei e manatu ua e pisi tele e le mafai ai ona suesue i le talalelei. O le seminare, inisitituti, po o vasega faalelotu, o le a maua ai le paleni o lou olaga ma faaopoopo atu ai i le aotauina o oe i le poto salalau, e ala i le tuuina atu ia te oe o se isi avanoa e faaalu ai se taimi e suesue ai tusitusiga paia ma aoaoga a perofeta ma aposetolo. E fa

ia kosi fou lelei tele ou te fautuaina talavou matutua uma e maimoa i ai ma ia auai.⁴

Ma aua nei galo o vasega ma gaioiga o loo ofo atu i la outou inisitituti i le lotoifale, pe auala atu foi i le uarota a le autalavou matutua nofofua po o le siteki, o se nofoaga foi lena e mafai ai ona outou mafuta ai ma isi alii ma tamaitai talavou ma siitia ai ma musuia e le tasi le isi a o outou aoao ma tuputupu ae faaleagaga ma mafuta faaagafesootai ai. Uso e, afai e te tuu ese lau telefoni feaveai ae tilotilo solo teisi, atonu o le a e maua ai foi lau soa faavavau o le lumanai i le inisitituti.

Ua tata’i atu ai foi au i se isi fautuaga itiiti lea ou te talitonu ua outou iloa o le a ou talanoaina: Outou na talavou matutua nofofua ua manaomia ona tafafao faamasani ma faaipoipo. Faamolemole soia le faatuatuai! Ua ou iloa o nisi o outou e fefefe e amata se aiga. Peitai, afai e te faaipoipo i le tagata sa’o i le taimi sa’o ma i le nofoaga sa’o, e le tatau ona e fefe. O le mea moni, e tele faafitauli tou te feagai o le a aloese mai ai pe afai tou te “auai ma le naunautai” i tafaoga faamasani amiotonu, faamau, ma le faaipoipoga. Aua e te tasi i ai! Faaoga lou lava leo e faailoa atu ai oe lava i afafine amiotonu o le Atua o loo siomia ai outou. O le faalogoina moni o se leo o se tagata soifua, o le a te’i ai o ia—masalo ma fai mai ai ioe.

Ia, uso e, ou te molimau atu ia te outou e mafai e le Alii o Iesu Keriso ona fesoasoani ia i tatou e faaleleia soo se mea e manaomia ona faaleleia i o tatou olaga e ala i Lana taulaga toggiola.

O le afiafi nei, a o tatou sauniuni atu e faamanatu le Aso Sa o le Eseta a taeao, faamolemole mapu ane faatasi ma au, ia manatua le meaalofo o le toggiola a Keriso. Manatua e sili le silafia o oe e lo tatou Tama Faalelagi ma lo



Saunia e Elder Ulisses Soares
O Le Au Peresitene o Fitugafulu

tatou Faaola, o Iesu Keriso, ma e sili foi ona alolofa ia te oe.

E ala i le Togiola, na tauaveina ai e le Faaola lava Ia o tatou faaletonu, o tiga, ma agasala. Na afio mai le Faaola o le lalolagi ia malamalama ia i tatou taitoatasi e ala i le aafia i o tatou faamoemoega ua faataumaoia, o luitau, ma mala e ala i Ona mafatiaga i Ketesemane ma luga o le satauro.⁵ Sa maliu o Ia e ave a se faatinoga faai e tasi o le alofa mo i tatou ma sa tanumia i se tuugamau fou i lena po matautia.

I le taeao o le Aso Sa, sa toetu mai Iesu mai le oti—ma se folafolaga o le ola fou mo i tatou taitoatasi. Ona poloaiina lea e le Alii toetu Ona soo e aoao tagata uma ia faatuatua ia Keriso, ia salamo mai agasala, ia papatiso, ia maua le meaalofa o le Agaga Paia, ma ia tumau e oo i le iuga. Uso e, ua tatou iloa na faaali atu le Atua lo tatou Tama ma Lona Alo Pele i le Perofeta o Iosefa Samita ma toefuatai ai e ala atu ia te ia le atoaga o le talalelei e faavavau a Iesu Keriso.

Ia lototetele, uso e. Tausi i poloaiga a le Atua. Ua folafola mai e le Alii o Iesu Keriso o mea uma tatou te manao e fai i le amiotonu, o le a fai ia mo i tatou. O loo faalagolago atu taitai o le Ekalesia ia te outou. Matou te manao-mia outou uma taitoatasi o talavou matutua e sauniuni e faaipoipo, e au-auna atu, ma taitai i aso o i luma, ou te tatalo ai ma le faamaulalo i le suafa o lo tatou Alii o Iesu Keriso, amene. ■

FAAMATALAGA

1. M. Russell Ballard, “O Se Tupulaga Sili Ona Maoae o Faifeautalai,” *Liahona*, Nov. 2002, 47.
2. Mataupu Faavae ma Feagaiga 58:27.
3. Tagai i le tusi a le Au Peresitene Sili, 21 Aperila, 2011.
4. Tagai “New Religion Classes to Be Offered at Church Universities and Institutes of Religion,” [lds.org/topics/education/new-religion-classes](https://www.lds.org/topics/education/new-religion-classes).
5. Tagai Mosaea 3:5–13.

Ioe, Tatou Te Mafaia ma O Le A Tatou Manumalo!

E tataua ona tatou pipiimau mausali i a tatou molimau o le talalelei a lesu Keriso. Ona tatou manumalo ai lea i taua o aso uma e tetee atu ai i le tiapolo.

Uso pele, ua faalotomauualaloina au i le avanoa e lauga atu ai ia te outou, o e umia le perisitua a le Atua i le Ekalesia atoa i aso nei.

Na saunoa Peresitene Thomas S. Monson i se tasi taimi:

“E mafai ona ave le lalolagi i nisi taimi ma nofoaga taufaafefe e nonofo ai. O uiga mama o le lalolagi e foliga mai ua matuai faatoilaloina lava i se saosasaoa e faapopoleina ai. E leai ma se tasi—e laitiiti pe matua pe faaleogalua—e tuusaunoa mai le oo atu i na mea ia e i ai le malosiaga e tosoina ai i tatou i lalo ma faaumatia ai. . . .

“ . . . Ae le moomia ona tatou lotovai-vai. . . . O loo tatou tau ma le agasala. . . . O se taua tatou te mafaia ma o le a tatou manumalo ai. Ua tuuina mai e lo tatou Tama o i le Lagi ia auupega tatou te moomia e tau ai.”¹

O loo fetai ai i tatou uma, talavou ma matutua, i aso taitasi ma taua na ta’ua e Peresitene Monson. O loo taumafai le fili ma ana au e faafenumiai i tatou. O loo latou faamoemoega o le uunaia lea

o i tatou ina ia tatou o ese mai feagaiga na tatou osia ma le Alii, ua mafua ai ona tatou faagaloina lo tatou tofi e faavavau. Ua latou iloa lelei le fuafuaga a lo tatou Tama Faalelagi mo Lana fanau, aua sa latou i ai faatasi ma i tatou i lena Fono tele i le Lagi i le taimi na tuuina mai ai. Latou te taumafai e faaoga o tatou vai-vaiga ma faaletonu, ma faaseseina i tatou i “puao o le pogisa . . . , ia e faatauaso ai mata, ma faamaaa ai loto o le fanauga a tagata, ma taitai ese atu ai i latou i ala lautele, latou te fano ma sē ai.”²

E ui i feteenaiga o feagai ma i tatou, ae e pei ona aoao mai Peresitene Monson, o se taua lenei tatou te mafaia ma o le a tatou manumalo ai. E faatua-tuaina e le Alii lo tatou gafatia ma le naunautaiga e faia ai.

O loo i ai i tusitusiga paia ni faatai-taiga lemafaiaulia o e na manumalo i taua, e oo lava i le lololotoi o tulaga matua sauaina. O se tasi o nei faatai-taiga o Kapeteni Moronae i le Tusi a Mamona. O lenei alii talavou maoae na ia maua le lototele e puipui ai le



Au Pulega Aoao ma Taitai Aoao O Le Ekalesia a Iesu Keriso o le Au Paia o Aso e Gata Ai

O LE AU PERESITENE SILI



Henry B. Eyring
Fesoasoani Muamua



Thomas S. Monson
Peresitene



Dieter F. Uchtdorf
Fesoasoani Lua

O LE KORAMA A APOSETOLO E TOASEFULUUA




Boyd K. Pecker



L. Tom Perry



Russell M. Nelson



Dallin H. Oaks



M. Russell Ballard



Richard G. Scott




Robert D. Hales



Jeffrey R. Holland



David A. Bednar



Quentin L. Cook



Todd Christofferson



Neil L. Andersen

O LE AU PERESITENE O FITUGAFULU



Ronald A. Rasband



L. Whitney Clayton



Donald L. Hallstrom



Richard J. Maynes



Craig C. Christensen



Ulisses Soares



Lynn G. Robbins

O LE KORAMA MUAMUA A FITUGAFULU

(i le faasologa faaalafapeta)



Marcos A. Adukanlis



Jose L. Alonso



Ian S. Ardem



Mervyn B. Arnold



David S. Baxter



Shayne M. Bowen



Craig A. Candon



Yoon Hwan Choi



Kim B. Clark



Don R. Clarke



Carl B. Cook



Lawrence E. Cochrane



Wilford W. Andersen



Koichi Aogagi



Randall K. Bennett



Bruce A. Carlson



Claudio R. M. Costa



LeGrand R. Curtis Jr.



Benjamin De Hoyos



Edward Dube



Kevin R. Durcan



Larry J. Echo Hawk



Stanley G. Ellis



David F. Evans



Enrique R. Falabella



Eduardo Gavaret



Robert C. Gay



Carlos A. Godoy



J. Dean Comishi



Timothy J. Dydtes



Bradley D. Foster



Randy D. Turk



Christoffer Golden Jr.



Genit W. Gong



Walter F. Gonzalez



C. Scott Grow



James J. Hamub



Allen D. Haynie



Daniel L. Johnson



Paul V. Johnson



Patrick Keanon



Von G. Keetch



Jung Klebingat



Erich W. Kopschke



O. Vincent Haleck



Kevin S. Hamilton



Larry S. Katcher



Larry R. Lawrence



Hugo Montoya



Marcus B. Nash



S. Gifford Nielsen



Brent H. Nielson



Allan F. Packler



Kevin W. Pearson



Anthony D. Perkins



Paul B. Pieper



Rafael E. Pino



Bruce D. Porter



Dale G. Reiland



Michael T. Ringwood



Per G. Malm



Hugo E. Martinez



James B. Mattino



Jairo Mazzagardi



Joseph W. Slati



Steven E. Snow



Ven P. Stanfill



Michael John U. Teh



Jose A. Teixeira



Juan A. Uceda



Amilfo Valenzuela



Francisco J. Vinas



W. Christopher Waddell



Scott D. Whiting



Lynn G. Robbins



Kazuhiko Yamashita



Adrian Ochoa



Kent E. Richards



Gregory A. Schwizer



Terence M. Vinson

O LE AU EPIKOPO PULEFAAMALUMALU



Gerald Caussé
Fesoasoani Muamua
Pulefaamalumu




Gay E. Stevenson
Epioko
Pulefaamalumu



Dean M. Davies
Fesoasoani Lua



M. Joseph Brough
Fesoasoani Lua



Stephen W. Owen
Pelestere



Douglas D. Holmes
Fesoasoani Muamua



Mary K. Dufham
Fesoasoani Lua



Rosemary M. Nixon
Pelestere



Cheryl A. Eplin
Fesoasoani Muamua



Linda S. Reeves
Fesoasoani Lua




Jorge F. Zeballos



Claudio D. Zivic



W. Craig Zwick



Larry Y. Wilson

TAITAI AAOA

TAMAITAI TALAVOU



John S. Tanner
Fesoasoani Muamua



Tad R. Callister
Pelestere



Devin G. Durrant
Fesoasoani Lua



Carol F. McCorkle
Fesoasoani Muamua



Bonnie L. O'Carson
Pelestere



Nell F. Marriott
Fesoasoani Lua



Carole M. Stephens
Fesoasoani Muamua



Linda K. Burton
Pelestere



Linda S. Reeves
Fesoasoani Lua



Cheryl A. Eplin
Fesoasoani Muamua



Rosemary M. Nixon
Pelestere



Mary K. Dufham
Fesoasoani Lua



Douglas D. Holmes
Fesoasoani Muamua




Stephen W. Owen
Pelestere



M. Joseph Brough
Fesoasoani Lua

PERAIMERI

ALII TALAVOU



Ata mai le tauagavale pito i luga o tagata o le Ekalesia ma faifeautalai i McMinnville, Oregon, ISA; San Martín de Los Andes, Neuquén, Atenitina; Johannesburg, Aferika i Saute; Helsinki, Finelani; Natal, Rio Grande faia Norte, Pasila; Ciudad del Carmen, Campeche, Mekisiko; Perpignan, Farani; Montreal, Quebec, Kanata; Lonetona, Egelani.



upumoni i se taimi sa i ai le tele o fevaevaea'iga ma taua ia na lamatia ai le soifua o le malo atoa o sa Nifae. E ui sa atamai i le faataunuaina o ona tiute, ae sa lotomauualalo pea Moronae. O lea uiga ma isi uiga na avea ai o ia ma se meafaigaluega tulaga ese i aao o le Atua i lenei taimi. Na faamatala mai e le tusi a Alema e faapea, ana pei tagata uma o Moronae, “po ua luluina i lalo e faavavau mana o seoli; [ma] ua le maua e le tiapolo se mana i luga o loto o le fanauga a tagata.”³ O uiga auau mama uma o Moronae na pogai mai i lona faatuatua maoae i le Atua ma i le Alii o Iesu Keriso⁴ ma lona naunautaiga maumaututu ia mulimuli i le siufofoga o le Atua ma Ana perofeta.⁵

I se tulaga faafaatusa, e manaomia ona liua i tatou uma lava i ni Kapeteni Moronae o aso nei ina ia manumalo ai i taua e tetea atu i le tiapolo. Ou te iloa se tiakono talavou o le sa liua o ia lava i se Kapeteni Moronae o aso nei. E ui i lona naunau tele e saili atu e mulimuli i fautuaga a ona matua ma taitai o le Ekalesia, ae na tofotofoina lona faatuatua ma le naunautaiga i aso uma, e ui lava i lona talavou. Sa ia faamatala mai ia te au le faateia o ia i se tasi aso i se tulaga matua faigata ma lē toafimalie—sa matamata ana uo i ni ata mataga i a latou telefoni feaveai. I lenei taimi, sa manaomia ai ona filifili lenei alii talavou po o le a le mea e sili ona taua—lona lauiloa po o lana amiotonu. I ni nai sekone na sosoo ai, sa faatumulia o ia i le lototele ma tau atu i ana uo e le sa'o mea sa latou faia. E le gata i lea, sa ia tau atu ia i latou e tatau ona tuu le mea sa latou faia po o le avea o i latou ma pologa i ia mea. O le toatele o ana uo aoga na faatauemu i lana fautuaga, ma fai mai o se vaega lea o le olaga ma e leai se mea e leaga ai. Peitai, sa filo ai iina se tasi na faalogo i le fautuaga a lenei alii talavou ma filifili ai e tuu le mea sa ia faia.



O le faataitaiga a lenei tiakono sa i ai se faatosinaga lelei i se tasi o ana uo aoga. E le masalomia lava, le feagai ai o ia ma lana uo ma ulaga ma sauaga ona o lona faaiuga. I le isi itu, sa la mulimuli i apoapoaiga a Alema i lona nuu ina ua ia faapea atu, “Ia outou o ese mai i e amioleaga, ma ia outou tuese, ma aua nei pai atu ia latou mea le mama.”⁶

O loo i le tamaitusi *Mo le Malosi o le Autalavou* le fautuaga lenei, na faamaonia e le Au Peresitene Sili i le autalavou o le Ekalesia: “O lau matafaioi le faia o au filifiliga. E manatu tele mai le Atua ia te oe ma o le a fesoasoani ia te oe i le faia o filifiliga lelei, e tusa lava pe faaoga e lou aiga po o uo o latou faitalia i auala e le sa'o. Ia i ai lou lototoa a'ia'i e tu mausali ai e usiusitai i le finagalo o le Atua, e tusa lava pe e te tu na o oe. A o e faia lenei mea, ua e faia se faataitaiga mo isi e mulimuli ai.”⁷

O le a faaauau pea le taua o le lelei e tetea atu i le leaga i o tatou olaga atoa, talu ai o le faamoemoega o le fili o le faia o tagata uma ia pagatia e pei o ia lava. O le a taumafai Satani ma ana au e faafenunui o tatou mafaufauga ma puleaina e ala i le faaosoosoina o i tatou ia agasala. Afai latou te mafaia, o le a latou faaleagaina tagata lelei uma. Ae ui i lea, e taua le malamalama e na o le pau le tulaga latou te maua ai le mana e pulea ai i tatou pe afai lea tatou te faatagaina.

O loo i ai foi i tusitusiga paia le tele o faataitaiga o i latou o e na tuuina atu lenei faatagaga i le fili ma iu ai ina le

mautonu ma oo ai ina faaumatiaina e pei o Neoa, Korioa, ma Serema. E ao ona tatou nofouta i lenei tulaga matautia. E le mafai ona tatou faatagaina i tatou lava ia lē mautonu i savali lauiloa ia ua faigofie ona taliaina e le lalolagi ma ua feteenai ma le aoaoga faavae ma mataupu faavae moni o le talalelei a Iesu Keriso. O le tele lava o nei savali faalelalolagi e leai se mea e faatusa ai nai lo se taumafaiga o lo tatou lalolagi e tauamiotonuina le agasala. E ao ona tatou manatua, i le iuga lava, o le a tutu tagata uma i luma o Keriso “ina ia faamasinoina i a [latou] galuega, pe ua lelei, pe ua leaga.”⁸ Pe a tatou fetaiia ma nei savali faalelalolagi, o le a manaomia ai se lototoa tele ma se malamalama mausali o le fuafuaga a lo tatou Tama Faalelagi e filifili ai le mea sa'o.

E mafai e i tatou uma ona maua le malosi e filifili ai le sa'o pe a tatou saili le Alii ma tuu atu lo tatou talitonuga ma le faatuatua atoa ia te Ia. Ae, e pei ona aoa mai tusitusiga paia, e tatau ona tatou maua “le loto faamaoni” ma le “manatu moni.” Ona “faaali mai [lea e le Alii, i lona alofa mutimutivale e le iu] le moni” ia i tatou “i le mana o le Agaga Paia. Ma o le mana o le Agaga Paia e mafai ona [tatou] iloa ai le moni o mea uma lava.”⁹

O lenei malamalama lea e maua e ala i le Agaga Paia o la tatou molimau lava lea i mea uma, lea e faamalosi ai lo tatou faatuatua ma le naunautaiga e mulimuli i aoaoga o le talalelei toefuataiina i nei aso e gata ai, e tusa lava po o a savali lauiloa ua tatou faalogo i ai mai le lalolagi. E tatau ona avea la tatou molimau ma a tatou talita e puipuia i tatou mai ufanafana mu a le fili i ana taumafaiga e osofaia i tatou.¹⁰ O le a taialaina ai ma le saogalemu i tatou e la tatou molimau i taimi o le pogisa ma le le mautonu o loo i ai i le lalolagi i lenei vaitaimi.¹¹



Sa ou aoaoina lenei mataupu faavae a o ou auuana atu o se faifeautalai talavou. Sa ma auuana atu ma la'u soa i se paranesi laitiiti lava ma maotua o le Ekalesia. Sa ma taumafai e talanoa i tagata uma i le aai. Sa latou talia lelei i maua, ae sa latou fiafia e felafolafoai i tusitusiga paia ma fesiligia i maua mo ni faamaoniga mausali e faatatau i le moni o mea sa ma aoao atua.

Ou te manatua o taimi uma lava ma te taumafai ai ma la'u soa e faamaonia se mea i tagata, e aluese lava le Agaga o le Atua ma i ma'ua ma e ma te lagona lava le fenumiai atoa ma le le mautonu. Sa ma lagonaina le tatau ona matuai faaogatusaina a maua molimau ma

upumoni o le talalelei sa ma aoao atua. Na amata mai i lenei taimi, ou te manatua pe a ma tuuina atu se molimau ma o ma'ua lotu atoa, sa faatumulia le potu i se mana faamautinoa filemu, na oo mai mai le Agaga Paia, ma sa leai se avanoa mo se le mautonu po o se finauga. Sa ou iloa e le mafai e 'au a le fili ona faafenuniaia, faaseseina, pe faalavelaveina le mana o se molimau faamaoni a se soo moni o Iesu Keriso.

E pei ona aoao mai le Faaola Lava Ia, e manao le fili ia lulu ia i tatou e pei o saito, ma aveesea ai lo tatou tomai e faatosinaina le lalolagi mo le lelei.¹²

Ou uso pele, talu ai o loo faasalalauina atu i le lalolagi atoa ia galu o

le le mautonu ma masalosologa i lenei vai taimi, e tatau ona tatou pipiimau mausali i a tatou molimau o le talalelei a Iesu Keriso. Ona matua faateleina ai lea o lo tatou tomai e puipuia le upumoni ma le faamasinotonu. O le a tatou manumalo i taua o aso uma e tetee atu i le tiapolo, ma nai lo le faatoilaloina e luitau o le olaga, o le a tatou faataunauina isi e ola i tulaga faatonuina a le Matai.

Ou te valaaulia tagata uma ina ia saili le saogalemu i aoaoga o loo maua i tusitusiga paia. Na faaogatusa e Kapeteni Moronae lona faatuatua i le Atua ma lana molimau e uiga i le upumoni ma le malamalama ma le atamai o loo maua i tusitusiga paia. O lenei auuala sa ia talitonu ai o le a ia maua faamanuiaga a le Alii ma o le a maua ni manumalo se tele, ma o le mea moni lava lenei na tupu.

Ou te valaaulia tagata uma ina ia saili le saogalemu i upu atamamai a o tatou perofeta o i ai nei. Na saunoa Peresitene Thomas S. Monson: "O i tatou o e ua faauuina i le perisitua a le Atua e mafai ona faia se eseese. A tatou faatumauiina lo tatou mama faaletagata lava ia ma faamamalu lo tatou perisitua, e avee i tatou ma faatatauamiotonu mo isi e mulimuli i ai . . . [ma] fesoasoani e faamalalamaina se lalolagi ua faateleina le pogisa."¹³

Ou te valaaulia tagata uma ina ia faalagolago i le alofa mutimutivale ma le mana o le Togiola a Iesu Keriso. E ala atu i Lana taulaga togiola, ua mafai ai ona tatou maua le lototele e manumalo ai i taua o o tatou aso, e oo lava i le lotolotoi o o tatou faigata, luitau, ma faaososoga. Ia tatou faalagolago i Lona alofa ma le mana e laveai ai i tatou. Na fetalai mai Keriso Lava Ia:

"O A'u nei le ala, ma le upu moni, ma le ola; e le alu atu lava se tasi i le Tama, pe a le ui mai ia te au."¹⁴



Saunia e Larry M. Gibson

Fesoasoani Muamua i le Au Peresitene Aoao o Alii Talavou

“O A’u nei o le malamalama o le lalolagi; o le mulimuli mai ia te au, e le savali o ia i le pouliuli, a e ia te ia le malamalama o le ola.”¹⁵

“Ua Ou fai atu nei mea ia te outou, ina ia outou maua le manuia ia te au; e maua foi outou e le puapuaga i le lalolagi, a ia outou loto tetele, ua ou manumalo i le lalolagi.”¹⁶

Ou te molimau atu ai i nei upumoni i le suafa paia o Iesu Keriso, amene. ■

FAAMATALAGA

1. Thomas S. Monson, “Toe Tēpa i Tua ma Agai i Luma,” *Liahona*, Me 2008, 90.
2. 1 Nifae 12:17.
3. Alema 48:17.
4. Tagai Alema 48:13.
5. Tagai Alema 43:23–24; 48:16.
6. Alema 5:57.
7. *Mo le Malosi o le Autalavou* (tamaitusi, 2011), 2.
8. Tagai 3 Nifae 27:14.
9. Moronae 10:4–5.
10. Tagai Efeso 6:16; Mataupu Faavae ma Feagaiga 27:17.
11. Tagai Faaaliga 12:11.
12. Tagai Luka 22:31–32.
13. Thomas S. Monson, “Taialaina ma le Saogalemu i le Aiga,” *Liahona*, Nov. 2014, 68.
14. Ioane 14:6.
15. Ioane 8:12.
16. Ioane 16:33.

Tulaga Faaletama— O Lo Tatou Taunuuga e Faavavau

Tau ina ia taitasi i tatou ma fiafia i le atoaga o faamanuiaga a le Tama i lenei olaga ma le faataunuaina o Lana galuega ma Lona mamalu i le avea ai ma tama mo le faavavau.

Sa aoaina a’u e lou tama i se lesona taua a o ou talavou. Sa ia iloina na amata ona ou fiafia i mea faaletino. A ou maua ni tupe, ou te faaalaina i le taimi lava lena—e toetoe lava i taimi uma ia te au lava ia.

I se tasi aoauli sa ia ave au e faatau ni seevae fou. I le fogafale lona lua

o le faleoloa, sa ia valaaulia au e autilo atu i fafo o le faamalama ma ia.

“O le a le mea o e vaaia?” o lana fesili lea.

“O fale, o le lagi, ma tagata” o lau tali lea.

“E fia?”

“E tele!”

Ona ia aumaia lea i fafo mai lana taga le tupe siliva lenei. A o ia tuuina mai ia te au, sa ia fesili mai, “O le a le mea lea?”

Sa vave ona ou iloa: “O se tala siliva!”

I le faaogaina o lona atamai faakemisi, sa ia faapea mai ai, “Afai e te faaliusuavaiaina lena tala siliva ma tuu-faatasi i ai elemene sa’o, o le a e maua ai se niterate siliva. Afai ta te kavaina lenei faamalama i le niterate siliva, o le a le mea e te vaaia?”

Sa ou le malamalama, o lea sa ia taitai atu ai au i se faaata atoa ma fesili mai, “O le a la se mea o e vaai atu nei i ai?”



“Afai e te taulai atu i le siliva,” o le tali mai lea a lōu tama, “na o le pau le mea e te vaaia o oe lava, ma o le a taofia oe mai le vaai manino atu i le taunuuga e faavavau ua saunia e le Tama Faalelagi mo na o oe.”

“Ua ou vaai ia te a’u.”

“Leai,” o lana tali mai, “o le mea ua e vaaia o le siliva o loo i ai lou ata. Afai e te taulai atu i le siliva, na o le pau le mea e te vaaia o oe lava, ma e pei o se veli, o le a taofia oe mai le vaai manino atu i le taunuuga e faavavau ua saunia e le Tama Faalelagi mo na o oe.”

“Larry,” na ia faaauau ai, “aua nei saili i mea o lenei lalolagi a ia outou . . . muai . . . saili le malo o le Atua ma [Lana] amiotonu; ona faaopoopoina atu lea o ia mea uma ia te outou” (Faaliliuga a Iosefa Samita, Mataio 6:38 [i le Mataio 6:33, vaefaamatalaga a]).

Sa ia tau mai ia te au e taofi le tälä ma aua lava ne’i leiloa. O taimi taitasi ou te tilotilo i ai, sa ou mafaufau ai pea i le taunuuga e faavavau o i ai i le Tama Faalelagi mo au.

Ou te alofa i lo’u tama ma le ala na ia aoao mai ai. Sa ou manao e avea e pei o ia. Sa ia totō i lo’u loto le manao ia avea ma se tama lelei, ma o lo’u faamoemoega silisili ia ou ola e tusa ai ma ana faaitaiga.

E masani ona saunoa mai Peresitene Thomas S. Monson e faapea, o a tatou faaiuga e iloa ai lo tatou taunuuga ma maua ai taunuuga e faavavau (tagai i le “Decisions Determine Destiny” [Faesaite a le Ofisa o Aoga a le Ekalesia, Nov. 6, 2005], 2; lds.org/broadcasts).

Pe le tatau ea la ona tatou atiina ae se vaaiga manino o lo tatou *taunuuga e faavavau*, aemaise lava i mea e finagalo le Tama Faalelagi ia tatou ausia—o tulaga faaletama e faavavau? Ia avea lo tatou *taunuuga e faavavau* ma faatumutumuga o a tatou faaiuga *uma*. E tusa lava po o le a le faigata e ono i ai nā faaiuga, o le a lagolagoina lava i tatou e le Tama.

Sa ou aoao e uiga i le mana o se vaaiga mamao faapena ina ua ou faatasi atu i lou atalii e 12- ma le 13-tausaga-mo se tauvaga 50/20. O le 50/20 e aofia ai le savavali mo le 50 maila (80 km) ia itiiti ifo ma le 20 itula. Sa matou amata i le 9:00 i le po ma savavali i lenei po atoa ma le tele o le taimi o le aso na sosoo

ai. Sa avea o se 19 itula faigata, ae sa faamanuiaina i matou.

I le taimi na toe foi ai i le aiga, sa matou tolotolo atu i totonu o le fale, lea sa saunia ai e se āvā ma se tina lelei se ‘aiga matagofie o le afiafi, lea sa matou le’i aai ai. Sa matapogia lou atalii, sa matua vaivai, i luga o le nofoa, a o tolotolo atu lou atalii matua i le fogafale i lalo i lona potumoe.

I le maea ai o ni malologa tiga mo au lava, sa ou alu atu i lou atalii laitiiti ina ia mautinoa o loo ola pea o ia.

“O a mai oe?” o lau fesili lea.

“Tama, o le mea aupito sili lenei ona faigata ua ou faia, ma ou te le toe manao e fai.”

Sa tuu ou te le tauina atu ia te ia ou te le toe faia foi. Ae, sa ou tau atu ia te ia lou mitamita tele i lona ausiaina o se mea faigata faapena. Sa ou iloa o le a saunia ai o ia mo isi mea faigata e fetai ai ma ia i le lumanai. Faatasi ai ma lenei manatu, sa ou fai atu, “Atalii, lea laa ou faia atua le folafolaga lenei. A e alu i lau misiona, e te le manaomia ona savali mo le 50 maila i le aso e tasi.”

“Lelei Tama! O le a ou alu la.”

O na upu faigofie na faatumulia ai lo’u agaga i le faafetai ma le olioli.

Ona ou alu lea i le fogafale i lalo i lo’u atalii matua. Sa ou taoto i ona autafa—ona pai atu lea ia te ia. “Atalii, o lelei mea uma ia te oe?”

“Tama, o se mea aupito sili ona faigata lenei mea ua ou faia i lou olaga, ma ou te le toe faia lava.” Na moeiini ona mata—ona pupula lea—ma ia faapea mai, “Sei vagana ua manao lo’u atalii ia ou faia.”

Sa ou tagi a o ou tauina atu lou faafetai tele mo ia. Sa ou tau atu ia te ia ou te iloa o le a avea o ia ma se tamā sili atu ona lelei nai lo au. Sa tumu lo’u loto i le olioli ona o lona talavou ma le mu’a ae ua uma ona ia iloina o se tasi o ona tiute sili ona paia faaleperisitua



o le avea lea ma se tamā. Sa leai sona fefe i lena matafaioi ma faalagiga—le faalagiga tonu lava lea e finagalo le Atua Lava Ia tatou te faaogaina pe a tatou talanoa ma Ia. Sa ou iloa sa ia te au le tiutetauave e faafailele ai manaoga o tulaga faaletama ia sa mumu i totonu o le loto o lo’u atalii.

O fetalaiga nei a le Faaola sa i ai se faauigaga loloto atu ia te au i le avea ai o se tama:

“E le mafai e le Atalii ona fai o se mea, na o ia lava; a o mea na te vaai atu i le Tama o faia: o [mea foi e faia e Ia], o loo faia foi ia lava mea e le Atalii” (Ioane 5:19).

“Ou te le faia fua foi se mea; ae peitai, faapei ona a’oa’o mai e lou Tamā ia te au” (Ioane 8:28).

Ou te fiafia i le avea ai o se tane ma se tamā—ua faaipoipo i se afafine filifilia a ni matua faalelagi. Ou te alofa ia te ia. O se tasi lea o vaega faamalieina o lo’u olaga. O lo’u faamoemoega i lena po ia vaaia e le aunoa e o’u atalii e toailima ma le latou tuafafine le olioli o loo ia te au lea e sau mai le faaipoipoga e faavavau, tulaga faaletama, ma le aiga.

Tama, ou te mautinoa ua outou faalogo i le faaupuga “Talai atu le talalelei i taimi uma, ma pe a talafeagai ai ia faaoga upu” (faamamaluina o Francis o Assisi). O loo e aoaoina lau fanau i aso uma i le uiga o le avea ma se tama. O loo e faataaiaina se faavae mo le isi augatupulaga e sosoo ai. O le a aoao e ou atalii le auala e avea ai ma tane ma ava e ala i le matauina o le auala e te faataunuina ai nei matafaioi. Mo se faataitaiga:

O latou iloaia le tele o lou alofa ma le faamemelo i lo latou tina ma le tele o lou fiafia e avea ma o latou tama?

O le a latou aoao le auala e taulimaina ai a latou ava ma fanau i le lumanai a o latou matamata atu ia te oe i lou taulimaina o i *latou taitoatasi* e pei ona faia e le Tama Faalelagi.



E ala i au faataitaiga, e mafai ona latou aoao ai le auala e faaaloalo ai, faamamalu ai, ma puipua ai le tulaga faatamaitai.

I le tou aiga, e mafai ona latou aoao e pulefaamalumu i o latou aiga i le alofa ma le amiotonu. E mafai ona latou aoao e tuuina atu mea e manaomia o le olaga ma le puipuiga mo o latou aiga—i le faaletino ma le faaleagaga (tagai i le “O Le Aiga: O Se Folafolaga i le Lalolagi,” *Liahona*, Nov. 2010, 129).

Uso e, faatasi ai ma le malosi uma o lou agaga, ou te talosagaina outou e toe mafaufau i lenei fesili: Pe o vaaia e o outou atalii o outou taumafai e faia le mea ua finagalo le Tama Faalelagi ia *latou* faia?

Ou te tatalo o le tali o le ioe. Afai o le tali e leai, e le o tuai tele ona suia, ae e tataua ona e amata i le asō. Ou te molimau atu o le a fesoasoani le Tama Faalelagi ia te oe.

Ia alii talavou, o e ou te alofa faapelepele i ai, ua outou iloa o loo outou sauniuni e mauaina le Perisitua Mekisateko, maua sauniga paia o le malumalu, faataunuua la outou *tiute* ma le *matafaioi* e auauna atu i se misi-ona faamamaluina, ma, e aunoa ma le faatalitali i se taimi umi tele, faaipoipo i le malumalu i se afafine o le Atua ma faia se aiga. Ona e taitaia lea o lou aiga

i mea faaleagaga a pei ona taitaia e le Agaga Paia (tagai MF&F 20:44; 46:2; 107:12).

Sa ou fesili atu i le toatele o alii talavou i le salafa o le lalolagi, “Aisea ua outou i ai iinei?”

E oo mai i le taimi lenei, e leai se tasi ua tali mai, “Ina ia aoao e avea o se tama, ia mafai ona ou saunia ma agavaa e maua mea uma ua i ai i le Tama Faalelagi.”

Sei o tatou iloiloia *ou* tiute o le Perisitua Arona e pei ona faamatalaina i le vaega e 20 o le Mataupu Faavae ma Feagaiga. Ia faaeteete i mea *tou te* lagonaina a o o’u faaogaina nei tiute i a outou auaunaga i o outou aiga.

“Valaau atu i tagata uma [o lou aiga] e o mai ia Keriso” (fuaiupu e 59).

“Leoleo i [latou] e le aunoa, ma faatasi ma faamalosi i latou” (fuaiupu e 53).

“Talai atu, aoao atu, faamalalalama atu, apoapoai atu, ma papatiso atu” i tagata o lou aiga (fuaiupu e 46).

“Apoapoai atu ia te i latou ia tatalo atu ma le leo ma i le mea lilo ma faasaga atu i tiute uma faaleaiga” (fuaiupu e 47).

“Vaai ia leai se amioletonu i totonu o [lou aiga], po o se feitagai ma le tasi, po o se pepelo, faatuaupua, po o se tautala leaga” (fuaiupu e 54).

“Vaai ia potopoto faatasi soo [lou aiga]” (fuaiupu e 55).



Saunia e Perisitene Dieter F. Uchtdorf

Fesoasoani Lua i le Au Perisitene Sili

Fesoasoani i lou tama i ona tiute faapeteriaka. Lagolago lou tina i le malosi o le perisitua pe a le o i ai se tama (tagai i fuaiupu e 52, 56).

A talosagaina, “faauu isi ositaulaga, aoao, ma tiakono” o i lou aiga (fuaiupu e 48).

Pe le faapenei ea *le galuega ma le matafaioi o se tama?*

O le faataunuuna o o outou tiute o le Perisitua Arona o le sauniaina lea o outou alii talavou mo le *tulaga faaletama*. O le punaoa o le *Tiute o le Atua* e mafai ona fesoasoani ia te outou e aoao ai ma faia fuafuaga patino e faataunuu ai tou tiute. E mafai ona avea ma se taiala ma se fesoasoaniga a o e saili i le finagalo o le Tama Faalelagi ma faatutu ni sini ina ia ausiaina.

Ua aumaia outou e le Tama oi le Lagi iinei i lenei taimi faapitoa mo se galuega taua ma se faamoemoega e faavavau. E finagalo o Ia ia e vaai manino ma malamalama po o le a lena faamoemoega. O Ia o lou Tama, ma e mafai ona e lilii atu i taimi uma ia te Ia mo le taitaiga.

Ou te iloa e popole le Tama Faalelagi mo i tatou taitoatasi ma e i ai se fuafuaga patino mo i tatou ina ia ausia ai lo tatou taunuuga e faavavau. Ua Ia auina mai Lona Alo Pele e Toatasi, o Iesu Keriso, ina ia fesoasoani ia i tatou e faatoilalo o tatou lē atoatoa e ala i le Togiola. Ua Ia faamanuiaina i tatou i le Agaga Paia e avea ma molimau, soa, ma taiala *i lo tatou taunuuga e faavavau* pe afai tatou te faalagolago atu ia te Ia. Tau ina ia taitasi i tatou ma fiafia i le atoaga o faamanuiaga a le Tama i lenei olaga ma le faataunuuna o *Lana galuega ma Lona mamalu* i le avea ai ma tamā i o tatou aiga mo le faavavau (tagai i le Mose 1:39). I le suafa o Iesu Keriso, amene. ■

E Faatatau i le Faamaoni

Ou te tatalo o le a tatou tetea atu i le faaosoosoga o le fiamata-muamua ae, ia tauivi mo se mamalu sili atu: ia avea ma ni soo lotomauualalo ma faamaoni o lo tatou Alii ma le Faaola, o Iesu Keriso.

le faatausiusiuga o le seneturi 18, sa faasilasila mai ai e Katerina le Sili o Rusia o le a ia malaga taamilo i le itu i saute o lona malo, ma faafeao atu e ni amapasa o isi malo. O le kovana o lea eria, o Kelekolio Potemikini, na matuai manao lava ia faafiafiaina nei tagata asi-asi. Ma o lea sa ia faia ai ni taumafaiga tulaga ese e faaali atu ai mea na ausia e le atunuu.

Mo se vaega o le malaga, sa faaopeopea atu ai Katerina i lalo i le Vaitafe o Dnieper, ma faasino atu ma le mitamita i amapasa ia tamai nuu lauusiisi i luga o auvai, na faatumulia i tagata galulue

malolosi ma fiafia o le aai. Ae na o le tasi lava le faafitauli: sa na o se atavali o mea faafoliga. Fai mai sa tuufaatasia e Potemikini ni faleoloa ma ni fale pepelo sa faia mai ni pepa malō tetele. Sa ia tuu ai foi iina ni faifaatoaga sa pisi solo ma galulue ina ia faafoliga mai i se vaaiga o se tamaoiga uluola. O le taimi lava e pasi ese atu ai le vaega lea i le pi’oga o le vaitafe, e teu uma e le vaega a Potemikini ata o nuu pepelo nei ma faananati atu i le isi ituvai e saunia ai le isi nuu mo le oo atu i ai o le isi maimoaga a Katerina.

E ui o loo fesiligia e tusitala faasolo-pito o aso nei le moni o lenei tala, ae o le faaupuga “nuu FaaPotemikini” ua i ai i le vaogagana a le lalolagi. Ua faasino atu nei i soo se taumafaiga ia faatali-tonu isi ua sili atu lo tatou lelei nai lo le lelei moni o loo tatou i ai.

O Sa’o Ea Faamoemoega o o Tatou Loto?

O se vaega o le natura faaletagata le manao ina ia tatou foliga i se tagata sili ona lelei. O le mafuaaga lena e toatele ai i tatou e matua galulue malolosi i fafo o o tatou fale, ma o le mafuaaga lena e matua selu faamomoe ai ulu o le au Perisitua Arona talavou, ina ne’i fetaii faafuasei ma lena tamaitai lalelei. E leai ma se mea e leaga ai le faaiilaina



o o tatou seevae, ma tatou manogi manaia, pe nana foi ipu palapala pe a taunuu atu faiaoga o aiga. Peitai, a soona fai, o lenei manao e faafiafia [le isi tagata] e mafai ona see mai se mea aogā i se mea taufaasese.

O loo alaga pea e perofeta a le Alii se leo o le lapataiga e faasaga ia i latou o e “ua faalatalata [atu i le Alii] i o latou gutu, ma latou vivii [atu ia te Ia] i o latou laugutu, a ua mamao lava o latou loto [mai ia te Ia].”¹

Sa malamalama ma agaalofa le Faaola i tagata agasala o o latou loto sa faamaualalo ma faamaoni. Ae sa ia tali atu i le ita amiotonu e faasaga i tagata pepelo e pei o tusiupu, au Faresaio, ma le au Satukaio—O e sa taumafai e faafoliga amiotonu ina ia maua ai viiga, faatosinaga, ma le oa o le lalolagi, ae i le taimi lava e tasi, sa faasoesa ai i tagata e tatau ona latou mauaina faamanu-iaga. Sa faatusatusa e le Faaola i latou i “tuugamau ua faasinasinaina, o loo matagofie i fafo, a o totonu ua tutumu i ivi o tagata oti, ma mea leaga uma.”²

I o tatou aso, ua fetalai foi le Alii i ni upu malolosi foi tai faapenei i e umia le perisitua o loo taumafai e “ufiufi a [latou] agasala, pe faamalie lo [latou] faamaualuga, [po o lo latou] fialauiloa lē aoga.” A latou faia lea mea, sa Ia fetalai, “e aveese e le lagi i latou lava; e faanoanoa le Agaga o le Alii; ma a aveesea, Amene i le perisitua po o le pule a lena tagata.”³

Aisea ua tupu ai lea mea? Aisea tatou te taumafai ai i nisi taimi e faafoliga mai e toaaga, uluola, ma tuuto atu i vaaiga i fafo ae o totonu lava ia—e pei ona fai mai le Talifaaaliga e uiga ia Efeso—ua tatou “tuua [lo tatou] uluai alofa?”⁴

I nisi tulaga, atonu ua faigofie lava ona le toe i ai so tatou taulaiga i le ute o le talalelei, ua avesese ai le “ituaiga o le amioatua: mo le “mana ua i ai i lea mea.”⁵ E faapitoa le lamatia o lea mea



pe a tatou faataulai atu o tatou lagona o i fafo o le aveva ma soo, e faafiafia ai isi ina ia maua mai ai ni mea pe tosina mai ai. O le taimi la lena e lamatia ai loa i tatou i le amio ai pei o ni Faresaio, ae o le taimi lava lenei e suesue ai o tatou loto ia faia loa ni suiga manaomia.

Polokalama FaaPotemikini

O lenei faaosoosoga ina ia foliga mai tatou te lelei atu i lo le mea o tatou i ai, ua le gata ina maua i o tatou lava olaga patino ae e mafai foi ona maua i tofiga a le Ekalesia.

Mo se faataitaiga, ou te iloa se siteki o loo faatutu ai e taitai ni sini naunautai mo le tausaga. E ui e foliga e taua uma sini, ae, a le o taulai atu i latou i tautinoga mauululuga ma faagaetia, ia po o taulai atu i latou i fuainumera ma pasene.

Ina ua uma ona talanoaina nei sini ma malilie i ai, sa i ai se mea na amata ona popole i ai le peresitene o le siteki. Sa ia mafaufau i tagata o lana siteki—e pei o le tina talavou ma lana fanau laiti lea e lei leva ona maliu atu lana tane. Sa ia mafaufau i tagata o loo tauivi ma masalosologa po o le tuuatoatasi po o ni tulaga ogaoga o le soifua maloloina ma le leai o se inisiua. Sa ia mafaufau i tagata o loo feagai ma faaipoipoga malepelepe, mea ua fai ma vaisu, leai ni galuega, ma ma’i o le mafaufau. Ma o le faatele lava ina mafaufau i nei tagata, o le faateleina foi lena o lona fesiligia o ia lava i se fesili faamaualalo: pe o le a faia ea e a matou sini fou se eseesea i olaga o nei tagata?

Sa amata ona ia tuufesili pe faamata e faape’i se eseesea i a latou sini a le siteki pe ana latou fesili muamua, “O le a la tatou galuega?”

O lea sa toe foi atu ai lenei peresitene o le siteki i lana aufono, ma latou fetuunaia faatasi ai la latou taulaiga. Sa latou naunau ia latou lē faatagaina lava “e ua fia aai, . . . e ua matitiva, . . . e ua le lavalavā, e ua mamai ma puapua-gatia e ui ane i o [latou] tafatafa, ma [latou] le amanaiaina i latou.”⁶

Sa latou toe faatutuina ni sini fou, ma le iloina o le tulaga manuia o nei sini fou e le mafai ona fuatiaina i taimi uma e tagata—aua e faapefea ona fuatiaina e se tasi se molimau patino, le alofa o le Atua, po o le agaalofa mo isi?

Ae sa latou iloina foi o le “tele o mea e mafai ona e faitauina, e lē taua. O le tele o mea e le mafai ona e faitauina, e taua moni lava.”⁷

Ou te mafaufau pe o a tatou sini faalefaalapotopotoga ma faaletagata lava ia i nisi taimi o ni faataitaiga faaonapo nei ia o se nuu FaaPotemikini. Pe foliga matagofie mai i se mea mamao ae e le o mafai ona taulimaina ai manaoga moni o o tatou uso a tagata pele?

Au uo pele ma ou uso o loo umia le perisitua, afai e alala faatasi Iesu ma i tatou ma fesili mai mo se tala o mea o loo tatou tausua, ou te le mautinoa o le a taulai tele atu o Ia i polokalama ma fuainumera. O le mea e finagalo le Faaola ia silafia o le tulaga o o tatou loto. O le a finagalo o Ia ia silafia le auala tatou te alolofa atu ai ma auauna atu ia i latou o loo tatou tausua, le auala tatou te faaali



Natal, Rio Grande do Norte, Pasila

atu ai lo tatou alolofa i o tatou taitoalua ma aiga, ma le auala tatou te faamā-māina ai a latou avega i aso uma. Ma e finagalo le Faaola ia silafia pe o faapefea ona tatou faalatalata atili atu ia te Ia ma lo tatou Tama Faalelagi.

Aisea Ua Tatou i ai linei?

Atonu e sili atu pe a sailiili o tatou lava loto. Mo se faataitaiga, e mafai ona tatou fesiligia i tatou lava, pe aisea tatou te auauna atu ai i le Ekalesia a Iesu Keriso?

E mafai foi ona tatou fesili pe aisea ua tatou i ai iinei i lenei sauniga i le asō?

Ou te manatu afai ou te taliina lena fesili i se tulaga papa'u, e mafai ona ou faapea atu ua ou i ai iinei ona na tofia au e Peresitene Monson e lauga.

O lea e leai ai sa'u filifiliga e faia.

Ma le isi, ua faamoemoeina au e lo'u toalua, o lē ou te alofa tele i ai, ia ou auai. E faapefea la ona ou fai atu ia te ia e leai?

Ae ua tatou iloa uma o loo i ai ni mafuaaga sili atu mo le auai ai i a tatou sauniga ma tatou ola i ni olaga o ni soo tuuto o Iesu Keriso.

Ua ou i ai iinei ona ou te manao ia mulimuli atu ma lo'u loto atoa i lo'u Matai, o Iesu Keriso. Ua ou gauai atu

ia faia mea uma Na te faatonu ai au i lenei galuega tele. Ua ou galala ma fiaai ina ia faagaetiaina e le Agaga Paia ma faalogo i le siufofoga o le Atua a o Ia fetalai mai e ala mai i Ana auauna faauuina. Ua ou i ai iinei ina ia ave ma se alii lelei atu, ina ia siitiaina e faataitaiga musuia a ou uso ma tuafafine ia Keriso, ma ia aoao i le auala ia auauna atu ai ma le mataalia atili ia i latou o e le tagolima.

I se aotelega, ua ou i ai iinei ona ou te alofa i lou Tama Faalelagi ma Lona Alo, o Iesu Keriso.

Ou te mautinoa o le tou mafuaaga foi lea. O le mafuaaga lea ua tatou nau-nau ai ia faia ni osigataulaga ae le na o ni tautinoga ia mulimuli i le Faaola. O le mafuaaga lenei tatou te tauaveina ai ma le mamalu Lana perisitua paia.

Mai se Aloiafi i se Afi Tele

Pe o uluola ma maloloina lau moli-mau pe o au gaoioiga i le Ekalesia ua foliga atili mai i se nuu FaaPotemikini, o le tala fiafia, e mafai lava ona e fausia i luga o soo se malosi o e mauaina. O i i le Ekalesia a Iesu Keriso e mafai ona e matua ai faaleagaga ma latalata atili atu ai i le Faaola e ala i le *faaogaina* o mataupu faavae o le talalelei *i aso uma*.

Faatasi ai ma le onosai ma le faapa-lepale, e oo lava i ni nai faatinoga iti o le ave ma soo po o sina vaega itiiti lava o le talitonu e mafai lava ona ave ma se afi tele e musaesae o se olaga faapaiaina. O le mea moni, o le auala lena e amata ai le tele o afi tetele—na o sina aloiafi lava.

O lea afai e te lagonaina le faa-tauvaa ma le vaivai, faamolemole tau lava o lou sau ia Keriso, le na te faia mea vaivai e ave ma mea malolosi.⁸ O lē sili ona vaivai o i tatou, e ala i le alofatunoa o le Atua, e mafai ai ona e malosi faaleagaga, ona “e faailogaina tagata”⁹ e le Atua. O Ia o lo tatou “Atua faamaoni, o le na te tausi i le feagaiga atoa ma le alofa i e alolofa atu ia te ia ma tausi i ana poloaiga.”¹⁰

O lo'u talitonuga maumaututu, afai e mafai ona aapa atu le Atua ma tausi se tagata sulufa'i Siamani mativa mai se aiga faatauvaa i se atunuu na masofa i le taua e mamao lava mai le laumua o le Ekalesia, e mafai foi ona aapa atu o Ia ia te oe.

Ou uso pele ia Keriso, o le Atua o le Foafoaga, le na manavaina le ola i le lalolagi, e mautinoa lava o loo i ai le mana e manava atu ai le ola ia te outou. E mautinoa lava e mafai ona Ia faia oe e

avea ma se tagata faaleagaga faamaoni o le malamalama ma le upumoni o loo e manao ia avea ai oe.

E mautinoa ma mausali lava folafolaga a le Atua. E mafai ona faamagaloina i tatou i a tatou agasala ma faamamaina mai le amioletonu uma.¹¹ Afai e faaauu pea ona tatou taliaina ma ola i mataupu faavae moni i o tatou tulaga faaletagata lava ia ma i totonu o o tatou aiga, o le a iu lava ina tatou taunuu atu i se vaega tatou te “le toe fia aai, e le toe fia inu foi. . . . Aua o le Tamai mamoe o loo i luma o le nofoalii na te fafaga ia i [tatou] ma taitai ia te i [tatou] i puna o vai ola; e soloieseina foi e le Atua o loimata uma nai o [tatou] mata.”¹²

O Le Ekalesia o Se Nofoga o le Faamalologa, Ae Le o Se Lafitaga

Ae e le mafai ona tupu lenei mea pe afai tatou te lalafi i tua o foliga taufaasese faaletagata, faalelotu, po o faalapotopotoga. O soo faafoliga faapena e le gata e taofia i tatou mai le iloaina o i tatou lava ia i tagata moni o loo avea ai i tatou, ae e taofia ai foi i tatou mai le suia moni e ala i le vavega o le Togiola a le Faaola.

O le Ekalesia e le o se potu o faaaliga taavale—se nofoaga e faaali-ali atu ai i tatou lava ina ia mafai ona

faamemelo mai i ai isi i lo tatou faaleagaga, gafatia, po o le uluola. Ae e tai pei lava o se faleenisinia, lea e aumai i ai taavale ua manaomia ona faaleleia ina ia faaleleia ma toe faafou.

Ma pe le o i tatou uma ea, e manao- mia ona faaleleia, tausia, ma faafouina?

Tatou te le o mai i le lotu e nanā ai o tatou faafitauli ae ia faamaloloina.

Ma i le avea ai ma e umiaina le perisitua, ua tatou maua ai se isi tiutetauave faaopoopo—ia “leoleo i le lafu a le Atua . . . , ma le lotu, a e le o le faatauana- ina; aua foi ne’i faia [mo ou lava viiga], a o le lotu fiafia; Aua foi ne’i faapei o e faamalo i le tofi o le Atua, a ia fai outou ma faaaoao i le lafu mamoe.”¹³

Manatua, uso e, “E tetee atu le Atua i e faamaualuga, a e foai mai le alofa tunoa i e faamaulalo.”¹⁴

O le tamalii silisili, sili ona malosii, sili ona atamai na savalia lenei lalolagi, o le tamalii sili foi lea ona lotomaulalo. Sa Ia faatinoina nisi o Ana auaunaga sili ona faagaetiaina i taimi patino, faatasi ai ma ni nai tagata sa iloaina, ia sa Ia faatonuina ia “aua nei tala atu i se tasi” mea sa Ia faia.¹⁵ Pe a ta’ua o Ia e se tagata e “lelei,” e vave lava ona Ia toe faasino sao atu lea upu lelei, ma tautino atu ua na o le Atua lava e lelei moni.¹⁶ Ua manino lava e leai se taua o viiga o le lalolagi ia

te Ia; e na o le tasi lava Lona faamoemoe-ega ia auauna atu i Lona Tama ma “faia pea lava o mea e lelei ia te ia.”¹⁷ O le a lelei ona tatou mulimuli atu i le faaitaiga a lo tatou Matai.

Tau Ina Ia Tatou Alolofa Atu E Pei Ona Ia Alofa Mai

Uso e, o lo tatou valaauga maualuga ma le paia lenei—ia avea ma sui o Iesu Keriso, ia alolofa atu e pei ona Ia alofa mai, ia auauna atu e pei ona Ia auauna mai, ia “sii i luga lima ua tautau i lalo, ma faamalosi tulivae ua vaivai,”¹⁸ ia “vaaia e ua matitiva ma e ua le tago- lima,”¹⁹ ma ia tausia fafine ua oti tane ma fanau matua-oti.²⁰

Ou te tatalo uso e, a o tatou auauna ai i o tatou aiga, korama, uarota, siteki, nuu, ma malo o le a tatou tetee atu i le faaososoga o le fiamata-muamua ae, ia tauivi mo se mamalu sili atu: ia avea ma ni soo lotomaulalo ma faamaoni o lo tatou Alii ma le Faaola, o Iesu Keriso. A tatou faia lea mea, o le a tatou iloaina o loo savavali i tatou lava i le ala lea e tau atu i le avea ai ma tagata silisili, sili ona faamaoni, ma sili ona malualii. I nei mea ou te molimau atu ai i le suafa o lo tatou Matai, o Iesu Keriso, amene. ■

FAAMATALAGA

1. Isaia 29:13.
2. Mataio 23:27.
3. Mataupu Faavae ma Feagaiga 121:37.
4. Faaaliga 2:4.
5. Tagai Iosefa Samita—Talafaasolopito 1:19; tagai foi Mataupu Faavae ma Feagaiga 84:20.
6. Mamona 8:39.
7. E faatatau ia Albert Einstein.
8. Tagai Eteru 12:27.
9. Galuega 10:34.
10. Teuteronome 7:9.
11. Tagai 1 Ioane 1:9.
12. Faaaliga 7:16–17.
13. 1 Peteru 5:2–3.
14. Iakopo 4:6.
15. Tagai Luka 8:56.
16. Tagai Mareko 10:17–18.
17. Ioane 8:29.
18. Mataupu Faavae ma Feagaiga 81:5.
19. Mataupu Faavae ma Feagaiga 38:35.
20. Tagai Mataupu Faavae ma Feagaiga 83:6.





Saunia e Peresitene Henry B. Eyring
Fesoasoani Muamua i le Au Peresitene Sili

Perisitua ma le Tatalo Patino

E mafai e le Atua ona to mai ia i tatou le mana i le perisitua mo soo se tulaga atonu o tatou i ai. E na ona manaomia ai lava o lo tatou ole atu i le lotomaulalo.

O u te faafetai ona o le faatua-tuaga ua ou maua e lauga atu ai i le au perisitua a le Atua i le lalolagi atoa. Ua ou lagonaina le mamafa o lena avanoa aua ou te iloa se mea e uiga i le faatua-tuaga ua tuu atu e le Alii ia te outou. Faatasi ai ma lo outou taliaina o le perisitua, ua outou maua ai le aia tatau e tautala atu ai ma galulue i le suafa o le Atua.

O lena aia tatau o le a avea o se mea moni pe a e maua musumusuga mai le Atua. Ua na o iina o le a e mafai ai ona e tautala atu i Lona suafa. Ma e na o iina foi e mafai ai ona e galue i Lona suafa. Atonu na e sese i lou mafau-fau, “Se, e le faigata lena mea. E mafai ona ou maua musumusuga pe afai e valaaulia au e faia se lauga pe ou te tuuina atu foi se faamanuiaga faaleperisitua.” Pe le popole foi se tiakono po o se aoao talavou faapea, “A ou matua atu, pe a oo ina valaau au e fai ma faifeautalai, ona ou iloa lea o le mea e finagalo le Atua ou te tautala atu ai ma le mea e finagalo le Atua ou te faia.”

Ae mafaufau i le aso e tatau ai ona e iloa le mea e finagalo le Atua e fai atu ai, ma le mea e finagalo o Ia e fai. Ua

uma ona oo mai mo i tatou uma—po o fea lava o e i ai i lou valaauga faaleperisitua. Sa ou ola ae i se eria faamisiona i sasae o le Iunaite Setete i le taimi o le Taua Lona Lua a le Lalolagi. E vavama-mao mea sa nonofo ai tagata, ma sa tapulaa le kesi sa mafai ona faatau e tagata. E na o a’u le tiakono i le paranesi. Sa avatu e tagata o le au paia ia teutusi o taulaga anapogi i le peresitene o le paranesi pe a o mai i le sauniga anapogi ma molimau i lo matou fale.



Ina ua 13 o’u tausaga, sa matou masii atu i Iuta e nonofo ai i se uarota tele. Ou te manatua la’u galuega muamua o le savali i aiga e ao mai ia taulaga anapogi. Sa ou tilotilo i le igoa i luga o teutusi ma ou matauina ai le faaiu e tutusa ma se tasi o Molimau e Toatolu o le Tusi a Mamona. Sa ou tuitui i le faitotoa ma le mautinoa. Sa tatala mai e le tamaloa le faitotoa, tilotilo mai ia te au, atigū mai, ona avaavau mai lea ou te alu ese. Sa ou aluese ma le faanoanoa.

Pe toeitiiti atoa le 70 tausaga talu ai, ae ou te manatua pea le lagona sa ou maua i lena aso i le faitotoa lea sa i ai se mea sa tatau ona ou tau atu pe faia. Maimau pe ana ou tatalo i le faatuatua a o ou alu atu i lena aso, semanu e musuia au ou te tu ai pea i le faitotoa, ataata, ma fai atu se mea e pei o le: “Fiafia lava ua ta feiloai. Faafetai atu mo mea na e foaia ma lou aiga i aso ua mavae. Ou te taulai atu fiafia e feiloai ma oe i le isi masina.”

Pe ana faapea na ou fai atu ai ma faia lena mea, semanu ua atili ai lona le fiafia—ma tiga le loto. Ae ou te iloa nei o’u lagona semanu e i ai. Nai lo se lagona o le faanoanoa a o ou savali ese, semanu ou te lagonaina le faamalo lemu i lo’u mafaufau ma lo’u loto: “Ua lelei ia.”

O i tatou uma lava e tatau ona tautala ma galulue i le suafa o le Atua i taimi e le lava ai lo tatou iloaitino e aunoa ma musumusuga. O na taimi e mafai ona oo mai ia i tatou, i le taimi ua le lava ai se sauniuniga. E tele taimi na tupu ai lena mea ia te au. Na tupu i le tele o tausaga talu ai i se falemai lea na fai mai ai se tama ia te a’u ma lau soa, ua ta’u atu e fomai ia te ia o le a toe o ni nai minute ona maliu lea o lona afafine e tolu tausaga sa i ai ni manu’a tuga. A ou tuuina atu o’u lima i luga o le pito e tasi o lona ulu e le o fusia, sa tatau ona ou iloa, i le avea ai o se



auauna a le Atua, le mea o le a Ia faia ma fai atu ai.

Na oo mai upu i lo'u mafaufau ma o'u laugutu o le a ola o ia. Sa mapuea aamu le fomai na tu i o'u autafa ona o le inoino ma fai mai ou te aluese. Sa ou savali ese mai lena potu o le falemai ma se lagona o le filemu ma le alofa. Sa ola le teineitiiti ma sa savali mai i le alasavali i le sauniga faamanatuga i lo'u aso mulimuli i lena aai. Ou te manatua pea le olioli ma le lotomalie sa ou lagonaina mai le mea sa ou tautala ai, ma faia i le galuega a le Alii mo lena teineitiiti ma lona aiga.

O le eseesega o o'u lagona i le falemai ma le faanoanoa sa ou lagonaina a o ou savali ese mai lena faitotoa o se tiakono, sa oo mai mai le mea sa ou aoaoina e uiga i le sootaga o le tatalo i le mana o le perisitua. I le aveai ai o se tiakono ou te lei iloina o le mana e tautala ai ma galue i le suafa o le Atua e manaomia ai faaaliga, ma ina ia mauaina pe a tatou manaomiaina, e manaomia ai le tatalo ma le galue i le faatuatua mo le mafutaga a le Agaga Paia.

I le afiafi ae ou te lei alu i lena faitotoa mo taulaga anapogi, sa fai la'u tatalo i le taimi o le a moe ai. Ae mo vaiaso ma masina a o lei oo mai lena telefoni mai le falemai, sa ou mulimuli i se mamamu o le tatalo ma faia le tau-mafaiga lea na aoao mai e Peresitene Josefa F. Samita, o le a mafai ai e le Atua ona aumai ia i tatou le musumuga e tatau ai mo i tatou ia maua le

mana i le perisitua. Na ia faaupuina faigofie:

“Tatou te le tau tagi atu ia te ia i ni mau upu. Tatou te le tau faavaivaia o ia i ni tatalo uumi. O le mea e manaomia ona tatou faia, ma le mea e tatau ona tatou faia o ni Au Paia o Aso e Gata Ai, mo lo tatou lava lelei, o le o atu soo i ona luma, e molimau atu ia te ia tatou te manatua o ia ma ua tatou naunau e tauave i o tatou luga lona suafa, tausi ana poloaiga, galueaiina le amiotonu; ma e tatou te mananao i lona Agaga e fesoasoani ia i tatou.”¹

Ona ia fai mai lea o Peresitene Smith ia i matou mea e tatau ona matou tatalo atu ai, o ni ana auauna ua folafola atu e tautatala ma galulue mo le Atua. Fai mai ia ia: “O a mea tou te tatalo atu ai? Tou te tatalo ia silafia outou e le Atua, ia faafofoga mai i a outou tatalo, ma ia mafai ona ia faamanuia outou i lona Agaga.”²

E le faapea o le tele o upu e faaaoga, ae o le a manaomia ai sina onosai. O se faalatalata atu i lou Tama Faalelagi ma le faamoemoe ia Ona silafia patino oe. O Ia o le Atua o tagata uma, o le Tama o tagata uma, ae ua naunau e tuuina mai le gauai atoa i se tasi o Ana fanau. Atonu o le mafuaaga lena na faaaoga ai e le Faaola ia upu “Lo matou Tama e o i le lagi, ia paia Lou suafa.”³

E faigofie atu ona maua le lagona e tatau ai o le migao pe a e tootuli pe punou lou ulu, ae e mafai ona e lagonaina o loo e faalatalata atu i lou Tama Faalelagi i se tatalo faasamasamanoa e

oo lava i tatalo le leoa, ia o le a tele ina manaomia ona e faia i au auaunaga faaleperisitua. O le a i ai se pisa ma tagata i lou siomaga i le tele o taimi e te ala ai. E faafofogaina e le Atua au tatalo le leoa, ae e ono tatau ona e aoao e tapunia uma mea faalavefau aua o le taimi e te manaomia ai le fesooteai atu i le Atua, atonu e le oo mai i ni taimi toafilemu.

Na fautuaina mai e Peresitene Samita o le a manaomia ona e tatalo atu ia silafia ai e le Atua lou valaauga e te auauna atu ia te Ia. Ua uma ona Ia silafia auililiga uma o lou valaauga. Sa Ia valaauina oe, ma o le tatalo atu ia te Ia e uiga i lou valaauga, o le a Ia faali atu ai nisi mea mo oe ia iloa.⁴

O le a ou avatu se faataitaiga o le mea e ono fai e se faiaoga o aiga a o ia tatalo. Atonu ua uma ona e iloa e tatau ona e:

“Asiasi i fale o tagata taitasi, uunaia i latou e tatalo ma le leo ma faalilolilo, ma auai i tiute uma faaleaiga. . . .

“ . . .Ia leoleo i luga o le ekalesia e le aunoa, ma faatasi ma faamalolosia i latou;

“Ma vaai ia leai se amioletonu i totonu o le ekalesia, po o se feitagai ma le tasi, poo se pepelo, faatuupua, poo se tautala leaga;

“Ma vaai ia potopoto soo faatasi le ekalesia, ma vaai foi ia fai e tagata uma o le ekalesia o latou tiute.”⁵

Ia, e oo foi lava i le faiaoga o aiga ua i ai le poto masani ma lana soa laitiiti, e matua manino lava le le mafai ona fai e aunoa ma le fesoasoani a le Agaga Paia. Mafaufau i aiga po o tagata taitoatasi, sa tofia oe e auauna i ai. O le faamasinoga a le tagata ma faamoemoga lelei o le a le lava ia.

O le mea lea o le a e tatalo ai mo le ala e iloa ai o latou loto, e iloa ai po o a mea o faaletonu i olaga ma loto o tagata e te lei masani lelei ai ma ē e le naunau ia e iloina i latou. O le a

manaomia ona e iloa le mea e finagalo le Atua e te faia e fesoasoani ai ia te i latou ma faia uma i le mea sili e te mafaia, i le lagonaina o le alofa o le Atua mo i latou.

Talu ai e taua tele ma faigata ou valaauga faaleperisitua, lea na fautua mai ai Peresitene Samita a e tatalo, e te aoiu atu pea lava i le Atua ia Ona faamanuia ia te oe i Lona Agaga. O le a e manaomia le Agaga Paia e le faatasi ae i le tele o le a tuu atu ai e le Atua ia te oe mo lau soa tumau. O le mafuaaga lena e tatau ai ona tatou tatalo pea lava ina ia taialaina i tatou e le Atua i la tatou auaunaga mo Ana fanau.

Talu ai e le mafai ona tatou ausia lo tatou gafatia faaleperisitua e aunoa ma lo tatou o faatasi ma le Agaga, o oe o le tulimataiga patino o le fili o le fiafia uma. Afai e mafai ona ia faaosoosoina oe ia fai le agasala, e mafai e ia ona faavaivaia lou mana e taitaia ai e le Agaga

ma tuutiitia ai lou mana i le perisitua. O le mafuaaga lena na saunoa ai Peresitene Samita e ao ona e tatalo e le aunoa ina ia lapataia ma puipuia oe e le Atua mai mea leaga.⁶

Na te lapataia i tatou i le tele o au-ala. O lapataiga, o se vaega o le faaolagata. O perofeta, aposetolo, peresitene o siteki, epikopo, ma faifeautalati latou te sii uma ae le leo o le lapataiga e sosolaese ai mai mala e ala i le faatua-tua ia Iesu Keriso, salamo, ma le osia ma tausia o feagaiga paia.

I le avea ai o se e umia le perisitua, e tatau ona avea oe o se vaega o le leo o le lapataiga a le Alii. Ae e ao ona e ua'i atu oe lava ia i le lapataiga. O le a e le ola faaleagaga e aunoa ma le puipuiga a le mafutaga a le Agaga Paia i lou olaga i aso taitasi.

E tatau ona e tatalo ia maua ma galue ina ia e maua. E na o le faasinoala lena o le a mafai ai ona e maua lou

auala i luga o le ala sa'o ma le vaapiapi i puao o mea leaga. O le a avea le Agaga Paia ma ou faasinoala a o Ia faaalua upumoni pe a e suesue i upu a perofeta.

O le mauaina o lena taiala o le a manaomia ai nisi mea e tele nai lo le na o se faalogologo ma faitau faasama-samanoa. O le a manaomia ona e tatalo ma galue i le faatuatua ina ia goto ifo upu o mea moni i le taele o lou loto. E tatau ona e tatalo ia faamanuia oe e le Atua i Lona Agaga, ina ia taitaiina ai e Ia oe i upumoni uma ma faaali atu ia te oe le ala sa'o. O le ala lea o le a Ia lapataia ai ma taiala oe i le ala sa'o i lou olaga ma i lau auaunaga faaleperisitua.

Ua saunia e le konafesi aoao se avanoa sili ina ia faamalosi ai e le Alii ou mana e te auauna atu ai i le perisitua a le Atua. E mafai ona e saunia oe lava, e pei ona ou mautinoa ua e saunia mo lena konafesi, i le tatalo. E mafai



ona e tuufaatasia lou faatuatua ma [le faatuatua] o i latou o le a tatalo. O le a latou tatalo mo faamanuiaga e tele i luga o tagata e toatele.

O le a latou tatalo mo le Agaga ia afio mai i luga o le perofeta o le fofoga taumomoli a le Alii. O le a latou tatalo mo Aposetolo ma auauna uma na tofia e le Atua. E aofia ai iina oe mai lava i le tiakono aupito fou e oo atu i le faitaulaga sili poto masani, ma nisi e matutua ma talavou atonu e le o toe mamao ona o atu lea i le lalolagi o agaga, i le mea o le a latou faalogo ai, “Ua lelei ia, le auauna lelei e ma le faamaoni.”⁷

O le a tuuina atu lena faamamaluga i nisi o le a faateia i lena mea. Atonu latou te lei umia lava se tofi maualuga i le malo o le Atua i le lalolagi. O nisi e manatu e itiiti se taunuuga ua latou vaaia mai i a latou galuega pe faapea foi e lei tuuina atu lava ia te i latou ni avanoa e auauna atu ai. E manatu foi nisi faapea na puupuu lo latou taimi o le auaunaga i lena olaga nai lo le mea sa latou faamoemoe i ai.

E le o tofi e umia po o le taimi na auauna atu ai o le a taua i le Alii. Ua tatou iloa lena mea mai le faataoto a le Alii i le au faigaluega i le tovine, lea na tutusa ai le totogi e tusa lava po o le a le umi ae po o fea foi sa latou galulue ai. O le a tauia i latou mo le auala sa latou auauna atu ai.⁸

Ou te iloa se alii, o se uo pele, o lona auaunaga faaletino i le tovine sa faamutaina anapo i le 11:00. Ua tele tausaga o faia ona togafitiga mo le kanesa. I nei tausaga sa faia ai togafitiga, sa ia taliaina se valaauga e faia fonotaga faalevaiaso ma vaaia tagata o lana uarota, ua o ese a latou fanau mai o latou aiga; o nisi o tina ua maliliu tane. O lona valaauga o le fesoasoani ia i latou ia maua le mafanafana o mafutaga ma le aoaoina o le talalelei.



Ina ua ia maua le toe faaiuga vavalo faapea e le o toe umi se taimi e ola ai, sa toesea le epikopo i se malaga faapisiinisi. E lua aso mulimuli ane, sa ia auina atu ai se feau i lona epikopo e auala atu i lana taitai vaega o faitaulaga sili. Sa ia ta'ua le mea lena e uiga i lona tofiga: “Ua ou malamalama o loo malaga le epikopo, o lea la ua ou faia se fuafuaga. Ua ou mafaufau e faia se fonotaga a le matou vaega i le Aso Gafua a sau. E mafai e ni tagata se toalua o le au paia ona ave i matou mo se maimoaga i le Maota Autu mo Konafesi. E mafai ona faaoga nisi o le au paia e aveina i latou ma ni nai Sikauti e tuleia nofofaataavale. E fuafua po o ai e saina e o, atonu e lava ni tagata matutua e faia ai e i matou lava, ae e lelei le iloa o loo i ai ni faaleoleo pe a manaomia. E mafai foi ona ave o se po lelei faaleaiga mo le au fesoasoani e aumai ai foi o latou aiga. E ui o lea, faailoa mai a o lei faasalauina le fuafuaga. . . . Faafetai.”

Ona ia faateia lea o le epikopo i se telefoni. E aunoa ma se ta'ua o lona lava tulaga po o ana taumafaiga lototoa, sa ia fesili atu, “Epikopo, o i ai se isi mea e mafai ona ou faia mo oe?” E na o le Agaga Paia lava na mafai ai ona ia lagonaina le avega a le epikopo i le taimi o le a matuai mamafatu ai lana foi ia avega. Ma e na o le Agaga foi na mafai ai e ia ona faia se fuafuaga e tautuaina ai ona uso ma tuafafine i le faautautaga lava e tasi lea sa ia faaogaina e fuafua ai mea fai a le Sikauti a o talavou o ia.

Faatasi ai ma se tatalo o le faatuatua, e mafai ai e le Atua ona to mai ia i tatou le mana i le perisitua mo soo se tulaga atonu o tatou i ai. E na ona manaomia ai lava o lo tatou ole atu i le lotomaulalo mo le Agaga e faaali mai ia i tatou le mea e finagalo le Atua tatou te tautala atu ai ma fai, ma faaauu pea ona ola agavaa mo lena meaalofo.

Ou te tuuina atu la'u molimau o loo soifua le Atua le Tama, e alofa ia i tatou, ma e faafogaina a tatou tatalo. Ou te molimau atu o Iesu o le Keriso soifua, o Lana Togiola ua mafai ai ona faamamaina i tatou ina ia agavaa mo le mafutaga a le Agaga Paia. Ou te molimau atu faapea, faatasi ai ma lo tatou faatuatua ma le maelega, e i ai le aso o le a mafai ai e i tatou ona faalogo atu i upu o le a aumaia ai le olioli ia i tatou: “Ua lelei ia, le auauna lelei e ma le faamaoni.”⁹ Ou te tatalo ia tatou maua lena faamanuiaga matagofie mai le Matai ua tatou auauna atu i ai. I le suafa o Iesu Keriso, amene. ■

FAAMATALAGA

1. *Aoaoga a Peresitene o le Ekalesia: Iosefa F. Samita* (1998), 23.
2. *Aoaoga: Iosefa F. Samita*, 26.
3. Luka 11:2.
4. Tagai Iosefa F. Samita, *Gospel Doctrine*, 5th ed. (1939), 215–21.
5. Mataupu Faavae ma Feagaiga 20:51, 53–55.
6. Tagai *Aoaoga: Iosefa F. Samita*, 26.
7. Mataio 25:21.
8. Tagai Mataio 20:1–16.
9. Mataio 25:21.



Saunia e Peresitene Thomas S. Monson

O Le Perisitua-o se Meaalofa Paia

Ua taitasi i tatou ma faamatuu mai i ai se tasi o meaalofa aupito taua ua faaee mai i luga o tagata.

O se tasi o mea e sili ona manino lo'u manatuaina, o le auai lea i se sauniga perisitua o se tiakono fou faatoa uma ona faauuina, ma usuina le viiga amata, "O mai alo o le Atua ua i ai perisitua."¹ O le po nei, ia i latou uma ua aofaga potopoto iinei i le Maota Autu mo Konafesi, faapea foi le lalolagi atoa, ou te toe ta'ua le agaga o lena viiga faapitoa ma fai atu ia te outou: *O mai, outou alo o le Atua ua i ai perisitua*, sei o tatou mafaufau i o tatou valaauga; sei o tatou toe mafaufau i o tatou tiutetauave; sei o tatou mataituina o tatou tiute; ma sei o tatou mulimuli ia Iesu Keriso lo tatou Alii. E ui atonu e eseese lo tatou matutua, i agaifanua, po o atunuu, ae ua tuufaatasia i tatou ua tasi i o tatou valaauga faaleperisitua.

Ia i tatou taitoatasi, o le toefuataiga o le Perisitua Arona ia Oliva Kaotui ma Iosefa Samita e Ioane le Papatiso, e ese le taua. E faapena foi, o le toefuataiga o le Perisitua Mekisateko, ia Iosefa ma Oliva e Peteru, Iakopo, ma Ioane, o se mea na tupu e pele.

Sei o tatou matua faatauaina o tatou valaauga, o tiutetauave, ma tiute ia e o mai faatasi ma le perisitua o loo tatou umia.

Sa ou lagonaina se tiutetauave tele ina ua tofia au e avea ma failautusi i la'u korama a tiakono. Sa ou matua saunia ma le faaeteete tele ia faamau-mauga sa ou tausia, aua sa ou manao e faia le mea silisili sa ou iloa fai i lena valaauga. Sa ou matua mitamita i la'u galuega. O le faia o mea uma ou te mafaia, i le mea aupito sili ou te gafatia, o la'u sini lea i soo se tofiga sa ou umia.

Ou te faamoemoe i alii talavou uma ua faauuina i le Perisitua Arona, ua tuu atu i ai se faailoaga o le paia o lona valaauga ua faauuina ai, faapea foi avanoa e faalauteleina ai lena valaauga. Sa ou mauaina se avanoa a o o'u tiakono, ina ua faatonuina au e le au epikopo ou te alu e ave le faamanatuga i se toeaina matua ua nofofale, e nofo pe tusa o se maila mai le falesa. I lena taeao faapitoa o le Aso Sa, a o ou tuitui atu i le faitotoa o Uso Wright ma faalogoina si ona leo vaivai o valaau mai, "Sau i totonu," sa ou ulufale atu e le gata i si ona āpi faatauavaa ae faapea foi se potu e tumu i le Agaga o le Alii. Sa ou soso atu i autafa o le moega o Uso Wright ma tuu atu ma le faaeteete se fasi falaoa i ona laugutu. Ona ou tuu atu lea o le ipu vai, ina ia mafai ona

inu ai. Ina ua ou savali ese, sa ou vaaia loimata i ona mata a o ia fai mai, "Ia faamanuia le Atua ia te oe, lo'u atalii." Ma sa faamanuiaina au e le Atua—ma se talisapaia o faatusa paia o le faamanatuga ma mo le perisitua sa ou umia.

E leai se tiakono, aoao, po o se ositaulaga mai le matou uarota o le a galo ia asiasiga e manatua pea sa matou faia ia Clarkston, i Iuta, i le mea o lagomau ai Matini Harisi, o se tasi o Molimau e toatolu o le Tusi a Mamona. A o matou siosioina le poutu maamora umi o loo maka ai lona tuugamau, ma a o faitau mai e se tasi o taitai o le korama ia te i matou na upu mamana mai "Le Mau a Molimau e Toatolu," o loo maua i le amataga o le Tusi a Mamona, sa matou amatalia se alofa mo lena tusifaamau-mau paia ma mo upumoni o loo maua tusia ai.

I le aluga o na tausaga, o lo matou faamoemoe o le avea ma atalii o Mosaea. Na tusia e uiga ia te i latou:

"Sa latou matua malolosi i le mala-malama o le upumoni; ona o i latou o ni alii mafaufau lelei ma sa latou sutesue i tusitusiga paia ma le filiga; ina ia latou iloa le afioga a le Atua.





“Ae sa le ona pau lea; sa latou tuu atu i latou lava i le tatalo tele, ma le anapogi; o lea na i ai ai ia i latou le agaga o valoaga, ma le agaga o faaaliga, ma a latou aoao atu, sa latou aoao atu ma le mana ma le pule mai le Atua.”²

E le mafai ona ou mafaufau i se sini e sili atu ona agavaa mo se alii talavou ia i ai, nai lo le faamatalaina e faapei o atalii totoa ma le amiotonu o Mosaea.

Ina ua lata ona atoa lo’u 18 tausaga ma ua saunia e ulufale atu i le tautua faamiliteli i le Taua Lona Lua o le Lalolagi, sa fautuaina atu ai au ina ia mauaina le Perisitua Mekisateko, ae sa moomia ona ou telefoni i lo’u perisitene o le siteki, o Paul C. Child, mo se faatalanoaga. O ia o se tagata e fiafia ma malamalama tele i tusitusiga paia, ma o lona faamoemoega le tataui tagata uma ona faapena le fiafia ma le malamalama i ai. Sa ou iloa mai nisi o a’u uo le auiliili ma le vaiiliili o ona faatalanoaga, o lea sa ou manao ai i sina faailoa atu itiiti o lo’u malamalama i tusitusiga paia; ma o lea, ina ua ou telefoni atu ia te ia sa ou fautuaina ma te feiloai i le Aso Sa e sosoo ai i se taimi sa ou iloa e na o le tasi le itula ae oo i le taimi o lana sauniga faamanatuga.

O lana tali: “Oi Uso Monson, o le a le lava ai la se taimi e suesue ai tusitusiga paia.” Ona ia fautuaina mai ai lea o se taimi e tolu itula a o lei oo i le sauniga faamanatuga, ma sa ia faatonuina au e avatu la’u lava seti o tusitusiga paia ua uma ona maka lelei.

Ina ua ou taunuu atu i lona maota i le Aso Sa, sa faafeiloaia a’u i le alofa, ona amata ai lea o le faatalanoaga. Sa fai mai Perisitene Child, “Uso Monson, ua e umia le Perisitua Arona. Pe na i ai se agelu na auauna atu ia te oe?” Sa ou tali atu e leai. Ina ua fesili mai pe sa ou iloa e i ai la’u aia tataui mo lona mea, sa ou toe tali atu foi ou te le iloa.

Sa ia fai mai, “Uso Monson, tauloto mai le vaega e 13 o le Mataupu Faavae ma Feagaiga.”

Sa ou amata, “I luga o oulua o’u uso a auauna e, i le suafa o le Mesia ou te tuuina atu ai le Perisitua o Arona, o loo i ai ki o asiasiga ma galuega a agelu—”

“Taofi,” sa faatonu mai ai Perisitene Child. Ona ia fautua mai lea i se leo mālū e faapea, “Uso Monson, ia aua lava nei galo o le avea ai ma se tasi e umia le Perisitua Arona, ua e aia foi i asiasiga a agelu.”

Sa toetoe ina pei sa i ai se agelu i totonu o le potu i lona aso. E lei galo lava ia te au le faatalanoaga. O loo ou lagonaina pea le agaga o lona taimi paia a o ma faitauina faatasi ia tiutetauave, o tiute, ma faamanuiaga o le Perisitua Arona ma le Perisitua Mekisateko—o faamanuiaga e oo mai e le gata ia i tatou ae faapena foi i o tatou aiga ma i isi o le a tatou maua le avanoa e auauna i ai.

Sa faauuina au o se toeaia, ma i le aso na ou tuua ai mo le faataunuaina o o’u tiute i le neivi, sa i ai faatasi se sui o le au epikopo o la’u uarota ma lo’u aiga ma uo i le nofoaga e faaee ai nofoaafi e faatofa mai ia te au. I le toe ai o sina taimi aluese le nofoaafi, sa ia tuuina mai i lo’u lima se tamaitusi sa faaigoa o le *Tusitaulima a le Faifeautalai*. Sa ou ata ma fai atu ou te le o alu i se misiona.

Sa ia tali mai, “Ave pea. Atonu lava e aoga.”

Na aoga. Sa ou manaomia se mea malo, faatafatolu e tuu faapito i lalo o la’u ato faatagata folau ina ia malo ma lē manuminumi tele o’u lavalava. O le *Tusitaulima a le Faifeautalai* o le mea tonu lava lea sa ou manaomia, ma sa



aoga lelei i la’u ato faatagata folau mo le 12 vaiaso.

O le po a o lumanai le aso matou te malolo ai mo le Kerisimasi, sa matou mafaufau i o matou aiga. Sa le gāsē se mea i le apitaga o le militeli, ae na faateia e la’u uo e i le moega i o’u autafa—o se tama Mamona, o Leland Merrill—sa amata ona ōi i le tiga. Sa ou fesili po o le a le mafuaaga, ae sa fai mai ua matua lagona lava le ma’i. Sa lei manao o ia e alu i le fale o togafitiga faafomai a le militeli, aua sa ia iloa afai e alu i ai, o le a le mafai ona alu i lona aiga i le aso e sosoo ai.

Sa foliga ua atili ona tigaina a o gasolo itula. O le iloa ai o au o se toa’ina, sa ia talosaga mai ai ou te tuu atu ia te ia se faamanuiaga faaleperisitua.

Ou te lei faia lava muamua se faamanuiaga faaleperisitua, e lei tuuina mai foi lava ia te au se faamanuiaga, ma ou te lei vaai lava foi o tuuina atu se faamanuiaga. A o ou tatalo lemu mo se fesoa-soani, sa ou manatuaina le *Tusitaulima a le Faifeautalai* i le pito i lalo o la’u ato folau. Sa vave ona ou sasaina i lalo ma aumai le tusi i se sulu itiiti o le po. O iina sa ou faitau ai i le ala e faamanuia ai e se tagata se ma’i. A o toatele le mau seila fiafiloa sa tilotilo mai, sa faagasolo le faiga o le faamanuiaga. A o lei mafai ona ou toe teuina mea uma i la’u ato, sa moe Leland Merrill e faapei o se tama-itiiti. Sa ala mai o ia i le taeao na sosoo ai ua manuia. Sa maoae le lotofaafetai sa ma taufai lagonaina mo le mana o le perisitua.

E tele nisi mau avanoa na ou maua i tausaga e tuuina atu ai faamanuiaga ia i latou na mafatia, ou te le mafaituina. O avanoa taitasi ou te maua ai lava le matuā faafetai atu ina ua faamatuu mai ia te au e le Atua lenei meaalofo paia. Ou te matua migao tele i le perisitua. Ua ou molimauina lona mana i lea taimi ma lea taimi. Ua ou vaai i lona malosi. Ua ou maofa i vavega ua tutupu mai ai.

Uso e, ua taitasi i tatou ma faamatuu mai i ai se tasi o meaalofo aupito taua ua faaee mai i luga o tagata. A tatou faamamaluina o tatou perisitua ma ola i o tatou olaga ina ia tatou agavaa i taimi uma, o le a tafe mai faamanuiaga o le perisitua e ala mai ia te i tatou. Ou te fiafia i upu o loo maua i le Mataupu Faavae ma Feagaiga, vaega 121, fuai-upu e 45, lea o loo ta’u mai ai mea e tataua ona tatou faia ina ia agavaa ai: “Ia tuu lou loto . . . ia tumu i le alofa mama i tagata uma, ma i le auaiga o le faatua-tua, ma ia tuu le amiomama e teuteuina ai ou mafaufauga e le aunoa, ona solo malosi ai lea o lou lototele i luma o le Atua, ma o le a to ifo i luga o lou agaga le mataupu faavae o le perisitua e pei o le sau mai le lagi.”

I le avea ai ma e umia le perisitua a le Atua, ua tatou punouai i le galuega a le Alii o Iesu Keriso. Ua tatou tali atu i Lana valaau; ua tatou i ai i Lana feau. Tatou te aoao ia te Ia. Tatou te mulimuli i Ona tulaga aao. Tatou te ola i Ana mataupu. O le faia o na mea, o le a tatou saunia ai mo soo se auaunaga e valaau mai o Ia e faatino. O Lana galuega lenei. O Lana Ekalesia lenei. Ioe, o Ia o loo tatou tautai, o le Tupu o le Mamalu, o le Alo o le Atua. Ou te molimau atu o loo soifua o Ia ma tuuina atu ai lenei molimau i Lona suafa paia, le suafa o Iesu Keriso, amene. ■

FAAMATALAGA

1. “O Mai, Alo o le Atua,” *Viiga*, nu. 200.
2. Alema 17:2–3.



Saunia e Peresitene Thomas S. Monson

Faamanuiaga o le Malumalu

A tatou auai atu i le malumalu, e mafai ona oo mai ia te i tatou se maualuga o le faaleagaga ma se lagona o le filemu.

O uso e ma tuafafine pele, e ese lo'u faafetai i lo tatou mafuta ai i lenei taea matagofie o le Eseta ina ua liliu atu o tatou mafaufauga i le Faaola o le lalolagi. E momoli atu o'u alofaaga ma faafeiloai atu ia te outou uma taitoatasi ma tatalo o le a musuia e le Tama Faalelagi a'u upu.

O le konafesi lenei ua atoa i ai le fitu tausaga talu ona lagolagoina a'u e aveva ma Peresitene o le Ekalesia. O ni tausaga pisi, e le gata e tumu i nai faigata laiti, ae faapena foi i faamanuiaga e le mafaitaulia. Faatasi ai ma faamanuiaga sili ona faafiafiaina ma paia o nei faamanuiaga, o lo'u avanoa e faapaia ai ma toe faapaia ia malumalu.

Talu ai nei lava, ia Novema ua mavae atu, sa ou maua ai se avanoa e faapaia ai le Malumalu fou matagofie o Phoenix Arisona. Sa matou faatasi ai ma Peresitene Dieter F. Uchtdorf, Elder Dallin H. Oaks, Elder Richard J. Maynes, Elder Lynn G. Robbins, ma Elder Kent F. Richards. I le afiafi a o lumanai le faapaiaga, sa faia ai se faafiafiaga faaleaganuu ofoofogia lea na auai ai o tatou talavou e silia ma le 4,000 i le faatinoga, mai itumalo e tautuaina e le malumalu. O le aso na

sosoo ai sa faapaia ai le malumalu i ni sauniga paia ma le musuia se tolu.

O le fauina o malumalu o se faailoga manino lea o le faatupulaia o le Ekalesia. Ua 144 o tatou malumalu ua faaoga i le taimi nei i le salafa o le lalolagi, e 5 o loo toe faafou ma le 13 isi o loo fauina. E le gata i lea, o malumalu e 13 na fofogaina atu talu ai o loo i ai nei i tulaga eseese o tapenapenaga a o lei amataina ona fau. O le tausaga nei ua faamoemoe e toefaapaia ai malumalu

e 2 ma faapaia ia malumalu fou e 5 lea na faatulaga mo le faamaeaina.

Mo le lua tausaga ua mavae, a o tau-lai atu a matou taumafaiga i le faamaeaina o malumalu na faasilasila muamua atu, sa matou taofia ai fuafuaga faaga-oioi mo soo se malumalu faaopoopo. Peitai, i lenei taea, ou te fiafia lava e faasilasila atu ni malumalu fou se tolu o le a fausiaina i nofoaga nei: Abidjan, Ivory Coast; Port-au-Prince, Haiti; ma Bangkok, Tailani. E ofoofogia faamanuiaga ua faapolopoloina mo au paia faamaoni i nei nofoaga, ma, e moni lava, i soo se mea o loo i ai malumalu i le lalolagi atoa.

O loo faagasolo pea le faiga o le fuafuaina o manaoga ma le sailia o nofoaga mo nisi malumalu, aua matou te mananao ia maua e le toatele o tagata o le au paia e mafai ai le avanoa e o ai i le malumalu e aunoa ma ni osigataulaga tele o taimi ma punaoa. E pei ona sa matou faia ai i aso ua mavae, o le a logo atu lava pe a faia ni faaiuga e tusa ai.

Pe a ou mafaufau i malumalu, e liliu atu o'u mafaufauga i le mau faamanuiaga tatou te maua mai



ai. A o tatou ulu atu i faitotoa o le malmalu, tatou te tuu ese mea faalavelave ma fenumiaiga o le lalolagi. O totonu o lenei maota paia, tatou te maua ai le matagofie ma le faatulagaina lelei. E i ai le malologa mo o tatou agaga ma se mapusaga mai mea e naunau i ai o tatou olaga.

A o tatou auai atu i le malumalu, e mafai ona oo mai ia te i tatou se maualuga o le faaleagaga ma se lagona o le filemu lea e sili mamao atu nai lo se isi lava lagona e mafai ona oo mai i le loto o le tagata. O le a tatou pueina ai le uiga moni o upu a le Faaola ina ua Ia fetalai: “Ou te tuuina atu ia te outou le manuia; o lo’u manuia ou te avatu ai ia te outou; . . . Aua le atuavale o outou loto; aua foi tou te matatau.”¹

O lena filemu e mafai ona sasala atu i soo se loto—o loto o loo fememeai, o loto ua mamafatū i le lototiga, o loto ua lagona le lē mautonu, o loto o loo aioi mai mo se fesoasoani.

Sa ou iloina talu ai nei se alii talavou sa alu i le malumalu ma se loto o loo aioi atu mo se fesoasoani. I le tele o masina na muamua, sa ia maua ai lona valaauga e faamisiona i Amerika i Saute. Peitai, sa umi tele se taimi na faatali ai lona visa, ma o lea sa toe tofia ai o ia i se misiona i le Iunaite Setete. E ui i lona le fiafia ona ua le mafai ona galue i le eria na muai valaauina ai o ia, ae sa galue malosi lava i lana eria fou, ma sa naunau e auauna atu i le mea sili sa ia mafaia. Peitai, sa oo ina lotovaivai, ona o aafiaga le lelei sa i ai ma faifeautalai sa foliga mai ia te ia, sa sili ona naunau e tafafao ma fiafia nai lo le faasoaina atu o le talalelei.

I ni nai masina pupuu mulimuli ane, sa mafatia lenei alii talavou i se luitau matuia faalesoifua maloloina, lea na tuua ai o ia ua pē le afa o lona tino, ma o lea sa auina atu ai o ia i le fale ona o mafuaaga faafomai.



I ni nai masina mulimuli ane, sa faamaloloina atoatoa lea alii talavou, ma ua te’a le pē o le tino. Sa ta’uina atu ia te ia o le a toe mafai ona galue o se faifeautalai, o se faamanuiaga sa ia tatalo ai i aso taitasi. Na pau le tala le fiafia, o le a toe foi i le misiona lava lea sa ia tuua, lea na ia manatu ai e le talafeagai amioga ma uiga faaalua o nisi o faifeautalai ma le mea e tatau ona i ai.

Na sau o ia i le malumalu e saili ai se faamafanafanaga ma se faamautinoga e mafai ona ia maua se aafiaga lelei o se faifeautalai. Sa tatalo foi ona matua o le a maua i lenei asiasiga i le malumalu le fesoasoani o loo manaomia e lo la atalii.

Ina ua ulu atu le taulealea i le potu selesitila ina ua maea le sauniga, sa nofo o ia i se nofoa ma amata loa ona tatalo mo se taitaiga mai lona Tama Faalelagi.

O le isi tagata na sosoo ai na ulu atu i le potu selesitila, o se alii talavou o lona igoa o Landon. A o savali atu o ia i le potu, sa vave ona faataupupula atu i le alii talavou lea e nofo i le nofoa, ma ona mata o moeiini ma e iloa lava o loo tatalo. Na maua e Landon se uunaiga e le mafaaseseina, e tatau ona talanoa atu i le taulealea lea. Peitai, i le musu ai e faalavelave, sa tonu ia te ia e faatali. Ina ua mavae ni nai minute ae o la lava e tatalo le taulealea, sa iloa e Landon ua le toe mafai ona toe tolopo le uunaiga.

Sa ia faalatalata atu i le taulealea ma pa’i lemu atu i lona tauau. Sa pupula mata o le taulealea, ua te’i ina ua faalavelaveina o ia. Sa fai atu lemu Landon, “Ua uunaia au e tatau ona ou talanoa atu ia te oe, e ui ou te le o mautinoa pe aisea.”

A o amata ona la talatalanoa, sa sasaa atu e le taulealea lona loto ia Landon, ma faamatala i ai ona tulaga ma faauma i lona manao ia maua se mafanafana ma se faamalosiaga e faatatau i lana misiona. O Landon, o lē faatoa talii mai i se misiona faamanuiaina i le na o le tasi le tausaga talu ai, sa ia faamatalaina ona aafiaga i le misiona, o luitau ma popolega na la feagai, o lona liliu atu i le alii mo se fesoasoani, ma faamanuiaga sa ia mauaina. Sa mafanafana ana upu ma faalaeiauga, ma sa pipisi atu lona naunautaiga mo le misiona i le taulealea lea. Mulimuli ane, a o mou atu atuavalega o le alii talavou, sa oo mai se lagona filemu ia te ia. Sa ia maua se lotofaafetai loloto ina ua ia iloina ua tali mai ana tatalo.

Sa tatalo faatasi nei alii talavou e toalua, ona sauni ai lea o Landon e alu, ua fiafia sa ia faalogo i le musumusuga na oo atu ia te ia. A o tu a’e o ia o le a alu, sa fesili atu le alii talavou ia Landon, “O fea na e faamisiona ai?” O le taimi lea e lei ta’ua ai lava e se tasi o i la’ua le igoa o le misiona sa galulue ai. Ina ua tali atu Landon i le igoa o lana misiona, sa faatumulia le alii talavou i loimata. Sa faamisiona Landon i le misiona tonu lava lea o le a toe foi i ai le alii talavou lea!

I se tusi na tusi mai ia te au talu ai nei, sa faasoa mai ai e Landon ia te au upu faamavae a le alii talavou lea ia te ia: “Sa ou faatuatua o le a faamanuia mai le Tama Faalelagi ia te au, ae sa le mafai ona ou manatu o le a Ia auina mai se tasi e fesoasoani ia te au, o se sa galue i la’u misiona. Ua ou iloa nei o le a lelei mea uma.”² Sa faafogaina ma

tali mai se tatalo faatauva'a a se loto faamaoni.

Ou uso e ma tuafafine, i o tatou olaga o le a i ai o tatou faaosoosoga; o le a i ai o tatou tofotofoga ma luitau. A tatou o i le malumalu, a tatou manatua a tatou feagaiga tatou te osia iina, o le a sili ona tatou mafaia ona faatoilalo na faaosoosoga ma onosaia o tatou tofotofoga. O totonu o le malumalu e mafai ona tatou maua ai le filemu.

O faamanuiaga o le malumalu e le mafaatauina. O se tasi ou te matua faafetai ai lava i aso uma o lo'u olaga, o lea na ma maua ai ma lo'u toalua pele, o Frances a o ma tootutuli i se fatafaitaulaga paia ma osia feagaiga e noatia faatasi ai ma'u'a mo le faavavau atoa e leai se faamanuiga e sili atu ona taua ia te au, nai lo le filemu ma le mafanafana ua ou maua mai le malamalama ua ou maua, o ia ma a'u o le a toe mafuta faatasi.

Tau ina ia faamanuia i tatou e lo tatou Tama Faalelagi ia tatou maua le agaga o le tapuai i le malumalu, ia tatou usiusitai i Ana poloaiga, ma ia tatou mulimuli ma le faaeteete i laasaga o lo tatou Alii ma le Faaola, o Iesu Keriso. Ou te molimau atu o Ia o lo tatou Togiola. O Ia o le Alo o le Atua. O Ia lea na afio mai i fafo mai le tuugamau i lenei taeao muamua o le Eseta, ma aumaia ai faatasi ma Ia le meaalofo o le ola e faavavau mo fanau uma a le Atua. I lenei aso matafogie, a o tatou faamanatuina lenei mea tulaga ese na tupu, tau ina ia tatou ofo atu ia tatalo o le lotofaafetai mo Ana meaalofo sili ma le ofoofogia mo i tatou. Ia faapea ia ona fai, ou te tatalo ai ma le lotomauualalo i Lona suafa paia, amene. ■

FAAMATALAGA

1. Ioane 14:27.

2. Tusi i le mauaina o Thomas S. Monson.



Saunia e Rosemary M. Wixom
Peresitene Aoao o le Peraimeri

Toe Fo'i i le Faatuatua

E mafai e i tatou taitoatasi ona faamalosi lo tatou faatuatua ia Iesu Keriso i a tatou faigamalaga taitoatasi ma maua le olioli.

I lenei taeao o le Eseta, Peresitene Monson, matou te faafetai tele e faalogologo atu i le siufofoga o lo tatou perofeta soifua. Matou te faatāuina au saunoaga, e aofia ai au fautuaga “Saili le olioli i le faigamalaga”¹ ma le “E i ai le faamoemoe i le lumanai e pei foi o lou faatuatua.”²

I lenei tausaga o loo faasoaina e tamaiti o le Peraimeri le olioli ma le malosi o lo latou faatuatua ia Iesu Keriso pe a latou usuina le pese “Ou Te Iloa E Alofa Lo'u Faaola Ia Te A'u.” Latou te usuina le upumoni “O Lo'o Soifua o Ia! . . . Avatu lo'u loto ia te Ia.”³ E pei o fanau Peraimeri, e mafai foi e i tatou taitoatasi ona faamalosi lo tatou faatuatua ia Iesu Keriso i a tatou faigamalaga taitoatasi ma maua le olioli.

I se sauniga o le Aso Sa talu ai nei a le Aualofa, sa ou faalogo ai i se tina talavou o faaso le vaega o lana faigamalaga o le liua. Sa ia ola ae i le Ekalesia, ma ni matua o ē sa aoaoina o ia i le talalelei. Sa ia auai i le Peraimeri, Tamaitai Talavou, ma le seminare. Sa ia fiafia e aoao ma iloaitino upumoni. O lana sailiga faifai pea o le fiaioaina o le *aisea [po o le mafuaaga o mea]*. Ua saunoa mai Elder Russell M. Nelson, “Ua na o se mafaufau e fia iloa e mafai ona aoaoina e le Alii.”⁴ Ma o lenei tamaitai talavou sa mafai ona aoaoina.

Ina ua maea le aoga mauualuga, sa ia auai i se iunivesite, sa faamauiina i le malumalu i se faifeautalai ua maea le misiona, ma sa faamanuiaina i ni fanau aulelei.

Faatasi ai ma le agaga o le suesue, sa faaauau pea e lenei tina ona fai atu ni fesili. Ae a o faasolo faigata ia fesili, sa faapena foi i tali. Ma o nisi taimi sa leai ni tali—pe leai ni tali na aumaia ai le filemu. Na iu lava, a o ia saili e maua tali, na faateleina le alia'e o fesili, ma sa amata ona ia fesiligia ai nisi o faavae moni o lona faatuatua.





I lea taimi o le fenumiā, na faapea atu ai nisi sa siomiaina o ia, “Tau lava o lou faalagolago mai i lo’u faatuatua.” Ae sa ia mafaufau, “E le mafai ona ou faia. Tou te le malamalama; tou te le o taulimaina nei faafitauli.” Sa ia faamalamalama atu, “Sa ou naunau e faaloalo ia i latou sa aunoa ma ni masalosaloga pe afai latou te faaloalo mai foi ia te a’u.” Ma na faia e le toatele.

Sa ia saunoa mai, “Sa iloa e o’u matua lo’u loto ma sa tuuavanao mai ia te au. Sa la filifili e alolofa ia te a’u a o o’u taumafai e faavasegaina mo a’u lava.” Na faapena foi, sa masani ona feiloai le epikopo ma lenei tina talavou ma talanoaina lona talitonuina o [lea tina].

Sa le’i faatuai foi ona tuuina atu e tagata o le uarota le alofa, ma sa ia lagona le faaofiaina o ia. O lana uarota sa le o se nofoaga e faafoliga ai le amiotonu; o se nofoaga sa faafailele ai le amio.

“Sa mataina,” na ia manatua. “I lea taimi sa ou lagona se sootaga malosi i o’u matua matutua ua maliliu. Sa laua lagolagoina au ma augani mai ia te au e taumafai pea. Sa ou lagona le la fai mai, ‘Taulai atu i mea ua e iloa.’”

E ui i le toatele o tagata na lagolagoina o ia, ae sa oo ina le toaga o ia. Sa ia fai mai, “Ou te le’i faaesea a’u lava mai le Ekalesia ona o amioga leaga, le lē manatu mamafa i mea faaleagaga, saili mo se ‘alofaga e lē ola ai i poloaiga, pe saili mo se auala faigofie e taulimaina ai o’u popolega. Sa ou lagona na ou

manaomia le tali i le fesili ‘O le a tonu le mea lea ou te talitonu i ai?’”

Pe tusa o se taimi faapenei sa ia faitau ai i se tusi o tusitusiga a Mother Teresa, o lē sa i ai foi ni lagona faapenei. I se tusi i le 1953, sa tusia ai e Mother Teresa: “Faamolemole tatalo faapitoa mo au ina ia ou lē faaleagaina Lana galuega ma ia mafai e lo Tatou Alii ona faaali mai o Ia Lava—aua o loo i ai se pogisa matautia i totonu ia te au, e pei ua mate mea uma. Sa faapea i taimi eseese talu mai ona ou amataina ‘le galuega.’ Ole atu i lo Tatou Alii e aumai ia te au le lototele.”

Na tali le Akiepipikopō o Périer: “E taitai oe e le Atua, Tina pele; e lē o pogisa tele le mea o e i ai e pei ona e manatu i ai. O le ala e mulimuli ai atonu e le o taimi uma e vave manino ai. Tatalo mo le malamalama; aua nei vave faia se faaiuga, faalogo i mea e tau atu e isi, mafaufau i a latou mafuaaga. O le a e maua pea se mea e fesoasoani ia te oe. . . . Taialaina e le faatuatua, e le tatalo, ma le faautautaga ma se faamoemoega sa’o, ua lava lena mo oe.”⁵

Na manatu la’u uo afai na mafai e Mother Teresa ona ola i lana tapuaiga e aunoa ma tali uma ma e aunoa ma se lagona manino i mea uma, atonu e mafai foi e ia. E mafai ona ia faia se la’ se tasi faigofie agai i luma i le faatuatua—ona sosoo ai lea ma le isi. E mafai ona ia taulai i upumoni ua ia talitonu i ai ma tuu na upumoni e faatumulia lona mafaufau ma le loto.

Ina ua ia mafaufau i tua i le mea na tupu, sa ia faapea mai, “Sa matuai faavaivaia la’u molimau. Sa faaleagaina atoa. Ae na pau le mea na totoe o Iesu Keriso.” Sa ia faaauai ai, “Ae Na te le tuua oe pe a i ai ni au fesili. Pe a taumafai se tasi e tasi poloaiga, e vatele pea le matala o le faitotoa. Na matuā taua lava le tatalo ma le suesueina o tusitusiga paia.”

O lana la’a muamua e toefausia lona faatuatua sa amata i upumoni autu o le talalelei. Sa ia faatauina se tusipese a le Peraimeri ma amata ona faitau i upu o pese. Sa amata ona ia fiafia i nei pese. Sa ia tatalo mo le faatuatua e aveesea ai le mamafatū na ia lagonaina.

Sa ia iloina e faapea, pe a ia fetai ai ma se faamatalaga e mafua ai ona ia masalosalo, e “mafai ona [ia] tu, tagai i le mea atoa o loo tupu, ma faaoga patino le talalelei ia te ia lava.” Sa ia fai mai, “E masani ona ou fesili, ‘Pe o le ala sao ea lea mo a’u ma lo’u aiga?’ O nisi taimi ou te fesili ifo ia te au lava, ‘O le a se mea ou te manao ai mo la’u fanau?’ Sa ou iloa na ou manao ia i latou e faia ni faaipopoga o le malumalu. O le taimi lena na oo mai ai le talitonuga i lo’u loto.”

Ua saunoa mai Elder Jeffrey R. Holland, “O le lotomauualalo, faatuatua, ma le faatosinaga a le Agaga Paia [o le a] avea pea ma elemene o sailiga *uma* mo le upumoni.”⁶

E ui na i ai ni ana fesili e uiga i le auala na oo mai ai le Tusi a Mamona, ae sa le mafai ona ia faafitia ia upumoni na ia iloina i le Tusi a Mamona. Sa ia taulai i le suesueina o le Feagaiga Fou ia malamalama atili ai i le Faaola. Sa ia fai mai, “Ae na iu lava na ou toe faitauina le Tusi a Mamona aua sa ou fiafia i le mea na ou lagonaina pe a faitau e uiga ia Iesu Keriso ma Lana Togiola.”

Sa ia faaiaina, “E ao lava ia te oe ona e mauaina ni ou lava aafiaga faaleagaga



i upumoni o i lena tusi,” ma sa ia mauaina [na aafiaga]. Sa ia faamatalaina, “Sa ou faitau i le Mosaea ma lagona le taitaiina atoatoa. ‘Ia talitonu i le Atua; ia talitonu o loo soifua o ia, ma o ia na foafoaina mea uma . . . ; ia talitonu ua ia te ia le poto uma, ma le mana uma, i le lagi ma le lalolagi; ia talitonu e lē mafai e le tagata ona malamalama i mea uma e mafai ona malamalama i ai le Alii.’”⁷

Pe tusa o se taimi faapenei sa oo mai ai se valaauga e galue o se ta piano o le Peraimeri. “Sa saogalemu,” o lana tala lea. “Sa ou manao ia i ai la’u fanau i le Peraimeri, ma o lea ua mafai ona ou faatasi ma i latou. Ma sa ou le’i saunia e aoao atu.” A o ia galue, sa faaaauu ona ia lagona [uiga] a i latou na siomia o ia o le valaaulia e “Sau; matou te taliaina oe, i soo se tulaga o e i ai, ma o le a matou galulue ma oe i le tulaga o e i ai. Tuu mai ia i matou soo mea e te ofoina mai.”

O le taitaina o pese a le Peraimeri, e masani ona ia manatu ifo ia te ia lava, “O upumoni nei ou te fiafia i ai. O loo mafai pea ona ou faasoa atu le molimau. Ou te tau atu na o na mea ou te iloa ma faatuatua. Atonu e le o se taulaga atoatoa o le malamalama, ae o le a avea ma a’u taulaga. O mea ua ou molimau ai ua faamalosiā i lo’u loto. Ua matagofie le toe foi atu i le ute o le talalelei ma lagonaina le manino.”

I lena taeao o le Aso Sa, a o ou

faalogo i lenei uso talavou o faasoa le tala o lana faigamalaga, sa faamanatu mai ai ia te au “o luga o le papa o lo tatou Togiola” e tatau ona tatou atiae uma ai lo tatou faavae.⁸ Sa toe faamanatu mai foi ia te au le fautuaga a Elder Jeffrey R. Holland: “Ia taofi mau i mea ua uma ona outou iloa ma tutu malolosi seia oo mai se isi malamalama.”⁹

I le taimi o lana lesone, sa oo ina ou iloa atili ma le naunautai, o tali i a tatou fesili faamaoni e oo mai pe a tatou saili ma le naunautai ma pe a tatou ola i poloaiga. Sa faamanatu mai ia te au e mafai ona fesoasoani lo tatou faatuatua e talitonu i mea tatou te le malamalama i ai i lena taimi.

Oka, e maeu lo’u manao ia pei o na tagata o e na siomia lenei tina talavou, agaalofa ma lagolago o ia. E pei ona saunoa mai Peresitene Dieter F. Uchtdorf: “O i tatou uma o tagata malaga o loo saili i le malamalama o le Atua a o tatou malaga i luga o le ala o le avea ma soo. Tatou te le tuuaia fua isi mo le aofaiga o le malamalama latou te ono maua pe ua le mafai foi ona maua; ae, tatou te faafai-lele ma uunaia le malamalama atoa seia oo ina manino, susulu, ma moni.”¹⁰

A usuina e fanau Peraimeri “Le Tatalo a Se Tamaititi [A Child’s Prayer],” latou te fesili: “Tama Faalelagi, o e i ai moni iinā? E te faafofoga ma tali i tatalo a tamaiti uma?”¹¹

Atonu tatou te tuufesili foi, “O I Ai moni ea le Tama Faalelagi iina?” ae olioli ai—e pei o lau uo—pe a oo mai tali i faamautinoaga filemu ma faigofie. Ou te molimau atu o na faamautinoaga faigofie e oo mai pe a avea Lona finagalo ma o tatou loto. Ou te molimau atu o loo i ai le upumoni i le lalolagi i le asō ma o Lana talalelei o loo maua i Le Ekalesia a Iesu Keriso o le Au Paia o Aso e Gata Ai. I le suafa o Iesu Keriso, amene. ■

FAAMATALAGA

1. Thomas S. Monson, “Mauaina o le Olioli i le Faigamalaga,” *Liahona*, Nov. 2008, 85.
2. Thomas S. Monson, “Ia Avea ma Tagata Sili e Mafai ona Avea ai Oe,” *Liahona*, Me 2009, 92.
3. “Ou Te Iloa E Alofa Lo’u Faaola Ia Te A’u,” i le *Ou Te Iloa E Alofa Lo’u Faaola Ia Te A’u: 2015 Otootoga mo le Taimi o Fetufaaiga* (2014), 29.
4. Russell M. Nelson, i le M. Russell Ballard, “What Came from Kirtland” (Faesaite a le Iunivesite o Polika Iaga, Nov. 6, 1994); speeches.byu.edu.
5. I le *Mother Teresa: Come Be My Light—The Private Writings of the Saint of Calcutta*, ed. Brian Kolodiejchuk (2007), 149–50; punctuation standardized.
6. Jeffrey R. Holland, “Aua E te Mata’u, Tau Lava Ina E Faatuatua” (o se faasauga ma Elder Jeffrey R. Holland, Fep. 6, 2015); lds.org/broadcasts.
7. Mosaea 4:9.
8. Tagai Helamana 5:12.
9. Jeffrey R. Holland, “Le Alii e, Ua Ou Faatuatua,” *Liahona*, Me 2013, 94.
10. Dieter F. Uchtdorf, “Mauaina o se Molimau o le Malamalama ma le Upumoni,” *Liahona*, Nov. 2014, 22.
11. “A Child’s Prayer,” *Children’s Songbook*, 12.



Saunia e Elder José A. Teixeira
○ Le Fitugafulu

Saili Atu i le Alii

A tatou faalolotoina lo tatou malamalama i le Faaola, o le a tatou mauaina se manaoga faateleina e ola fiafia ma se talitonuga maumaututu e mafai ona maua le olioli.

O uso e ma tuafafine, o se fiafiaga tele lo'u tu ai i o outou luma a o tatou auai faatasi ai i lenei konafesi aoao. I le faalogologo ai i timaiga atamai, fautuaga, faamafanafanaga, ma lapataiga e tuuina atu i konafesi aoao i le tele o tausaga, ua avefa pea ma se faamanuiaga lē mafua-tiaina ia Sister Teixeira, i lo matou aiga, faapea ma au.

I lenei vaitau faapitoa o le tausaga, aemaise lava i lenei Sapati o le Eseta, ua ou mafaufau ai lava i le taua o aoaoga a le Faaola ma Lana faaitaiga agalelei ma le agaaloa i lo'u olaga.

O se malamalama loloto atu ia Iesu Keriso o le a tatou maua ai se faamoe-moe sili atu mo le lumanai ma se talitonuga sili atu i le ausiaina o a tatou sini amiotonu, e tusa lava po o a ni o tatou lē atoatoa. O le a tatou maua ai foi se manaoga sili atu ia auauna atu i o tatou uso a tagata.

Na fetalai le Alii, “[Saili] mai ia te a'u i mafaufauga uma; aua le masalosalo, aua le fefefe.”¹ O le sailia o le Alii ma lagonaina Lona mamalu o se sailiga o aso uma, o se taumafaiga taua.

Uso e ma tuafafine, o le taimi nei ua sili atu i lo se isi lava taimi, ua tatou maua ai ni avanoa tulaga ese ma ni punaoa e faalolotoina ai lo tatou

malamalama i aoaoga a Iesu Keriso ma Lana Togiola. O le faaaogaina o nei punaoa ma le talafeagai o le a fesoasoani ai ia i tatou ia ola i se olaga uluola i le olioli.

I le faataoto a le Faaola i le Vine ma lala, sa Ia fetalai ai: “Ina tumau ia o outou ia te au, o a'u foi ia te outou. Faapei o le la e le mafai ona fua pe a na o ia, pe afai e le mau i le vine; e faapea foi outou, pe afai tou te le tumau ia te au.”²

O le faateleina o lo tatou malamalama i le matafaioi tulaga ese a Keriso i o tatou olaga, o le faateleina foi lena o lo tatou iloaina o lo tatou faamoemoega iinei i le olaga faaletino, o lona uiga ia maua le olioli. Peitai, o lena olioli e le taofia ai i tatou mai le oo i tofotofoga ma faigata, e oo lava i mea e sili ona faigata ia e ono taitai atu ai i tatou e manatu e le mafai ona maua le fiafia i ni tulaga faapena.

Ua ou iloa e ala i ni aafiaga faale-tagata lava ia o le olioli i le ola ai i le amiotonu ma le tumau ia Keriso e mafai lava ona aveavea'i e ui i ni fesoua'iga ia ua masani ai i le olaga faaletino. I le iuga, o nei fesoua'iga e tele lava ina fao-aina ai, faaleleia ai, ma taiala ai i tatou i se malamalama loloto atu e uiga i le faamoemoega o lo tatou i ai i lenei olaga ma le Togiola a Iesu Keriso. O le mea moni, ua na o Iesu Keriso lava e mafai

ona maua ai le atoatoaga o le olioli.³

Ua Ia fetalai mai, “O a'u nei o le vine, o la outou. O lē tumau ia te au, ma a'u ia te ia, o ia lava e fua tele mai; aua e le mafaia e outou ona fai o se mea e tasi pe a a'u le i ai.”⁴

Ou te talitonu pe a tatou faalolotoina lo tatou malamalama i le Faaola, o le a tatou mauaina se manaoga faateleina e ola fiafia ai ma se talitonuga maumaututu e mafai ona maua le olioli. O lea la, o le a tatou maua ai se tomai sili atu e ola ai i aso taitasi ma se naunautaiga sili atu mo le olaga ma le tausaga o poloaiga a le Atua, e oo lava i tulaga luitauina.

Aua nei o tatou tuua ni mea mo taeao o mea e mafai ona tatou faia i le asō. O le taimi nei lava e tatau ai ona tatou o mai ia Keriso ona “afai [tatou] te talitonu . . . ia te [Ia], o le a [tatou] galulue manū o ta'ua o le asō.”⁵

O aso uma lava e tatau ai ona tatou mafaufau e faaaofia aoaoga a Keriso i a tatou fegalegaleaiga faisoo. O gaoioiga ma faatinoga iti ma faatauvaa e faia i aso taitasi o le a:

1. Faalolotoina ai lo tatou malamalama i le taua o le Alii i o tatou olaga, ma
2. Fesoasoani ia i matou e faasoatu lenei malamalama i le tupulaga faiaie, o ē o le a mautinoa lava e lagonaina le alofa o le Tama Faalelagi ma Lona Alo, o Iesu Keriso, pe a latou vaaia a tatou faaitaiga o le ola faamaoni i le talalelei.

O a la nisi o amioga faigofie i lenei vaitaimi o le a avefa ma se pulupāsama mo o tatou agaga i le faamalosiā o a tatou molimau ia Keriso ma Lana misiona?

I le 2014, sa maua ai e le tauvaga a le National Geographic ni ata tauva e 9,200 mai pueata faapolofesa ma ē na lagolagoina, mai le silia ma le 150 atunuu. O le ata na manumalo o loo faaalai ai se tamaitai i le ogatotonu o le

nofoaafi na faatumulia i ni pasese. O le malamalama mai lana telefoni feaveai na suluia ai ona foliga. Sa ia avatua se savali manino i isi pasese: e ui lava i lona i ai moni iina, ae e ese le mea o loo ia gauai atu i ai.⁶

O faamatalaga feaveai, telefonipoto,



I luga: Faasalalaga o le konafesi aoao mai totonu o se vaalele. Tauagavale: O le ata na manumalo mai le tauvaga ata a le 2014 National Geographic o loo faaalua ai se tamaitai o loo avatua se savali manino i isi pasese o le nofoaafi: e ui lava i lona i ai moni iina, ae e ese le mea o loo ia gauai atu i ai.

ma ola i se olaga sili atu ona uluola.

Mo nei mafuaaga, ou te fia ta'ua i le aso ni mausa faigofie se tolu o le a atiaeina ai gaoioiga maloloina i le initoneti. O nei mausa o le a faagaoioia ai iloilogia faaletagata lava ia i aso uma ia e taua mo i tatou ia latalata atili ai i aoaoga a lo tatou Tama Faalelagi ma Lona Alo, o Iesu Keriso.

Mausa 1: Asiasi atu i le Uepisaite Aloaia a le Ekalesia mo Punaoa

E masani o nei asiasiga i le vaiaso i nei punaoa o le a fesoasoani ia i tatou ia manatunatu ai i aoaoga o le talalelei ma uunaia o tatou aiga ma uo e mafaufau ma toe tomanatu i mea e sili ona taua.

Mausa 2: Ia Lesitala i Upega Tafailagi Aloaia a le Ekalesia

O lenei filifiliga o le a aumaia ai anomea i lau masini lea e taua i le faalolotoina o lau sailiga ma le sueina o le Alii ma Ana aoaoga, ma o le a faama-losia ai lou manao ia malamalama i le talalelei. O le mea e sili ona taua, o le a fesoasoani lenei mea ia te oe ia manatua le mea ua faamoemoeina e Keriso mai ia i tatou taitoatasi.

E pei lava o le “Leai o se eleele lelei pe a leai se faifaatoaga lelei,”⁷ e faapena foi ona leai se seleselega lelei i le initoneti sei vagana ua tatou

ma upega o fesootaiga ua matuai suia ai lava le auala o lo tatou i ai i le lalolagi ma le auala tatou te fesootai atu ai i isi.

I lenei vaitau faatekinolosi, ua mafai ai ona matuai faatelevaveina lo tatou feoai i nofoaga ma gaoioiga ia e mafai ona aveesea vave ai i tatou lava mai le mea e taua mo se olaga e faatumulia i le olioli tumau.

I lenei olaga o Initoneti, afai e le puleaina, o le a mafai ona tatou ave i ai le faataua i ni sootaga ma ni tagata tatou te le iloaia pe le i feiloai foi lava i ai, nai lo tagata tatou te nonofo faatasi—o o tatou lava aiga!

I le isi itu, ua tatou iloa uma lava ua

faamanuiaina i tatou i punaoa sili ona lelei faainitoneti, e aofia ai punaoa ua atiaeina e le Ekalesia e pei o lomiga tusitusia ma leo o tusitusiga paia ma konafesi aoao, gaosiga o ata o le soifuaga ma aoaoga a Iesu Keriso, polokalama komepiuta e faamaumau ai o tatou talafaasolopito o aiga, ma avanoa e faalogologo ai i musika musuia.

O filifiliga ma mea e faamuamua tatou te faia i o tatou taimi i luga o le initoneti e matua faatosina lava. E mafai ona latou puleaina le taunuuga o lo tatou alualu i luma faaleagaga ma le lava o le silafia i le talalelei, ma lo tatou manao ia saofagā i se lalolagi sili atu

faamuamuaina mai lava i le amata-
taga mea lelei e mafai ona mauaina
e o tatou tamatamailima ma o tatou
mafau.

Mausa 3: Faatulaga se Taimi e Tuu ese ai Au Masini Feaveai

O se lagona faafouina le tuu ese
o a tatou masini faaeletonika mo se
taimi ma susue itulau o tusitusiga paia
pe faaalu se taimi e talatalanoa ai ma
le aiga ma uo. Aemaise lava i le aso
[Sapatil] o le Alii, ia lagonaina le filemu
o le auai i se sauniga faamanatuga
e aunoa ma se unaiga faifai pea e
autilo pe o i ai se feau fou po o se
tala fou [mai le facebook].

O mausa o le tuueseina o masini
feaveai mo se taimi o le a faamauoa-
ina ai ma faalateleina ai lau vaaiga i
le olaga, aua o le olaga e le faatapu-
laaina i se lau e fa inisi le tele (10-cm).

Na fetalai le Alii o Iesu Keriso,
“Faapei ona alofa mai o le Tama ia te
au, e faapea lava ona ou alofa atu ia
te outou; ia tumau pea outou i lo’u
alofa.”⁸ E finagalo le Atua ia maua le
olioli ma lagona Lona alofa. Ua faafai-
gofie e Keriso ona maua lena olioli mo
i tatou taitoatasi. Ua tatou maua auala
e iloa atili ai o Ia ma ola i Lana talalelei.

Ou te molimau atu i le olioli e
maua pe a tatou tausia poloaiga faa-
pea ai ma le filemu ma le saogalemu
tatou te lagonaina pe a tatou tumau i
le alofa o le Tama Faalelagi ma Lona
Alo, lo tatou Faaola. I le suafa o Iesu
Keriso, amene. ■

FAAMATALAGA

1. Mataupu Faavae ma Feagaiga 6:36.
2. Ioane 15:4.
3. Tagai Ioane 15:11.
4. Ioane 15:5.
5. Mataupu Faavae ma Feagaiga 64:25.
6. Tagai “Photo Contest 2014,” *National Geographic*, photography.nationalgeographic.com/photography/photo-contest/2014/.
7. Le mailoa le Tusitala.
8. Ioane 15:9.



Saunia e Epikopo Gérald Caussé

Fesoasoani Muamua i le Au Epikopo Pulefaamalumalu

Pe O Ofoofogia Pea Ea ia te Oe?

*O le maofa i mea ofoofogia o le talalelei o se faailoga o le faatuatua.
O le iloa lea o le aao o le Alii i o tatou olaga ma i mea uma o loo
siomia ai i tatou.*

S a ma maua ma lo’u toalua le olioli
tele i le tausiga o le ma fanau e
toalima e lata i le aai matagofie
o Pale. I na tausaga sa ma mananao
ai e avatu ia i latou ia avanoa lelei e
tele e vaili ai mea ofoofogia o lenei
lalolagi. O taumafanafana taitasi, matou
te faia ai ni malaga uumi e asiasi ai i
maafaamanatu sili ona taua, o nofoaga
logologoa, ma le ofoofogia faanatura o
Europa. Mulimuli ane, ina ua uma ona

faaalu tausaga e 22 i le eria o Pale, sa
matou saunia e tuua. Ou te manatua
pea le aso na o mai ai la’u fanau ma fai
mai, “Tama, o se matua tulaga maasi-
asi tele! Sa tatou nonofo iinei i o tatou
olaga atoa, ae tatou te lei o lava i le
Olo o Eiffel!”

E tele naua mea ofoofogia i lenei
lalolagi. Peitai, o nisi taimi afai e tu mai
pea i o tatou luma, ona tatou le ano
lea i ai. Tatou te vaai, ae tatou te le



iloa moni; tatou te faalogo, ae tatou te le lagonaina moni.

I le taimi o Lana galuega i le lalolagi, na fetalai atu ai Iesu i Ona soo:

“Amuia mata ua iloa mea tou te iloa:

“Aua ou te fai atu ia te outou, e toatele perofeta ma tupu na fia matamata i nei mea ua outou iloa, a ua latou le iloa lava; na latou fia faalogo foi i nei mea ua outou faalogo ai, ae lei faalogo ai lava.”¹

E tele taimi ou te manatunatu ai pe mata o a ni foliga o le ola ai i le taimi o lo tatou Faaola. Mata e mafai ona e mafaufau o e nofo i Ona aao? Lagonaina Lona opo mai? molimau a o Ia auauna atu i isi? Ae e matua toatele i latou na feiloai ia te Ia ae le'i iloina—e lei “iloa” lava—o le Alo lava lea o le Atua sa latou nonofo faatasi.

Ua faamanuiaina foi i tatou i le ola ai i se taimi tulagaese. Sa vaai perofeta anamua i le galuega o le Toefuataiga o “se galuega ofoofogia . . . , ioe, o se galuega ofoofogia ma le mea e ofo ai.”² E leai se tisipenisione ua toatele naua ni faifeautalai ua valaauina ai, ua tele naua malo ua tatala mo le savali o le talalelei, ma ua tele naua malumalu ua fausia i le lalolagi atoa.

Mo i tatou, i le avea ai o ni Au Paia o Aso e Gata Ai, ua tutupu foi mea ofoofogia i o tatou olaga taitasi. E aofia ai lo tatou lava liua patino, o tali tatou te maua i a tatou tatalo, ma faamanuiaga mutimutivale e liligi mai e le Atua i o tatou luga i aso taitasi.

O le maofa i mea ofoofogia o le talalelei o se faailoga o le faatuatua. O le iloa lea o le aao o le Alii i o tatou olaga ma i mea uma o loo siomia ai i tatou. O lo tatou maofa foi e maua ai le malosi faaleagaga. E aumai ai ia i tatou le malosiaga e tumau ai ona taula i lo tatou faatuatua ma punouai ai i tatou lava i le galuega o le faaolataga.

Ae ia tatou faaeteete. O lo tatou tomai e maofa ai e maaleale. Mo se



taimi umi, o na mea e pei o le tausi faatemeteme o poloaiga, faatalale, po o le paie e ono mautu ia i tatou, ma tatou le nofouta ai i faailoga aupito ofoofogia ma vavega o le talalelei.

O loo faamatala mai i le Tusi a Mamona se vaitau, e tali foliga foi i o tatou taimi, lea na tomua i le afio mai o le Mesia i Amerika. Na faafuasei ona alia'e i le lagi faailoga o Lona soifua mai. Sa matua fememeai tagata i le maofa ma faamaualaloina ai i latou lava, ma na toetoe o i latou uma sa liua. Peitai, na o se fa tausaga mulimuli ane “na amata ona galo i tagata ia faailoga ma mea ofoofogia ia sa latou faalogo i ai, ma amata ona faaitiitia ifo lava i lalo lo latou ofo i se faailoga po o se mea ofoofogia mai le lagi, . . . ma amata ona le talitonu i mea uma sa latou faalogo ma vaai i ai.”³

Ou uso e ma tuafafine, pe o ofoofogia ea lava le talalelei ia te oe? Pe o mafai ea ona e vaai, faalogo, lagona, ma maofa? Pe ua e le toe lagonaina mea faaleagaga? Po o le a lava lou tulaga patino o i ai, ou te valaaulia outou ia faia ni mea se tolu.

Muamua, aua lava nei e fiu i le sailia ma toe sailia ia maua upumoni o le talalelei. Fai mai le tusitala o Masela Porusi, “O le folauga moni o le sailia o mea fou e le o i le sailia o vaaiga fou, ae o le vaai atu i mea i ni mata fou.”⁴ Pe o e manatua le taimi muamua na e faitau ai se fuaiupu o le tusi paia ma e lagonaina ai e faapei o loo fetalai patino atu le Alii ia te oe? Pe mafai ona e tomanatu i le taimi muamua na e lagonaina ai le faatosinaga mālū a le Agaga Paia ua oo atu ia te oe, atonu ae e te lei iloina muamua o le Agaga Paia? Pe le o ni taimi paia, faapitoa ea na?

E ao lava ona tatou fiiāai ma fiafeinu i aso uma i le malamalama faaleagaga. O lea faiga patino e faavae i luga o le suesue, mafaufau loloto, ma le tatalo. O nisi taimi atonu e tofotofoina i tatou e mafaufau faapea, “Ou te le tau suesue i tusitusiga paia i le asō: Ua uma ona ou faitauina uma muamua” pe “Ou te le tau alu i le lotu i le asō e leai a ni mea fou o i ai.”

Ae o le talalelei o se punavai o le malamalama e le mafai lava ona



mātūtū. E i ai pea lava se mea fou e aoao ma lagonaina i Aso Sa taitasi, i fuaiupu taitasi o tusitusiga paia. I le faatuatua tatou te taofimau i le folafolaga afai tatou te “saili, . . . [tatou] te maua.”⁵

Lua, taula lou faatuatua i upumoni manino faigofie o le talalelei. O lo tatou maofa e tatau ona mauaa i mataupu faavae autu o lo tatou faatuatua, i le mama a’ia’i o a tatou feagaiga ma sauniga, ma i a tatou faatinoga sili ona faigofie o le tapuai.

Sa faamatala e se tuafafine faifeautalalai le tala o ni alii se toatolu sa ia feiloai i ai i se konafesi faaleitu i Aferika. Sa o mai i latou mai se nuu tuufua e mamao ese i le togavao lea e lei faavae ai le Ekalesia ae toa 15 tagata faamaoni o le Ekalesia ma toeitiiti atoa le 20 o tagata sailiili. E silia ma le lua vaiaso sa savavali atu ai nei alii i le silia ma le 300 maila (480 km) i luga o ala palapala ona o le vaitau o timuga, ina ia mafai ona latou auai i le konafesi ma avatu sefuluai mai tagata o la latou vaega. Sa latou fuafua e nonofo mo se vaiaso atoa ina ia latou fiafia i le avanoa e aai ai ma feinu i le faamanatuga i le Aso Sa na sosoo ai, ona faamoemoe lea e toe alu le latou malaga tofo’i ma ave i luga o o latou ulu ni pusa e tutumu i kopi o le Tusi a Mamona e avatu i tagata o lo latou nuu.

Sa molimau mai le faifeautalalai e maeu le ootia o lona loto i le lagonaina

o le ofoofogia na faaalai e nei uso, ma a latou osigataulaga ma le loto atoa ina ia maua mea sa manatu o ia, ua uma ona i ai.

Sa ia tomanatu: “Sa ou taumana-tunatu ifo ia te au lava; afai ou te ala a’e i se taeao o se Aso Sa i Arisona ma iloa e le o ola la’u taavale, mata ou te savali i la’u lotu lea e le mamao mai le fale? Pe o le a na ona ou nofo i le fale ona e mamao tele pe ona o loo timu?”⁶ O ni fesili lelei nei tatou te mafaufau uma i ai.

O le mea mulimuli, ou te valaaulia outou e saili ma faapelepele i le mafutaga ma le Agaga Paia. O le tele o mea ofoofogia o le talalelei, e le mafai ona vaaia e o tatou mata faanatura. O mea ia e “lei vaaia e mata, e lei lagona foi e taliga, . . . o mea ia ua saunia e le Atua mo i latou o e alofa ia te ia.”⁷

A i ai le Agaga ma i tatou, o le a faigofie ona tatou lagonaina mea faaleagaga ma mumu lo tatou manatua ina ia le mafai ai ona galo ia i tatou o vavega ma faailoga ua tatou molimauina. Atonu o le mafuaaga lena, i le iloa ai o le a tuua i latou e Iesu, sa tatalo faatauanau ai Ona soo sa Nifae “mo lena mea na sili ona latou mananao i ai; ma sa latou manaomia ona tuuina mai le Agaga Paia ia te i latou.”⁸

E ui ina sa latou vaai i le Faaola i o latou lava mata ma sa pa’i atu foi i Ona

manua i o latou lava lima, sa latou iloa e ono maluelue a latou molimau e aunoa ma le faafouina pea lava pea e le mana o le Agaga o le Atua. O’u uso e ma tuafafine, aua lava nei faia se mea e ono leiloa ai lenei meaalofa taua ma le ofoofogia—le mafutaga a le Agaga Paia. Saili atu i ai e ala i le tatalo faatauanau ma le ola amiotonu.

Ou te molimau atu o le galuega o loo tatou punouai ai o “se galuega ofoofogia ma o se mea e ofo ai.” A o tatou mulimuli ia Iesu Keriso, e molimau mai le Atua ia te i tatou, “i faailoga ma vavega, i mea mamana esese foi, ma mea alofa mai le Agaga Paia, e tusa ma lona lava finagalo.”⁹ I lenei aso faapitoa, ou te tuuina atu la’u molimau o mea ofoofogia ma mea e maofa ai o le talalelei o loo taula i le meaalofa aupito silisili o meaalofa uma a le Atua—o le Togiola a le Faaola. O le meaalofa atoatoa lenei o le alofa lea e autasi ai le Tama ma le Alo i le faamoemoe, ua ofoina mai ia i tatou taitoatasi. Faatasi ai ma outou “Ou te tu [ai] ma ofo i le alofa o Iesu mo au. . . . E maeu lava, maeu naua!”¹⁰

Ia i ai pea ni o tatou mata e vaai ai, o taliga foi e faalogo ai, ma loto e iloa ai mea ofoofogia o lenei talalelei maoae o la’u tatalo lea i le suafa o Iesu Keriso, amene. ■

FAAMATALAGA

1. Luka 10:23–24.
2. Nifae 27:26.
3. 3 Nifae 2:1.
4. “Marcel Proust,” *Guardian*, July 22, 2008, theguardian.com/books/2008/jun/11/marcelproust.
5. Mataio 7:7.
6. Fetuunaia mai le Lorraine Bird Jameson, “The Giants of Kinkondja” (article on Africa Southeast Area website, 2009); web.archive.org/web/20101210013757/http://www.lds.co.za/index.php/news-a-events/news/aseanews/91-the-giants-of-kinkondja.
7. 1 Korinito 2:9.
8. 3 Nifae 19:9.
9. Eperu 2:4.
10. “Ou Te Tu ma Ofo,” *Viiga*, nu. 107.



Saunia e Elder Brent H. Nielson
O Le Fitugafulu

Faatalitali mo le Atalii Faamaumau Oa

Tau ina ia tatou maua le faaaliga e iloa ai le auala silisili e talanoa atu ai ia i latou i o tatou olaga o e ua leiloloa.

Sa faaaluina e le Faaola Lana galuega i le lalolagi e aoao atu ai Lona mana faamalolo ma le togiola. I se tasi taimi i le Luka mataupu e 15 i le Feagaiga Fou, na faitioina ai o Ia i le taumamafa ma faaalu ia taimi e faatasi ai ma tagata agasala (tagai Luka 15:2). Sa faaaoga e le Faaola lenei faitioga e fai ma avanoa e aoao ai i tatou uma i le auala e tali atu ai ia i latou o e ua leiloloa lo latou ala.

Sa Ia tali atu i e na faitio ia te Ia e ala i le fai atu ia te i latou o ni fesili taua se lua:

“O ai ea so outou e ana mamoe e selau, afai e leiloloa le tasi, e le tuua e ia le ivagafulu ma le iva i le vao, ae alu ma saili i le na leiloloa, seia maua?” (Luka 15:4).

“O ai ea foi le fafine e ana tupe e fuagafulu, afai e le iloa ia te ia le tasi tupe, e le tutu ea se afi, ma tafitafi le fale, ma matua saili i ai, seia maua?” (Luka 15:8).

Ona aoao mai lea e le Faaola le faataoto o le atalii faamaumau oa. O lenei faataoto e le o faatatau i mamoe e 100 po o ni tupe siliva; o loo faatatau i se atalii e toatasi faapelepele ua leiloloa. E ala i le faataoto, o le a le mea ua aoao

mai e le Faaola ia i tatou e uiga i le auala e tali atu ai pe a se ese se tagata o le aiga mai le ala?

Na faailoa atu e le atalii faamaumau oa i lona tama ua manao o ia i lona tofi i le taimi nei. Ua manao o ia e tuua le saogalemu o lona fale ma le aiga, ma saili atu i mea o le lalolagi (tagai Luka 15:12–13). Faamolemole ia matau, i le faataoto a le Faaola o loo tali atu ma le alofa le tamā e ala i le tuuina atu i le atalii o lona tofi. E mautinoa lava atonu na faia e le tamā mea uma sa mafai

ona ia faia e faatauina ai le atalii ia nofo. Peitai, o le taimi lava na faia ai e le atalii ua matua lana lava filifiliga, na faamatuu atu ai e le tamā poto o ia e alu. Ona faaali atu lea e le tamā le alofa faamaoni, ma vaavaai (pe ua tai foi ane) ma faatalitali o ia (tagai Luka 15:20).

Sa i ai i lo’u aiga se aafiaga faapena. Na tausia a’u ma o’u uso faamaoni e toalua, ma se tuafafine lelei, e ni matua sili ona lelei. Sa aoaoina i matou i le talalelei i lo matou aiga, sa oo ina avefa i matou ma tagata matutua, ma sa faamaumau uma i matou e toafa i le malumalu i o matou taitoalua. Peitai, i le 1994 na faasolo ina le fiafia lo matou tuafafine, o Susana i le Ekalesia ma nisi o ona aoaoga. Sa faatosinaina o ia e i latou sa tauemuina ma faitioina ia uluai taitai o le Ekalesia. Sa ia faatagaina lona faatuatua i perofeta ma aposetolo soifua ia faaitiitia. I le aluga o taimi, na faatolaloina e ona masalosaloga lona faatuatua, ma ia filifili ai e tuua le Ekalesia. Ua tuuina mai e Susana ia te au le faatagaga e faasoa atu ai lana tala ma le faamoemoe e mafai ona fesoa-soani ai i isi.

Sa matua matou faanoanoa lava ma o’u uso ma lo matou tina





nofotoatasi. Sa le mafai ona matou mafaufauina po o le a se mea na ono taitai atu ai o ia e lafoai lona faatuatua.

Sa matou auuana atu ma o'u uso o ni epikopo ma peresitene o korama, ma sa matou lagonaina le olioli o le manuia [i le laveaiina] o tagata o le uarota ma korama a o matou tuua le ivasefulu ma le iva ae o atu e saili mai le tasi. Peitai, o a matou taumafaiga faifai pea e laveai mai lo matou tuafafine, ma valaaulia o ia e toe foi mai, sa atili ai ona le fiafia pea o ia.

A o matou saili atu i le taitaiga faalelagi po o le a se auala e mafai ai ona matou tali atu ma le talafeagai ia te ia, sa oo ina manino mai ai e tatau ona matou mulimuli i le faataitaiga a le tamā i le faataoto o le atalii faamau-mau oa. Na faia e Susana lana filifiliga, ma sa tatau ona matou faamatau atu faafaataoto o ia e alu—ae ia le aunoa o ia ma lona iloina ma lagonaina o lo matou alofa faamaoni ia te ia. Ma o lea, faatasi ai ma se alofa faafouina ma le agalelei, sa matou vaavaai ai ma matou faatalitali.

Sa le'i taofia lava le alofa ma le popole o lo'u tina mo Susana. O taimi uma lava e auai ai lo'u tina i le malumalu, sa ia tuuina ai lava le igoa o Susana i le lisi o talosaga ma e lei mate ai le faamoemoe. Sa valaaulia e lo'u uso matua ma lona faletua, sa nonofo latalata ia Susana i Kalefonia o ia i polokalama uma faaleaiga. Sa la saunia 'aiga o le aftafi i lo la fale i tausaga taitasi i aso fanau o Susana. Na la faamautinoa la te faatumau pea i taimi

uma fesootaiga ma ia, ma ia ona iloina lo la alolofa faamaoni mo ia.

Sa aapa atu lo'u uso laitiiti ma lona faletua i le fanau a Susana i Iuta ma popole mo i latou ma alolofa ia i latou. Sa la faamautinoa e valaaulia i taimi uma lana fanau i faatasiga faaleaiga, ma ina ua oo i le taimi mo le tama a le tama a Susana e papatiso ai, sa i ai iina lo'u uso laitiiti e faatino le sauniga. Sa i ai foi faiaoga o aiga ma faiaoga asiasi alolofa a Susana o e sa lei faavaivai lava.

A ō ā matou fanau i misiona ma faaipoi, sa valaaulia lava Susana ma auai i nei aso faamanatu faaleaiga. Sa matou taumafai ma le filiga e fatufatu ni gaoioiga faaleaiga ina ia mafai ai e Susana ma lana fanau ona faatasi ma i tatou ma ia latou iloa ai matou

te alolofa ia i latou ma o i latou o se vaega o lo matou aiga. Ina ua maua e Susana se faailoga maualuga i se iunivesite i Kalefonia, sa matou i ai uma iina e lagolagoina o ia i lona faauuga. E ui lava sa le mafai ona matou taliaina ana filifiliga uma, ae o le mea mautinoa sa mafai ona matou taliaina o ia. Sa matou alolofa i ai, sa matou vaavaai, ma sa matou faatalitali.

I le 2006, i le mavae ai o le 12 tausaga talu ona tuua e Susana le Ekalesia, sa masii atu ai le ma afafine o Keiti ma lona toalua i Kalefonia ina ia mafai ona auai [lona toalua] i le aoga faaloia. Sa latou i ai i le aai lava e tasi ma Susana. Sa tepa taulai atu lenei ulugalii talavou i le tuafafine o lo la tamā o Susana mo fesoasoaniga ma le lagolago, ma sa la alolofa ia te ia. Sa fesoasoani Susana e tausi le la tama e lua tausaga le matua, o Lusi, ma tei ai lava ua ia fesoasoani atu ia Lusi i ana tatalo i le po. Sa valaau mai Keiti ia te au i se tasi aso ma fesili mai pe ou te manatu e le toe foi mai lava Susana i le Ekalesia. Sa ou faamautinoa atu ia te ia sa ou lagonaina o le a ia foi mai,



ma e manaomia pea ona matou faaauau pea ona onosai. A o mavae atu le isi tolu tausaga, faatasi ai ma le alofa faifai pea, sa matou vaavaai ma matou faatalitali.

E atoa i le faaiuga o le vaiaso nei le ono tausaga talu ai, sa ma nonofo ai ma lo'u toalua o Marcia, i le laina pito i luma o lenei Maota Autu mo Konafesi. Sa loma le lagolagoina ai o au e avea ma se Pulega Aoaou fou i lona aso. Sa tusi mai e Marcia, lea na te maua lava i taimi uma musumusuga a le Agaga, se tamai tusi ia te au e faitauina faapea, "Ou te manatu ua oo i le taimi mo Susana e toe foi mai ai." Na fautua mai lo'u afafine o Keiti ina ia ou alu atu e valaau Susana ma valaaulia o ia e matamata i le konafesi aoao i lona aso.

A o uunaia ai e nei tamaitai maoae e toalua, sa ou savali atu i le potu malolo ma valaau atu i lo'u tuafafine. Sa na o lana masini na tali mai ma ou valaaulia ai o ia e matamata i lona sauniga o le konafesi aoao. Sa ia maua le feau. Sa matou fiafia ina ua uunaia o ia e matamata i sauniga uma o le konafesi. Sa ia faalogo atu i perofeta ma aposetolo na ia alofa i ai i tausaga ua mavae. Sa ia maua ni igoa fou sa ia lei faalogo muamua ai lava, e pei o Peresitene Uchtdorf ma Elder Cook, Christofferson, ma Andersen. I le taimi o lenei aafiaga ma isi aafiaga tulaga ese e uunaia mai le lagi, o lo'u tuafafine—e pei foi o le atalii faamaumau oa—ua atamai o ia (tagai Luka 15:17). O upu a perofeta ma aposetolo ma le alofa o lona aiga na musuia ai o ia e salamo ma toe foi mai i le aiga. I le mavae ai o le 15 tausaga sa toe maua ai lo matou tuafafine sa leiloa. Ua uma le vaavaai ma le faatalitali.

Ua faamatalaina e Susana lenei aafiaga e pei ona faamatalaina e Liae i le Tusi a Mamona. Sa ia faamaamulu le ai uamea, ma maua ai o ia i se puao



o le pogisa (tagai 1 Nifae 8:23). Sa ia ta'ua na te le'i iloina na leiloa o ia seia oo ina toe fāgua lona faatuatua e le Malamalama o Keriso, lea sa manino ai ia te ia le eseese e le va o le mea sa ia oo i ai i le lalolagi ma le mea sa ofo atu e le Alii ma lona aiga ia te ia.

Sa tupu se vavega i le gasologa o le silia ma le ono tausaga talu ai. Ua i ai se molimau faafouina a Susana e uiga i le Tusi a Mamona. Ua ia toe maua lona pepa faataga o le malumu. Ua galue o ia o se fai sauniga i le malumu, o loo faiaoga o ia i le taimi nei i le vasega o Aoaoga Faavae o le Talalelei i lona uarota. Ua matala ifo faamalama o le lagi i lona fanau ma fanau a lona fanau, ma e ui na i ai ni taunuuga faigata, ae o loo lagonaina e peiseai sa ia lei tuua [lava le Ekalesia].

O nisi o outou, e pei o le aiga o Nielson, o loo i ai tagata o le aiga o e ua leiloa lo latou ala mo se taimi le tumau. O le faatonuga a le Faaola i tagata uma e ana mamoe e 100, ia tuua le ivagafulu ma le iva ma o e laveai mai le tasi. O lona faatonuga ia i latou o loo i ai tupe siliva e 10 ae ua leiloa le tasi ia saili seia oo ina maua. Pe a leiloa se tasi o ou atalii po o ou afafine, lou uso po o lou tuafafine ma ua filifili e o ese, ua matou aoaoina i lo matou aiga e faapea, a uma ona faia o mea uma tatou te mafaia, tatou te alolofa i lona tagata ma o tatou loto atoa ma tatou te vaavaai, tatou te tatalo, ma tatou faatalitali mo le aao o le Alii e faaali mai.

Atonu o le lesona aupito sili ona taua na aoao mai e le Alii ia te au e ala

mai i lenei faagasologa sa tupu i le taimi o la matou suesuega faaleaiga o tusitusiga paia ina ua tuua e lo'u tuafafine le Ekalesia. Sa faitau lo'u atalii o Tavita a o matou suesue faatasi le Luka 15. A o ia faitau le faataoto o le atalii faamaumau oa, na ese la'u faalogo i lona aso nai lo le mea sa ou faalogo muamua i ai. Mo nisi mafuaaga, ou te malamalama ai lava i taimi uma i le atalii sa nofo i le fale. A o faitau Tavita i lona taeao, sa ou iloina i nisi o auala I o a'u lava o le atalii faamaumau oa. E le oo uma i tatou i le mamalu o le Tama (tagai Roma 3:23). E manaomia e i tatou uma le Togiola a le Faaola e faamalolo ai i tatou. O i tatou uma ua leiloloa ma e manaomia ai ona maua. O lenei faaaliga i lona aso, na fesoasoani ai ia te au e iloa ai sa ma manaomia uma ma lo'u tuafafine le alofa o le Faaola ma Lana Togiola. Sa ma i ai moni lava ma Susana i luga o le ala lava lea e tasi e toe foi atu ai i le aiga.

O le fetalaiga a le Faaola i le faataoto a o Ia faamatalaina le faafeiloaiga e le tama o lona atalii faamaumau oa e mamana, ma ou te talitonu atonu o le faamatalaina lea o le aafiaga o le a tatou mauaina faatasi ma le Tamā pe a tatou toe foi atu i lo tatou aiga faalelagi. Ua aoaoina ai i tatou e uiga i se tama e alofa, o loo faatalitali mai, ma silasila mai. O le fetalaiga lenei a le Faaola: "Ua iloa mamao atu foi o ia e lona tama, ona mutimuti vale lea o lona alofa, ua momoe atu o ia, ua fusi ia te ia, ma sogi atu ia te ia" (Luka 15:20).

Tau ina ia tatou mauaina le faaaliga ia iloa ai le auala silisili e talanoa atu ai ia i latou i o tatou olaga o e ua leiloloa ma, pe a talafeagai ai, ia maua le onosai ma le alofa o lo tatou Tama i le Lagi ma Lona Alo, o Iesu Keriso, a o tatou alolofa atu, vaavaai, ma faatalitali mo le atalii faamaumau oa. I le suafa o Iesu Keriso, amene. ■



Saunia e Elder Jeffrey R. Holland

○ Le Korama a Aposetolo e Toasefululua

Pe a Faatasia le Faamasino Tonu, Alofa ma le Alofa Mutimutivale

Na mafatia Iesu Keriso, maliu, ma toetu mai le oti ina ia mafai ai ona la sii ae i tatou i le ola e faavavau.

Leai ni maea, fusi, po o soo se mea e faaaoga e fe'a'ei ai mo le saogalemumu, ae sa taumafai pea Simi e 14 tausaga ma Sione e 19 tausaga (e ui e le o ni o la igoa moni na)—e a'ea se pa tifatō o le Snow Canyon State Park i lo'u nuu o Iuta i saute. I le latalata atu i le tumutumu o la la'ua fe'aeiga faigata, sa la iloa e i ai se fatapapa e 'oso mai i luma e le mafai ai ona la a'ea nai futu o totoe agai i luga. Sa le mafai ona a'ea ae sa le mafai foi ona la toe solomuli ai nei. Sa noatia ai i la'ua. Ina ua uma se feliiu'iga ma le toto'a, sa maua e Sione se avanoa e tutu ai ona vae ae tulei i luga lona uso laitiiti ma le saogalemumu i luga atu o le fatapapa. Ae e leai se auala e lifi ai o ia lava. O le tele o lona taumafai e sue se mea e pipii ai ona lima po o vae, o le tele foi lona na amata migi ai ona uaua. Sa amata ona ufitia o ia i le gatete, ma sa amata ona popole mo lona ola.

O le le mafai ai ona toe pipii, sa tonu loa ia Sione e na o le pau lava le



mea o totoe o le taumafai lea e puna faatu i se taumafaiga e pu'e ai le tumutumu faataumata o le fatapapa. Afai e manuia, atonu e mafai e le malosiaga tele o lona lima, ona tosoina o ia ia saogalemumu.

I ana lava upu na ia fai mai ai:

“Ae ou te lei puna, sa ou fai ia Simi e alu e sue ane se lala laau e lava le malosi e tuutuu mai i lalo ia te au, e ui ina sa ou iloa e leai se na mea i luga o le tumutumu papa. Sa na o sa'u taumafaiga faanatinati. Afai e le manuia la'u puna, na pau le mea sa mafai ona ou faia o le mautinoa lea e le vaai lo'u uso laitiiti o o'u pa'u atu i lo'u oti.

“O le tuuina atu o ia ia lava se taimi ia alu ese atu ai, sa ou faia ai la'u tatalo faaiu—ou te manao ia iloa e lo'u aiga ou te alofa ia i latou ma e mafai ona toe foi saogalemumu atu Simi na o ia—ona ou puna ai lea. Na lava le malosi na ou tuleia ai au, ma sa ou oso ai ma oo atu o'u lima i luga atu o le fatapapa toeitiiti oo i o'u tulilima. Peitai a o pa'i ifo o'u lima i le pito i luga o le fatapapa, sa leai se mea na ou lagonaina ae na o le oneone pefu i luga o le papa mafolafola. E mafai lava ona lagonaina le talatala o le oneone a o t'āupe ai iina ma le leai o se mea e pipii i ai—leai se augutu, leai se papatū, leai se mea e mau ai pe u'u mau. Sa ou faalogoina o'u tamatamailima ua amata ona se'e ese atu i le tumutumu oneonea. Sa ou iloa ua uma lo'u ola.

“Ona faafuasei ai lea, e pei o se uila ua pa i se matagi o le taumafanafana, sa togi mai ni lima se lua mai se mea i luga atu o le faatausiusiuga o le tifatō, pu'e o'u tapulima ma se malosi ma se naunautaiga mausali e ui i le laiti. E lei alu si o'u uso faamaoni e sue se lala laau e le moni. I le taumateina o le mea moni sa ou fuafua e fai, na te lei tuua ai lava au. Sa na ona ia faatalitali lava—le leoa, tau lē mānava—ma le iloina lelei,



o le a lava lo'u faavalevatea e taumafai ai e puna. Ina ua ou puna, sa ia pueina au, taofi mau au, ma sa lei manao e tuu au ou te pa'u. O na lima malolosi faaleuso na laveaiina ai lo'u ola i lena aso, a o ou tautau i se tulaga matua mamao ese mai le elelee semanu e mautinoa lava lo'u oti."¹

Ou uso e ma tuafafine pele, o le asō o le Aso Sa o le Eseta. E ui e ao ina tatou manatua *pea* (tatou te folafola atu i la tatou tatalo faamanatuga o vaiaso taitasi o le a tatou faia), ae ui o lea o le aso aupito paia lenei o le tausaga mo le manatuaina faapitoa o lima faaleuso [o Iesu] ia sa aapa mai ia i tatou o e ua mafai ona oti faaleagaga ma faaletino e laveai i tatou mai o tatou toilalo ma vai-vaiga ma mai o tatou faanoanoaga ma agasala. I le faaaogaina o lenei tala na faamatalaina e le aiga o Sione ma Simi e fai ma matalalaga, ou te momoli ai lo'u lotofaafetai mo le Togiola ma le Toetu o le Alii o Iesu Keriso ma faailoa atu mea na tutupu i le fuafuaga paia a le Atua ia na tau atu ai ma aumaia se uiga i "le alofa o Iesu na ia alofa ai ia i [tatou]."²

I o tatou malo ua faateleina le faalelailagi, e le masani ai e pei ona le tausafia ai le talanoa e uiga ia Atamu ma Eva po o le Faatoaga o Etena po o le "lelei o lo la'ua pa'u" ua maua ai le ola faaletino.

Ae ui o lea, o le upumoni faigofie o le *le mafai* ona tatou malamalama atoatoa i le Togiola ma le Toetu o Keriso ma *o le a le lava* ai le talisapaia o le faamoemoega uiga ese o Lona soifua mai ma Lona maliu—i se isi faaupuga, e leai se ala e matua faamanatu moni ai le Kerisimasi *po o le Eseta*—e aunoa ma le malamalama sa i ai moni lava se Atamu ma Eva sa pa'u'u mai se Etena mo'i faatasi ai ma taunuuga uma sa tauaveina e lena pa'u.

Ou te le iloa auiliiliga o le mea na tupu i lenei paneta i luma atu o lena mea, ae ou te iloa o le toalua lena sa foafoaina i lalo o le aao paia o le Atua, ma sa la nonofo mo se taimi i se tulaga faaparataiso, lea sa leai se oti faaletagata po o se aiga i le lumanai, ma e ala mai i se faasologa o filifiliga sa la solia ai se poloaiga a le Atua lea sa manaomia ina ia la tuua ai le faatoaga, ae sa faatagaina ai i la'ua ia maua fanau a o lei feagai ma le oti faaletino.³ Ina ia faapoopo atu se isi faanoanoaga ma le lavelave i lo la'ua tulaga ua i ai, o la la'ua solitulafono sa i ai foi ni taunuuga faaleagaga, na vavae ese ai i la'ua mai le afioaga o le Atua e faavavau. Talu ai la ua tatou fananau mai i lena lalolagi pa'u ma talu ai o le a tatou solia foi tulafono a le Atua, o lea sa faasalaina ai foi i tatou i na lava faasalaga na feagai ma atamu ma Eva.

Oka se mala! Ua pa'u'u tagata uma ua leai se mea e taofi mai ai—o alii uma, tamaitai, ma tamaiti ua lalata uma atu i le oti tumau faaletino, ua lalata atu pea foi i le lototiga e faavavau. Pe o le mea ea lena na tatau ona i ai le olaga? Pe o le tualuga ea lea o le aafiaga faaletagata soifua? Pe ua na ona tatou tūpeupeupe ea i se tifatō malulu i se vaimeia o se atulaulau e leai se isi e manatu mai, o loo tofua saili e i tatou sina mea e mapu i ai, ua tofua saili e i tatou se mea e pipii ai—ae leai se mea ua na o le oneone o se'e i o tatou vai-lima, leai se mea e laveaiina i tatou, leai se mea e mau ai, ma e matua leai lava se mea e pipii mai ia i tatou? Pe na o le pau ea lo tatou faamoemoega i le olaga ua na o se suesuega o se olaga e leai se uiga—tau lava o le puna i le maua tulaga tatou te mafaia, ma tūpeupeupe ai mo le tusa ma le fitusefulu tausaga, ona toilalo lea ma pa'u, ma pa'u ai pea e faavavau?

O le tali i na fesili o se leai manino ma le faavavau! Faatasi ai ma perofeta anamua ma ona po nei, ou te molimau atu "ua faia mea uma e tusa ma le poto o ia o le ua silafia mea uma."⁴ O le mea lea, o le taimi lava na laa ese mai ai na uluai matua mai le Faatoaga o Etena, ma i le muaisilafia ai o le faaiuga a Atamu ma Eva, na auina



mai ai e le Atua ma le Tama o i tatou uma, ia agelu o le lagi e ta'u atu ia te i laua—ma pasi mai ai i tupulaga seia oo mai ia te i tatou—e faapea o lenei faasologa atoa lava sa mamanuina mo lo tatou fiafia e faavavau. O se vaega o Lana fuafuaga paia lea e saunia ai se Faaola, le Alo o le Atua lava Ia—se isi “Atamu,” lea o le a faaigoa ai o Ia e Paulo⁵—o lē o le a afio mai i le taulotoaiga o taimi e togilaina le uluai solitulafono a Atamu. O lenei Togiola o le a ausia ai le manumalo atoa i le oti faaletino, e leai ni tuutuuga e maua ai le toetu o tagata uma sa fananau mai ai pe o le a fananau mai i lenei lalolagi. Ma le alofa mutimutivale o le a aumaia ai foi le faamagaloga o agasala patino a tagata uma, mai ia Atamu seia oo atu i le tuluiga o le lalolagi, e fuafua i le salamo ma le usiusitai i poloaiga paia.

I le avefa ai o se tasi o Ana molimau faauuina, ou te tautino atu i le taeao o lenei Eseta o Iesu le Nasareta o le Faaola lenei ma o loo i ai lava o le lalolagi, o le “Atamu mulimuli,”⁶ o Le Na te taitaia ma Le Na te faaatoatoaina le faatuatua o le Alefa ma le Omeka o le ola e faavavau. “Aua e faapei ona oti uma ia Keriso,”⁷ o la Paulo lea. Na faapea foi ona faia e le perofeta-peteriaka o Lia: “Na pa’ū Atamu ina ia i ai tagata. . . . Ma e afio mai le Mesia i le atoatoaga o taimi, ina ia mafai ona ia togilaina le fanauga a tagata mai le pa’ū.”⁸ O le aupito auiliili

o mea uma, sa aoao mai e le perofeta o Iakopo o le Tusi a Mamona o se vaega o se lauga i le lua aso e uiga i le Togiola a Iesu Keriso e faapea “e tatau ona oo mai le toetu . . . ona o le pa’ū.”⁹

O le asō la ua tatou faamanatuina ai le meaalofo o le manumalo mai pa’ū uma ua tatou oo i ai, o faanoanoaga uma ua tatou iloa, o lotovaivai uma ua tatou maua, o atuatuvalega uma ua tatou feagai—ma e tatou te faamanatuina ai foi lenei manumalo mai le oti ma le faamagaloga o a tatou agasala. O loo maua lenei manumalo mo i tatou ona o mea na tutupu i se faaiuga tonu lava o se vaiaso faapenei i le silia ma le lua afe tausaga talu ai i Ieruselema.

Na amata i le tiga faaleagaga i le Faatoaga o Ketesemane, ma oo atu ai i le Faasatauroga i luga o se satauro i Kalevaria, ma faai ai i se taeao matagofie o se Aso Sa i totonu o se tuugamau na foai fua atu, na faia ai e se tamalii e leai se agasala, e mama a’ia’i, ma le paia, le Alo o le Atua lava Ia, le mea e leai se isi tagata ua oti na na faia pe faia i le talafaasolopito o le lalolagi. I lalo o Lona lava mana, sa Ia toetu mai ai nai e ua oti, e le toe tuueseesea lava lona tino mai Lona agaga. O Lana lava filifiliga, na Ia aveesea ai le ie na ufi a’i o Ia, ma tuu ese foi ma le faaeteete le solosolo sa tuu i Ona fofoga “i se tasi mea,”¹⁰ o loo fai mai ai le mau.

I lenei uluai Eseta o le faasologa o le Togiola ma le Toetu e aofia ai taimi

e aupito sili ona taua, le meaalofo tulaga ese, le tiga aupito ogaoga, ma le faaaliga aupito taua o le alofa mama na faatino i le talafaasolopito o lenei lalolagi. Na mafatia Iesu Keriso, le Alo e Toatasi na Fanaua a le Atua, malii, ma toetu mai le oti ina ia mafai ai e Ia, e faapei o se uila i se matagi o le tau-mafanafana, ona aapa mai ia i tatou a o tatou pauu, taofimau ia i tatou i Lona malosi atoa, ma e ala atu i lo tatou usiusitai i Ana poloaiga, e sii ae ai i tatou i le ola e faavavau.

O lenei Eseta, ou te faafetai atu ia te Ia ma le Tama na tuuina mai o Ia ia te i tatou ma o loo tu manumalo pea Iesu i le oti, e ui ina tu o Ia i luga o vae manu’anu’a. O lenei Eseta ou te faafetai atu ia te Ia o le na tuuina mai o Ia ia te i tatou, o loo Ia tuuina mai pea ia i tatou le alofa tunoa e le uma, e ui ina Ia tuuina mai ma alofilima ua pūpū ma tapulima manu’anu’a. O lenei Eseta ou te faafetai atu ia te Ia o le na tuuina mai o Ia ia te i tatou ua mafai ai ona tatou pepese ma le manatu i se faatoaga na afutoto ai, o se satauro na tutui ai fao, ma se tuugamau ua gaogao:

*Maeu, mamalu, ma atoa,
Le ata o le olataga,
Faamasino tonu ma alofa
Ua tasi i Le paia!*¹¹

I le suafa paia o le Iesu Keriso toetu, amene. ■

FAAMATALAGA

1. Tusi o loo i ai ia Jeffrey R. Holland.
2. “Ou te Tu ma Ofo,” *Viiga*, nu. 107.
3. Tagai 2 Nifae 2:19–29, aemaise lava fuaiupu e 20–23; Mose 5:10–11.
4. 2 Nifae 2:24.
5. Tagai 1 Korinito 15:45.
6. 1 Korinito 15:45.
7. 1 Korinito 15:22.
8. 2 Nifae 2:25–26.
9. 2 Nifae 9:6.
10. Ioane 20:7.
11. “Maeu le Poto ma le Alofa,” *Viiga*, nu. 109.



Saunia e Peresitene Dieter F. Uchtdorf
Fesoasoani Lua i le Au Peresitene Sili

O Le Meaalofa o le Alofatunoa

O le asō ma aso uma o loo avanoa ai le alofatunoa o le Atua i tagata uma o o latou loto ua nutimomoia ma o latou agaga ua salamo.

I le Aso Sa o le Eseta tatou te faamanatu ai le mea mamalu na tupu i le talafaasolopito o le lalolagi sa leva ona faatalitali i ai tagata.

O le aso na suia ai mea uma.

O lona aso na suia ai lo'u olaga.

Na suia ai lou olaga.

Na suia ai le taunuuga o fanau uma a le Atua.

I lona aso faamanuiaiina, o le Faaola o tagata uma, lē na tauaveina i luga o Ia Lava filifili o le agasala ma le oti ia na tatou nofopologa ai, na motusiaina na filifili ma faasaoloto i tatou.

Ona o le taulaga a lo tatou Togiola pele, ua leai ai se tui o le oti, ua le manumalo foi le tuugamau,¹ ua leai se mana tumau o Satani, ma o i tatou na “fanaufouina . . . ina ia iu i le faamoemoe ua ola, i le *toe tu* mai o Iesu Keriso.”²

E sa'o lava le Aposetolo o Paulo ina ua ia saunoa e mafai ona tatou “fefaamafanafanaa” i nei upu.”³

Alofatunoa o le Atua

Tatou te talanoa soo i le Togiola a le Faaola—ma e sa'o lona mea!

I upu a Iakopo, “Aisea tatou te lē tautatala ai e uiga i le togiola a Keriso,

ma saili ia maua se malamalama atoatoa e uiga ia te ia?”⁴ Ae a o tatou “tautatala e uiga ia Keriso, . . . olioli ia Keriso, . . . talai atu Keriso, [ma] vavalo e uiga ia Keriso”⁵ i avanoa uma, e le tatau lava ona mou ese lo tatou lagona ina o le ofo ma le lotofaafetai loloto mo le taulaga e faavavau a le Alo o le Atua.

O le Togiola a le Faaola e le mafai ona avea ma se mataupu faasamasamanoa i a tatou aoaoga, a tatou talanoaga, po o o tatou loto. E paia ma mamalu, aua na auala mai i lenei “taulaga tele ma mulimuli” na aumaia ai e Iesu le Keriso le “olataga ia i latou uma o e e talitonu i lona suafa.”⁶



Ou te maofa i le mafaufau atu i le Alo o le Atua na tuu ifo o ia i lalo e laveai i tatou, ona tatou te lē atoatoa, lē mama, ma fai pea mea sese, ma le leai o se lotofaafetai e pei ona tatou matele ai. Ou te taumafai lava ia malamalama i le Togiola a le Faaola i lo'u mafaufau papa'u, ma na o le pau le faamalalamaga ou te mauaina e faapenei: o le alofa o le Atua ia i tatou e loloto, atoatoa, ma faavavau. E le mafai ona ou faatusatusaina “le lautele, ma le umi, ma le loloto, ma le maualuga . . . [o le] alofa o Keriso.”⁷

O se faailoaga mamana o lona alofa lea e masani ona ta'ua e tusitusiga paia o le *alofatunoa o le Atua*—o le fesoasoaniga faalelagi ma le faaeina mai o le malosi lea tatou te tuputupu ae ai mai tagata agasala ma tapulaa o loo tatou i ai nei, i tagata faaeaina o le “upumoni ma le malamalama, seia oo ina faamamaluina [i tatou] i le upumoni ma [iloga] mea uma.”⁸

O se mea sili ona ofoofogia le alofatunoa o le Atua. Ae e tele lava ina malamalama sese i ai.⁹ E ui e tatau ona tatou iloina le alofatunoa o le Atua pe afai tatou te faamoemoe ia maufofi i mea ua sauniaina mo i tatou i Lona malo e faavavau.

I lona tulaga ou te fia talanoa ai i le alofatunoa. E patino lava, muamua, o le auala *tatalaina ai e le alofatunoa faitotoa o le lagi* ma le lona lua, o le auala na te *tatalaina ai pupuni o le lagi*.

Muamua: E Tatala e le Alofatunoa Faitotoa o le Lagi

Ona o i tatou uma ua “agasala . . . ma ua le oo i le [mamalu] o le Atua”¹⁰ ma ona “e le mafai e se mea eleelea ona ulu atu i le malo o le Atua,”¹¹ o i tatou uma la ua le agavaa e toe ui atu i le afoaga o le Atua.

E tusa lava pe ao ona tatou auauna atu i le Atua ma o tatou agaga atoa, e le lava lea; aua o le a avea pea i tatou ma



Helsinki, Finelani

ni “auauna lē aoga.”¹² E le mafai ona tatou mauaina lo tatou ala i le lagi; o manaoga o le faamasinotonu e tu o se papupuni, lea e leai ai so tatou malosi e faatoilalo ai e i tatou lava ia.

Ae e le leiloloa tagata uma.

O le alofatunua o le Atua o lo tatou faamoemoe sili ma le faavavau lea.

E ala i le taulaga a Iesu Keriso, le fua-fuaga o le alofa mutimutivale ua faamalieina ai manaoga o le faamasinotonu ¹³ “ma aumai ai ala i tagata e mafai ai ona latou maua o le faatuatua e salamo ai.”¹⁴

E ui e ‘ulaula a tatou agasala, ae mafai ona sinasina e pei o le kiona.¹⁵ Ona “na foaifuaina e [lo tatou Faola pele] Ia e fai ma togiola mo tagata uma,”¹⁶ o lea ua saunia ai mo i tatou se faitotoa e ulu atu ai i Lona malo e faavavau.¹⁷

Ua matala le faitotoa!

Ae o le alofatunua o le Atua e le tau na ona fuata’i ai o i tatou i le tatou tulaga mama sa i ai muamua. Afai o le uiga o le faaolataga ua na o le tapeeseina ai o a tatou mea sese ma agasala, o le faaolataga la—e tusa ai ma lona matagofie—ua le faataunuuna ai sini tupito a le Tama mo i tatou. E matua maualuga atu lava Lona faamoemoega: E finagalo o Ia i Ona atalii ma afafine ia avea e faapei o Ia.

Faatasi ai ma le meaalofo o le alofatunua o le Atua, o le ala la i le avea ma soo e le toefoi atu i tua; ae taitai atu i luga.

E taitai atu ai i tatou i mea maualuluga e seasea mafai ona tatou malamalama i ai. E taitai atu ai i le faaeaga i le malo selesitila a lo tatou Tama



Faalelagi, lea e siomia ai i tatou e ē pele ia i tatou, mauaina “lona atoatoa, ma lona mamalu.”¹⁸ O mea uma e ā tatou ia, ma e ā Keriso i tatou.¹⁹ O le mea moni, o mea uma o i ai i le Tama o le a foaiina mai ia i tatou.²⁰

Ina ia mautofi i lenei mamalu, tatou te manaomia atili nai lo o se faitotoa ua matala; e tataua ona tatou ulu atu i lenei faitotoa ma se mana o le loto ina ia sui—o se suiga tele naua lea o loo faamatala e tusitusiga paia o le “toe fanauina; ioe, fananauina i le Atua, ma suia mai lo [tatou] tulaga [faalelallagi] ma pa’u, i se tulaga o le amiotonu, ua togiolaina e le Atua, ma avea ma ona atalii ma afafine.”²¹

Lua: E Tatala e le Alofatunua Pupuni o le Lagi

O le isi elemene o le alofatunua o le Atua o le tatalaina lea o pupuni o le lagi, lea e liligi mai ai e le Atua faamanuiga o le mana ma le malosi, tatou te mafaia ai ona ausia mea ia e le mafai

ona oo i ai lo tatou lava malosi. O le alofatunua ofoofogia o le Atua lea e mafai ai e Lana fanau ona faatoilaloina le faaosoosoga matautia ma taufaapōpō a lē taufaasese, lafoai ese agasala, ma “ia faaatoatoaina ia Keriso.”²²

E ui e tofu uma i tatou ma agasala, ae mafai ona tatou faatoilaloina. O le mea moni e ala atu i le alofatunua o le Atua, pe afai tatou te faamualalo i tatou lava ma maua le faatuatua, e mafai ai ona avea mea vaivai ma mea malolosi.²³

I o tatou olaga atoa, ua faaee mai ai e le alofatunua o le Atua faamanuiga faaletino ma meaalofo faaleagaga ia e faalateleina ai o tatou gafatia ma faaoaina ai o tatou olaga. O Lona alofatunua e faamamaina ai i tatou. E fesoa-soani Lona alofatunua ia i tatou ia avea ai tatou ma ni tagata silisili ona lelei.

O Ai e Mafai Ona Agavaa ai?

I le Tusi Paia tatou te faitau ai i asiasiga a Keriso i le fale o Simona le Faresaio.

I uiga faaaliga, sa foliga mai ai Simona o se tagata lelei ma amio sa’o. Na te faia e le aunoa ona tiute faalelotu e pei: sa ia tausia le tulafono, totoi lana sefuluai, tausi le Sapati, tatalo i aso uma, ma alu i le sunako.

Ae a o i ai Iesu ma Simona, sa faalatalata atu se fafine, ma mulumulu aao o le Faola i ona loifofoga, ma faauuina Ona aao i le suauu manogi.

Sa le fiafia Simona i le faaaliga o le tapuai, aua na ia iloaina o lenei fafine o se tagata agasala. Sa manatu Simona afai e lei silafina e Iesu lenei mea, pe ana o Ia o se perofeta po o pe nei Na te le tuu atu i le fafine e pa’i atu ia te Ia.

I le iloaina o ona manatu, sa faliu atu ai Iesu ia Simona ma fesili atu se fesili. “O tagata e toalua sa la nono mai tupe i le tagata e toatasi: . . . Sa nono mai le tasi tenari e lima selau, e a le tasi e limagafulu.

“Ua leai [uma] ni a la tupe e toe avatu, ona faamagalalo fua lea o ia ia te i laua uma. Ina fai mai ia, po o ai so laua e tele lona alofa ia te ia?”

Sa tali mai Simona o lē sa ia faamagalalo atu ana mea e tele.

Ona aoao atu lea e Iesu se lesona loloto: “Ua e iloa ea le fafine nei? . . . Ua faamagaloina ana agasala e tele; *aua ua alofa tele mai o ia*: a o le ua faamagaloina i ai se mea itiiti, ua itiiti foi lona alofa.”²⁴

O fea o nei tagata e sili ona pei o i tatou?

O pei ea tatou o Simona? O tatou talitonu ea ma toafimalie i a tatou galuega lelei, faalagolago i lo tatou lava amiotonu? Pe masalo foi o fai sina o tatou le lavā onosai ia i latou e le tutusa o tatou tulaga faatonuina? O tatou ea o se masini faatonutonu, tau na ona faatagā fai o mea, auai i a tatou fonotaga, auai ma le musuā i vasega o le Aoga Sa, ma atonu o fai a tatou telefoni feaveai i taimi o sauniga faamanatuga?

Pe o pei i tatou o lenei fafine, o le sa manatu sa matua leiloa atoa ma leai se faamoemoe ona o le agasala?

O lava ea lo tatou *alolofa*?

O tatou malamalama ea i lo tatou nofoaitalafu i le Tama Faalelagi ma aioi atu ma o tatou agaga atoa mo le alofatunoa o le Atua?

A tatou tootutuli e tatalo, pe o tautau atu ea na o mea sili o lo tatou lava amiotonu, pe o tautau atu o tatou faaletonu, aioi atu mo le alofa mutimutivale o le Atua, ma le maligi o loimata o le lotofaafetai mo le fuafuaga ofoofogia o le togilaina?²⁵

O le faaolataga e le mafai ona faatauina i le usiusitai; ae e faatauina i le toto o le Alo o le Atua.²⁶ O le mafaufau ai e mafai ona tatou faafesuiiaia a tatou galuega lelei mo le faaolataga e pei o le faatauina o se pepa malaga o le vaalele ona manatu lea tatou te pule i le ofisa vaalele. Pe manatu foi pe a uma ona totogiina le pili o loo mautotogi ai i lo tatou fale, ua tatou pule ai i le paneta o le lalolagi atoa.

Aisea la e Usitai ai?

Afai o le alofatunoa o se meaalofoa a le Atua, aisea la ua taua tele ai le usiusitai i poloaiga a le Atua? Aisea e ātu ai i poloaiga a le Atua—po o le salamo, mo lena mea? Aisea e le tau ai na ona tautino atu ua tatou agasala ma tuu i le Atua e laveai i tatou?

Po o le, pe a tuu le fesili i upu a Paulo, “Tatou te nonofo pea ea i le agasala, ina ia faatele ai le alofa tunoa?” E faigofie lava ma manino le tali a Paulo: “[E faasa e le Atua].”²⁷

Uso e ma tuafafine, tatou te usiusitai i poloaiga a le Atua—ona o lo tatou alolofa ia te Ia!

O le taumafai ai ia malamalama i le meaalofoa o le alofatunoa o le Atua ma o tatou loto ma mafaufau atoa ua tatou maua ai mafuaaga uma e alolofa atu ai ma usiusitai i lo tatou Tama Faalelagi i le agamalu ma le lotofaafetai. A tatou savalia le ala o le aveva ma soo, e faamamaina i tatou, faaleleia i tatou, e fesoasoani ia i tatou ia aveva atili e faapei o Ia, ma e taitai atu ai i tatou i Lona afioaga. “O le Agaga o le Alii [lo tatou Atua]” e aumaia ai lea “liuga tele i totonu o i [tatou], . . . ua le toe i ai so tatou manao e fai mea leaga, ae ia faia mea lelei e le aunoa.”²⁸

O le mea lea, o lo tatou usiusitai i poloaiga a le Atua e sau mai se taunuuga masani o lo tatou alolofa ma le lotofaafetai le mafaamutalia mo le lelei o le Atua. O lenei ituaiga o alofa faamaoni ma le lotofaafetai o le a tuufaatasia faavavega ai a tatou galuega faatasi ma le alofatunoa o le Atua. O le a leoleoina e le amio-mama o tatou manatu e le aunoa, ma o le a solo malosi ai lo tatou lototele i luma o le Atua.²⁹

Uso e ma tuafafine pele, o le ola ma le faamaoni i le talalelei e le o se avega mamafa. O se faatinoga fiafia—o se sauniuniga mo le mauaina o le mamalu silisili o le faavavau. Tatou te saili ia



usiusitai i lo tatou Tama Faalelagi ona o le a oo ina taliaina atili e o tatou agaga mea faaleagaga. O le a tatou malamalama i mea tatou te lei mafau-fauina muamua. O le faamaninoga ma le malamalamaaga e oo mai ia i tatou pe a tatou faia le finagalo o le Tama.³⁰

O le alofatunoa o le meaalofoa a le Atua, ma o lo tatou manao ina ia usiusitai i poloaiga taitasi a le Atua, o le auala lea tatou te faailoa atu ai i lo tatou Tama Faalelagi tatou te mananao i lenei meaalofoa paia.

Mea Uma e Mafai Ona Tatou Faia

Sa faia e le perofeta o Nifae se são taua i lo tatou malamalamaaga e uiga i le alofatunoa o le Atua ina ua ia tautino mai: “Ua matou galulue maelega . . . e faatauanau atu ai ia matou fanau, ma o matou uso foi, ia talitonu ia Keriso, ma ia faalelei ma le Atua; ona ua matou iloa e faaolaina i tatou i le alofa tunoa, pe a uma mea uma e mafai ona tatou faia.”³¹

Peitai, ou te tomanatu lava pe o tatou faaliliuina sese i nisi taimi le fasifuaitau “pe a uma mea uma e mafai ona tatou faia.” E tatau ona tatou malamalama o le “pe a uma” e le tutusa ma le “ona.”

E le faaolaina i tatou “ona” o mea uma e mafai ona tatou faia. Pe ua faia ea e se tasi o i tatou *mea uma* e mafai ona tatou faia? Pe o faatali ea le Atua seia maea uma a tatou taumafaiga ona faatoa Ia faasalavei mai lea i o tatou olaga ma Lona alofatunoa laveai?

E toatele tagata e lagona le lotovai-vai ona latou te le ausia i le tele o taimi mea ua faamoemoeina. Latou te iloa mai o latou lava aafiaga “ua manao i ai le loto, a o le tino ua vaivai.”³² Latou te sii ae o latou leo faatasi ma Nifae e folafola atu, “Ua faanoanoa lo’u agaga ona o a’u amioletonu.”³³

Ua ou mautinoa na iloaia e Nifae o le alofatunoa o le Faaola e faatagaina ma mafai ai e i tatou ona faatoilaloia



le agasala.³⁴ O le mafuaaga lea na matua galue maelega ai Nifae e faatauanau lana fanau ma [ona] uso “ia talitonu ia Keriso, ma ia faalelei ma le Atua.”³⁵

Pe a uma mea uma, o lona uiga o mea uma e mafai ona tatou faia! Ma o lona uiga o a tatou galuega i le olaga nei!

O Le Alofatunoa e Maua e Tagata Uma

A ou mafaufau i le mea na faia e le Faaola mo i tatou lea na sosoo ma lena uluai Aso Sa o le Eseta, ou te fia manao ai e sii ae lo’u leo ma alaga i viiga i le Atua Silisili Ese ma Lona Alo, o Iesu Keriso!

Ua matala faitotoa o le lagi!

Ua matala pupuni o le lagi!

O le asõ ma aso uma o loo avanoa ai le alofatunoa o le Atua i tagata uma o o latou loto ua nutimomoia ma o latou agaga ua salamo.³⁶ Ua faaavanoa-ina e Iesu Keriso le auala mo i tatou e o a’e ai i mea maualuluga ia e le malamalama i ai o tatou mafaufau faaletino.³⁷

Ou te tatalo ina ia tatou vāai i ni mata fou ma se loto faafouina i le taua e faavavau o le taulaga togiola a le Faaola. Ou te tatalo ina ia faaali atu lo tatou alolofa i le Atua ma lo tatou loto-faafetai mo le meaalofoa o le alofatunoa le i’u o le Atua e ala i le tausiga o Ana poloaiga ma olioli e “savavali i le ola toefuataiina.”³⁸ I le suafa paia o lo tatou Matai ma le Togiola, o Iesu Keriso, amene. ■

FAAMATALAGA

1. Tagai 1 Korinito 15:55; Mosaea 16:8.
2. 1 Peteru 1:3; faaopoopo le faamamafa.
3. 1 Tesalonia 4:18; tagai foi fuaiupu 13–17.
4. Iakopo 4:12.
5. 2 Nifae 25:26.
6. Alema 34:10, 15.
7. Efeso 3:18–19.
8. Mataupu Faavae ma Feagaiga 93:28.
9. O i tatou moni lava o “ni fanau iti, ma . . . [e] lei malamalama lava i le tetele o faamanuiaga o i ai i le Tama i ona lava aao ma ua saunia mo [tatou]” (Mataupu Faavae ma Feagaiga 78:17).
10. Roma 3:23.
11. 1 Nifae 15:34; tagai foi 1 Nifae 10:21; Mose 6:57.
12. Mosaea 2:21.
13. Tagai Alema 42:15.
14. Alema 34:15.
15. Tagai Isaia 1:18.
16. 1 Timoteo 2:6.
17. Tagai 2 Peteru 1:11.
18. Mataupu Faavae ma Feagaiga 76:56.
19. Tagai Mataupu Faavae ma Feagaiga 76:59.
20. Tagai Mataupu Faavae ma Feagaiga 84:38.
21. Mosaea 27:25.
22. Moronae 10:32.
23. Tagai Eteru 12:27.
24. Tagai Luka7:36–50; faaopoopo le faamamafa.
25. O le faataoto a Keriso i le Faresaio ma le telona ua faailoa manino mai ai lenei tulaga (tagai Luka 18:9–14).
26. Tagai Galuega 20:28.
27. Roma 6:1–2.
28. Mosaea 5:2.
29. Tagai Mataupu Faavae ma Feagaiga 121:45.
30. Tagai Ioane 7:17.
31. 2 Nifae 25:23; faaopoopo le faamamafa.
32. Mataio 26:41; tagai foi Roma 7:19.
33. 2 Nifae 4:17.
34. Tagai 2 Nifae 4:19–35; Alema 34:31.
35. 2 Nifae 25:23.
36. Tagai 3 Nifae 9:19–20.
37. Tagai 1 Korinito 2:9.
38. Roma 6:4.



Saunia e Elder Robert D. Hales

○ Le Korama a Aposetolo e Toasefululua

Faasaoina o le Faitalia, Puipuia o le Saolotoga o Tapuaiga

O le faaaogaaga faamaoni o lo tatou faitalia e faalagolago i luga o le i ai o lo tatou saolotoga o tapuaiga.

O le Aso Sa o le Eseta lenesi: o se aso o le lotofaafetai ma le manatua e faamamaluina le Togiola a lo tatou Faaola o Iesu Keriso ma le Toetu mo tagata uma. Tatou te tapuai ia te Ia, faafetai mo lo tatou saolotoga o tapuaiga, saolotoga o potopotoga, saolotoga o tautalaga, ma lo tatou aia tatau o le faitalia na tuuina mai e le Atua.

E pei ona sa valoia e perofeta nei aso e gata ai lea ua tatou ola ai, e toatele ua fenumiiai pe o ai i tatou, ma pe o a mea tatou te talitonu i ai. O nisi o “e faatuaupua. . . ? [ma] e le alolofa i tagata amio lelei.”¹ O isi ua “fai mai ua lelei mea ua leaga, ae leaga le mea lelei; [ma] ua fai ma malamalama le pouliuli, a e fai foi ma pouliuli le malamalama.”²

A o faia e i latou o loo siomiaina i tatou ni filifiliga pe faapefea ona tali mai i o tatou talitonuga, e le tatau ona galo ia i tatou o le faitalia o se vaega taua o le fuafuaga a le Atua mo Ana fanau uma. O lena fuafuaga faavavau, na tuuina mai ia i tatou i le Fono i le muai olaga i le Lagi, na aofia ai ma le meaalofa o le faitalia.³

I lena Fono Sili, sa faaaoga ai e Lusifelo, ua lauiloa ia Satani, lona faitalia e tetee ai i le fuafuaga a le Atua. Na fetalai le Atua: “Ona . . . sa fouvale Satani ia te au, ma saili e faaumatia le faitalia a le tagata, lea na tuu atu e A’u o le Alii le Atua ia te ia, . . . na Ou faia ai ia lafoina o ia i lalo.”⁴

Na Ia faaaauu mai: “Ma sa faaliliu ese foi e ia mai ia te a’u le tasi vaetolu o ‘au o le lagi ona o la latou faitalia.”⁵

O le taunuuga, o fanau agaga a le Tama Faalelagi o e sa filifili e teena Lana fuafuaga ma mulimuli atu ia Lusifelo, ua le maua lo latou taunuuga paia.

O Iesu Keriso, i le faaaogaina o Lana faitalia, na fetalai:

“O A’u lenesi, auina atu au.”⁶

“Ia faia lou finagalo, ma e a oe pea le mamalu e faavavau.”⁷

O Iesu, o le na faaaoga Lana faitalia e lagolagoina ai le fuafuaga a le Tama Faalelagi na iloa ma tofia e le Tama e aveva ma o tatou Faaola, ma muai faauuina e faatinoina le taulaga togiola mo tagata uma. E faapena foi, o lo tatou faaaogaina o lo tatou faitalia e tausia

poloai e mafai ai ona tatou malamalama atoa i lo tatou faasinomaga ma maua ai faamanuiaga uma o loo i ai i lo tatou Tama Faalelagi—e aofia ai le avanoa e maua ai se tino, e alualu ai i luma, e iloa ai le fiafia, e maua ai se aiga, ma fai ai mo tatou tofi le ola e faavavau.

Ina ia tausia poloai, e manaomia ona tatou iloa le aoaoga faavae aloaia o le Ekalesia ina ia aua ai nei o tatou o ese mai le taitaiga a Keriso ona o manatu fesuisui ai pea o tagata.

O faamanuiaga o loo tatou sapi ai nei ua mafua ona sa tatou faia le filifiliga e mulimuli i le Faaola a o lei oo mai i lenesi olaga. Ia i latou uma o faalogologo mai pe faitauina foi nei upu, po o ai lava oe ma pe o le a lava foi lou tulaga sa i ai, manatua le mea lenesi: e lei tuai tele ona e toe faia lena filifiliga ma mulimuli ia te Ia.

E ala i lo tatou faatuatua ia Iesu Keriso, talitonu i Lana Togiola, salamo mai i a tatou agasala, ma papatisoina, e mafai ai ona tatou maua le meaalofa faalelagi o le Agaga Paia. O lenesi meaalofa e maua ai le silafia ma le malamalama, taitaiga ma le malosi e aoao ai ma maua se molimau, mana, faamamaina





e faatoilalo ai le agasala, ma le faamafanafanaga ma le faamalosiaga ia faamaoni i taimi o faigata. O nei faamanuiaga le mafaatusalia e faateleina ai lo tatou saolotoga ma le mana e fai ai le mea tonu, aua “o le mea o i ai le Agaga o le Alii, o i ai le saolotoga.”⁸

A o tatou savalia le ala o le saolotoga faaleagaga i nei aso e gata ai, e tatau ona tatou malamalama o le faaaogaina ma le faamaoni o lo tatou faitalia, e faalagolago lea i le i ai o lo tatou saolotoga o tapuaiga. Ua tatou iloa lava e le manao Satani ia tatou maua lena saolotoga. Sa taumafai o ia e faaumatia le faitalia e iloa ai le tonu i le lagi, ma i le taimi nei ua matua lili o ia e faavaivaia, teena, ma faasalalau le fenumiai e uiga i le saolotoga o tapuaiga—o le a le uiga ma pe aisea e taua ai i lo tatou olaga faaleagaga ma lo tatou lava faaolataga.

E fa maatulimanu o le saolotoga o tapuaiga e tatau ia i tatou o le Au Paia o Aso e Gata Ai ona faalagolago i ai ma puipuia.

Muamua o le saolotoga e talitonu ai. E leai se tasi e tatau ona faitioina, sauaina, pe osofaia e tagata, po o malo foi, mo mea ua ia talitonu i ai e uiga i le Atua. O loo ta’ua i se uluai tautinoga o lo tatou talitonuga le saolotoga o tapuaiga:

“E leai se malo e mafai ona ola i le filemu, vagana ua faia ma faamalosi ituaiga tulafono e mautinoa ai le maua e tagata taitoatasi o le faaoga saoloto o le mafaufaufuatiaifo. . . .

“ . . . E tatau i taitai faalemalo ona taofi le solitulafono, ae le pulea le mafaufaufuatiaifo; . . . [pe] taofia le saolotoga o le agaga.”⁹

O leni saolotoga faavae o le talitonuga sa aloaia e Malo Aufaaatasi i lana Tautinoga Lautele o Aia Faaletagata Soifua ma isi faamaumauga faaleatunuu ma faavaomalo o aia faaletagata soifua.¹⁰

O le maatulimanu lona lua o le saolotoga o tapuaiga o le saolotoga e faasoa atu lo tatou faatuatuaga ma talitonuga i isi. Ua poloaiina i tatou e le Alii, “Ia outou aoao atu [le talalelei] ia outou fanau . . . pe a e nofo i lou fale.”¹¹ Sa Ia fetalai atu foi i Ona soo, “O atu ia outou i le lalolagi uma, ina ta’u atu ai le tala lelei i tagata uma lava.”¹² I le avefa ai o ni matua, o faifeautalai faamisiona, ma faifeautalai o uarota, tatou te faalagolago i le saolotoga o tapuaiga ina ia mafai ai ona aoao atu le aooga faavae a le Alii i o tatou aiga ma le lalolagi atoa.

O le maatulimanu lona tolu o le saolotoga o tapuaiga o le saolotoga lea e faatuina ai faalapotopotoga faalelotu, o se ekalesia, ia tapuai filemu ai faatasi ma isi. O le mataupu faavae lona sefulutasi o le faatuatua o loo ta’u mai ai, “Ua ia i matou le aia tatau matou te tapuai atu ai i le Atua Mamana e tusa ai ma o matou lava lotofuatiaifo, ma ua matou tuuina atu foi lea lava aia tatau i tagata uma, e faitalia i latou, pe faapefea, po o fea, po o le a foi le mea latou

te tapuai atu i ai.” Ua lagolagoina leni mataupu faavae e faamaumauga o aia tatau faavaomalo a tagata soifua faapea foi le tele o faavae faalemalo.

O le maatulimanu lona fa o le saolotoga o tapuaiga o le saolotoga lea e ola ai i lo tatou faatuatuaga—faaogaina saoloto o lo tatou faatuatua e le na o le fale ma le falesa ae faapea foi i nofoaga faitele. Ua poloaiina i tatou e le Alii ia le gata ina tatou tatalo i o tatou afeafe¹³ ae ia tatou o atu foi ma “faapupula atu [lo tatou] malamalama i luma o tagata, ina ia latou iloa [a tatou] galuega lelei, ma vivii atu ai i [lo tatou] Tama o i le lagi.”¹⁴

E i ai nisi e le fiafia pe a tatou avatu la tatou tapuaiga i nofoaga faitele, ae o tagata lava foi nei e tauanau ia talileleia o latou manatu ma faatinoga e tagata, e tele lava ina faifaiaga tele e tuuina mai lena lava talileleia i le au faatuatua faalelotu, o e foi e mananao ia talileleia o latou manatu ma faatinoga. O le tulaga masani o le le lava o le faaaloalo mo manatu faalelotu e vave ona solovi ifo i le le talileleia o tagata lotu ma faalapotopotoga i tulaga faaagafesootai ma faaupufai.

A tatou feagai ma uunaiga faateleina ia tatou gauai atu i tulaga faalelalolagi, ma lafoai o tatou saolotoga e tapuai ai, ma fetuunai lo tatou faitalia, mafaufau i le mea ua aoao mai e le Tusi a Mamona ia i tatou e uiga i o tatou tiutetauave. I le tusi a Alema ua tatou faitau ai e uiga ia Amiliki, “o se tagata faitogafiti tele” mo se “tagata amioleaga” o le sa saili ia fai ma tupu i le nuu ma “aveeseina mai ia te i latou a latou aia ma avanoa,” lea “sa popole ai tagata o le ekalesia.”¹⁵ Sa aoaoina i latou e le Tupu o Mosaea e sii ae o latou leo i le mea latou te manatu e sa’o.¹⁶ O lea sa latou “faapotopoto faatasi ai e tagata i latou lava i le laueleele atoa, e taitasi le tagata e tusa ma lona manatu, pe mo Amiliki pe

tetee ia te ia, i tino potopoto eseese, i le finau tele . . . o le tasi ma le isi.”¹⁷

I nei talanoaga, sa maua ai e tagata o le Ekalesia ma isi le avanoa e tutu faatasi ai, maua le agaga o le lotogatasi, ma faatosinaina e le Agaga Paia. “Ma sa oo ina tetee le leo o le nuu ia Amiliki, ma le faia ai o ia ma tupu i le nuu.”¹⁸

I le avea ai ma soo o Iesu Keriso ua ia te i tatou se tiutetauave e galulue faatasi ai ma le au faatuatua e tutusa mafaufau, e faaali o tatou manatu i le mea e sa’o. E ui e le tatou i tagata o le ekalesia ona faapea pe faaataata atu o loo latou tautatala atu mo le Ekalesia, ae ua valaaulia i tatou uma, i o tatou tulaga o ni tagatanuu, e faasoa atu la tatou molimau patino faatasi ai ma le talitonuga maumaututu ma le alofa—“e taitasi le tagata [alii ma le tamaitai] e tusa ma lona [lava] manatu.”¹⁹

Na saunoa le Perofeta o Iosefa Samita:

“Ou te toa e folafola atu i luma o le Lagi ua tutusa lava ma lo’u saunia ou te oti i le puipuia o aia tatau a se Peresipetiriane, o se Papatiso, po o se tagata lelei o soo se ituaiga lotu [e faapei foi o se Mamona]; mo le mataupu faavae lava e tasi lea e solia ai aia tatau a le Au Paia o Aso e Gata Ai lea foi e solia ai aia tatau a le Katoliko Roma, po o soo se isi lava ekalesia o e atonu e le ta’uta’ua pe e vaivai tele foi e puipuia i latou lava.

“O le alofa o le saolotoga lea e musuia lo’u agaga—o saolotoga faaletagata ma le faalelotu o tagata uma lava.”²⁰

Uso e ma tuafafine, o i tatou ua nafa ma le malupuipuia o nei saolotoga paia ma aia tatau mo i tatou lava ma a tatou fanau. O le a se mea e mafai ona e faia ma ou faia?

Muamua, e mafai ona tatou iloa. Ia nofouta i faafitauli i lou nuu ia e ono i ai se aafiaga o le saolotoga o tapuaiga.

Lua, i lou lava tulaga, ia afaatasi ma isi o e tutusa lo tatou naunau



i le saolotoga o tapuaiga. Galulue soosootauau e puipuia le saolotoga o tapuaiga.

Tolu, ia e ola i lou olaga ia avea o se faaitaiga o mea ua e talitonu i ai—i upu ma galuega. O le ala tatou te ola ai i la tatou tapuaiga, e sili atu ona taua nai lo mea e mafai ona tatou tautatala atu ai e uiga i la tatou tapuaiga.

Ua lalata mai lava le Afio Mai Faalua o lo tatou Faaola. Ia aua nei tatou faatuai i lenei galuega tele. Manatua Kapeteni Moronae, o le sa faaagiagiaina le fu’a o le saolotoga na tusia ai upu: “Mo le manatuaina o lo tatou Atua, ma la tatou tapuaiga, ma le saolotoga, ma lo tatou filemu, a tatou avā, ma a tatou fanau.”²¹ Ia tatou manatua le tali a tagata na faaoga ai la latou faitalia: sa latou “taufetuli faatasi mai” ma se feagaiga e faatino.²²

O’u uso e ma tuafafine pele, aua le savalivali! Taufetuli! Taufetuli ia maua faamanuiga o le faitalia e ala i le mulimuli i le Agaga Paia ma faaoga ia saolotoga ua tuuina mai e le Atua ia te i tatou e fai ai Lona finagalo.

Ou te tuuina atu la’u molimau faapitoa i lenei aso faapitoa o le Eseta sa faaoga e Iesu Keriso Lona faitalia e faia ai le finagalo o lo tatou Tama Faalelagi.

Tatou te pepese i lo tatou Faaola, “O Lona toto sa faamasaa: Ma ofo mai Lona soifua.”²³ Ma talu ai sa Ia faia, ua tatou maua ai le avanoa e le mafaatauina e “filifili ai le saolotoga ma le ola

faavavau” e ala i le mana ma faamanu-iaga o Lana Togiola.²⁴ Ina tatou filifili saoloto ia e mulimuli ia te Ia i le asō ma aso uma, ou te tatalo atu ai i Lona suafa paia, o Iesu Keriso, amene. ■

FAAMATALAGA

1. 2 Timoteo 3:3.
2. Isaia 5:20.
3. Tagai Mose 6:56.
4. Mose 4:3.
5. Mataupu Faavae ma Feagaiga 29:36.
6. Aperamo 3:27.
7. Mose 4:2.
8. 2 Korinto 3:17.
9. Mataupu Faavae ma Feagaiga 134:2, 4.
10. Tagai i le Folafolaga Faavaomalo o Aia Tatau, na taliaina e le Faalapotopotoga Aoao o Malo Afaatasi i le aso 10 Tesema, 1948, un.org/en/documents/udhr. Ua ta’ua i le Tusiga 18: “Ua i ai i tagata uma le saolotoga e faaleo atu ai ni manatu, mafaufauga ma tapuaiga; o lenei aia tatau e aofia ai le saolotoga e suia ai lana tapuaiga faaletonu po o talitonuga, ma le saolotoga, pe tutoatasi pe afaatasi ma nuu ma isi i nofoaga faitele pe faalilolilo, e faailoa atu lana tapuaiga po o talitonuga i le aoao atu, faaitaiga, tapuai ma le faamamaluina.” Tagai foi i le tusiga 9 a le Fonotaga a Europa mo le Puipuia o Aia Tatau o Tagata ma Saolotoga Tatau, ratified on Sept. 3, 1953, conventions.coe.int/treaty/en/treaties/html/005.htm.
11. Teuteronome 11:19.
12. Mareko 16:15.
13. Tagai Mataio 6:6.
14. Mataio 5:16.
15. Tagai Alema 2:1–4.
16. Tagai Mosaea 29:25–26.
17. Alema 2:5; faaopoopo le faamamafa.
18. Alema 2:7.
19. Alema 2:5.
20. *Aoaga a Peresitene o le Ekalesia: Iosefa Samita* (2007), 345.
21. Alema 46:12.
22. Alema 46:21.
23. “Maeu le Poto ma le Alofa,” *Viiga*, nu. 109.
24. 2 Nifae 2:27.



Saunia e Elder Kevin W. Pearson
O Le Fitugafulu

Tumau i le Laau

O le faaaliga ia Liae o le laau o le ola o se faataoto mamana lea e uiga i le tumau e oo i le iuga.

Ao tulata ina malii Peresitene Ipa J. Kurene, sa asiasi atu se tasi o le Pulega Aoao i lona maota. A o lei tuua e ia, sa tatalo Peresitene Kurene, “Le Atua e, faamanuia a’u ina ia le mou atu la’u molimau ma ia tumau le faamaoni seia oo i le iuga!”¹ Ina ua mavae le toetiiti ato le 27 tausaga o aveai ma Peresitene o le Ekalesia, o lana tatalo faatauana lea. O lana faataitaiga o se faamanatu mamana e leai se tasi, i soo se matua, ua saoloto mai faatosinaga a Satani. O meafaigaluega e lua e sili ona mamana a Satani o le tata’iese ma le taufaasese.

O le tumau e oo i le iuga o se uiga lea o le aveai ma soo moni ma e manaomia mo le ola e faavavau. Peitai a oo mai tofotofoga ma luitau ia i tatou, e tele taimi e ta’u mai ai ia i tatou ia tau lava ina “onosai ai iina.” Sei ou faamanino atu lava o le “onosai ai iina” e le o se mataupu faavae o le talalelei. O le tumau e oo i le iuga o lona uiga o le sau pea lava pea ia Keriso ma ia faaatoatoaina ia te Ia.

Afai e manaomia le tumau e oo i le iuga, i le ola e faavavau, aisea tatou te tauivi ai ina ia faamaoni? Tatou te tauivi pe a utia i tatou i faamuamua faatautavā. O le usitai faasamasamanoa ma le tautino atu faavaelutai e faumatia ai le faatuatua. O le tumau e oo i le iuga,

e manaomia ai le tautino atu atoatoa i le Faola ma a tatou feagaiga.

O le faaaliga ia Liae o le laau o le ola o se faataoto mamana lea e uiga i le tumau e oo i le iuga. Faamolemole ia suesue ma le agaga tatalo ma mafau-fau loloto i le miti a Liae; ona faataua lea ia te oe lava. A o e faia, ia mafau-fau toto’a i mataupu faavae taua e ono ia e fesoasoani tatou te tumau ai e oo i le iuga.

1. Aua Nei Galo Ona Tatalo

Tatou amata ia Liae na o ia “i totonu o se gaogao pogisa ma le pagatia.”² Ua tatou tofua oo i ni taimi o le pogisa ma le tuuatoatasi. “Ina ua o’o mala, na e tatalo ai.”³ Mulimuli i le faataitaiga a Peresitene Ipa J. Kurene. Tatalo mo le malosi e tumau ai e oo i le iuga. Ole atu i le Tama Falelagi, “O le a se isi mea E Te finagalo ou te faia?”

2. O Mai Ia Keriso ma Ia Faaatoatoaina ia te Ia

O le laau o le ola o le taulaiga tutotonu lea o le miti a Liae. E faasino mea uma i le laau o le ola. O le laau e faatusa ia Keriso, o le faaaliga manino o le alofa o le Atua. O le fua o Lana Togiola e le i’u ma o se faamaoniga tele o le alofa o le Atua. O le ola e faavavau ma e pele ia i tatou, e sili atu ona suamalie ma manaomia nai lo se isi lava mea. Ina ia iloaina lenei mea alofa, e tatau ona tatou “o mai ia Keriso, ma ia faaatoatoaina ia te ia.”⁴ O Ia “o le ala, le



upumoni, ma le ola.”⁵ E mafai ona tatou faatumuina o tatou olaga i mea e ausia ma mea lelei, peitai i le iuga, afai tatou te le ulu atu i feagaiga paia e mulimuli ma le faamaoni ia Keriso ma tausia, o le a tatou matuā le malamalama lava i lo tatou faamoemoega moni.

3. Fetaomi Atu i Luma ma le Faatuatua

E i ai le ala e tau atu i le laau o le ola, ia Keriso. O se ala sa’o ma le vaapiapi, e tāmāu ma sa’onoa. O poloaiga a le Atua e tāmāu ae le faatapulaaina. E puipuia ai i tatou mai tulaga matautia faaleagaga ma faaletino ma puipuia ai foi i tatou mai le leiloloa.

O le usitai e fausia ai le faatuatua ia Keriso. O le faatuatua o se mataupu faavae o faatinoga ma le mana. O le mulimuli pea lava pea i le faataitaiga a le Faaola, e maua mai ai le mana ma le gafatia faaleagaga. A aunoa ma le mana faamalosi ma gafatia o le Togiola, e le mafai ona nofomau i luga o le ala ma tumau ai.

“Fetaomi atu i luma ma le tumau ia Keriso.”⁶

4. O Le Tusi a Mamona o le Ki i le Ola Ai Faaleagaga

E faigata le malaga o le olaga. E faigofie ona faalavefauiina, ma see ese ai mai le ala ma leiloloa ai. O puapuga o se vaega e le maalofia ma e tatau ai o lo tatou alualu i luma e faavavau. A oo mai mafatiaga, aua nei e faatagaina se mea e te le malamalama atoa i ai e talatalaina mea ua e iloa. Ia e onosai, pipiimau i le upumoni; o le a oo mai le malamalama. O tofotofoga e pei o puaoa o le pogisa e mafai ona faatauaso ina o tatou mata ma faamaaaina o tatou loto. Vagana ua tatou “piimau pea”⁷ i le afioga a le Atua ma ola ai, o le a oo ina tatou tauaso faaleagaga nai lo le mafaufau faaleagaga. Sailiili i le Tusi a Mamona ma upu a perofeta soifua i aso



uma, i aso uma, i aso uma! O le ki lea i le ola faaleagaga ma aloese ai mai le faaseseina. A aunoa ma lena, ua tatou leiloloa faaleagaga.

5. Aua Nei Tata’ieseina ma Faaseseina Outou

O le ua’i atu o le avatu lea i ai o se gauai toto’a. O le ua’i atu ia i latou e le talitonu ia Keriso o le a le fesoasoani ia te oe e maua ai o Ia. O le sailia o le fale ateatea, mo se malamalama o le a taitai atu ai oe i le upumoni. E le maua ai iina. E na o le Faaola o loo i ai “upu o le ola e faavavau.”⁸ O isi mea uma ua na o ni upu. O le faletele ma le ateatea ua faatusa i “mafaufauga le aoga ma le faamaualuga”⁹ o le lalolagi—i se isi faaupuga, o le tata’iese ma le taufaasese. E tumu i tagata laei lelei o e foliga mai e maua mea uma. Peitai, latou te aamu i le Faaola ma i latou o e mulimuli ia te Ia. Ua latou “aoaoina e le aunoa, a e le au mafai ona oo ina iloa lelei o le upumoni.”¹⁰ Atonu e sa’o lava i latou i mea faaupufai, ae ua leiloloa faaleagaga i latou.

6. Tumau i le Laau

O le savali a Liae o le tumau i le laau. Tatou te tutu ai aua ua liua i tatou i le Alii. Na aoao mai e Alema, “Faauta, sa ia liua o latou loto; ioe, sa ia fafagu i latou mai se moe gase, ma sa latou ala mai i le Atua.”¹¹ A o tatou faamatuu atu o tatou loto i le Atua, e suia e le Agaga Paia o tatou lava natura, ma tatou liua loloto ai i le Alii, ma tatou le toe saili atu ai i le fale ateatea. Afai e tuu lo tatou faia o na mea ia e aumaia ai le liua loloto, e faavaivaia faaleagaga i tatou. O le liliuese o le faafeagai o le liua.

I faifeautalai uma o taimi ua tuanai ma le taimi nei: Alii ma tuafafine, e le mafai ona e foi mai lau misiona, ma toe tofua atu i Papelonia, ma faaalu ai itula e le mafaitaulia e te sikoa ai ma maua ni ‘ai e leai se uiga o taaloga faavitio e aunoa ma se pa’ū atu i se moegase faaleagaga. E le mafai foi ona e nopiā’i i ponokalafi i le initoneti ma lē amanaia ai le amioatua ma le legavia e aunoa ma ni taunuuga matuia faaleagaga. A e le maua le Agaga, ua e se. Aua ne’i tata’ieseina ma faaseseina oe.



O soo moni e faaaauu pea ona alafa'i mai i le Atua i aso taitasi i le tatalo anoa faaletagata lava ia, o le suesue faamaoni i tusitusiga paia, usiusitai patino, ma le auauna atu ma le le manatu faapito. Tumau i le laau ma mataala.

I ni tausaga ua mavae, sa valaauiina ai ma'ua ma Sister Pearson e pulefaa-malumu i le Misiona a Washington Tacoma. O se mea na matua'i faateia lenei valaauga. Faatasi ai ma sina atu-ativale, sa ma fono ma le taitaifono ma le Pule Sili o le kamupani sa ou faigaluga ai, ma sa faailoa atu ai ia i laua lo'u valaauga faamisiona. Sa manino lava lo laua le fiafia i la'u faaiuga e tuua le kamupani. "O anafea na e faia ai lenei faaiuga, ae aisea na e le talanoa vave mai ai?" sa la ina'inā mai ai.

I se minute o le manino, sa oo mai ai se tali maoae i lo'u mafaufau. Sa ou fai atu, "Sa ou faia lenei faaiuga ina

ua 19 o'u tausaga, ina ua ou faia ni feagaiga paia ma le Atua i totonu o le malumu e mulumu i le Faaola. Sa ou fauina lo'u olaga atoa i luga o na feagaiga, ma ua ou matuai aga atu e tausia atoatoa na feagaiga i le taimi nei."

O le taimi lava tatou te osifeagaiga ai ma le Atua, e le toe i ai se foi i tua. O le fetuunai, togi le solo, ma le faamaumau o le malosi, e le o ni filifiliga ia. I le malo o le Atua, e i ai se tagavai o le lelei atoatoa mo le faaeaga. E manaomia ai le avea ma soo lototoa! E leai se avanoa mo ni soo faasamasamanoa pe faafia-amiotonu. O le faasamasamanoa o le fili lea o le lelei silisili, ma o le tautinoga faasamasamanoa o le a taofia ai oe mai le tumau e oo i le iuga.

Afai o e tauivi, fenumiai, pe ua leiloa faaleagaga, ou te uunaia oe e fai le mea e tasi lea ou te iloa o le a toe faafoi ai oe i luga o le ala. Toe amata ona suesue

ma le agaga tatalo le Tusi a Mamona ma ola ai i ona aoaoga i aso uma, i aso uma, i aso uma! Ou te molimau atu i le maoae o le mana o le Tusi a Mamona o le a suia ai lou olaga ma faamalosi ai lau faaiuga e mulumu ia Keriso. O le a suia e le Agaga Paia lou olaga ma fesoasoani e te iloa ai "mea e pei ona i ai moni."¹² O le a Ia faaali atu ia te oe le isi mea e sosoo e tataua ona e faia. O le folafolaga lenei a Nifae ia te oe:

"Ma sa ou fai atu ia te i latou . . . ai se faalogo i le afioga a le Atua, ma pipiimau i ai, e le fano lava i latou; pe mafai foi e faaosoosoga ma ufanafana mu a le fili ona faatoilaloina i latou i le faatauasoina, e taitai ese atu ai i latou i le faafanoga.

"O le mea lea, o a'u . . . sa ou apo-apoai atu ia te i latou . . . ia ua'i atu i le afioga a le Atua ma manatua ia tausi pea i ana poloaiga uma."¹³

Uso e ma tuafafine, o le tumau e oo i le iuga o le suega sili lea o le avea ai ma soo. O le avea ai o i tatou ma soo i aso taitasi, o le a fuafua ai lo tatou taunuuga e faavavau. Ala maia i le Atua, pipiimau i le upumoni, ia tausia a outou feagaiga paia i le malumu, ma tumau i le laau!

Ou te molimau atu i le Keriso toetu soifua. Ou te iloa o loo soifua o Ia. O lo'u naunauga aupito sili ia ou faamaoni ma faatuatua e oo i le iuga i le mulumu ai i Lana faataitaiga ofoofogia. I le suafa paia o Iesu Keriso, amene. ■

FAAMATALAGA

1. Siiina e John Longden, i le Conference Report, Oct. 1958, 70.
2. 1 Nifae 8:7.
3. "Pe na Faia Sau Tatalo?" *Viiga*, nu. 75.
4. Moronae 10:32.
5. Ioane 14:6.
6. 2 Nifae 31:20.
7. 1 Nifae 8:30.
8. Ioane 6:68.
9. 1 Nifae 12:18.
10. 2 Timoteo 3:7.
11. Alema 5:7.
12. Iakopo 4:13.
13. 1 Nifae 15:24–25.



Saunia e Elder Rafael E. Pino

○ Le Fitugafulu

O Le Vaaiga e Faavavau i le Talalelei

Mo faaiuga e aafia ai le faavavau, e taua ai le mauaina o se vaaiga o le talalelei.

I se faaaliga na tuu atu ia Mose, na ta'u mai ai ia i tatou le faamoemoega folafolaina a lo tatou Tama Faalelagi: "Aua faauta, o la'u galuega ma lo'u mamalu lenei—ia aumaia le tino ola pea ma le ola faavavau o le tagata."¹ E tusa ai ma lena fetalaiga, o le finagalo o le Tama ia tuu atu i tagata uma le avanoa e maua ai le atoatoa o le olioli. Ua faaali mai i faaaliga o aso e gata ai na fatu e le Tama Faalelagi se fuafuaga sili o le fiafia mo Ana fanau uma, o se fuafuaga faapitoa lava ina ia mafai ai ona tatou toe foi atu e mau faatasi ma Ia.


O le malamalama ai i lenei fuafuaga tatou te maua ai se vaaiga e faavavau ma fesoasoani ai ia i tatou ia faataua moni lava poloaiga, o sauniga, o feagaiga, ma tofotofoga ma faigata.

O le tasi mataupu faavae autu e sau mai le Alema: "O lea na tuu mai ai e le Atua poloaiga ia te i latou, ina ua uma ona ia faaali mai ia te i latou le fuafuaga o le togiolaina."²

E mata'ina le matauina o le faatula-gaga i le faagasologa o le aoao atu. Na muamua lava aoao atu e lo tatou Tama Faalelagi ia Atamu ma Eva le fuafuaga o le togiolaina, ona Ia tuu atu lea ia i laua ni poloaiga.

O se upumoni maoae lea. O le malamalama i le fuafuaga o le a fesoasoani lea i tagata ia tausia poloaiga, faia ni faaiuga sili atu, ma maua le uunaiga sa'o.

I lenei taimi o la'u auaunaga i le Ekalesia, ua ou molimauina ai lava le tuuto ma le faamaoni o tagata o le Ekalesia i atunuu eseese, o nisi o ia atunuu o loo feagai ma ni faafitauli tau faaupufai, faaleagafesootai, pe faaletamaoiga. O se tasi o vaega taatele e tele lava ina ou maua i nei tagata faamaoni, o le vaaiga o loo ia i latou o le faavavau. O le vaaiga e faavavau i le talalelei e taitai atu ai i tatou ia malamalama i lo tatou tulaga i le fuafuaga a le



Atua, ia talia faigata ma alualu i luma e ala i na faigata, ia faia ni faaiuga, ma ia avea lo tatou gafatia paia ma vaega tutotonu o o tatou olaga.

O le vaaiga o le ala lea tatou te vaai atu ai i ni mea pe a tatou tilotilo atu i ai mai se mamao patino, ma e faatagaina ai i tatou ia talisapaia lo latou taua moni.

E tai pei lava o le i ai i totonu o se vaomatua ma o loo tu se laau i o tatou luma. Sei vagana ua tatou laa teisi i tua, o le a le mafai lava ona tatou talisapaia le tulaga moni o le vaomatua. Sa ou asiasi atu i se tasi taimi i le Vaomatua o Amasoni i Letisia, Kolomupia, e latalata i le tuaoi o Pasila ma Peru. Sa lei mafai ona ou talisapaia lona lautele naua seia oo ina ou lele atu i ona luga ma maua ai se vaaiga.

A o laiti le ma fanau, sa masani lava ona latou matamata i se alaata 'mo tamaiti i le televise lea sa i ai se polokalama na ta'ua *O Le A le Mea o E Vaai I Ai?* E matuai faalatalata mai lava e le lau le ata o se mea, ma taumate atu e tamaiti po o le a lena mea a o faasolo ina faalautele le ata. A oo loa ina iloa atoa le meafaitino lea, ona faigofie lava lea ona e iloina o se pusi, se laau, se fasi fualaaauaina, ma isi mea faapena.

Ou te manatua se tasi taimi a o latou matamata i lena polokalama, sa faaali mai ai se mea na matua le manino lava lea sa pei e foliga mai e auleaga ia i latou, pe inoino ai foi; ae a o manino mai le ata, sa latou iloina ai o se pisa [pizza] sa matua manogi lava. Ona latou faapea mai lea ia te au, "Tama, faatau mai se pisa [pizza] faapela ma matou!" Ina ua latou malamalama po o le a lena mea, o se mea sa foliga muamua mai e le manaia ia i latou lea sa iu ina avea ma se mea sa matua tosina atu i ai.

Sei ou faasoa atua se isi aafiaga. I lo matou aiga sa fiafia lava le fanau e fai le taaloga o le paso. Masalo sa tatou maua uma se avanoa e faia ai se paso.



O nisi paso e tele lava ni vaega laiti. Ou te manatua se tasi o le ma fanau (o le a ou le ta'ua lona igoa ina ia pui-puia lona tagata) sa masani ona taulai atu i ni vaega taitasi, ma a le fetau i le tasi vaega i le mea na ia manatu e tatau ona ofi ai, e ita lava o ia ma manatu sa le lelei ma manao ai e tiai ese. Sa iu lava ina ia iloa fai le paso ina ua ia malamalama o vaega laiti taitasi e tofu lava ma sona nofoaga i le ata faaiu, e tusa lava pe na te le iloaina le mea e ofi i ai i le taimi tonu lea.

O se tasi lea o auala e mafaufau lelei ai i le fuafuaga a le Alii. E le tatau ona tatou soona atuavale i ona vaega eseese taitasi ae ia taumafai ia malamalama i le ata atoa, ma manatua pea po o le a le taunuuga faaiu. Ua silafia e le Alii po o fea e fitoitonu i ai vaega taitasi, ina ia ofi i totonu o le fuafuaga. E i ai le taua e faavavau i poloaiga uma i le faatulagaga atoa o le fuafuaga sili o le fiafia.

E matuai taua lava lo tatou lē faia o ni faaiuga e i ai lo latou taua e faavavau mai se vaaiga o le olaga faaletino. Mo faaiuga e aafia ai le faavavau, e taua ai le mauaina o se vaaiga o le talalelei.

Sa aoao mai Elder Neal A. Maxwell: “E ui atonu o loo tatou ‘taulai’ atu i mea e sili ona tatou faamoemoe i ai i le faavavau, ae o nisi o mea o loo tatou faamoemoe i ai i lenei olaga, e ese. Atonu tatou te faamoemoe i se siitaga o le totogi, se faigauo faapitoa, se manumalo i le faigapalota, ia po o se fale tele atu—o mea e mafai pe le mafai foi ona tino mai. O le faatuatua i le fuafuaga a le Tama tatou te maua ai le onosai e oo lava i le le faataunuaina o ni mea sa faamoemoe i ai mo se taimi puupuu. O le faamoemoe e faatumauina ai lo tatou auai ma le naunautai i galuega lelei e tusa lava pe foliga mai e le ausiaina na galuega (tagai MF&F 58:27).”³

O le le mauaina o se vaaiga e faavavau, po o le mauaina, e mafai ona taitai atu ai i tatou i le mauaina o se vaaiga faalelalagi e tusa ai ma o tatou tulaga faaletagata ma faia ai ni faaiuga e le ogatusa ma le finagalo o le Atua.

O loo taua e le Tusi a Mamona le uiga na i ai ia Nifae ma le uiga o Lamana ma Lemuelu. Sa latou puapuga uma i le anoanoai o mafatiaga ma le tele o faigata; peitai, o o latou

uiga e faatatau i na mafatiaga sa matua eseese lava. Sa fai mai Nifae, “Ma sa matua tele lava faamanuiaga a le Alii i luga o i matou, e ui ina sa matou ola i aano mata o manu i le vao, sa lava le suasusu o o matou fafine mo a latou fanau, ma sa malolosi, ioe, e pei lava o tane; ma sa amata ona latou tauave a latou malaga e aunoa ma le muimui.”⁴

Ae o Lamana ma Lemuelu i le isi itu, sa faitio leaga. “Ma sa faapea ona muimui o Lamana ma Lemuelu, o e ua matutua, i lo laua tamā. Ma sa muimui i laua ona sa laua le iloa faiga a lena Atua o le na foafoaina i laua.”⁵ O le le iloaina po o le lafoaia o “faiga a [le] Atua” o se tasi lea o auala e le maua ai se vaaiga e faavavau, ma o le muimui o se tasi lea o faailoga. E ui lava sa molimauina e Lamana ma Lemuelu le tele o vavega faatasi ma Nifae, ae sa la alalaga lava ma fai mai: “Ma ua tatou feoa’i ai i le vao i nei tausaga e tele; ma galulue o tatou fafine, a’o mamafa i latou i fanau; ma ua latou fanauina fanau i le vao ma mafatia i mea uma, vagana ai le oti; ma sa sili ona lelei pe ana latou feoti ae latou te lei o ese mai i fafo o Ierusalemā nai lo le mafatia i nei puapuga.”⁶

O ni uiga na se lua e matua eseese lava, e ui lava o faigata ma mafatiaga sa latou fetaii sa talitutusa. Ae sa iloagofie lava, sa eseese a latou vaaiga.

Sa tusia e Peresitene Spencer W. Kimball le faamatalaga leni: “Afai tatou te vaai atu i le olaga faaletino o lo tatou olaga atoa lava lea, ona avea lea o tiga, faanoanoaga, toilalo, ma le puupuu o le ola o se faalavelave matautia. Ae afai tatou te vaai atu i le olaga o se vaega e faavavau e amata mai le muai olaga ma oo atu i le faavavau pe a mavae le oti, ona mafai lea ona tuu mea uma o loo tutupu i se vaaiga talafeagai.”⁷

Sa faamatala e Elder David B. Haight se tala e uiga i le vane-faatagata o Michelangelo e faamanino ai le taua



Saunia e Elder Neil L. Andersen

○ Le Korama a Aposetolo e Toasefululua

o le vaai atu i mea uma i se vaaiga talafeagai: “A o vaneina e le vane-faatagata se poloka o maamora, sa sau ai lava se tamaitiiti i aso uma ma mata-mata ma le filemu. Ina ua manino ma aliali mai le faatusa o Tavita mai lena maa, ma faamaeaina mo tagata uma ia faamemelo i ai, sa fesili atu le tamaitiiti ia Michelangelo, ‘Sa faapefea ona e iloaina sa i ai o ia i totonu iina?’”⁸

O le vaaiga lea sa vaai ai le vane-faatagata i lena poloka o maamora sa ese mai le vaaiga a le tamaitiiti sa matamata atu a o galue o ia. O le vaai mamao a le tufuga e uiga i mea e mafai ona faia sa i totonu o le maa na faatagaina ai o ia e fatua’i se galuega o le faatufugaga.

Ua silafia e le Alii po o a mea e finagalo o Ia e faataunuu ia i tatou tai-toatasi. Ua Ia silafia le ituaiga o suiga e finagalo o Ia ia ausia i o tatou olaga, ma e le o ia i tatou le aia e faatonu ai o Ia. E silisili atu ona manatu i lo o tatou manatu.⁹

Ou te molimau atu o loo i ai so tatou Tama Faalelagi alofa, amiotonu, ma alofa mutimutivale ua sauniaina se fuafuaga mo lo tatou fiafia e faavavau. Ou te molimau atu o Iesu Keriso o Lona Alo ma le Faaoia o le lalolagi. Ou te iloa o Peresitene Thomas S. Monson o se perofeta a le Atua. Ou te tau atu ai nei mea i le suafa o Iesu Keriso, amene. ■

FAAMATALAGA

1. Mose 1:39.
2. Alema 12:32.
3. Neal A. Maxwell, “Faamoemoe Atoatoa Lelei,” *Liahona*, Ian. 1995, 40–43.
4. 1 Nifae 17:2.
5. 1 Nifae 2:12.
6. 1 Nifae 17:20.
7. *Aoaoga a Peresitene o le Ekalesia: Spencer W. Kimball* (2006), 15.
8. David B. Haight, “Your Purpose and Responsibility” (Faesaite a le Iunive-site o Polika Iaga, Sete. 4, 1977), 2–3; speeches.byu.edu.
9. Tagai Isaia 55:8–9.


Ia Oo Mai Lou Malo

O le mafaufau i Lona afio mai e faagaeetia ai lo’u agaga. O le a ofoofogia! O le lautele ma le matagofie, o le tele ma le ofoofogia, o le a sili mamao atu i soo se mea ua vaai i ai mata faaletino pe oo foi i ai.

Ao tatou pepese, sa matua uunaia a’u i se manatu faapea o le taimi lava lenei, e faitau selau ma fia afe, masalo e faitau miliona o tagata talitonu o Au Paia i atunuu e 200, i se tulaga ofoofogia i gagana eseese e 75,¹ ua tatou sii ae faatasi o tatou leo i le Atua, ma pepese:

*Le Tupu o tupu afio mai!
Loa na matou faatali oe,
Mamana e faasaoloto ai,
I lou nuu paia.²*

“Le Tupu o Tupu, Afio Mai!”³ O i tatou o se aiga toatele naua o ni tagata faatuatua i le lalolagi atoa, o soo o le Alii o Iesu Keriso.



Ua tatou tauaveina i o tatou luga Lona suafa, ma o vaiaso taitasi a o tatou aai ma feinu i le faamanatuga, tatou te folafola atu ai o le a tatou manatua o Ia ma tausii Ana poloaiga. E mamao lava i tatou mai le atoatoa, ae tatou te le o faa-samasamanoa i lo tatou faatuatua. Tatou te talitonu ia te Ia. Tatou te tapuai ia te Ia. Tatou te mulimuli ia te Ia. Tatou te alolofa tele ia te Ia. O la tatou galuega ua silisili ia i le lalolagi uma.

Ua tatou ola, uso e ma tuafafine, i taimi o loo loma ai le Afio Mai Faalua o le Alii, o se taimi ua loa ona faatalitali i ai le au faatuatua o le talafaasolopito. Ua tatou ola i taimi o taua, o taimi o faalavelave faalenatura, o aso ua fetosoa’i ai le lalolagi e le fememeai ma fevesiaiga.

Ae ua tatou ola foi i le taimi o le Toefuataiga, o le taimi ua avatu ai le talalelei i le lalolagi uma—o se taimi sa folafola mai ai e le Alii faapea o le a Ia “faatu mai . . . se nuu mama”⁴ o e o le a Ia faaaupegaina “i le amiotonu ma le mana o le Atua.”⁵

Ua tatou sapi i lo tatou olioli ma le lotomalie, ma tatou te faamoemoe e fetaiai ma le lotototoa ma a tatou tauiviga ma mea e le o mautinoa. O nisi faigata e sili atu ona ogaoga i lo isi, peitai e leai se tasi e sao mai ai. Na saunua Elder Neal A. Maxwell i se tasi taimi,

“Afai ua atoatoa le lelei o mea uma mo oe i le taimi nei, faatali la.”

E ui ina sa faamautinoa mai faafia e le Aii ia i tatou e “le tatau ona mata’u,”⁶ ae o le tausisia o se vaaiga manino e ati i luga atu o lenei lalolagi, e le faigofie pea pe a tatou i ai i le lotolotoi o tofotofoga.

Sa aoao mai e Peresitene Thomas S. Monson ia te au se lesona taua e uiga i le tausisia o se vaaiga e faavavau.

Sefuluvalu tausaga talu ai a o ma malaga atu i se nofoaafi i Suitiselani ma Peresitene Monson, sa ou fesili atu ia te ia e uiga i ona tiutetauave mamafa. O lana tali sa faamalosia ai lo’u faatuatua. “I le Au Peresitene Sili,” sa saunoa ai Peresitene Monson,”matou te faia mea uma matou te mafaia e tulei ai i luma lenei galuega. Ae o le galuega lenei a le Alii. Na te taitaia. O loo i ai o Ia i le foeuli. Matou te maofa a o matou matauina o Ia o tatala faitotoa matou te le mafai ona tatalaina ma faatino ia vavega e seasea matou manatu i ai.”⁷

Uso e ma tuafafine, o le vaaia ma le talitonu i vavega a le Alii i le faavaeina o Lona malo i le lalolagi, e mafai ona fesoasoani tatou te vaai ai ma talitonu o loo i ai le aao o le Alii i le galuega ma i o tatou foi olaga.

Na tautino mai le Alii, “Ou te mafai ona fai o la’u lava galuega.”⁸ Tatou te taumafai uma e fai la tatou vaega, peitai o Ia o le tusiata mamana sili. I lalo o le taitaiga a Lona Tama, sa Ia foafoaina ai lenei lalolagi. “Na ia faia mea uma lava; e leai foi se mea e tasi na faia e lei faia e ia.”⁹ A oo ina tatou alafa’i mai faaleagaga ma mataituina, tatou te vaaia Lona aao i le salafa o le lalolagi ma vaaia Lana faatosinaga i o tatou lava olaga patino.

Sei ou faasoa atu se faaitaitaiga.

I le 1831, i le na o le 600 tagata o le Ekalesia, sa tautino mai ai e le Alii, “O ki o le malo o le Atua ua tuu atu i tagata i luga o le lalolagi, ma mai iina o le a taavale atu ai i luma le talalelei

i tuluiga o le lalolagi, e pei ona o le a taavale atu le maa na tofi mai le mauga e aunoa ma lima, seia tumu ai le lalolagi atoa.”¹⁰

Sa muai vaaia e le perofeta o Nifae o le a “toaitiiti” ni tagata o le Ekalesia i o tatou aso pe a faatusatusa i le faitau aofai o le lalolagi ae o le a i ai “i luga o le lalolagi atoa.”¹¹

O faaitaitaiga matagofie e tolu o le aao o le Alii i le faatuina o Lona malo, o malumalu ia na faasilasila mai i le asō e Peresitene Monson. I le mavae ai o ni nai vaitausaga, o ai na mafaufauina ni malumalu i Haiti, Taialani, ma le Faga o Ivory?

O le tulaga o se malumalu e le o se faaiuga talafeagai faafaafanua. E oo mai i se faaaliga mai le Alii i Ana perofeta, e tau mai ai se galuega maoae ina ia faia, ma faailoa atu ai ia Au Paia amiotonu o e o le a faatauaina ma tausia mo Lona maota i augatupulaga.¹²

Sa ma asiasi atu ma lo’u toalua o Kathy, i Haiti i le lua tausaga talu ai. I luga o le mauga o Port-au-Prince, sa matou aufaatasi ai ma le Au Paia o Haiti i le faamanatuina o le faapaiaga o le atunuu e Elder Thomas S. Monson i le na o le 30 tausaga na muamua atu. E leai se tasi o i tatou o le a faagaloina le mafuie faataumaoui o le 2010. Faatasi ai ma tagata faamaoni o le au paia ma se au lotototoa o faifeautalai sa toetoe o tagata Haiti uma, ua faaaauu ai pea ona faatupulaia le Ekalesia i lenei atumotu ma ua malosi. Ua sii ae lo’u faatuatua i le vaai atu i nei Au Paia amiotonu a le Atua, o laei papae, ma maua le mana o le perisitua paia e taitaiina ma faataunuuna ia sauniga paia i le maota a le Alii.

O ai na mafaufauina se maota o le Alii i le aai matagofie o Bangkok? O se isi faaitaitaiga, o Kerisiano e na o le tasi le pasene o le atunuu o Tailani e tele lava i le Lotu Puta. E pei o Haiti, ua tatou iloaina foi i Bangkok sa faapotopotoina e le Alii le au filifilia o le lalolagi. A o i ai iina i ni nai masina talu ai, sa matou feiloai ai ma Sathit ma Gaew Kaivalvatana. Sa auai Sathit i le Ekalesia ina ua 17 ona tausaga, ma sa faamisiona i lona lava nuu. Mulimuli ane, sa la feiloai ai ma Gaew i le Inisitituti, ma sa faamauina i la’ua i le Malumalu o Manila Filipaina. I le 1993, na lavevea ai le au Kaivalvatana i se loli ona na moe le avetaavale. Sa pipili ia Sathit mai le fatafata i lalo. Sa lei maluelue lava lo la’ua faatuatua. O Sathit o se faiaoga tausaaafia i le Aoga





Faavaomalo i Bangkok. O ia o le peresitene o le Siteki a Thailand Bangkok Matu. E i ai vavega a le Atua i Lana galuega ma i o tatou olaga patino.

O le vavega o le Ekalesia i le Faga o Ivory e le mafai ona faamatalaina e aunoa ma igoa o ni ulugalii se toalua: O Filipe ma Analei ma Lusiane ma

ma Lusiane e toe foi i o la'ua atunuu moni i Aferika ma le faamoemoe e fausia le malo o le Atua. Mo le Tuafafine o Asata, o se Siamani, o le tuua o lona aiga, ma Uso Asata, o le tuua o lana galuega o se enisinia faamoemoeina, e manaomia ai se faatuatua uiga ese. O nei ulugalii e toalua sa feiloai le tasi ma

le isi mo le uluai taimi i le Faga o Ivory, ma sa amata ai se Aoga Sa. Ua 30 tausaga talu ai. Ua i ai nei siteki e valu iina ma tagata auai e 27,000 i le atunuu Aferika matagofie. O loo galulue faatamalii pea le au Afoue, e faapena foi le au Asata, lea faatoa mae'a nei se la misiona i le Malumalu o Accra Ghana.

Pe o mafai ona outou vaai i le aao o le Atua i le tuleia i luma o Lana galuega? Pe o mafai ona outou vaai i le aao o le Atua i olaga o faifeautalai i Haiti po o le au Kaivalvatanas i Taialani? Pe o mafai ona

outou vaai i le aao o le Atua i olaga o le au Asata ma le au Afoue? Pe o mafai ona outou vaai i le aao o le Atua i lou lava olaga?

“Ma ua leai se mea e faatausuai ai le tagata i le Atua . . . tau lava o i latou o e latou te le tautinoina lona aao i mea uma.”¹³

E le na o Haiti, Tailani, po o le Faga o Ivory o loo tutupu ai vavega a le Atua. Vaavaai solo.¹⁴ “E manatu mai le Atua i tagata uma . . . ; ioe, ua ia faitauina ona tagata, ma o ona loto alofa mutimutivale ua i luga o le lalolagi uma.”¹⁵

O nisi taimi e mafai ona tatou vaai i le aao o le Alii i olaga o isi ae tatou te taumanatunatu, “Pe mafai faapefea ona manino atili la'u vaai i Lona aao i lo'u lava olaga?”

Na fetalai le Faaola:

“[Aua] le masalosalo.”¹⁶

“Aua e te mata'u.”¹⁷

“E leai . . . se [manuiti] e . . . pa'ū [i] le elelee e aunoa ma [le silafia] e lo outou Tama. . . .

“O lea . . . aua tou te matatau ai, [aua] e sili outou i manu iti e tele.”¹⁸

Manatu i le alii talavou lea sa tagi atu i le perofeta o Elisaia a o siomia i latou e fili: “Aue, [o le a] se mea tatou te fai a'!”¹⁹

Sa tali atu Elisaia:

“Aua e te fefe: aua e toatele ua ia te i tatou i e ua ia te i latou.

“Ona tatalo ai lea o Elisaia, . . . Ieova e, . . . faapupula i ona mata,



Agavale pito i luga: O Peresitene Thomas S. Monson i Haiti mo le faapaiaiga o lona malo i le 1983. I luga: O paionia o Faga o Ivory o Philippe ma Annelies Assard (agavale) ma Lucien ma Agathe Affoue. Agavale: Peresitene o le siteki o Sathit Kaivaivatana ma lona faletua, o Juthamas, i Bangkok, Taialani.

Asata Afoue. Sa auai i latou i le Ekalesia o ni ulugalii talavou i Europa, o le tasi i Siamani a o le isi i Farani. I le 1980, e le iloa e le tasi le isi, sa manatu ai Filipe



ina ia na iloa. Ona faapupulaina lea e Ieova o mata o le taulealea, ona iloa ai lea e ia, faauta foi, ua tumu le mauga i solofanua ma kariota afi.”²⁰

A o outou tausia poloaiga ma tatalo i le faatuatua ina ia iloa le aao o le Alii i lou olaga, o le a Ia faapupula tele ou mata faaleagaga, ma o le a atili manino ai lau vaai e le o tuua na o oe.

Ua aao mai e tusitusiga paia e aoo ona tatou “[tutu] mausali i le faatuatua i le mea o le a oo mai.”²¹ O le a le mea o le a oo mai? Na tatalo le Faaola:

“Lo matou Tama e, o i le lagi, Ia paia lou suafa.

“Ia oo mai lou malo. Ia faia lou finagalo i le lalolagi, e pei ona faia i le lagi.”²²

Faatoa uma atu ona tatou lagiina le viiga, “Le Tupu o Tupu, Afio Mai.”

E tupu lo tatou faatuatua a o tatou naunau atu i le toe afio mai o le Faaola. O le mafaufau i Lona afio mai e faaga-eetia ai lo’u agaga. O le a ofoofogia! O le lautele ma le matagofie, o le tele ma le ofoofogia, o le a sili mamao atu i soo se mea ua vaai i ai mata faaletino pe oo foi i ai.

I lena aso, o le a afio mai o Ia o “aui i se ie ma taoto i le moega vaovao,”²³ peitai, o le a Ia afio mai “i ao o le lagi, ua faaofuina i le mana ma le mamalu tele; faatasi ma agelu paia uma.”²⁴ le a tatou faalogo “i le leo o le agelu sili, ma le . . . pu a le Atua.”²⁵ O le a suia le la ma le masina ma, “o fetu [o le a] lia’i

ese mai o latou nofoaga.”²⁶ O oe ma a’u, po o i latou o e mulimuli mai ia i tatou, “o au paia . . . mai [itu uma] o le lalolagi,”²⁷ “o le a liua . . . segia i luga e fetaia’i ma ia,”²⁸ ma o i latou na oti i le amiotonu, o i latou foi o le a “segia i luga e fetaia’i ma ia i le taulotoa’iga . . . o le lagi.”²⁹

Ona, oo mai lea o se aafiaga e toetoe ina a le mafaufauina: “O tagata uma,” ua fetalai mai ai le Alii, “o le a vaai faatasi ia te au.”³⁰ Ona, oo mai lea o se aafiaga e toetoe ina a le mafaufauina: “O tagata uma,” ua fetalai mai ai le Alii, “o le a vaai faatasi ia te au.”³¹ “Ma o le a . . . pei o se leo o vai e tele, ma e pei o le leo o se faititili tele.”³² “Ma o le a tu le Alii, le Faaola lava ia, i le lotolotoi o lona nuu.”³³

Ona oo mai ai lea o le toetuufaa-tasiga a agelu o le lagi ma le Au Paia i luga o le fogaeleele.³⁴ Ae o le mea aupito taua, ua tautino mai e Isaia, “Ua iloa foi e tuluiga uma o le lalolagi le olataga mai lo tatou Atua,”³⁵ ma o le a “nofotupu [o Ia] i luga o tagata uma.”³⁶

I lena aso, o le a gugu le au masalosalalo, “aui o le a faalogo tagata uma . . . , ma tootuli tulivae uma, ma tautino atu e laulaufaiva uma”³⁷ o Iesu o le Keriso, o le Alo o le Atua, o le Faaola ma le Togiola o le lalolagi.

O le aso o le Eseta. Tatou te fiafia faatasi ai ma le au Kerisiano i le lalolagi atoa i Lona Toetu mamalu ma i Lona lava toetu na folafola mai. Ia tatou

sauniuni mo Lona toe afio mai, ia saga suesue pea lava pea i lou mafaufau nei mea mamalu na tutupu, faatasi ma i latou tatou te alolofa i ai, ma ia avea Lana tatalo ma a tatou tatalo: “Ia oo mai lou malo. Ia faia lou finagalo i le lalolagi e pei ona faia i le lagi.”³⁸ Ou te molimau atu o loo soifua o Ia. “Le Tupu o Tupu, Afio Mai.” I le suafa o Iesu Keriso, amene. ■

FAAMATALAGA

1. E ui na faaliliuina le konafesi aoo atoa i gagana e 94, ae e le o gagana uma na faasalalauina atu i le tasi lava e tasi, pe mo sauniga uma. Mo sauniga o le afiafi o le Aso Sa, e 75 gagana na faasalalauina tuusao atu ai.
2. “Le Tupu o tupu, Afio Mai,” *Viiga*, nu. 25.
3. O le Aso Lua, 31 Mati, 2015, na auina mai ai e le ofisa o le Au Peresitene Sili se imeli e faamatala mai ai ou te lauga i le afiafi o le Aso Sa, 5 Aperila, pe a uma le viiga e usu faatasi e le faapotopotoga o le “Le Tupu o tupu, Afio Mai.” O anotusi o lenei viiga Toefuataiina maoae, na tusiaina e Pale P. Palate, o se talosaga faamaulalo i le Faaola ina ia toe afio mai i le lalolagi. Ua matua malosi lava ona faaalitino mai e lenei viiga le savali o la’u lauga o le konafesi nai lo se isi lava viiga ua tatou lagiina. Na matuai ootia lava a’u i le faamamafaina e Au Paia faatuatua i soo se nofoaga o loo auai faatasi i le Aso Sa o le Eseta, ma sii ae o tatou leo i le Atua, ma lagiina faatasi, “Le Tupu o tupu, Afio Mai! Loa na matou faatali oe.” O le iloaia e leai so’u sao patino i le filifiliga o musika mo le konafesi aoo, na ou mafaufau ai pe na faitauina e i latou e nafa ma musika la’u lauga o le konafesi ua faaauituina “Ia Oo Mai Lou Malo” ma filifilia ai lenei viiga e uiga i le Afio Mai Faalua o le Faaola. Na ou iloaia mulimuli ane o le faatonu o le Aupaipese a le Tapeneko na fautuaina atu le viiga i le Au Peresitene Sili i le amataga o Mati, i vaiaaso na muamua atu ao lei auina atu la’u lauga i le Au Peresitene Sili mo le faaliliuga. O le taimi mulimuli lava na lagiina ai faatasi e le faapotopotoga le viiga o “Le Tupu o tupu, Afio Mai” o le konafesi aoo lea ia Oketopa 2002. Tatou te taumafai uma e faia la tatou vaega, peitai o Ia o le tusiata sili.
4. Mataupu Faavae ma Feagaiga 100:16.
5. 1 Nifae 14:14.
6. Mataupu Faavae ma Feagaiga 10:55.
7. Aafiaga patino, Me 1997.
8. 2 Nifae 27:20.
9. Ioane 1:3.
10. Mataupu Faavae ma Feagaiga 65:2.
11. 1 Nifae 14:12.



Saunia e Elder Jorge F. Zeballos
O Le Fitugafulu

12. O le tautoulu i le 2001, ao ou nofo ai i Pasila, sa ou faasoa atu ma le naunautai ia Peresitene James E. Faust o le Au Peresitene Sili ia le anoanoai o mea moni ofoofogia e uiga i Au Paia o loo nonofo i le aai o Curitiba, ma faamoemoe ai o le a ia faasoa atu le faamatalaga ia Peresitene Hinckley. Na taofi au e Peresitene Faust i le ogatotonu o le fuaiupu. "Neil," na ia fai mai ai, "matou te le uunaia le Peresitene. O le faauiga o le nofoaga e fausia ai se malumalu e i le va o le Alii ma Lana perofeta." Na faapaiaina le Malumalu o Curitiba Brazil i le 2008.
13. Mataupu Faavae ma Feagaiga 59:21.
14. O se tasi o vavega maoae o aao o le Alii o le uunaiga lea o Lona malo i le salafa o le Iunaita Setete i aai ma nuu i sitete uma. O se tasi nei o faataitaiga. Ia Me 2006 sa tofia a'u i se konafesi faalesiteki i Denton, Texas. Sa ou nofo i le fale o le peresitene o le siteki, o Peresitene Vaughn A Andrus. Na faamatala mai e Sister Andrus ia au e uiga i le Ekalesia anamua i Denton, na amata i ona matua, o Ioane ma Makerita Porter. Sa na o se Aoga Sa i le amataga. Ae na faasoa atu e le au Porter le talalelei i le au Ragsdales, lea na faasoa atu i le au Nobles ma le au Martinos. Ioe, na faaopopo atu foi e faifeautalai o latou sao taua. O le toatele o aiga na auai i le Ekalesia. Na masii mai nisi mai sisifo i Denton. I le aso, o le mea lea sa i ai se tamai paranesi, ua fa nei siteki, ma o se tasi o atalii a le au Martinos, o Elder James B. Martino, lea na auai i le Ekalesia ina ua 17 ona tausaga, o loo auaua atu o se Pulega Aoao o le Ekalesia.
15. Alema 26:37.
16. Mataio 21:21.
17. Mareko 5:36.
18. Mataio 10:29, 31.
19. 2 Tupu 6:15.
20. 2 Tupu 6:16-17.
21. Mosaea 4:11.
22. Mataio 6:9-10; tagai foi Mataupu Faavae ma Feagaiga 65:6.
23. Luka 2:12.
24. Mataupu Faavae ma Feagaiga 45:44.
25. 1 Tesalonia 4:16.
26. Mataupu Faavae ma Feagaiga 133:49.
27. Mataupu Faavae ma Feagaiga 45:46.
28. Mataupu Faavae ma Feagaiga 88:96.
29. Mataupu Faavae ma Feagaiga 88:97.
30. Mataupu Faavae ma Feagaiga 101:23.
31. Mataupu Faavae ma Feagaiga 45:49.
32. Mataupu Faavae ma Feagaiga 133:22.
33. Mataupu Faavae ma Feagaiga 133:25.
34. Tagai Mose 7:63.
35. Isaia 52:10.
36. Mataupu Faavae ma Feagaiga 133:25.
37. Mataupu Faavae ma Feagaiga 88:104.
38. Mataio 6:10.

Afai O Le A E Tali Atu

la tatou fetaomi atu i luma e ala i le aoaoina o o tatou tiute, faia o faaiuga sao, faatino e tusa ai ma na faaiuga, ma taliaina le finagalo o lo tatou Tama.


Sa na o le 12 ou tausaga ina ua tau-nuu faifeautalai mo le taimi muamua e tali atu i le aai lea sa ou fanau ai i matu o Chile. I se tasi o Aso Sa, i le mavae ai o lou auai i le paranesi laitiiti mo le ono masina, sa ofo mai e se faifeautalai ia te au le falaoa a o ia tufaina le faamanatuga. Sa ou vaai atu ia te ia ma fai atu lemu, "Ou te le mafai." "Aisea e le mafai ai?" o lana tali lea.

Sa ou tau atu ia te ia, "Auā e le o a'u o se tagata o le Ekalesia."¹

Sa lē talitonu le faifeautalai. Sa faate'ia o ia. Ou te manatu na ia mafaufau, "Ae o lenei alii talavou e auai i sauniga uma! E mafai faapefea ona lē avea o ia ma se tagata o le Ekalesia?"

O le aso na sosoo ai, na i ai faifeautalai i lou aiga, ma sa laua faia mea uma e mafaia ina ia aoao ai lou aiga atoa. Ae talu ai sa le'i fia [mananao ai] lou aiga, sa lagona e faifeautalai le faamautinoaga e faaaauu pea ona o lou auai pea i vaiaso taitasi i le Ekalesia mo le silia i le ono masina. Mulimuli ane, na oo mai le taimi sili na ou faatalitali ai ina ua laua valaaulia au e avea ma se tagata o le Ekalesia a Iesu Keriso. Sa faamatala mai e faifeautalai ia te au e faapea talu ai ona o au e laitiiti, ou te manaomia le faatagaga a o'u matua. Sa matou o atu ma faifeautalai e vaai lou tama, ma mafaufau o lana tali agaalofa e faapea "Atalii, a oo ina e matua, o le a mafai ona e faia au lava faaiuga."

A o talanoa atu faifeautalai ia te ia, sa ou tatalo ma le faatauanao ina ia musuia lona loto e tuu mai ia te au le faatagaga na ou mana'o i ai. O lana tali lenei i faifeautalai: "Uso e, i le aluga o le ono masina ua tuanai, sa ou vaaia le vave ala i luga o lou atalii o Jorge i taeao o Aso Sa taitasi, fai ona ofu sili ona lelei, ma savali i le lotu. Ua na o





se uunaiga lelei mai le Ekalesia ua ou vaaia i lona olaga.” Ona talanoa mai lea ia te au, sa ia faateia au i le faapea mai, “Atalii, afai o le a e tali atu mo lena faaiuga, ua e maua la’u faatagaga e papatiso.” Sa ou fusiina lou tama, sogi atu ia te ia, ma faafetai i ai mo le faatagaga e papatiso ai. Na ou papatiso i le aso na sosoo ai. O le vaiaso ua tuanai sa faamanatu ai le 47 tausaga o lena taimi taua i lou olaga.

O le a le tiutetauave o ia te i tatou i le aveai ma ni tagata o le Ekalesia a Iesu Keriso? Sa saunoa mai Peresitene Iosefa Filitia Samita e faapea: “Ua ia i tatou nei tiutetauave tetele e lua. . . . Muamua, ia saili lo tatou lava faaolataga; ma le, lona lua, o lo tatou tiute mo tatou uso a tagata.”²

O tiutetauave taua la nei na atofaina mai e lo tatou Tama ia i tatou: o le sailia o o tatou lava faaolataga faapena ma isi, ma le malamalamaaga e faapea i lenei faamatalaga, o le *faaolataga* o lona uiga o le ausia o le tikeri sili ona maualuga i le mamalu ua saunia e lo tatou Tama mo Lana fanau usiusitai.³ O tiutetauave nei ua atofaina mai ia i tatou—ma ua tatou taliaina ma le agalelei—e tatau ona faamatala ai mea tatou te faamua-mua, o tatou faanaunauga, o tatou faaiuga, ma o tatou amioga i aso taitasi.

Mo se tasi ua malamalama e faapea, ona o le Togiola a Iesu Keriso, e mafai moni ai lava ona maua le faaeaga, o le lē mauaina e tutusa lelei ma le

faasalaga. O lea la, o le faafeagai o le faaolataga o le faasalaga, e pei lava o le faafeagai o le faamanuiaina o le toilalo popo. Na aoaoina i tatou e Peresitene Thomas S. Monson e faapea “e le mafai ona faamalieina tagata i le na ona amio a’i i ni tulaga e le lelei pe a latou vaaia se tulaga lelei e mafai ona latou oo atu i ai.”⁴ E mafai faapefea la ona faamalieina i tatou i soo se mea e itiiti ifo i lo le faaeaga pe afai ua tatou iloa e mafai ona maua le faaeaga?

Faataga au e faasoa atu ni mataupu faavae autu se fa o le a fesoasoani ia i tatou e faataunu ai o tatou manao ia tali atu i lo tatou Tama i le Lagi, faapea ai foi ma lo tatou tali atu i Ona faamoe-moega ina ia tatou aveai e pei o Ia.

1. Aoaoina o O Tatou Tiute

Afai e ao ona tatou faia le finagalo o le Atua, afai e ao ona tatou tali atu ia te Ia, e tatau la ona tatou amata e ala i le aoaoina, malamalama, taliaina, ma ola e tusa ai ma Lona finagalo mo i tatou. Ua fetalai mai le Alii, “O le mea lea, ia tuu atu nei i tagata taitoatasi e aoao lona tiute, ma galue i le tofi ua tofi i ai o ia, i le filiga ato.”⁵ O le mauaina o le manao e faia le mea e sa’o e le lava pe afai tatou te le mautinoa ua malamalama i mea ua faamoemoeina e lo tatou Tama mai ia i tatou ma finagalo ia tatou faia.

I le tala ia Alice in Wonderland, e le’i iloa e Alice le itu e alu i ai, o lea na ia fesili ai i le Pusi o Cheshire, “E mafai ona

e tau mai ia te au, faamolemole, po o le fea itu e tatau ona ou alu i ai mai i i?”

Na tali atu le pusi, “E faalagolago tele lena mea po o fea e te manao e alu i ai.”

Na faapea atu Alice, “Ou te le popole tele po o fea.”

“E le afaina la po o le fea o itu e te alu i ai,” o le tala lea a le pusi.⁶

Peitai, ua tatou iloa le ala e tau atu i le “laau, o ona fua [e] manaomia lava e faafiafia ai le tagata”⁷—“le ala, e tau atu i le ola”—e va apiapi. E manaomia le taumafaiga e faimalaga ai i le ala, ma e “toaitiiti foi i latou o e maua.”⁸

Ua aoao i tatou e Nifae e faapea “o afioga a Keriso o le a ta’u mai ai ia te outou mea uma e tatau ona outou faia.”⁹ Ona ia faaopoopo mai lea o “le Agaga Paia . . . o le a faaali mai e ia ia te outou mea uma e tatau ona outou faia.”¹⁰ O lea, o punaoa e mafai ai e i tatou ona aoao o tatou tiute, o afioga ia a Keriso ua tatou maua e ala mai i perofeta ana-mua ma ona po nei ma faaaliga patino tatou te maua e ala mai i le Agaga Paia.

2. Faia o le Faaiuga

Pe ua tatou aoao e uiga i le Toefuataiga o le talalelei, o se poloaiga patino, o tiute e faatautu i auaunaga i se valaauaga, po o feagaiga tatou te osia i le malumalu, o le filifiliga e a tatou lea pe tatou te faatino pe leai e tusa ai ma lena iloa fou. E saoloto tagata taitoatasi e filifili mo ia lava e ulu atu i se feagaiga paia e pei o le papatisoga po o sauniga o le malumalu. Talu ai o le faia o tau-toga sa aveai ma vaega masani o olaga tapuai o tagata i aso ua leva, sa ta’ua ai e le tulafono tuai e faapea “aua tou te tauto pepelo i lo’u igoa.”¹¹ Peitai, i le vaeluaga o taimi, sa aoao ai e le Faaola se tulaga maualuga o le tausia o a tatou tautinoga ina ua la fetalai mai o le *ioe* o lona uiga o le ioe ma o le *leai* o lona uiga o le leai.¹² E tatau ona lava upu a se tagata e atiae ai lona moni a’ia’i ma



le tautinoga agai i se isi tagata—ma e oo lava pe afai o lona tagata o lo tatou Tama o i le Lagi. O le faamamaluina o se tautinoga e avea ma se faailoga o le moni a'ia'i ma faamaoni o a tatou upu.

3. Faatino e Tusa Ai

A maea le aoaoina o lo tatou tiute ma le faia o faaiuga e fesootai ma lona aoaoga ma le malamalama, e tatau ona tatou faatino e tusa ai.

O se faataitaiga mamana o le faaunautai mausali ia ausia Lana tautinoga i Lona Tama e sau mai le aafiaga a le Faaola o le aumaia o se tagata mai supa ia te Ia ina ia faamaloloina. “Ua silafia e Iesu lo latou faatuatua, ona fetalai atu lea o ia i le supa, Lo'u atalii e, ua faamagaloina au agasala.”¹³ Ua tatou iloa o le Togiola a Iesu Keriso e taua i le mauaina o le faamagaloga mo a tatou agasala, ae i le taimi na faamalololo ai le tagata mai supa, e lei tupu lona mea maoae; e lei tupu mafatiaga i Ketesemane ma luga o le satauro. Peitai, sa lei gata na faamanuiaina e Iesu le tagata mai supa i le tomai e tu ai i luga ma savali, ae na Ia tuuina atu foi ia te Ia le faamagaloga mo ana agasala, lea na tuu atu ai se faailoga manino o

le a Ia le toilalo lava, o le a Ia faataunuu le tautinoga na Ia faia i Lona Tama, e faapea i Ketesemane ma luga o le satauro, o le a Ia faia mea na Ia folafola atu e faia.

O le ala ua tatou filifilia e savavali ai e lauitiiti. I luga o le ala o loo i ai luitau o le a manaomia ai lo tatou faatuatua ia Iesu Keriso ma a tatou taumafaiga silisili e tumau ai i luga o le ala ma fetomi atu i luma. E manaomia ona tatou salamo ma ususitai ma onosai, e tusa lava pe tatou te le malamalama i tulaga uma o loo siomia ai i tatou. E tatau ona tatou faamagalalo atu i isi ma ola e tusa ai ma mea ua tatou aoaoina ma filifiliga ua tatou faia.

4. Taliaina ma le Naunautai le Finagalo o le Tama

O le avea ma soo e le gata ina manaomia ai ona tatou aoao i lo tatou tiute, faia faaiuga sao, ma faatino e tusa ai ma na mea, ae e taua foi lo tatou atiaeina o le naunautai ma le tomai e talia ai le finagalo o le Atua, e tusa lava pe le fetai ma o tatou manaoga amiotonu po o mea e fiafia i ai.

E faagaetia au ma faamemelo i le uiga na faaalii e le lepela lea sa sau i le

Alii, “ua aioi ia te ia, ma tootuli ia te ia, ua faapea mai, Afai ua e finagalo i ai, e te mafaia ona faamama ia te au.”¹⁴ Sa le'i tuu faapoloaiina e le lepela se mea, e ui atonu o lona manao na amiotonu; sa na ona ia naunau e talia le finagalo o le Alii.

I le tele o tausaga ua mavae, na faamanuiaina se ulugalii faamaoni o ni a'u uo i le taunuu mai o se atalii na faananau i ai mo se taimi umi, o lē sa la tatalo ai mo se taimi umi. Sa faatumulia lona aiga i le olioli a o fiafia a maua uo ma le la afafine, lea sa na o ia le tamaitiiti sa i ai i lona taimi, i le faatasi ai o se tama meamea faatoa fanau mai. Peitai, i se tasi aso, na tupu ai se mea sa le'i mafauina: sa na o le tolu tausaga le tamaitiiti, ae faafuasei ona koma. I le taimi lava na ou iloa ai le tulaga [o le tamaitiiti], sa ou valaau atu i lau uo e faailoa i ai lo ma lagolago i lona taimi faigata. Ae o lana tali sa avea o se lesone ia te au. Na ia faapea mai, “Afai o le finagalo o le Tama e avatu o ia ia te Ia, ona lē afaina lea ia i matou.” Sa le'i i ai i upu a lau uo sina faitioga, fouvale, po o le le fiafia. O se faafeagai o ia mea, na o le pau le mea na ou lagonaina i ana upu o le loto faafetai



Saunia e Elder Joseph W. Sitati
O Le Fitugafulu

i le Atua mo le faatagaina o i latou e fiafia ma lo latou atalii laitiiti mo lena taimi puupuu, faapea ai ma lona nau-nau atoa e talia le finagalo o le Tama mo i latou. I ni nai aso mulimuli ane, sa toe foi atu ai lena alualutoto i lona maota selesitila.

Ia tatou fetaomi atu i luma e ala i le aoaoina o o tatou tiute, faia o faaiuga sao, faatino e tusa ai ma na faaiuga, ma taliaina le finagalo o lo tatou Tama.

Ou te matua faafetai ma fiafia mo le faaiuga na tuu mai e lou tama ou te faia i le 47 tausaga ua mavae. A o alua'i pea aso, ua ou malamalama i le tulaga na ia tuuina mai ia te au—ia tali atu mo lena faaiuga—o lona uiga o le tali atu i lou Tama Faalelagi ma le sailia o lou lava faaolataga ma le [faaolataga] o ou uso a tagata, ina ia avea atili ai e pei ona faamoemoeina ma finagalo i ai lou Tama ou te avea ai. I lenei aso faapitoa tele, ou te molimau atu o loo soifua le Atua lo tatou Tama, ma Lona Alo Pele. I le suafa o Iesu Keriso, amene. ■

FAAMATALAGA

1. Faamolemole ia manatua “e ui o le faamanatuga e mo tagata o le Ekalesia, ae e le tatau i le au epikopo ona faasilasila atu faapea o le a na o tagata o ekalesia e tufaina atu i ai, ma e leai se mea e taofia ai tagata e le auai i le ekalesia, mai le taumamafa ai” (*Tusitaulima 2: Taitaiina o le Ekalesia* [2010], 20.4.1).
2. *Aoaoga a Peresitene o le Ekalesia: Josefa Filitia Samita* (2013), 294.
3. Tagai Mataupu Faavae ma Feagaiga 132:21–23.
4. Thomas S. Monson, “Ia Laveaiina,” *Liahona*, Iulai 2001, 58.
5. Mataupu Faavae ma Feagaiga 107:99.
6. Lewis Carroll, *Alice’s Adventures in Wonderland* (1920), 89.
7. 1 Nifae 8:10.
8. Mataio 7:14.
9. 2 Nifae 32:3.
10. 2 Nifae 32:5.
11. Levitiko 19:12.
12. Tagai Mataio 5:37.
13. Mareko 2:5.
14. Mareko 1:40.

Ia Fanafanau, Uluuluola, ma Faato’a le Lalolagi

Ua poloaia ma faamanuiaina i tatou e le Tama Faalelagi ina ia fanafanau, ia uluola, ma ia faato’a le lalolagi ina ia mafai ai ona avea i tatou e faapei o la.

Faafetai lava, i le Aufaipese o le Tapeneko, mo lena faamamalu matagofie i le Faaola o le lalolagi.

I le aso na valaau atu ai le Atua le Tama i Lona Alo e Toatasi na Fanau ia gaosi le tagata i lo Laua faatusa ma foliga, sa Ia faamanuiaina Lana fanau, i le fetalai atu, “Ia fanafanau, ma uluuluola, ma faatumuina le lalolagi, ma faato’a i ai, ma maua ai le pule i . . . meaola uma e fegaoioia’i i luga o le fogaeelele.”¹ O le mea lea na amata ai la tatou malaga faaletino i se poloaiga ma se faamanuiaga faalelagi. Na tuuina mai e se Tama alofa ia i tatou le poloaiga ma le faamanuiaga ina ia fanafanau ma ia uluuluola ma ia faatumuina ma maua ai le pule ina ia mafai ai ona tatou atiae ma avea e pei o Ia lava.

Uso e ma tuafafine, i lenei aoauli ou te valaaulia ai lo outou faatuatua ma tatalo a o ou faasoa atu ni manatu ia te outou e faatatau i uiga autu e tolu o lo tatou natura paia. O la’u tatalo ia tatou taufai iloina atoatoa atili ma faataunuu lo tatou tiutetauave paia—le poloaiga a lo tatou Tama—ia atiae lo tatou natura paia ina ia mafai ai ona faamanuiaina

atili le faatautaiga o la tatou malaga ma maua ai lo tatou taunuuga paia.

Muamua, Ua Poloaia i Tatou e le Atua Ia Fanafanau

O se vaega taua o le fanafanau lea e laaloa ai le vaai i nisi taimi, o le aumaia lea o le malo o le Atua i le lalolagi. Sa aoao mai le Faaola:

“O a’u nei o le vine, o la outou: O lē tumau ia te au, ma a’u ia te ia, o ia lava e fua tele mai; aua e le mafaia e outou ona fai o se mea e tasi pe a a’u le i ai. . . .

“Afai tou te tumau ia te au, a tumau foi a’u upu ia te outou, o mea uma lava tou te manano i ai, tou te ole atu ai, ona faia lea mo outou.

“E viia lo’u Tama i lenei mea, pe a outou fua tele mai; ona fai ai lea outou mo’u soo.”²

Tatou te matua fua tele mai pe a tatou tumau ia Keriso ma pe a tatou “ave i o [tatou] luga [Lona] suafa [ma] . . . au-auna atu ia te ia e oo i le iuga”³ e ala lea i le fesoasoani atu i isi ia o mai ia te Ia.

I o tatou aso, o loo faaauau pea e perofeta ma aposetolo soifua ona siitia o latou siufofoga e valaaulia tatou

taitoatasi ia auai atoatoa i le galuega o le faaolataga e tusa ma o tatou tomai ma avanoa.

O le vaega amata o se tali atu lea e fua tele mai ai ni fua, o le “agamalu ma le maualalo i le loto.”⁴ Ona mafai lea ona tatou o mai atoatoa ia Keriso pe a tatou gauai atu i faatosinaga a le Agaga Paia ma tausia feagaiga uma ua tatou osia.⁵ E mafai ona tatou sailia ma mauaina le meaalofa o le alofa mama ma maua le mana e valaaulia ai o tatou lava aiga, o tatou tuaa, ma o tatou tagata ma tuaoi ma uo le lolotu ia maua le talalelei a Iesu Keriso.

O le galulue ai i le agaga o le alofa mama e le o se tiute ae o se fiafiaga. O luitau e oo ina aveva ma ni avanoa e fausia ai le faatuatua. E oo ina aveva i tatou ma “molimau [o le lelei o le] Atua i taimi uma ma i mea uma, ma i nofoaga uma atonu [tatou] te i ai, seia oo lava i le oti.”⁶

E mafai ma e tataua ia i tatou uma ona auai atoatoa i le galuega o le faaolataga. Ua tuuina mai e le Faaola ia i tatou le tiutetauave lenei faatasi ma se folafolaga: “Ua filifilia outou e a’u; ua ou tuuina atu foi outou, ia outou ō, ma ia outou fua mai ni fua, ma ia tumau o outou fua; ina ia foaiina atu ia te outou e le Tama mea uma lava tou te ole atu ai ia te ia i lo’u igoa.”⁷

Lua, Ua Poloaiina i Tatou e le Atua Ia Uluola

O ō tatou tino faaletino o se faamanuiaga mai le Atua. Na tatou mauaina mo faamoemoega o le faataunuuina o le galuega a le Tama ina “ia aumai le tino ola pea ma le ola faavavau o le tagata.”⁸ O le tino o le auala lea e mafai ai ona tatou maua lo tatou gafatia paia.

O le tino ua mafai ai e fanau agaga usiusitai a le Tama Faalelagi ona oo i le olaga i le lalolagi.⁹ O le fanauina o fanau e maua ai e isi fanau agaga a le Atua le avanoa e olioli ai foi i le olaga



i le lalolagi. O e uma e fananau mai i le olaga faaletino e mauaina le avanoa e alualu ai i luma ma ia faaeaina pe afai latou te usiusitai i poloaiga a le Atua.

O le faaipoipoga i le va o se alii ma se tamaitai o le faatulagaga lea na faauuina e le Atua mo le faataunuuina o le poloaiga ia uluola. O se mafutaga a le itupa e tasi e lē uluola.

O se faaipoipoga faaetulafono ma faatagaina ua faamauina i totonu o le malumalu ma ua faamamaluina e feagaiga o le faamauga ua maua ai e matua ma a latou fanau le avanoa mo le aafiaga aupito silisili o le alofa ma le sauniaina mo se olaga uluola. Ua ofoina atu ia i latou se siosiomaga silisili lea e mafai ona latou ola ai e tusa ma a latou feagaiga ua osia ma le Atua.

Ona o Lona alofa mo i tatou, ua tuuina mai ai e le Tama Faalelagi e faapea o Ana fanau faamaoni uma e le o olioli ma e le mafai ona olioli i faamanuiaga o se faaipoipoga faalefeagaiga ma fanau po o se atoaga o na faamanuiaga mo ni mafuaaga e le oo i ai so latou

malosi, o le a olioli i nei faamanuiaga i le taimi atofaina a le Alii.¹⁰

Ua fautuaina e perofeta ma apose-tolo soifua tagata uma ua mauaina le avanoa e ulu atu ai i le feagaiga o le faaipoipoga e faavavau ia fai mea faasolo i le atamai ma le faatuatua. E le tataua ona tatou tolopoina le taimi o lena aso paia ona o le sailiga o mea faalelalolagi po o le tāmāu i ni mea ua faamoemoeina mai i se soa talafeagai i se tulaga e le faitaulia ai soo se sui agavaa.

O le folafolaga i tagata uma ua faamauina i le feagaiga o le faaipoipoga e faavavau faapea ma ē e fanafanau e ala i le tausiga o a latou feagaiga e faapea, o le a le maua lava e le fili se mana e faatamaia ai le faavae o lo latou mafutaga e faavavau.

Tolu, Ua Poloaiina i Tatou e le Atua ia Faato’a le Lalolagi

Ina ia faato’a le lalolagi ma maua le pule i meaola uma, o le puleaina lea o nei mea ina ia mafai ai ona latou faataunuuina le finagalo o le Atua¹¹ a



o latou faataunuina faamoemoega o Lana fanau. O le faato'aina e aofia ai le mauaina o le pule aoao i o tatou lava tino.¹² E le o aofia ai tagata ua afaina fua i nei mea po o le faaogaina i se ala ua feteenai ma le finagalo o le Atua.¹³

O le atiaeina o le tomai e faato'a ai mea o le lalolagi e amata i le lotomauualo ia iloa o tatou vaivaiga faaletagata ma le mana ua avanoa ia i tatou e ala ia Keriso ma Lana Togiola. Aua "ua fetalai mai Keriso: Afai tou te faatuatua mai ia te au o le a outou maua le mana e fai ai soo se mea e tatau ai ia te au."¹⁴ E avanoa lenei mana ia i tatou pe a tatou filifili e faatino le usiusitai i Ana polo-aiga. Tatou te faateleina lo tatou tomai e ala i le sailia o meaalofa a le Agaga ma e ala i le atiaeina o a tatou taleni.

Sa ou fanau ma ola ae i ni tulaga faatauvaa ua masani ai le tele o aiga i Aferika. Sa ou mauaina le tomai e siitia ai a'u ia mai na tulaga e ala i le saili ma le mauaina o se aoaoga lelei, faatasi ai ma le fesoasoaniga alofa a ou matua. O le atiaeina o se vaaiga mamao o le tagata e mafai ona avea ai a'u sa taua i lo'u alualu i luma. Mulimuli ane, i le avea ai ma se ulugalii talavou, na maua ai ma lo'u toalua le talalelei toefuataiina, lea ua faauau ai pea ona faamanuiaina ai o ma olaga i le taitaiga faaleagaga. E pei foi o aiga uma, e i ai foi o matou tofotofoga ma luitau. Ae a o matou tepataulai atu i le Alii mo se fesoasoani, ua matou maua ai ni tali e aumaia ai le filemu ma le mafanafana, ma e matou te le lagonaina le lofituina e nei mea.

O luitau o loo feagai ma tagata i nei aso, ua aofia ai le ola lē mama, ponokalafi, fetauaiga faafitafita, faatamaiaiga o mea, vailaau oona ma le mativa, ua faateteleina ona ua anoanoai tagata i le lalolagi ua filifili lava e i latou "le loto o le tiapolo faapea ma le tino"¹⁵ nai lo le finagalo o le Atua. "Ua latou le sailia le Alii e faatu lana amiotonu, ae ua taitoatasi le tagata ma savali i lona lava ala, ma tusa ai ma le faatusa o lona lava atua, o lona foliga ua tusa ma foliga o le lalolagi."¹⁶

Peitai, ua valaaulia e le Atua Lana fanau *uma* ia mauaina Lana fesoasoani e faatoilalo ma onosaia ai luitau o lenei olaga i upu nei:

"O A'u o le Atua; o A'u na faia le lalolagi ma tagata ae lei i ai i latou i la le tino.

". . . Afai e te liliu mai ia te a'u, ma faalogo mai i lo'u leo, ma talitonu, ma salamo i au solitulafono uma, ma papatiso, i le vai lava, i le suafa o lo'u Atalii e Toatasi na Fanau . . . , o le a e maua le meaalofa o le Agaga Paia, ma ole mai i mea uma i lona suafa, ma o soo se mea e te ole mai ai, o le a tuu atu ia te oe."¹⁷

O tagata faamaoni o le Au Paia o Aso e Gata Ai o e malamalama i lo latou gafatia paia ma faalagolago ma le loto atoa i le mana o loo maua e ala mai i le Togiola a le Alii o Iesu Keriso e faamalosia ai lo latou vaivai faanatura ma "mafai ai ona . . . faia o mea uma."¹⁸ E mafai ona latou faatoilaloina faatosinaga a le tiapolo ia ua nofopologa ai le toatele i le fili. Sa aoao mai Paulo:

"Ua faamaoni le Atua [ma] na te le tuuina atu outou i le tofotofoga e sili i se mea ua outou lavātia, a e sauni foi faatasi ma le tofotofoga se mea e sao ai, ina ia outou lavā oono."¹⁹





Saunia e Elder Russell M. Nelson

○ Le Korama a Aposetolo e Toasefululua

“Aua na tigaina o ia ina o tofotofoina, o le mea lea ua mafai ai o ia ona fesoasoani i e ua tofotofoina.”²⁰

Ua poloaiina ma faamanuiaina i tatou e le Tama Faalelagi ina ia fanafanau, ia uluola, ma ia faato’a le lalolagi ina ia mafai ai ona avea i tatou e faapei o Ia. Ua Ia faaavanoaina mai le fesoasoani ina ia mafai ai e i tatou taitoatasi ona ola moni ai, e tusa ma a tatou fili-filiga taitoatasi, ia avea ai faapei o Ia. Ou te tatalo ina ia tatou ola uma i o tatou olaga i ia tulaga, ina ia taialaina i tatou e le vaaiga mamao o lo tatou natura paia, maua uma o tatou avanoa faalelagi, ma ausia ai lo tatou taunuuga faalelagi.

Ou te molimau atu i le moni a’ia’i o le Atua le Tama ma Lona Alo pele, lo tatou Faaola o Iesu Keriso; i Lana fuafuaga mamalu o le fiafia; ma i ki ua Ia faaee mai i luga o se perofeta soifua i le lalolagi i aso nei, e oo lava ia Thomas S. Monson, o lē e tatou te alolofa i ai ma lagolagoina. Ou te tatalo ina ia tatou maua le mana e olioli ai i le atoatoa o Ana faamanuiaga i le suafa o Iesu Keriso, amene. ■

FAAMATALAGA

1. Mose 2:28; tagai foi i le Mose 2:26–27; Kenese 1:26–28.
2. Ioane 15:5, 7–8.
3. Mataupu Faavae ma Feagaiga 20:37.
4. Moronae 7:44.
5. Tagai Mosaea 3:19.
6. Mosaea 18:9.
7. Ioane 15:16.
8. Mose 1:39.
9. Tagai Mose 5:10–11.
10. Tagai *Tusitaulima 2: Taitaiina o le Ekalesia* (2010), 1.3.3; Ezra Taft Benson, “I Tuafafine Nofofua Matutua o le Ekalesia,” *Liahona*, Ian. 1989, 104–107.
11. Tagai Iakopo 2:18–19.
12. Tagai 1 Korinito 6:19–20; Kalatia 5:16–25; 1 Tesalonia 4:3–7; 2 Timoteo 2:22.
13. Tagai Iakopo 2:12–16, 20–21.
14. Moronae 7:33.
15. 2 Nifae 10:24.
16. Mataupu Faavae ma Feagaiga 1:16.
17. Mose 6:51–52.
18. Alema 26:12.
19. 1 Korinito 10:13.
20. Eperu 2:18.

O Le Sapati o Se Aso Fiafia

E mafai faapefea ona e faamautinoa o ou uiga i le Sapati o le a taitaia oe i le olioli ma le fiafia?

Uso e ma tuafafine pele, ua mamalu lava nei aso e lua o le konafesi.

Ua siitiaina i tatou e ala i musika musuia ma tatalo matagofie. Ua faama-losia o tatou agaga e savali o le malama-lama ma le upumoni. I lenei Aso Sa o le Eseta, ua tatou toe faafetai faatasi ai ma le faamaoni i le Atua mo se perofeta!

O le fesili mo i tatou taitoatasi o le: ona o mea sa ou faalogoina ma lagoina i le taimi o lenei konafesi, o le a faapefea ona suia ai a’u? Po o le a lava lau tali, ou te fia valaauliaina foi outou e suesue o outou lagona ma au amioga i le aso Sapati.

Ua lofituina au i upu a Isaia, o le sa ta’ua le Sapati “o le aso fiafia.”¹ Ae ou te fesiligia au lava, pe o le Sapati o se aso fiafia moni lava mo oe ma au?

Sa ou iloaina muamua lava o le Sapati o se aso fiafia i le tele o tausaga ua mavae a o avea ma se fomai tipitipi pisi, na avea le Sapati ma se aso mo le faamalologa faaletagata lava ia. E oo atu i le faaiuga o vaiaso taitasi, ua tiga ou lima mai le olo soo i le fasimoli, vai, ma se palasi e malo nifo. Na ou manaomia foi se malologa mai le mamafa o se galuega faigata. O le Aso Sa la na maua ai lena toomaga sa sili ona manaomia.

O le a le uiga o le fetalaiga a le Faaola ina ua Ia fetalai mai “ua faia le sapati mo tagata, a ua le faia tagata mo le sapati”?² Ou te talitonu na finagalo o Ia ina ia tatou malamalama o le Sapati o Lana meaalofa lea ia i tatou, faatagaina le malologa moni mai faigata o le olaga i aso taitasi ma le avanoa mo le toefaaufouina faaleagaga ma faaletino. Na tuuina mai e le Atua ia i tatou lenei aso faapitoa, e le mo mea faafiafia po o galuega o aso taitasi ae mo se malologa mai tiute, faapea foi i le faaletino ma le faaleagaga.

I le faaEperu, o le uiga o le upu *Sapati* o le “malolo.” Na i ai lava le faamoemoega o le Sapati talu mai le Fofoaga o le lalolagi, ina ua uma aso e ono na galue ai, na malolo le Alii mai le galuega o le fofoaga.³ Ina ua Ia faaali atu Tulafono e Sefulu ia Mose i se taimi mulimuli ane, na poloaiina e le Atua i tatou ia “manatua le aso sapati e . . . faapaiaina.”⁴ Mulimuli ane, na faamaluina le Sapati o se faamanatu o le laveaiina o Isaraelu mai lo latou nofopologa i Aikupito.⁵ Masalo o le mea sili ona taua, na tuuina mai le Sapati e avea ma feagaiga e faavavau, o se famanatu faifai pea o le a faapaiaina e le Alii Lona nuu.⁶



E le gata i lea, ua tatou aai ma feinu i le taimi nei i le faamanatuga i le aso Sapati e faamanatu ai le Togiola a Iesu Keriso.⁷ O le faia o lea mea ua tatou osifeagaiga ai ua tatou loto e ave i o tatou luga Lona suafa paia.⁸

Ua faailoa mai e le Faaola o Ia Lava o le Alii o le Sapati.⁹ O Lona aso lea! Ua Ia toe faamanatu mai pea ia i tatou ina ia *tausia* le Sapati¹⁰ po o le *faapaia* le aso Sapati.¹¹ Ua tatou osi feagaiga o le a tatou faia lona mea.

E faapefea ona tatou *faapaia* i le aso Sapati? A o ou laitiiti, sa ou suesue i lisi na faia e isi e faatatau i mea e fai ma mea e *lē* faia i le Sapati. O se taimi mulimuli ane sa ou iloa ai mai tusitusiga paia o la'u amio ma o'u uiga i le Sapati o le a avea ma se *faailoga* i le va o a'u ma lo'u Tama Faalelagi.¹² Faatasi ai ma lona malamalamaaga, sa ou le toe manaomia ni lisi o mea e faia ma mea e *lē* faia. Pe a manaomia ona ou faia se filifiliga pe o se gaoioiga talafeagai pe leai foi mo le Sapati, e na o lo'u fesili lava ia te au, "O le a le *faailoga* ou te manao e avatu i le Atua?" O lona fesili e matua ta'u manino mai ai lava a'u filifiliga e uiga i le aso Sapati.

E ui na i ai lava i le amataga le aoaoga faavae e faatatau i le aso Sapati,

ae ua toe faafouina i nei aso e gata ai e avea o se vaega o se feagaiga fou ma se folafolaga. Faafofoga i le mana o lenei folafolaga paia:

"Ma ina ia mafai ona e tausi atili atoatoa oe lava i le *lē* pisia mai le lalolagi, ia e alu atu i le fale tatalo ma osi a'e i luga au faamanatuga i lo'u aso paia;

"Aua e moni o se aso lenei ua tofia mo oe e te malolo ai mai au galuega, ma avatu ai au tapuaiga i le Silisili Ese. . . .

"Ma i le aso lenei . . . tau lava o le saunia o au meaai ma le manatu tasi o le loto ina ia atoatoa lau anapogi, . . . ina ia atoatoa lou olioli. . . .

"Ma o le tulaga e oo i ai la outou faia o nei mea ma le faafetai, ma loto ma mata fiafia, ae *lē* ma le ata leoleoā, aua o le agasala lea, ae ma le loto ma le mata fiafia, . . . e a outou le atoatoa o le lalolagi."¹³

Mafaufau i le maoae o lenei fetalaiga! O le atoatoaga o le lalolagi ua folafola mai ia i latou o e tausia le paia o le aso Sapati.¹⁴ Leitioa a ta'ua e Isaia le Sapati "o le aso fiafia."

E mafai faapefea ona e faamautinoa o ou uiga i le Sapati o le a taitaia oe i le olioli ma le fiafia? E faaopoopo atu i lou alu i le lotu, 'ai ma inu i le faamanatuga, ma le filiga i lou valaauga patino e au-auna atu, o a nisi gaoioiga o le a fesoa-soani ai e avea le Sapati ma se aso fiafia mo oe? O le a se faailoga o le a e avatu i le Alii e faaalua ai lou alofa mo Ia?

O le Sapati e aumaia ai se avanoa matagofie e faamalosia ai mafutaga faaleaiga. O le mea moni lava, e finagalo le Atua ia i tatou uma, o Lana fanau,





ina ia toe foi atu ia te Ia o ni Au Paia ua mau faaeega paia, faamauina i le malumalu o ni aiga, i o tatou tuua, ma i a tatou fanau.¹⁵

Tatou te faia le Sapati o se aso fiafia pe a tatou aoao atu le talalelei i a tatou fanau. O o tatou tiutetauave o ni mātua ua matuā manino lava. Na fetalai mai le Alii, “O le tulaga e oo i ai le i ai o matua e fai fanau i Siona . . . ae latou te le aoaoina i latou ia malamalama i le mataupu faavae o le salamo, faatuatua ia Keriso le Alo o le Atua soifua, ma e uiga i le papatisoga ma le meaalofa o le Agaga Paia e ala i le faaee o lima, pe a valu tausaga le matutua, ia i ai le agasala i luga o ulu o matua.”¹⁶

I tausaga ua mavae sa faamamafa mai ai e le Au Peresitene Sili le taua o taimi anoa faaleaiga. Sa latou tusia:

“Matou te talosaga atu i matua ina ia tuu atu a latou taumafaiga aupito sili i le aoaoina ma le faafaileleina o a latou fanau i mataupu faavae o le talalelei lea o le a taofia faalatalata mai i latou i le Ekalesia. O le aiga o le faavae lea o se olaga amiotonu, ma e leai se isi mea e mafai ona suitulaga ai pe faataunuaina ona tiute taua i le faatinoina o tiutetauave na tuuina mai e le Atua.

“Matou te fautua atu i matua ma fanau ina ia tuu le faamuamua aupito sili i tatalo faaleaiga, afaifi faaleaiga, suesue ma aoao i le talalelei, ma gaoioiga lelei faaleaiga. Po o le a lava le lelei ma le talafeagai e i ai isi mea e fai po o gaoioiga, e le tatau ona faatagaina e suia ai tiute ua tofia mai le lagi, ia e na o matua ma aiga e mafai ona faataunu lelei ai.”¹⁷

A o ou mafaufau i leni fautuaga, sa toeitiiti lava ou moomoo maimau pe ana ou toe avea ma se tamā talavou. Ua mau e matua i le taimi nei ia punaoa matagofie e fesoasoani ia i latou ina ia sili atu ona anoa taimi faaleaiga, i le Sapati ma isi foi aso. Ua latou maua le LDS.org, Mormon.org, ata o le Tusipaia, o le Alaata faaMamona, o le Potutusi o Ata o le Talalelei, le *Friend*, le *New Era*, le *Ensign*, le *Liahona*, ma le tele—ma le anoanoai. O nei punaoa ua matua aoga i matua i le faataunuina o a latou tiute paia o le aoao atu o a latou fanau. E leai se isi galuega e sili atu le taua nai lo o tulaga faamatua amiotonu ma le faaeteete!

A o e aoao atu le talalelei, o le a e aoao atili. O le auala leni a le Alii e fesoasoani ai ia te oe ina ia

malamalama i Lana talalelei. Na Ia fetalai mai:

“Ou te tuu atu ia te outou se polo-aiga ia outou aoao i le tasi mataupu faavae o le malo.

“Ia outou aoao atu ma le filiga . . . , ina ia mafai ona aoaoina atoatoa atili outou . . . i mataupu faavae, i le tulafono o le talalelei, i mea uma tau i le malo o le Atua.”¹⁸

O sea ituaiga o suesuega o le talalelei e avea ai le Sapati ma se aso fiafia. O leni folafolaga e talafeagai lava e tusa lava po o le a le toatele o le aiga, po o ai o aofia ai, po o fea o i ai.

E le gata i le taimi ma le aiga, e mafai ona e maua se aso fiafia moni i le Sapati i le faia o galuega o talafaasolopito o aiga. O le sailia ma le mauaina o tagata o aiga o e na muamua mai ia te oe i le lalolagi—o i latou o le maua se avanoa e talia ai le talalelei a o i ai iinei—e mafai ona aumaia ai le olioli sili.

Sa ou molimauina e au lava ia leni mea. I ni nai tausaga ua mavae, na naunau ai si ou toalua pele, o Wendy, ia iloa le faiga o sailiga o talafaasolopito o aiga. Na tuai lana faiga i le amataga, ae o sina mea itiiti i le taimi ma lea taimi, na ia iloa ai le faigofie o le faiga o leni



alofa i le Atua ma o outou manatu atoa, mafaufau, ma le malosi atoa, ona . . . faapaiaina lea o outou ia Keriso.”²⁴

Faatasi ai ma lou alofa tele ia te outou, ou te tuuina atu ai lau tatalo, molimau, ma faamanuiaga i le suafa paia o Iesu Keriso, amene. ■

FAAMATALAGA

1. Isaia 58:13.
2. Mareko 2:27.
3. Tagai Kenese 2:2–3.
4. Esoto 20:8; tagai foi Teuteronomie 5:12; Mosaea 13:16; 18:23.
5. Tagai Teuteronomie 5:14–15. O tagata o e filifili e galulue i aso e fitu o le vaiaso ua matua nofo pologa lava—i le galuega pe masalo foi i tupe, ae o i latou lava o ni pologa. O se milionea e galue i aso e fitu o le vaiaso o se mauoa pologa.
6. Tagai Esoto 31:13, 16.
7. Tagai Mataupu Faavae ma Feagaiga 59:12. A o lei oo i Lona Faasatauroga, sa faavae ai e le Alii le faamanatuga i Ona au soo i le Talisuaga o le Paseka (tagai Mataio 26:26–28; Mareko 14:22–24). Sa faavaeina e le Alii toetu le faamanatuga e faamanatu ai Lona Togiola i tagata o Amerika anamua (tagai 3 Nifae 18:1–12; Moronae 4:1–3; 5:2) ma toefuatai mai i ona po nei (tagai Mataupu Faavae ma Feagaiga 20:77, 79). O le fetagofi atu i le faamanatuga e faafou ai o tatou feagaiga sa osia i le papatisoga e tausi Ana poloaiga (tagai Mataupu Faavae ma Feagaiga 20:68).
8. Tagai Mataupu Faavae ma Feagaiga 20:37, 77.
9. Tagai Mataio 12:8; Mareko 2:28; Luka 6:5.
10. Tagai Esoto 31:13; Levitiko 19:3, 30; 26:2; Mataupu Faavae ma Feagaiga 68:29.
11. Tagai Esekielu 20:20; 44:24.
12. Tagai Esoto 31:13; Esekielu 20:12, 20.
13. Mataupu Faavae ma Feagaiga 59:9–10, 13, 15–16.
14. Tagai Levitiko 26:2–4.
15. Tagai Mataupu Faavae ma Feagaiga 128:15–18.
16. Mataupu Faavae ma Feagaiga 68:25; faaopoopo le faamamafa; tagai foi Mose 6:58–62.
17. Tusi a le Au Peresitene Sili, Fep. 11, 1999; siina i totonu o le *Tusitaulima 2: Taitaiina o le Ekalesia* (2010), 1.4.1.
18. Mataupu Faavae ma Feagaiga 88:77–78.
19. Tagai Isaia 61:1; Mataupu Faavae ma Feagaiga 128:22; 138:57–59.
20. Tagai Mataio 25:35–40.
21. Isaia 58:13–14; faaopoopo le faamamafa.
22. Tagai Mosaea 2:21.
23. Tagai 1 Timoteo 4:12.
24. Moronae 10:32–33.

galuega paia. Ma ou te lei vaai mua-mua lava ua ia fiafia faapea. E te le tau malaga foi i isi atunuu po o se nofoaga autu o talafaasolopito o aiga. I le fale, faatasi ai ma le fesoasoani o se komepi-uta po o se masini feaveai, e mafai ona e iloa ai agaga o e o loo faananau mai mo o latou sauniga. Ia faia le Sapati o se aso fiafia i le sailia o ou tuua ma faasoloto i latou mai le falepuipui o agaga!¹⁹

Ia faia le Sapati ma se aso fiafia i le tuuina atu o se auaunaga i isi, aemaise i latou o e le o malosi po o i latou o e ua tuuatoatasi pe lē tagolima.²⁰ O le siitiaina o o latou agaga o le a siitiaina ai foi oe.

Ina ua ta’ua e Isaia le Sapati o “le aso fiafia,” sa ia aoao mai foi ia i tatou le ala ia avea ai ma se aso fiafia. Na ia fai mai:

“Afai e te liliu ese . . . a e le faia lou lava lotu i lo’u aso sa; ma e ta’ua le sapatu, o le aso fiafia, . . . ma e faamamalu [i le Alii], e le faia au lava amio, o loo le maua ai lou lava fiafia, ma e le tautala ai i au lava upu:

“Ona e fiafia lava lea *i le Alii.*”²¹

O le le taulai atu i au “lava mea e te fiafia i ai” i le Sapati e manaomia ai le amio-pulea. Atonu e manaomia ai le aloese mai mea e te manao i ai. Afai e

te filifili e faafiafia oe lava *i le Alii*, o le a lē faatagaina e te taulimaina e pei o se isi lava aso. O gaioiga masani ma faafiafia e mafai ona faia i isi foi taimi.

Mafaufau i le mea leni: O le totagi o le sefuluai, tatou te faafoi atu ai le tasi vae sefulu o a tatou tupe i le Alii. I le tausia o le paia o le Sapati, tatou te faapolopolo ai se aso se tasi mai le fitu mo Ia. O se faamanuiaga la mo i tatou le faapaiaina o tupe ma taimi ia te Ia, o lē ua tuuina mai le ola mo i tatou i aso taitasi.²²

O le faatuatua i le Atua o se tau-nuuga o le alofa mo le Sapati; o le faatuatua i le Sapati o se tau-nuuga o le alofa mo le Atua. O le Sapati paia o se aso fiafia moni lava.

A o tulata atu i le faaiuga o leni konafesi, ua tatou iloa po o fea lava o tatou nonofo ai o i tatou o ni faataitaiga o e talitonu [ia Keriso] i totonu o tatou aiga, tuaoi, ma uo.²³ O tagata talitonu faamaoni e tausia le paia o le aso Sapati.

Ou te faaiu atu ai i le tatalo faamavae a Moronae, a o ia faaiuina le Tusi a Mamona. Na ia tusia, “O mai ia Keriso, ma faaatoatoaina ia te ia, ma faafiti outou lava mai mea uma e le faaleatua; ma afai tou te faafiti outou lava mai mea e le faaleatua uma, ma

O le lisi lea o aafiaga na filifilia mai saunoaga o le konafesi aoao, e mafai ona faaaoaga i suesuega a le tagata lava ia, afaifi faaleaiga, ma isi aoaoga. O le numera o loo faasino i le itulau muamua o le lauga.

Failauga	Tala
Neil L. Andersen	(119) Na faamatala e Elder Thomas S. Monson i lena taimi ia Neil L. Andersen e tatala e le Alii faitotoa ma faatino ia vavega. O le faatuatua o se ulugalii i Taialani na tumau malolosi ina ua pipili le tane. Ina ua mavae le feiloai ai i le Faga o Ivory, na fausia e ni ulugalii se toalua o le Au Paia o Aso e Gata Ai le malo o le Atua iina.
Wilford W. Andersen	(54) Na tau atu e se tagata Amerika moni i se fomai e mafai ona ia aoaoina le fomai e siva, ae e tatau ona ia faalogoina le musika.
David A. Bednar	(46) I le avefa ai ma se tama laitiiti, sa popole David A. Bednar o le a ave o ia i le falepuipui ina ua uma ona tataeina se faamalama o le faleoloa.
Linda K. Burton	(29) Na ta'u atu e se tama i lana fanau o le a latou saogalemu pe afai latou te tumau i totonu o le pa manoa o siomia ai lo latou fanua. Sa taialaina e le Alii se tuafafine i le fatuina faatasi ma lona toalua o se fale o taliaina ai le Agaga.
Gérald Caussé	(98) Ina ua mavae le ola ai i tausaga e 22 i le eria o Pale, na iloa e le aiga o Caussé latou te lei asiasi atu i le Olo o Eiffel. Na savalia e ni alii Aferika se toatolu le silia ma le 300 maila (480 km) e auai atu i se konafesi faaleitu, totogi le sefulu'ai, ma ia maua mai ni kopi o le Tusi a Mamona.
D. Todd Christofferson	(50) O D. Todd Christofferson na uunaia ma tatalo mo se tamaitai o le na lagonaina le lē agavaa o se tina.
L. Whitney Clayton	(36) O se teineitiiti e fitu tausaga le matua na sao mai se vaalele na pau ma na tautevateva atu agai i se malamalama i le mea mamao seia oo ina ia taunuu i le saogalemu.
Quentin L. Cook	(62) Na fasiotia le tuagane o le tina o Quentin L. Cook i le taimi o le Taua Lona II a le Lalolagi. O se tagata Samoa o le Ekalesia na manao e tatalo mo lona ma'i na alu e vaai se fomai e saili le mea o faaletonu ia te ia.
Cheryl A. Esplin	(8) Na auai Cheryl A. Esplin i se sauniga lea na iloa ai e tamaitai, o le upumoni ma le Agaga Paia e tuuina atu i o latou aiga ma auai le mana e tetee atu ai i mea leaga. Na maua e le tuafafine o le tama o tamamatua a Cheryl A. Esplin se uunaiga mamana e uiga i le faasoa atu o lana molimau.
Henry B. Eyring	(17) O le Agaga Paia e aumaia le mafanafana ma le malosi i matua faavauvau o se tamaitiiti laitiiti o le na malii i se faalavelave faafuasei. (22) Na lagona e Henry B. Eyring le faamanuiaina atonu na fesoasoani lana taulaga anapogi i le Au Paia i Vanuatu lea na faataumaioia e se afa. Na faaalai e se tamaitai lona lotofaafetai mo taulaga anapogi ia na lagolagoina o ia ma isi tagata o le Ekalesia i le taimi o se taua faalemalo i Sierra Leone. (84) A o aoina e Henry B. Eyring e 13 tausaga le matua ia taulaga anapogi, na tulia o ia e se tagata e alu ese. Ua musuia Henry B. Eyring ia faamanuia se tamaitiiti ua manu'a ina ia ola. Sa musuia e le Agaga Paia se tagata o le a malii e auuina atu i lona valaauga ma mafai ai ona ia lagona le avega mamafa a lona epikopo.
Larry M. Gibson	(77) Na tuuina atu e le tama o Larry M. Gibson ia te ia se tälä siliva e faamanatu atu ia te ia lona taunuuga e faavauvau. Na savalia e Larry M. Gibson le 50 maila (80 km) i le 19 itula ma ona atalii.
Jeffrey R. Holland	(104) Na laveai e se alii talavou lona uso matua mai le pau mai se pa tifato i le uumuina o ona tapulima ma toso mai o ia i le saogalemu.
Thomas S. Monson	(88) I le avefa ai ma se tiakono, na lagona e Thomas S. Monson le faamanuiaina ina ua ia aveina atu le faamanatuga i se tagata ma'i. Na atiae e Thomas S. Monson le fiafia i le Tusi a Mamona ina ua mavae le asiasi atu i le tuugamau o Matini Harisi. A o i ai i le neivi, na tuuina atu e Thomas S. Monson se faamanuiaga faaleperisitia i se uo, o le na faamaloloina. (91) Ina ua maea le tatalo ai i le malumalu e uiga i le toe foi atu i lana misiona, na maua e se alii talavou le faamautinoaga mai se faifeautalai ua maea lana misiona lea na auuina atu i le misiona lava lea e tasi.
Brent H. Nielson	(101) Na onosaia ma le alofa e Brent H. Nielson ma tagata o lona aiga se tasi o le aiga na le toe toaga i le lotu ina ia toe foi mai i le Ekalesia.
Bonnie L. Oscarson	(14) O se tamaitai talavou i Italia i le 1850 na tu atu e fetai ai ma tagata faatupu veses. Na puipuia e le tama teine a Bonnie L. Oscarson le tulaga faatina i le aoga a lana fanau.
Boyd K. Packer	(26) Na faatalitali Boyd K. Packer i fafo o le potuaoga o le kolisi a lona toalua i le lumanai, o Donna Smith, mo ia e tuuina atu ia te ia se kuki ma se kisi.
Kevin W. Pearson	(114) Na tatalo Peresitene Heber J. Grant ina ia mafai ona ia tumau faamaoni seia oo i le iuga. Na tuua e Kevin W. Pearson lana galuega e talia se valaauga o se peresitene o le misiona.
Rafael E. Pino	(117) O le fanau a Rafael E. Pino na aoao e talisapaia vaaiga mai se televise ma se paso jigsaw. Na fesili se tamaitiiti ia Michelangelo pe faapefea ona ia iloa sa i ai le faatusa o Tavita i totonu o se poloka o maamora.
Dale G. Renlund	(56) Na aoao e se tina i Aferika i Saute lana tama teine i le faapalepale. Na maua e se faifeautalai se uunaiga lea na fesoasoani ia te ia ina ia onosai i lana soa faifeautalai.
Michael T. Ringwood	(59) Na aoao e Michael T. Ringwood i lana misiona ma i le seminare, o le galuega e sili ona taulia e masani lava ua na o le Atua e silafiaina.
Ulisses Soares	(70) Na lapataia e se tiakono ana uo aoga e uiga i ponokalafi. Na aoao e Ulisses Soares i lana misiona e le mafai e le tiapolo ona taofia le mana o le molimau o se soo.
Joseph W. Sitati	(126) Na siitia ae e Joseph W. Sitati o ia lava mai tulaga faatauvaa i le mauaina o se aoaoga lelei.
Carole M. Stephens	(11) Na asiasi atu Carole M. Stephens i se tamaitai Amerika maori i Arisona, ISA, o le manatu ia te ia lava o se tinamatua i tagata uma.
Dieter F. Uchtdorf	(80) Na tuufaatasia e se kovana i Rusia ni tagata faifaatoaga ma fausia ni faleoloa pepelo e faagaetia ai amepasa na asiasi atu. Ua setiina e taitai o siteki ni sini lea e taulai atu i la latou auunaga.
Rosemary M. Wixom	(93) Na toe fagua e se tamaitai na le toe toaga mai lona faatuatua ina ua uma ona suesue i le talalelei, faitau le Tusi a Mamona, ma mauaina le lagolago mai le aiga ma tagata o le uarota.
Jorge F. Zeballos	(123) O le tama o Jorge F. Zeballos na faatagaina o ia e 12 tausaga e auai i le Ekalesia. Na taliaina e se ulugalii faamaoni le finagalo o le Tama Faalelagi ina ua malii le la pepe.



O Le Avea o le Konafesi ma Vaega o o Tatou Olaga

Mafaufau e faaaoaga nisi o nei gaoioiga ma fesili e fai ma vaega amata mo talanoaga faaleaiga po o mafaufauga loloto faaletagata lava ia.

Mo Tamaiti

- Na faasoa mai e Elder David A. Bednar o le Korama a Aposetolo e Toasefululua se tala o le lagonaina o le fefe ina ua uma ona ia tataeina faafuasei se faamalama o se fale-oloa e lata ane i lona fale (itulau 46). Ona ia aoaoina mai lea, a tatou vaai ia Iesu Keriso ma mulimuli ia te Ia, e mafai ona tatou lagonaina le filemu nai lo le fefe. O le a se mea e mafai ona e faia i aso taitasi ina ia fesoasoani i lau fanau e vaai atu i le Faaola? E faapefea ona e aoaoina i latou e fetaomi atu i luma ia Keriso e tusa lava pe ua oo i taimi faigata?
- Na faamatala e Sister Linda K. Burton, peresitene aoao o Le Aualofa, e uiga i se aiga na masii atu i se fale fou e lei faapaina le fanua (itulau 29). Na faailogaina e le tama tuaoi

o le fanua i le manoa ma ta'u atu i lana fanau latou te saogalemu pe afai latou te nonofo ai i totonu o le laina. Na usiusitai le fanau, na tusa lava pe na fiti atu le polo ma pasia le manoa. E mafai faapefea e matua ona fesoasoani i fanau ia saogalemu? O a faamanuiaga e oo mai mai le faalogo atu i o tatou matua? O a tuaoi e tuuina mai e le Tama Faalelagi ia i tatou?

- O Epikopo Gérald Caussé, Fesoasoani Muamua i le Au Epikopo Pulefaamalumu, na faamatalaina se tala e uiga i ni tagata se toatolu i Aferika o e na savalia i le lua vaiaso ia auala palapala ina ia auai i se fonotaga a le itu (itulau 98)! Na latou nonofo mo se vaiaso ina ia mafai ona latou aai ma feinu i le faamanatuga a o lei toe talii atu i le aiga. Ona latou aveina

lea i luga o latou ulu o atigipusa na tumu i kopi o le Tusi a Mamona e tuuina atu i tagata o lo latou nuu. E te manatu i le talalelei o se mea matagofie tele? O a ni osigataulaga e te naunau e faia e ola ai i le talalelei?

Mo Le Autalavou

- O le tele o saunoaga o lenei konafesi na faamamafaina ai le taua o le aiga ma auai. Mo se faataitaiga, o Sister Bonnie L. Oscarson, peresitene aoao o Tamaitai Talavou, na talosaga atu i tagata o le Ekalesia ia “puipuia le aiga o se nofoaga e lona lua atu i le malumalu lona paia” (itulau 14). O le a le mea e mafai ona e faia, ina ia puipuia ai le aiga? E mafai faapefea ona e fesoasoani e faia lou aiga ia avea ma se nofoaga paia?
- Na aoao mai Elder Russell M. Nelson o le Korama a Aposetolo e Toasefululua e faapea o o tatou uiga ma amioga i le Sapati o se faailoga i le va o le Tama Faalelagi ma i tatou (itulau 129). A o e faitau i le saunoaga a Elder Nelson, e mafai ona e mafaufau e uiga i le Aso Sa a sau ma fesili iofa ia te oe lava, “O a faailoga ou te manao e tuu atu i le Atua?”
- O Elder Ulisses Soares o le Fitugafulu na talanoa e uiga i se tiakono na mulimuli i faataitaiga a Kapeteni Moronae (itulau 70). Ina ua vaaia e le alii talavou nisi o tamaiti o le vasega o matamata i ata mataga i luga o a latou telefoni feaveai, sa ia ta'u atu ia i latou o mea sa latou faia e sese ma e tatau ona tuu. Na tuu e se tasi o uo. E faapefea ona tatou maua le malosi e filifili ai le mea sa'ou? E faapefea ona tatou iloa le mea e saogalemu mo i tatou e olioli ai?
- O masini eletionika e mafai ona lagonaina le mamana aua latou te tuuina mai ia avanoa i faamatalaga ma ala o faasalalaua ua toeitiiti le faatuaioa. Ae na i ai se isi lava taimi na e tu ai ma mafaufau pe *latou* te puleaina *oe*? Fai mai Elder José A. Teixeira o le Fitugafulu, “O se lagona faafouina le tuu ese o a tatou

masini faaeletonika mo se taimi” (itulau 96). Faataitai i ai. Filifili se aso i se taimi lata mai e alu ai e aunoa ma se masini feaveai. Atonu e foliga mai e pei o le mea mulimuli lea e te manao e fai, ae o le a faateia oe i le tele o le taimi o le a e faaaluina e talanoa ai ma faia ni manatuaga ma uo ma aiga.

- O le anapogi o se tasi o auala sili e matuia ai e uiga i le mana faaleagaga. O Peresitene Henry B. Eyring, Fesoasoani Muamua i le Au Peresitene Sili, na faamanatu mai ia i tatou o le anapogi ma le tatalo na faamallosia Iesu e tetee atu i faaosoosoga a Satani a o i ai le Faaola i le vao (itulau 22). O le isi Aso Sa anapogi e sosoo ai, taumafai e mulimuli i faataitaiga a Iesu ma anapogi ma se faamoemoega. O le a e maua le fesoasoani faalelagi ma le puipuiga foi.

Mo Tagata Matutua

- Sa saunoa nisi o failauga o le konafesi i le taua o le faaipoipoga ma aiga i le lalolagi ma i le ata o le faaolataga. E mafai ona e tali i fesili e lima na fesili ai Sister Burton i le itulau 31 ma ia mafaufau loloto ma le agaga tatalo i le auala e sili atu ona e siitia ma alofa atu ai i e sili ona latalata ia te oe. Faatasi ai o se aiga, ia talanoaina pe faapefea ona e faataulai atili atu lou aiga ia Iesu Keriso ma pe faapefea ona e tuuina atu le lagolago sili i le tasi ma le isi.
- Sa faamanatu mai e Peresitene Thomas S. Monson ia faamanuiaga e oo mai i le tapuai i le malumalu, e aofia ai le tulaga faaleagaga, filemu, ma le malosi e faatoilalo ai tofotofoga ma faigata (itulau 91). “A o tatou auai atu i le malumalu,” na ia saunoa ai, “e mafai ona oo mai ia te i tatou se maualuga o le faaleagaga ma se lagona o le filemu lea e sili mamao atu nai lo se isi lava lagona e mafai ona oo mai i le loto

o le tagata.” O le a se mea e mafai ona e faia ia atili anoa ai lou auai i le malumalu?

- O le faatuatua ia Iesu Keriso o se mataupu faavae o le faatinoga. “O le a le faafuasei lava ona tatou talitonu i le Faaola ma Lana talalelei nai lo le faafuasei ona tatou tatalo pe totogi le sefuluai,” na saunoa ai Elder L. Whitney Clayton o le Au Peresitene o Fitugafulu. “Tatou te filifili ma le manino e talitonu” (itulau 36). A o e faitauina lana saunoaga ma saunoaga a Elder Dallin H. Oaks o le Korama a Aposetolo e Toasefululua (itulau 32); Rosemary M. Wixom, peresitene aoao o le Peraimeria (itulau 93); Epikopo Gérald Caussé (itulau 98); ma Elder Kevin W. Pearson o



le Fitugafulu (itulau e 114), mafaufau e fai se lisi o auala e faamallosia ai lou faatuatua ia Iesu Keriso ma Lana talalelei. Ona fai lea o se lisi o faamanuiaga ua folafola mai e oo mai i le faatuatua faateleina.

- Na aoao mai e Elder Jeffrey R. Holland o le Korama a Aposetolo e Toasefululua o le Togiola ma le Toetu a le Faaola ua aofia ai “le faaaliga aupito taua o le alofa mama na faatino i le talafaasolopito o lenei lalolagi” (itulau 104). E faapefea e ou mafaufauga, upu, ma gaoioiga ona sili atu ona atagia mai ai lou agaga faafetai mo mea ua faia e le Faaola?
- O Peresitene Dieter F. Uchtdorf, Fesoasoani Lua i le Au Peresitene Sili, na faamatalaina mai le meaalofo ofoofogia o le alofa tunoa ma le taua o le usiusitai ma le salamo. “O le tau-mafai ai ia malamalama i le meaalofo o le alofatunoa o le Atua ma o tatou loto ma mafaufau atoa ua tatou maua ai mafuaaga uma e alolofa atu ai ma usiusitai i lo tatou Tama Faalelagi i le agamalu ma le lotofaafetai,” na ia saunoa ai (itulau 107). Mafaufau e faaauau ai pea au suesuega o le alofa tunoa i le faitauina o le Roma 3:23; 6:1-4; 2 Nifae 25:23, 26; Mosaea 2:21; 5:2; 27:25; Alema 34:10, 15; Eteru 12:27; ma Moronae 10:32. ■





lava o loo i ai i le motu lava lea e tasi, ae o lena malumalu e toetoe lava o se aso le mamao e malaga ai.

Malumalu o Abidjan Faga o Ivory

O le Faga o Ivory (Côte d'Ivoire) o se nofoaga mau i le silia ma le 27,000 tagata o le Ekalesia i se malo pe tusa ma le 20 miliona tagata. Na amata aloaia le galuega faafaifeautalai i le 1988. O le malumalu aupito lata ane o le Malumalu o Accra Ghana, lea e 340 maila (550 km) le mamao.


Malumalu o Bangkok Taialani

O Taialani o se nofoaga mau i le pe a ma le 19,000 o le Au Paia o Aso e Gata Ai i se malo pe tusa ma le 67 miliona. Na faatulagaina aloaia le Ekalesia i Taialani i le 1966. O le a auauna atu le Malumalu o Bangkok Taialani i le Au Paia o Aso e Gata Ai i Taialani, faapea foi ma tagata uma i Asia Sautesasae. O le taimi nei, o le malumalu aupito lata ane i Taialani o le Malumalu o Hong Kong Saina, e silia ma le 1,000 maila (1,610 km) le mamao.

Tala Fou o Malumalu Faaopoopo

Ua fofogaina atu ia fale tatala, faafiafiaga faaleaganuu, ma aso e tatala ai ia malumalu e lima mo le 2015 i Córdoba, Atenitina; Payson, Iuta, ISA; Trujillo, Peru; Initianapoli, Initianana, ISA; ma Tijuana, Mekisiko. O le a toe faapaiaina foi i le 2015 le Malumalu o Mekisiko Aai o Mekisiko lea na toe faafouina.

Mo le lua tausaga ua mavae, na taulai atu taumafaiga a le Ekalesia i le faamaeaina o malumalu ia na fofogaina atu muamua. E faaopoopo atu i malumalu fou e 3, ua 144 malumalu o loo faaaogaina, 5 o loo toe faafouina, 13 o loo fausiaina, ma le 13 lea na fofogaina talu ai nei o loo i ai i vaega eseese o sauniuniga ao lei amata le fausiaina. ■



E Tolu Malumalu ua Fofogaina Mai

Ua fuafuaina ni Malumalu mo Port-au-Prince, Haiti; Abidjan, Faga o Ivory; ma Bangkok, Taialani, na fofogaina mai e Peresitene Thomas S. Monson i le taimi o le sauniga i le taeao o le Aso Sa o le konafesi aoao. I tulaga taitasi, o le malumalu muamua lea o le a fausia i lona atunuu. O nofoaga tonu o malumalu, o le a fofogaina atu i se taimi mulimuli ane.

“E ofofogia faamanuiaga ua faapopoloina mo au paia faamaoni i nei

nofoaga, ma, e moni lava, i soo se mea o loo i ai malumalu i le lalolagi atoa,” na saunoa ai Peresitene Monson.

Malumalu o Port-au-Prince Haiti

O Haiti o se nofoaga mau lea i le silia ma le 20,000 o le Au Paia o Aso e Gata Ai i se malo pe tusa ma le 10 miliona tagata. Na amata aloaia le galuega faafaifeautalai i le 1980. O le malumalu aupito lata ane o le Malumalu o Santo Domingo Dominican Republic. E ui

Lagolagoina o Taitai Fou

E toalima Pulega Aoao fou na lagolagoina i le taimi o le konafesi aoao, e auauna atu i le Korama Muamua a Fitugafulu. O i latou nei o Elder Kim B. Clark, Elder Allen D. Haynie, Elder Von G. Keetch, Elder Hugo Montoya, ma Elder Vern P. Stanfill.

Sa lagolagoina foi se au peresitene aoao fou o Alii Talavou. O Stephen W. Owen o le a auauna atu o se peresitene; o Douglas D. Holmes, o le fesoasoani muamua; ma M. Joseph Brough, o le fesoasoani lua.

Sa lagolagoina foi se fesoasoani fou i le au peresitene aoao o le Peraimeri. O Mary R. Durham na valaauina e auauna atu o se fesoasoani lua. O le a faaauau pea ona auauna atu Rosemary M. Wixom o se peresitene, ma Cheryl A. Esplin, o le sa avea muamua ma fesoasoani lua, o le a auauna atu nei o se fesoasoani muamua.

E mafai ona maua ia tala o soifuaga o taitai fou faatoa valaauina i itulau e 140–144. ■



O Peresitene Eyring i le Fonotaga i le Vatikana

O Peresitene Henry B. Eyring, Fesoasoani Muamua i le Au Peresitene Sili, na valaauina se “amataga fou o faaipogaga fiafia” i le taimi o se fonotaga mo tapuiga eseese faavaomalo i le Vatikana lea na talimalo ai le Ekalesia Katoliko i le aso 18 Novema, 2014. O le autu o le fonotaga “The Complementarity of Man and Woman,” na aumaia faatasi ai taitai faalelotu mai faatuatuga e 14 ma atunuu e 23.

“O se alii ma se tamaitai, ua tuufaatasia i le faaipogaga, ua mauaina le mana paia e fatuina ai le fiafia mo i laua lava, mo o laua aiga, ma mo tagata o siomiaina i laua,” na saunoa ai Peresitene Eyring. ■

O Le Tusi a Mamona i Gagana e 110


I le lomiga talu ai nei i le gagana Kosaraea, ua faaliliuina nei le Tusi a Mamona i gagana e 110. O Kosarae o se motu i le Setete Tuufaatasi o Maikolenisia.

O le a maua kopi na lolomiina o le Tusi a Mamona i le faa-Kosaraea ia Iulai 2015. Na maua lomiga faaeletonika i le LDS.org, faapea foi i le Potutusi o le Talalelei ma lomiga o le Tusi a Mamona i masini omiomi feaveai, ia Mati. Ua faalauiloa mai foi i le taimi nei e le Ekalesia ni lomiga faaeletonika o tusitusiga paia i le taimi lava e tasi lea ua auina atu ai anotusi mo tusi mo le lolomiina. O lenei faiga o le a vave ona maua ai e tagata o le ekalesia ia tusitusiga paia faatoa uma ona faaliliuina.

O le tele o faaliliuga fou o tusitusiga paia o le a fofogaina atu i le aluga o le isi lua tausaga. O faaliliuga fou e tolu o le Tusi a Mamona ma faaliliuga faaopopo e lima o le fusi tolu (o le Tusi a Mamona, Mataupu Faavae ma Feagaiga, ma le Penina Tau Tele na lomiai le lomiga e tasi) e na

o le 2015 o le a lolomiina ai. O le a logoina atu tagata o tautatala i na gagana pe a lomiai ia lomiga faaeletonika. ■





Faamalosia le Faatuatua i Vitio o le Tusi Paia

E mafai ona e fesoasoani e faamalosia le faatuatua ia lesu Keriso i lenei tausaga—lo outou lava [faatuatua] faapea ma isi—e ala i le maimoaina ma le faasoaina atu *O Vitio o le Tusi Paia o le Soifuaga o lesu Keriso* i BibleVideos.org ma luga o polokalama Vitio o le Tusi Paia.

O nei punaoa atiae-faatuatua o loo ofoina atu e aunoa ma se totogi i isi ekalesia i se taumafaiga e faasoa atu le savali a le Faaola i se tulaga lautele e mafai ai i le lalolagi atoa, ina ia fesoasoani i tagata maimoa ia lagonaina Lona alofa ma uunia i latou ia mananao ia faapei o Ia.

Mai vitio e 92 o le Tusi Paia ua gaosia e le Ekalesia i le faagasologa o le tolu tausaga ua mavae, ua silia nei ma le afa ua uma ona faaliliuina mai le gagana Peretania i le gagana Sipaniolo, Potukale, Italia, Farani, Rusia, Siamani, Korea, Iapani, ma Saina. ■

F&T ma Elder ma Sister Bednar

Ua valaaulia le autalavou i le lalolagi atoa e auai i se sauniga tuusao, fesootai Faafesagai o fesili-ma-tali ma Elder David A. Bednar o le Korama a Aposetolo e Toasefululua ma lona faletua, o Susan.

E mafai ona faatasi mai le autalavou i le talatalanoaga fesootai i le aso 12 Me, 2015, i le 6:00 i le afiafi i le Mountain Daylight Time, e ala i le matamata i le faasalalauga tuusao i le LDS.org, le itulau o le Facebook o le Autalavou a le AAG, o le saite o Gaoioiga a le Autalavou (lds.org/youth/activities), po o le itulau o le YouTube o le Alaata Mamona. O lenei faasalalauga o le a faaliliuina tuusao atu i gagana Sipaniolo, Potukale, Italia, Siamani, Farani, Rusia, Korea, Iapani, ma Saina.

E fautuaina le autalavou e auina atu ia fesili i le saite o Gaoioiga a le Autalavou a o lei faia le sauniga po



o le taimi foi o le sauniga; e mafai foi ona latou mulimuli i le talanoaga i le #LDSface2face.

“Matou te fautuaina le autalavou, a o latou saunia mo lenei gaoioiga, ia saili le taitaiga a le Agaga i le manatunatu loloto po o a ni fesili latou fesili mai ai,” o le saunoaga lea a Elder Bednar. “Pe a tatou maua le Agaga e faatasi ma i tatou, o le a tatou aoao uma faatasi.” ■

Faigalotu mo Talavou Matutua

O le a saunoa atu Elder Lynn G. Robbins o le Au Peresitene o Fitugafulu i se faigalotu i le lalolagi atoa mo talavou matutua, lea o le a faasalalauina atu i le Aso Sa, 3 Me, 2015, i le 6:00 i le afiafi o le Mountain Daylight Time. O le faasalalauga o le lona lua ai lea o le tolu o faigalotu i le lalolagi atoa na fuafuaina mo le 2015.

O talavou matutua uma (18-30 tausaga) ma tamaiti aoga ua maea aoga mauululuga po o se tulaga talitutusa ua valaaulia ina ia auai. O le a maua le faasalalauga i luga o polokalama satellite a le 'Ekalesia, le Initoneti, ma isi ala o faasalalauga. O loo maua foi anomea faaopoopo e faatatau i le faigalotu i le devotionals.lds.org. ■

Auaunaga mo Vaega o Uepisaite

O a mea o loo faia e Au Paia o Aso e Gata Ai e faaleleia ai ia nuu ma alalafaga o loo latou nonofo ai? Saili atu i le alu i leMormonNewsroom.org. O nisi nei o faataitaiga mai faasilasilaga talu ai nei i luga o uepisaite o Potu o Talafou faavaomalo.

Niu Sila ma Vanuatu

Ina ua taia e le Afa o Pam le tamai motu o le Pasefika o Vanuatu, o le Au Paia o Aso e Gata Ai i Aukilani, Niu Sila—faatasi ai ma fesoasoani mai le Auaunaga o Fesoasoaniga Alofa a le Ekalesia—na afaatasi e fesoasoani atu ia i latou na faataumaioia e le matagi. Na latou tuufaatasia ni pusa meaai e 2,000 ina ia fesoasoani i le toatele o le faitau aofai na aafia e mafai ai. Na tutumu ia koneiteina taitasi i falaoamata, araisa, apa fualaaui suamalie, pi,

pisupo, i'a, masi, vine, saimini, susu pauta sukalaki, ma se talaapa. E mafai foi ona faaoga ia koneiteina mo isi faamoemoega, e pei o le aveina o vai.

Ripapelika Tominika ma Kanata

I le Ripapelika Tominika ma Kanata, sa auai tamaitai o le Au Paia o Aso e Gata Ai i le faamanatuina o le Aso o Tamaitai Faavaomalo, o se gaoioiga e lagolagoina e Malo Afaatasi. Na silia ma le 1,200 tamaitai na potopoto i falelotu o le Ekalesia i le tele o eria o le Ripapelika Tominika e faamamaluina tamaitai mo o latou sao e tele i le lalolagi. O taitai faalelotu, faalemalo, ma le militeli sa auai i lea gaoioiga, lea na aafia ai se polokalama o musika ma lauga. I Kanata, sa faailogaina foi

e tamaitai o le Au Paia o Aso e Gata Ai lea aso i le faasoaina atu o faamatalaga e faatautu i le Aualofa, matauina o se “auala maoae mo le auunaga i le lalolagi atoa.”

Peretania

O la latou sini autu o le suiina o ni ofu se 100 mo tamaiti le tagolima i Aferika, ae ina ua maea, sa suiina e tamaitai o le Uarota o Coventry i Egelani le silia ma le 230 ofu. O ofu faigofie, na faia mai tagaaluga, e faigofie ona faamaeaina. O se tasi o tuafafine, e lei suisui muamua, sa mafai ona ia faia ni ofu se 3.

Arkansas, ISA

Na silia ma le 600 tagata na auai i se faigalotu a le nuu o tapuaiga eseese i le autu, o le saolotoga o tapuaiga na faatulagaina e le Siteki o Little Rock Arkansas, e aafia ai ma sui mai le Katoliko, Metotisi, ma nuu Faaisalama ma se tagata faasalalau o le leitio Faaevagelia. O le faigalotu o tapuaiga eseese na aafia ai foi ma se savali na pueina i le vitio mai le lutena kovana o le setete ma se tatalo faaiu mai le senatoa o le setete, e lotu Papatiso uma. Na fai mai i latou na faamaopoopoina, o leni gaoioiga na fausiaina “ni alalaupapa o le malamalama.” ■


O Le LDS.org Ua Sili Atuona Faigofie le Faaaogaina

O le a maua e leLDS.org se faatula-gaga fou o le lisi autu ma faatau-taiga faigofie ia Me lenei, o faaleleiga faifaipaea sili ona fou ia a le Ekalesia ina ia faia ai lona uepisaite aloaia ia sili ona patino ma sili ona faigofie i le faaaogaina.

Na tuufaatasia e tagata atiae ma tagata mamamu ni manatu faaalua a

tagata faaoga o le tele o tausaga faatasi ma ni sailiiliga faaopoopo e fatu ai se lisi autu sili ona manino ma malamalama. Ua faaalua mai i faataitaiga ua sili atu ona faigofie le sailia o anotusi ma punaoa i le faatautaiga fou.

Ua saunia foi se maimoaga faavitio o le LDS.org, ina ia fesoasoani e faama-sani tagata i le faalapopotoga fou. ■





Elder Kim B. Clark

Korama Muamua a Fitugafulu

O Tala o le Uluai Faaaliga

Ua maua nei ia tala patino e fa o le Uluai Faaaliga, na tusia e Iosefa Samita, i gagana e 10. Ua mafai ona mauaina i le josephsmithpapers.org, lea e mafai ai foi e se tagata o maimoa i le initoneti ona maua ia uluai pepa o faamatalaga ma api talaaga. ■



O se olaga atoa o aoaoga—o se tagata aoga ma se faiaoga—o le a faamanuaina ai Elder Kim Bryce Clark i lona tofiga fou i le Korama Muamua a Fitugafulu. Sa lagolagoina o ia i le aso 4 Aperila, 2015, o le a amataina e Elder Clark lana auunaga i ni nai vaiaso pe a maea lona tofiga o se peresitene o le Iunivesite o Polika Iaga-Idaho.

“Na ou aoga talu mai lou lima tausaga,” o le tala lea a le Fitugafulu faatoa valaauina. “Ou te fiafia i le aoaoina ma aoao atu.”

Sa soifua mai o ia i le aso 20 Mati, 1949, i le Aai o Sate Leki, Iuta, ia Merlin ma Helen Mar Clark, o le ulumatua o le fanau e toatolu. Na ia faaaluina lona olaga faatamaitiiti i le Aai o Sate Leki seia oo i le 11 tausaga, ina ua talia e lona tama se galuega i Spokane, Uosigitone.

E ui ina sa ia fuafua e auai i le Iunivesite o Polika Iaga i Provo, Iuta, ao avea ma se tausaga tolu i le aoga mauuluga sa ia lagona le manaomia ona ia suesue i isi vaega ma filifili ai loa e talosaga atu i le Iunivesite i Harvard i Massachusetts—o se nofoaga o le a iu lava ina avea ma ona aiga mo le silia ma le tolusefulu tausaga.

Ina ua mavae lona tausaga muamua o suesuega i Harvard, sa auauna atu Elder Clark i le Misiona a South German mai le 1968 i le 1970. Ina ua ia taliu mai sa ia auai i le BYU, lea e lei umi ae feiloai ai ia Sue Lorraine Hunt i lana uarota. Na la faaipoipo i ni nai masina mulimuli ane i le aso 14 Iuni, 1971. O i laua o ni matua o se fanau e toafitu.

O le taimi lava na uma ai ona la faaipoipo, na siitia atu ai le ulugalii i le eria o Boston, Massachusetts, lea sa toe lesitala ai Elder Clark i Harvard. O iina sa ia maua ai se faailoga o le tagata malaga i le faatufugaga ma le faailoga o le matuaofaiva i le faatufugaga, ma sona faailoga Faafomai—i mea tau tupe uma. Na avea Elder Clark ma se tasi o faiaoga o le Aoga Faapisinisi a Harvard i le 1978 ma mulimuli ane avea ma fautua o le aoga i le 1995. I le 2005 sa avea o ia ma peresitene o le BYU-Idaho, lea na avea ai mo le toetiiti lava sefulu tausaga.

Na auauna atu Elder Clark o se peresitene o le korama a toeaina, failautusi faapitoa a le uarota, fesoasoani o le epikopo, epikopo, fautua mauuluga, fesoasoani o le peresitene o le misiona a le siteki, ma Fitugafulu Eria. ■

O Aoaoga Mo o Tatou Taimi

Mai ia Me 2015 e oo atu ia Oketopa 2015, e tatau ona saunia lesone o le Perisitua Mekisateko ma le Aualofa i Aso Sa lona fa mai se lauga se tasi pe sili atu, na tuuina mai i le konafesi aoao ia Aperila 2015. Ia Oketopa 2015, e mafai ona filifili mai lauga mai le konafesi aoao ia Aperila 2015 po o Oketopa 2015. E tatau ona filifili e peresitene o siteki ma itu po o fea lauga o le a faaaogaina i o latou eria, pe e mafai ona latou faamatuueseina atu leni tiutetauave i epikopo ma peresitene o paranesi.

Ua fautuaina i latou e auai i lesone i Aso Sa lona fa ina ia suesue muamua i lauga ua filifilia. O loo maua lauga o le konafesi i le tele o gagana i le conference.lds.org. ■



Elder Allen D. Haynie

Korama Muamua a Fitugafulu

Na lagolagoina Elder Allen Decker Haynie o se tasi o le Korama Muamua a Fitugafulu i le aso 4 Aperila, 2015.

Na soifua mai Elder Haynie i le aso 29 Aokuso, 1958, ia Van Lloyd ma Sara Lulu Lewis Haynie.

Na soifua mai o ia i Logan, Iuta, ae sa faaaluina le tele o lona talavou i isi aai i Iuta i matu, ma i le Vanu o Silicon o Kalefonia. Sa ia auai i ni aoga tulagalua eseese se lima, lua aoga faaogatonu, ma mulimuli ai auai i se aoga maualuga i Bountiful, Iuta.

O leni eseesea i aafiaga na “aoo mai ia te au se lesona maoae e uiga i le aoo e talisapaia tagata uma,” na ia fai mai ai, “aia sa foliga mai o tausaga uma lava sa suia ai ou nofoaga ma toe faia foi nisi uo. O se tasi o mea ou te fiafia ai e uiga i le Ekalesia ona e aumaia ia i tatou se avanoa e mafuta ai ma tagata ma maua ai le taua i o latou tulaga eseese, aafiaga, ma taleni ma tomai.”

Sa ia auuina atu i le Misiona a Atenitina Cordoba mai le 1977 i le 1979.

Faatasi ai ma se faailoga o le tagata malaga faa-saienisi mai le Iunivesite o Poliga Iaga, sa faaauu pea Elder Haynie ma mauaina se faailoga maualuga o le avea ma faamasino mai le Aoga Faaloia a le iunivesite o J. Reuben Clark i le 1985.

Na ia faataunuuna se tausaga atoa e avea ai ma se fesoasoani i le faamasino o le U.S. Ninth Circuit Court of Appeals i San Diego, Kalefonia, ao lei auai i le kamupani loaia a Latham ma Watkins, o loo galulue mai le ofisa i San Diego. Pe tusa ma le lima tausaga talu ai na la faatuina ai ma lona uso sa la'ua lava kamupani loaia.

Na galue foi Elder Haynie o se peresitene o le korama a toeaina, peresitene o Alii Talavou a le uarota, faiaoga seminare, fautua maualuga, epikopo, peresitene o le siteki, ma Fitugafulu Eria.

Sa ia feiloai ia Deborah Ruth Hall a o auai i le BYU, ma sa faaipoipo le toalua i le aso 19 Tesema, 1983, i le Malumalu o Sate Leki. O i laua o ni matua o se fanau e toaono.

I le ootia ai ao talanoa e uiga i lana molimau, na fai mai Elder Haynie na ia muai faitauina ma makaina le Tusi a Mamona ina ua 12 ona tausaga. “E leai sou manatua o le le talitonu; e leai sou manatua o le le tatalo.” ■



Elder Von G. Keetch

Korama Muamua a Fitugafulu

Na oo mai se taimi taua tele o le olaga o Elder Von G. Keetch a o ia faamaeaina se vaega faataitai o le avea ma se fesoasoani i le Faamasino Sili o Warren E. Burger ma Faamasino Antonin Scalia o le Ofisa o le Faamasinoga Maualuga a le Iunaite Setete ma sauniuni ai e avea ma se loaia maoli.

Na mafai lava ona ia galue i soo se aai i le Iunaite Setete mo le anoanoai o kamupani loaia tetele. Nai lo lena, sa la tatalo ma lona faletua o, Bernice Pymm Keetch, mo se musumusuga ia iloa le mea e tatau ona la faia. Ina ua mavae se vaitaimi o saililiga, sa toe foi atu le ulugalii i le Aai o Sate Leki, Iuta, lea sa ia galue ai mo le ofisa loaia a Kirton McConkie.

I lena taimi, na manatu Elder Keetch atonu o loo ia ositaulagaina lona tomai e galue ai i ni mataupu faaletulafono fou ina ia mafai ai ona ia latalata i le aiga. Ae, i le avea ai ma loaia sili tutoatasi mo le Ekalesia, na finauina e Elder Keetch ni mataupu faaletulafono ma ni mataupu e faatatau i le saolotoga o tapuaiga lea ua uma ona faataatia ia faavae. Na ia tu mo le toetiiti lava o tapuaiga tetele uma faalelotu i le atunuu. “Sa ou fiafia i le mafai ai ona galue mo se faalapotopotoga maoae ma mafai ona galue i ia faafitauli maoae,” o lana tala lea.

Na soifua mai i le aso 17 Mati, 1960, i Provo, Iuta, ia Gary ma Deanne Keetch, o Elder Keetch o le ulumatua o le fanau e toafa. Sa nonofo lona aiga i Orem, Iuta, a o le'i siitia atu i Pleasant Grove, Iuta—lea o le a la galulue faatasi ai ma lona faletua i le lumanai i le aufono o le seminare a la latou aoga maualuga.

Na auuina atu Elder Keetch i le Misiona a Siamani Dusseldorf ma sa ia alofa i tagata Siamani. Ina ua foi mai le misiona, na faaipoipo o ia ia Bernice Pymm i le Malumalu o Sate Leki i le aso 21 Novema, 1981; e toaona le la fanau. Na faauu Elder Keetch mai le Iunivesite o Polika Iaga i le 1984, ma se faailoga o le tagata malaga i le saienisi faaupufai ma maua se faailoga faaloia mai le iunivesite i le 1987.

I le aluga o tausaga, o Elder Keetch, o le na lagolagoina i le aso 4 Aperila, 2015, i le Korama Muamua a Fitugafulu, na galue i le au epikopo, i le au fautua maualuga, o se peresitene o le siteki, ma o se Fitugafulu Eria. ■



Elder Hugo Montoya

Korama Muamua a Fitugafulu

Na manino lava le faagaetia o Elder Hugo Montoya ina ua valaauina o ia i le Korama Muamua a Fitugafulu. Sa ia maua le mafanafana i upu mālū a Peresitene Thomas S. Monson i le taimi o se fonotaga faaleaoaoga mo le Au Pulega Aoaofou: “Ua e i ai iinei aua e te alofa i le Faaola.” Na lagona e Elder Montoya le faagaetia, i le iloina o lona valaaua fou ua tuuina atu o ia i le feau a le Alii.

“Ou te alofa i le Faaola, ma o le a ou alu i soo se mea e talosagaina a’u ou te alu i ai,” o lana tala lea. “O le a ou faia soo se mea e talosagaina a’u e fai. O le a ou tautala i upu ua talosagaina a’u e tautala ai.” Sa lagolagoina Elder Montoya i le taimi o le sauniga i le afiafi o le Aso Toonai o le Konafesi Aoaofaaleausaga Lona 185 a le Ekalesia.

Ua maua foi e Elder Montoya le malosi i le talatuu o le faatuatua a lona aiga. O le tamamatua a lona tina o Rafael Monroy o se tagata sili ona taua i le talafaa-solopito o le Ekalesia i Mekisiko. I le 1915, sa molia ai Uso Monroy ma se tasi uso, o Vicente Morales, e se vaega o tagata faatupu faalavelave i le taimi o Fetauaiga i Mekisiko. Na ta’u atu i ia alii e toalu o le a tatalaina i laua pe afai, atoa ai ma isi manaoga, la te teteina la laua tapuaiga.

Sa mumusu i laua ma na tafanaina i laua ma malilui ai e le au fanafana.

Na saunoa mai Elder Montoya o le faataitaiga a le tamamatua a lona tina o loo avea pea ma se uunaiga mamana i lona olaga. “Ua ou aoaoina o lagona o le fefe e mafai ona faatoilaloina e ala i lagona o le faatuatua ma le molimau pe a e iloina o loo e faia le mea sa’o.”

Na soifua mai Elder Montoya i le aso 2 Aperila, 1960, i Fresno, Kalefonia, ia Abel Montoya ma Maclovía Monroy. Na nofo o ia i Mekisiko mo le tele o lona olaga.

Na ia faaiipoipo atu ia Maria del Carmen Balvastro i Hermosillo; sa faamauina i laua i le Malumalu o Mesa Arisona i le aso 6 Aperila, 1983. E toailima le la fanau.

Ina ua uma ona galue o se faifeautalai faamisiona i le Misiona a Mexico City North mai le 1979 i le 1981, sa ia auauna atu o se peresitene o Alii Talavou a le uarota, fautua maualuga, epikopo, peresitene o le siteki, suetusi a le eria, ma Fitugafulu Eria.

Sa ia faauu mai le Iunivesite a le Setete o Sonora i le 1986 ma se faailoga faa-faatoaga faaenisia ma faigaluga ai i le tele o galuega faalepulega i le Xerox ma o se faiaoga inisitituti o le Ekalesia. ■



Elder Vern P. Stanfill

Korama Muamua a Fitugafulu

E talitonu Elder Vern Perry Stanfill e leai se mea e tupu e fua. E talitonu o ia o loo i ai fesootaiga i lenei olaga i le va o tagata mo se faamoemoega ma e mafai e le Alii ona uunaia Lana fanau ia avea ma ni faamanuiaga i isi.

E fiafia Elder Stanfill e auauna atu i isi i le talalelei, aemaise lava le galulue faatasi ai ma tagata taitoatasi.

Na soifua mai o ia i le aso 8 Aokuso, 1957, ia Jed ma Peggy Stanfill, na ola ae Elder Stanfill i se faatoaga lafumanu o povi e latalata i Townsend, Monatana. Sa ia aoaoina le taua o le galue malosi ma atinaeina se molimau o le Faaola o Iesu Keriso. O le lona tolu o le fanau e toafa, o Elder Stanfill e toalu ona uso matutua ma se tuafafine laitiiti o e na galulue faamaoni i le Ekalesia.

“O loo i ai le aao o le Alii i o tatou olaga e ui i o tatou vaivaiga,” na ia fai mai ai. “Ma te le atoatoa ma lo’u toalu. E le atoatoa lo ma aiga. Ua na o i matou o ni tagata faatauvaa o e o taumafai e ola ai o matou olaga i lea aso ma lea aso ma tuu atu i le Alii ina ia avea ai ma se vaega.”

Ina ua uma ona auauna atu i se misiona talai i Toulouse, Farani, ma tulimata’ia se faailoga i mataupu faa-faatoaga i le Iunivesite o Polika Iaga, sa ia feiloai ma faaiipoipo ia Alicia Cox. Sa la faaiipoipo i le aso 17 Tesema, 1980, i le Malumalu o Sate Leki.

Ina ua maea le faauuga, sa toe siitia atu le au Stanfills i Monatana ina ia mafai ona fesoasoani e galueaina le faatoaga o le aiga, taulimaina o manu, vaomago, ma le faagaoioiga o le saito. Sa ia faatauina atu le pisinisi i le 1998, ma amata ona puleaina se vaega o fanua faatau ma mea tau tupe, o fanua ma le mea e faaaoaga mea tau tupe, faapea foi ma faatulagaina o fesoasoaniga agalelei ma mataupu tau aseta.

Na aofia Elder Stanfill i mea tau vaalele i tulaga faa-pisinisi ma faasamasamanoa ma na ia umia uma ni tusi faamaonia mo vaalele tetele la’u pasese ma helikopa.

E le gata i le tausaiaina faatasi ma lona faletua o se fanau teine e toafa, na maua e Elder Stanfill ni avanoa e auauna atu ai i le Ekalesia o se peresitene o le korama a toeaina, epikopo, fautua maualuga, peresitene o le siteki, ma Fitugafulu Eria. Sa ia auauna atu i le Korama Lona Ono a Fitugafulu i le taimi o lona valaaua i le Korama Muamua. ■



Mary R. Durham

*Fesoasoani Lua i le Au Peresitene Aoao
o le Peraimeri*

A o faapaleniina manaoga o le olaga o le aiga, vala-
auga o le Ekalesia, galuega, ma isi tiutetauave i lona
olaga faaipoipo, na matauina e Mary Richards Durham
afai la te faamuamua ma lona toalua le Alii, o le a
sologa lelei mea uma. “O se mea matagofie. Afai e te
talitonu, o le a faamanuia oe e le Alii,” o lana tala lea.

O se manatu autu sa ia ta’ua soo faafia. Sa vala-
auina o ia e auauna atu o se peresitene o Tamaitai
Talavou a le uarota a o auauna atu lona toalua i le au
peresitene o le siteki. Mulimuli ane sa la auauna atu
faatasi ao pulefaamalumu lona toalua i le Misiona a
Iapani Tokyo mai le 2000 i le 2003. O lenei la o le a ia
auauna atu o se fesoasoani lua i le au peresitene aoao
o le Peraimeri a o amataina e lana tane lana auaunaga
o se Fitugafulu Eria.

“A o tatou tauave faatasi ma le tasi ma le isi faapea foi
ma le Alii, o le a faigofie atu mea uma,” o lana tala lea.

Na soifua mai Mary Lucille Richards i le aso
15 Mati, 1954, i Portsmouth, Virginia, ia L. Stephen
Richards Jr. ma Annette Richards. A o tulitulimatagau-
ina e lona tama lona faailoga faafomai, na siitia atu le
aiga i Minneapolis, Minesota, ao le i nofoia le Aai o
Sate Leki, Iuta.

O le faafaileleina e ala i le faatuatua ma le alofa o
ona matua ma se aiga lautele toatele, na ia iloa e moni
le talalelei. “O se aafiaga fiafia le ola ai i le talalelei. Sa
lei faigata. Sa fiafia,” o le tala lea a Sister Durham.

I le avea ai ma se tamaitai talavou, sa faagaetia o ia
i le taua o le mauaina o se alii talavou agavaa e faaipo-
ipo i ai ma sa faia o se mataupu o le tatalo i aso taitasi
ma anapogi faalevaiaso. Ina ua maea le aoga maualuga,
sa ia auai i le Iunivesite o Polika Iaga i se sikolasipi siva
ma feiloai ai ma Mark Durham, o le sa auai i le Iunive-
site o Iuta. “Sa vave ona ou iloaina lona agalelei,” o lana
tala lea.

Sa faaipoipo le ulugalii ia Iuni 1974 i le Malumalu o
Sate Leki. E toafitu le la fanau.

Na auauna atu Sister Durham o se peresitene o
le Aualofa o le siteki, fesoasoani i le au peresitene o
le Aualofa a le uarota, faiaoga o Aoaoga Faavae o le
Talalelei, peresitene o Tamaitai Talavou a le uarota, ma
le, sili ona lata mai nei, o se tasi o le au fono aoao o le
Peraimeri. ■



Stephen W. Owen

Peresitene Aoao o Alii Talavou

I na ua 14 tausaga le matua o Stephen W. Owen, sa
faafaigaluegaina o ia e lona tuaoi e moa le vao o lona
fanua tele ma vele vao o lona togalaau i vaiaso taitasi.
“E tolu aso na ou moaina ai lena fanua,” na fai mai ai
Uso Owen ataata, o le sa lagolagoina i le aso 4 Aperila,
2015, e avea ma peresitene aoao o Alii Talavou.

Ina ua iu lava ina ua maea Stephen talavou, sa fai
atu lona pule atamai ia te ia la te savalivali e ui atu i le
togalaau ina ia mafai ona ia faasino atua se vao se tasi
pe lua sa misi i lana vaai.

“Sa ia ta’u mai ia te au e tataua ona ou veleesea uma
vao,” o lana tala lea. “O la’u galuega muamua lena ma
sa fesoasoani ia te au e iloa ai le uiga o le tautino atu i
se tiute.”

Na aoaoina e Uso Owen ni lesonea i lena tausaga na
sili atu nai lo le tausiga o le fanua ma le togalaau. O se
tasi o lesonea, sa ia iloaina o le faamalieina o loo maua
i le faia o mea faigata i le ala sa’o. Sa ia aoaoina foi le
taua o faufautua.

Sa na o le mea sili lava sa faamoemoeina e le tuaoi
mai ia Stephen. “Sa pei sa ia fai mai ia te au, ‘ou te iloa
le mea e mafai ona avea ai oe, ma ou te mana’o e feso-
asoani ia te oe.’”

O alii talavou uma i le Ekalesia, sa ia faaopoopo mai,
e manaomia ni faufautua faapenei e fesoasoani ia te ia e
avea ai ma se umia le perisitua sili ona lelei e mafai ona
avea ai o ia. “E tele lou agaga alofa mo le autalavou,” o
lana tala lea. “Ou te alofa ia i latou ma ou te iloa o se
taimi taua tele lenei o le a faatuina ai le mamanu mo o
latou olaga atoa.”

Sa auauna atu Uso Owen i le Misiona a Texas
San Antonio ma avea mulimuli ane ma taitai Sikauti,
peresitene o Alii Talavou o le uarota, epikopo, fautua
maualuga, ma peresitene o le siteki.

O se tagata ma’oi o Holladay, Iuta, sa pulefaamalu-
malu foi i le Misiona a Kalefonia Arcadia mai le 2005 i
le 2008, lea sa ia galue faatasi ai ma lona faletua o, Jane
Stringham Owen. Sa la faaipoipo i le aso 28 Tesema,
1979, i le Malumalu o Provo Iuta. E toalima le la fanau.

Sa soifua mai o ia i le aso 22 Mati, 1958, i le Aai
o Sate Leki, Iuta, ia Gordon ma Carolyn Owen. Sa
faauuina o ia mai le Iunivesite o Iuta ma se tikeri i mea
tau tupe, ma o le peresitene o le Kamupani o le Great
Harvest Bread i Provo, Iuta. ■



Douglas D. Holmes

*Fesoasoani Muamua i le Au Peresitene
Aoa o Alii Talavou*

“Olenei tupulaga o le autalavou, ua i ai se gafatia sili atu mo le ususitai nai lo soo se tupulaga na muamua atu. Ou te manatu o se vaega lena o le faatulagaga o taimi a le Alii ma sauniuniga mo aso ua tatou ola ai,“ o le tala lea a Uso Douglas D. Holmes, o le na lagolagoina i le aso 4 Aperila, 2015, e avea ma fesoasoani muamua i le au peresitene aoao o Alii Talavou.

Na soifua mai Uso Holmes i le aso 27 Fepuari, 1961, i le Aai o Sate Leki, Iuta, ia Dee W. ma Melba Howell Holmes ma ola ae i Cottonwood Heights, Iuta.

Ina ua uma ona auauna atu i le Misiona a Sikotilani Glasgow mai le 1980 i le 1982, na maua e Uso Holmes se faailoga o le tagata malaga i mataupu faasaenisi faaleaiga mai le Iunivesite o Polika Iaga i le 1986 ma faaauau atu ai i le mauaina o se faailoga o le matuaofaiva o pulega faapisinisi mai le iunivesite a Marriott Aoga o le Pulega.

Ina ua maea le faauuga, sa avea o ia ma se faufautua o le pulega mo le tolu tausaga ona amataina lea o se galuega faamanuiaina i mea tau fesootaiga, na avea ai ma sui peresitene o fuafuaga ma atinaega mo le vaega o le Media One. Mai le 2000 seia oo i lona valaauga o se peresitene o le misiona i le 2010 ma faapea foi i le 2013, sa ia faigaluega mo ia lava i atinaega o mea tau tupe ma fanua.

Na ia tuuto atu le tele o lona taimi ma taleni i faalapotopotoga e le sue tupe, auauna atu i au fono a le United Way i le Itumalo o Davis, Iuta; Parents for Choice in Education; o le Saunia o Nofoga Saogalemu mo Tamaitai i le Itumalo o Davis; ma le Aoga mo le Fatuina o Pisinisi.

Sa ia auauna atu o se taitai misiona a le uarota, peresitene o Alii Talavou a le uarota, epikopo, ma talu ai nei lava o se fesoasoani i le au peresitene o le siteki. Sa ia pulefaamalumu i le Misiona a Michigan Detroit mai le 2010 i le 2013.

Na ia faaipoipo atu ia Erin Sue Toone i le aso 22 Iuni, 1985, i le Malumalu o Sate Leki. O i laua o ni matua o se fanau e toano.

“Ua tatou vaai i le mana o le upu i o tatou olaga, pe o upu a perofeta po o upu o tusitusiga paia po o musumusuga a le Agaga Paia,” o le tala lea a Uso Holmes. ■



M. Joseph Brough

*Fesoasoani Lua i le Au Peresitene
Aoa o Alii Talavou*

I le taimi o le tolu tausaga lea na auauna atu ai M. Joseph Brough o se peresitene o le Misiona a Guatemala Guatemala City Central (mai le 2011 i le 2014), na maliliu uma ai lona tamā ma lona tamā faaletulafono [tamā o lona faletua].

E ui na mafai ona toe foi lona faletua i le Iunaita Setete mo maliu, sa filifili le ulugalii i vaega uma e lua e tatau ona ia nofo i Kuatemala ma faaauau le la galuega faafaifeautalai. “Sa ma iloina sa sili atu ona lelei le ma nonofo ma galulue i le mea sili ma te mafaia,” na fai mai ai Uso Brough, lea na valaauina i le aso 4 Aperila, 2015, o se fesoasoani lua i le au peresitene aoao o Alii Talavou. “O le faamoemoega tonu lava lena o lona tama ma lo’u tama ia i ma’ua.”

Na soifua mai Uso Brough i le Aai o Sate Leki, Iuta, i le aso 11 Tesema, 1963, ia Monte J. ma Ada B. Brough. Sa ia faaaluina lona talavou i Farmington, Iuta, ma Robertson, Wyoming. Na siitia atu le aiga i Minesota ina ua valaauina le tamā o Joseph o se peresitene o le misiona, o le na valaauina mulimuli ane o se tasi o Fitugafulu. Sa i ai Joseph i lona tausaga mulimuli i le aoga maualuga i le taimi na maea ai le auaunaga a lona tama o se peresitene o le misiona. Nai lo le toe foi atu i le aoga maualuga, sa sue Joseph i le suega e talitutusa ma le aoga maualuga ma alu sao ai lava i le Iunivesite o le Setete o Weber i Ogden, Iuta.

Peitai, na faamalosia e ona matua lona faauu mai le seminare ma se tusi faamaonia o le fa tausaga. O le taimi lea sa ia auai ai i le seminare i le Aoga Maualuga i Davis sa ia feiloai ai i lona faletua i le lumanai, o Emily Jane Thompson. Sa la faaipoipo i le aso 25 Aperila, 1985, i le Malumalu o Sate Leki; o i laua o ni matua o se fanau e toafa.

A o lei faaipoipo le ulugalii, sa auauna atu Uso Brough o se faifeautalai i le Misiona a Kuatemala Quetzaltenango. Sa avea lona peresitene o le misiona o, Jorge H. Perez, ma se “tagata sili ona taua i lo’u olaga,” o lana tala lea.

Na faavaeina ma o le pule o Rotational Molding o Iuta, sa ia maua se faailoga o le tagata malaga i mea tau tupe ma se faailoga o le matuaofaiva i pulega faapisinisi mai le Iunivesite o Iuta. I le Ekalesia sa ia auauna atu o se epikopo, peresitene o Alii Talavou a le uarota ma se fautua maualuga. ■



Le Alii e, Ua Faafetai, na saunia e Annette Everett

*“Le Alii e, ua faafetai
I lou Agaga sa 'au ai,
I au sauniga nei sa fai
Ia aoga pea, ma tumau ai.
Lo'u agaga e ia faamanu!
I le alofa o Iesu.
Ia aoga pea a'u mo Oe.
I ni o'u aso o totoe.”
(Viiga, nu. 87)*



“Tau ina ia faamanuia i tatou e lo tatou Tama Faalelagi ia tatou maua le agaga o le tapuai i le malumalu, ia tatou usiusitai i Ana poloaiga, ma ia tatou mulimuli ma le faaeteete i laasaga o lo tatou Alii ma le Faola, o Iesu Keriso,” o le saunoaga lea a Peresitene Thomas S. Monson i le Konafesi Aoa Faaletausaga Lona 185 o le Ekalesia. “Ou te molimau atu o la o lo tatou Togiola. O la o le Alo o le Atua. O la lea na afio mai i fafo mai le tuugamau i lena taeao muamua o le Eseta, ma aumaia ai faatasi ma la le meaalofo o le ola e faavavau mo fanau uma a le Atua.”

O LE EKALĒSIA A
IESU KERISO
O LE AU PAIA O ASO
E GATA AI